

Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 28 Dec 2024 from source files dated 31 Aug 2023
aa19f3e3-98fb-51fa-9c53-3906edc75f11

Contents

FRT	1
INT	2
Genesis - Karena	3
Exodus - Oputawanana	26
Leviticus - Levi ai kaua	43
Numbers - Au Mutulua	45
Deuteronomy - Tarawatu Viruaina	52
Joshua	56
Judges - Taurauetara	58
1 Samuel	59
Samuel Viruaina	68
1 Kings - Gulagulau Naona	71
2 Kings - Gulagulau Viruaina	81
Chronicles Viruaina	87
Ezra	88
Nehemiah	89
Job	90
Psalm - Wela ma Pari	94
Proverbs - Nuaulaula Riwai	103
Ecclesiastes - Tauviararamana	107
Isaiah	112
Jeremiah	123
Lamentation	127
Ezekiel	129
Daniel	131
Hosea	132
Amos	133
Jonah	134
Micah	137
Zechariah	138
Mark	139
Apasol	166

**Buka Vivivireina
Parivainuāgana Wadubona Ĝuta Vinevine
ma
Mark ma Acts**

**Translation of The Gospel of Mark and Acts in the Wedau
language,
Milne Bay Provins, Papua New Guinea.**

**Buka Vivivireina
Parivainuāgana Wadubona Ĝuta Vinevine ma Mark ma Acts**

**Translation of The Gospel of Mark and Acts in the Wedau language,
Milne Bay Provins, Papua New Guinea**

© VITAL/SIL PNG 2010

Milne Bay Province
Papua New Guinea.
Printed in Ukarumpa.
2016, 700 Printed
wed
ISBN 9980 0 3979 5

© Wycliffe Bible Translators 2016

Illustrations:

By Horace Knowles and are used by permission of
© The British and Foreign Bible Society, 1954, 1967, 1972
Additions and amendments by Louise Bass
© The British and Foreign Bible Society, 1994
© VITAL/SIL PNG 2010

*Translation of The Gospel of Mark in the Wedau language,
Milne Bay Provinz,
Papua New Guinea.*

Printed in Ukarumpa.

Preface - Pariverena

Nature & Purpose of book
Translation principles
Text followed
Orthography
Name location & number of speakers

Genesis Karena Pariverena

Wei bukana e ririweta ma e viviegeta da menanarena mara ma dobu i tupuanei. Wei bukana maiteni e viviegeta da aiāi rava i kaei ma menanarena mai Israel i tupuanei. Kaua gaegai ruāga e viviegeta wei bukana au orana.

1. Kapita 1-11 e viviegeta da menanarena mara, dobu ma rava i kaei. E viviegeta da Adam ma Eve, Cain ma Abel, Noah ma ututuva ma numa ġegetelarana au Babel.
2. Kapita 12-50 e ririweta menanarena mai Israel i tupuanei. E viviegeta da Abraham natuna Isaac ma gogōna Jacob ma Jacob natunatuna 12 Israel noinoi.

Wei bukana taugirumana ega wavana ita viegeta. Wate tauviaramana ġelau e notanotai da Moses i girumi mai Israel aubaii da taui ita aramanei da God i vinei da Tauna ana rava, ma aiwai i kaei mai Israel aubaii. Au gunai wei bukana Moses i girumi madegħal 1,500 - 1,230 BC. - muriai Iesu i tupua.

Giruma reregħana

Virarautua wadubona

- God, mara ma dobu i kaei (1:1 - 2:3)
- God, oroto ma wavine i kaei (2:4, 7-9, 15-25)
- Apoapoe mena i vikareni (3:1-24, 4:1-12; 25-26)
- Noah ana virarautua (6:5-22; 7:1-5, 17, 23; 8:15-22; 9:1-15)
- Babel ana numa ġeġe dewadewana (11:1-9)

Mai Israel ġogōgai

- Abraham, Isaac ma Jacob
- God Abram i kwatuei (12:1-7)
- Abram ma Lot i vilamonei (13:5-6, 8-1)
- Abram, Lot i vai-melei (14:11-16)
- Melkisedek, Abram i viaiaini (18-20)
- God parivainuāgħana bagibbagħina Abram maiteni i kaei (15:1-6, 12-16)
- Sarai ma Hagar (16:1-3, 15)
- God ana mataira terenana (17:1-21)
- Nelara tonuāga i nei Abraham awarina (18:1-15)
- Sodom ana virarautua (23; 19:1-7, 24-26)
- Isaac i tupua (21:1-5)
- Hagar ma natuna Ishmael i paritawanei (21:8-14)
- God Abraham ana tumaġa i raudadani (22:1-19)
- Esau ma Jacob i tupua (25:19-26)
- Esau, natuevou ana buderi i verenei Jacob awarina (25:27-34)
- God i parivainuāgħana da Isaac ina viaiaini (26:1-6)
- Isaac, Jacob i paritawanei Laban awarina (28:1-4)
- Jacob ana rauboni au Bethel (28:10-22)
- God, Jacob i viaiaini (35:9-15, 16-20, 22b-29)
- Joseph, tuatana maiteni ai virarautua (37:1-8, 12-35)
- Joseph ana nola au Egypt (39:1-23)
- Joseph, rava ai rauboni anoi i vieġei (40:1-23)
- Pharaoh ana rauboni (41:1-16, 25-42, 45-49, 53-57)
- Jacob natunatuna i paritawanei au Egypt (42:1-10, 21-23)
- Joseph i vieġana-melei (45:4-11, 25-28)
- Jacob, natunatuna ma ġogōgħana maiteni i nae au Egypt (46:1-7, 28-30)
- Jacob, Ephraim ma Manasseh i viaiaini (48:1-6, 13-21)
- Jacob, Juda i viaiaini (49:8-10, 33)
- Joseph, tuatuna i vinuqbai (50:15-21)

BADA, mara ma dobu i kaei

¹ Au karena, God, mara ma dobu i vitupui.

² Dibu kwakwawina ma ega aiwai ita mamae. Gimtona, gabinou i purui. Ma God Aruana, gabinou au tepana i genagenara ġaira.

³ Ma God i riwa i pa, "Ina lalai!" Ma i lalai.

⁴ Ma lalalaina i 'nanai da i ai. Ma lalalaina ma gimtona i vilamonei.

⁵ Ma lalaina i ġorei Marai ma gimtona i ġorei Au Pom. Ma au bigai i nae ma ubaubanai i nei, au pom tagogi.

⁶ Ma God i riwa i pa, "Parata mara au tepana ina mae da waira au tepana ma waira au gabaurina ina vilamonei."

⁷ Ma parata mara au tepana i terei da waira au dobu ma waira au mara i vilamonei.

⁸ Ma parata i ġorei Mara. Ma au biga i nae ma ubaubanai i nei, nai au pom viruaina.

⁹ Ma God i riwa, "Waira, mara au gabaurina, gabu au tagogi ona vitagogiemi ma doa alalana ina eġa." Ma nanare i tupua.

¹⁰ Ma doa alalana i ġorei, Dobu ma waira i vivitagogieia i ġorei, Boga. Ma i 'nanai da i ai.

¹¹ Anina ma God i riwa i pa, "Dobu, tam modu ma ai ma vigogoi, modu rarauanoi nununai ma ari rarauanoi nununai, ma peii ina gogo ma ina rauano me aloi nanare, ma nanare i tupua."

¹² Ma dobu, modu ma ai anatapui i vigogoi. Ma i 'nanai da i ai.

¹³ Au bigai i nae ma ubaubanai i nei, au pom vitonuina.

¹⁴ Ma God i riwa i pa, "Aniravilala au mara ina mae da marai ma waguvvara ina vilamonei, ma iri ina vieġeta ma nanare mara ma borima.*

¹⁵ Ma taui, mara ina ravilalai da lalaina dobu ina verei." Ma nanare i mae.

¹⁶ Ma aniravilala ġaeġaei ruaġa i kaei, voġaġaena marai i vibadei ma voaburuna waguvvara i vibadei ma ubona maiteni i kaei.

¹⁷ Aniravilala au mara i terei da dobu ita ravilalai

¹⁸ da marai ma waguvvara ita vibadei ma lalalaina ma waguvvara ita vilamonei. Ma i 'nanai da i ai.

¹⁹ Ma au bigai i nae ma ubaubanai i nei, au pom vi-four-na.

²⁰ Ma God i riwa i pa, "Sia ma lawalawai anatapui waira ona vioai ma kiu ona tupua ma ona lave au aidamo."

²¹ Ma sia ġaeġae ma sia tapuna ma tapuna, boga au orana maemaei ma kiu tapuna ma tapuna maiteni i vitupui. Ma God, i 'nanai da i ai.

²² I viaiaini ma i riwa i pa, "Ona vinatuna ma ona vimaġaimi da boga ona vioai ma kiu ona vinatuna da ona maġa abu dobu."

²³ Ma au bigai i nae ma ubaubanai i nei, au pom vi-five-na.

²⁴ Ma God i riwa i pa, "Doa, ġamōġamo nununai ma vitupui, ġamōġamo maramaraġamai ma ġamōġamo moduei, ma ġamōġamo tetetei ma ina vinatuna da me taui nanare." Ma nanare i tupua.

²⁵ Ġamōġamo nununai anatapui i vitupui ma taui ina vinatuna da me taui nanare. Ma i 'nanai da i ai.

²⁶ Anina ma God i riwa i pa, "Marina, rava tana kaei me tauta ma ai kaua tauta nanare. Ma taui sia ma kiu ma ġamōġamo anatapui au dobu ina vibadei, ġamōġamo maramaraġamai ma ġamōġamo moduei, ġaeġaei ma muomuoi."

²⁷*Ma God, rava i kaei

Anina ma oroto ma wavine i kaei,
me tauna nanare.

²⁸ Rava i viaiaini ma i riwei i pa, "Ona vinatuna ma ona vimaġaimi da dobu ona vioai ma dobu ona vibadei. Taumi, sia, kiu ma aiwai anatapui au doa tetetei ona vibadei.

²⁹ Lam, modu anoi ma ai uana a vereveremi ami lam.

³⁰ Ma ġamōġamo moduei ma kiu ma ġamōġamo nununai anatapui aubai; ai rugurugu a vereverei ai lam." Ma nanare i mae.

³¹ Aiwai anatapui i kaukaueia i 'nanai da i ai kaua ma i vinuiai. Ma au bigai i nae ma ubaubanai i nei, aupom vi-six-na.

2

¹ Ma nanare God mara ma dobu ma anataputapuna au orana i vitupui.

²*God ana nola i vorovei ma mara au vi-seven-na i vilauvitau.

³ Ana nola i vikwai ma lamna aubaina God wei marana vi-seven-na i viaiaini ma i vovivirei.

Oroto ma Wavine

⁴ Wei lamna mara ma dobu ana virarautua. Menanare BADA God mara ma dobu i vitupui.

* ^{1:14}: Eng. **Year**; Madeġa tagogi. * ^{2:27}: Mrk 10:6 * ^{2:2}: Exo 20:11

⁷ Ma BADA * God doa pokauna i vaia ma oroto i voai ma lavutu lawalawaina au giaganana i uveni ma oroto¹ i lawana.

⁸ Ma BADA God peipei Eden i paewi au maramatanei ma kampa orotona i vivitupua i terei da i mae.

⁹ Ma BADA God ai inanana aiaina ma uana amna aiaina anatapui i paewi ma peipei au pouna ai vinevinei ruāga i gogo. Ai tagogi uana lamna lawana tauvereina ma ai gelauna uana lamna nota rava ina verei da metauna aiaina ma metauna apoapoena.

¹⁵ Ma BADA God oroto au peipei Eden i terei da ita nolei ma ita paini.

¹⁶ Ma BADA God riwa bagibaginei i riwei i pa, "Ai uana anatapui au peipei am ġoanei ma ani.

¹⁷ Wate a viviġaem da nota aialii ma nota apoapoei aina uana eġa ma ani! Mepa da u ani, tam nai au marana ma iraġe!"

¹⁸ BADA God i riwa i pa, "Oroto ainelana e mamae ma lamna eġa ita ai. Ana tauagu ana kauet da ina voagui."

¹⁹ Ma BADA God doa pokauna i vaia ma ġamoġamo anatapui ma kiu anatapui i kauet. Ma taui i neiai oroto awarina da ita viwawai. Ma oroto aiwai i viwawai, nanare ai wava i mae.

²⁰ Ma oroto kiu ma ġamoġamo maramaraġamai ma moduei, wava i verei. Wate Adam eġa ana tauagu ita nelāġai da ita voagui.

²¹ Ma BADA God oroto i kauet da i matave ma maranaina i raunuavuru kaua, torotorona tagogi i votawanei ma vioa i pota-melei ana au gabu.

²² Ma BADA God oroto torotoronei wavine i kauet ma wavinena i neiai oroto awarina.

²³ Anina ma oroto i auepai ma i riwa,

"Ee wei tauna! Marina gelama tau gelamieuei
ma vioa tauvioauei,

wei tauna awariu i votawanei,

lamna aubaina, ana ġorei *Wavine*.‡"

²⁴ ♦Ma nanare i tupua ma lamna aubaina oroto, amana ma alona e vovoterei ma awana maiteni e vivitagogie.

²⁵ Oroto awana maiteni, ana kovakovai, wate eġa ita vinimala.

3

Apoapoe mena i vikarenei

Maranai God mara ma dobu i vitupui, aiwai anatapui i ai kaua ma rava aiaii. Wei virarautu-anu lamna menanare apoapoei au dobu i rui.

¹ Anina ma mota lamna terevaideġa kaukauana eġa me ġamoġamo ġelaui i kaukaueia nanare. Ma mota wavine i paridadanei i pa, "Riwa kaua bō eġa da God i riwem da eġa ai uana au peipei ma ani."

² Ma wavine i paribelei i pa, "Tauai ai uana peipei au orana ana ani.

³ Wate God i riwa da peipei au pouna, ai uana eġa ana ani bo ana vodadani. Mepa da ana ani bo ana vodadani lamna ana iraġe."

⁴ Ma mota wavine i paribelei, "Eġateni! Amapo eġa ma iraġe.

⁵ Nai maranai u ani, mattam ina vikalai me God nanare ma aiaina ma apoapoena ona aramanei. Ma God i aramanei, lamna aubaina i viġaem da avena ma ani."

⁶ Ma wavine i 'nana da ai uana aniam aiaina ma inanana i ai kaua, ma i ġoiei da ita ani da nuaulaula ita vajni, lamna aubaina tauna ai uana i vaia da i ani. Ma gelauna awana au ririvana i mamae i verei da i ani.

⁷ Ma matai i kala ma i aramanei da taui ana kovakovai, lamna aubaina ai bawara rugurugui i vaia da i vaturi da tupuai i tere-ġaġari.

⁸ Au biga ubana i opoupu ma taui i nonori BADA God au peipei i bababara nae. Ma oroto awana maiteni ai au orai BADA God i raugovaġei.

⁹ Wate BADA God oroto i kwatuei i pa, "Tam mepa?"

¹⁰ Tauna i paribelei i pa, "A nonorim au peipei ma tau ana kovakovau aubaina a rovo da a raugovaġem."

¹¹ Ma BADA God i riwa i pa, "Aiai i riwem da tam ana kovakovam? Ai uana a viġaem da avena uta ani, ma u ani bo?"

¹² Ma oroto i paribelei i pa, "Wavine u verevereu, tauna ai uana i vereu da a ani."

¹³ BADA God wavine i riwei i pa, "Aiwai u kauet?"

Ma wavine i paribelei i pa, "Mota i moruui da a ani."

* 2:7: Yahweh bo Jehovah Exo 3:13-15. † 2:7: ... doa pokauna i vaia ma oroto Pona Hebrew **oroto** lamna **Adam**, ma **doa** lamna **adamah**. ‡ 2:23: Au Hebrew pona **oroto** lamna **ish** ma **wavine** lamna **ishah**. ♦ 2:24: Mrk 10:7-8

BADA, Rava ai kovoğā i vinolenolei

¹⁴ BADA God mota i riwei i pa, "Wei u kaei aubaina, kovoğā ġaēgaena tam awarim, eġā me ġamoġamo ġelaui nanare, maramaraġamai ma moduei.

Manawamei ma matave-taitaina-nae
ma am lam doa ma ani
am mara au anatapuna.

¹⁵ Ana kaei da tam ma wavine ona viġavia nonoa,
ma am epaia ma wavine ana epaia ona viġavia.
Tauna kolam ina gwadai
ma tam ae karena ma ani."

¹⁶ Ma wavine i riwa i pa:
"Am nuabola ana viratai am au raumanawa,
ma am iniviara ina rata am au vinatuna.

Tam u ġoei da awam uta vibadei,
wate tauna tam ina vibadem."

¹⁷ Adam i riwei i pa,
"Ma tam awam ponana u rautaniġanei
ma ai uana a viviġaei u ani,
Tam am kaelei doa u viapoapoeni.

Tam ma nola guratana ma inim ina viara da lam ma nelagai, am mara au anatapuna.

¹⁸ Ma doa, donadona ma modu viganaganai ina vigogoi aubaim
ma tam ma ipi da ma am.

¹⁹ Tam polapolam ina toi
da lam ma nelagai
ma nanare ma mae da ma nae me au doa.
Doa pokauna a vaia da tam a kauem
ma tam ma nae me doa au pokauna."

²⁰ Oroto i aramanei da awana tauna rava anatapui aloi ma lamna aubaina i ġorei Eve.*

²¹ BADA God ġamogamo opina i vaia da iniġaġara i kaei Adam[†] awana maiteni aubai ma ini i tere-ġagħari.

BADA, Adam ma Eve Edenei i viopuni

²² BADA God i riwa i pa, "Orotona aiaina ma apoapoeni i aramanei, tauna marina tauta nanare. Eġa tana voterei da urana ina vilolo-melei da lawana aina uana ina vaia da ina ani ma ina mae-nonoa."

²³ Ma lamna aubaina peipeiei, oroto i viopuni da doa ita ipiei. BADA, doe i oroto i voai.

²⁴ Anina ma oroto i viägħagna-opunei ma *cherub*[‡] biaġa au peipei Eden au maramatanei i terei ma ana dabaruma araratana i terei da i nenei ma i nenei ma lawana aina etanaina e gagħaloei.

4

Cain ma Abel

¹ Ma Adam awana Eve maiteni i matave ma i duama ma tevera orotona i tupua. Ma i riwa, "BADA ana aguei natu a vaia." Lamna aubaina i ġorei "Cain,"*

² Ma muriae tevera orotona ġelauna i ġuni ma i ġorei "Abel."[†]

Ma maranai taui i vilaraga, Abel tauna tauviġamogħam ma Cain tauipi.

³ Mara tagħġi Cain doa uana ġelaui i nejai da i puloei BADA awarina.

⁴ Wate Abel nanare sипу natuevouii i vunu-naiei ma sia monamonai i apui BADA awarina ana pulo. BADA Abel ma ana pulo i vinuaiae.

⁵ Wate Cain ma ana pulo eġa ita vinuaiae. Ma lamna aubaina, Cain amlona i ġaiġai ma naona i peu.

⁶ Anina ma BADA Cain i riwei i pa, "Aiwai aubaina amlom i ġaiġai? Aiwal aubaina naom i peu?

* ^{3:20:} Eve Wei wavana nonorana me Hebrew ponanei *lawana tauverena*. † ^{3:21:} Au Hebrew ponana oroto lamna *adamah* lamna aubaina oroto i ġorei *Adam*. ‡ ^{3:24:} Arua lawalawajjib gabu vivivireina taupaini. Tagħġi lamna cherub

* ^{4:1:} Cain Wei wavana nonorana me Hebrew ponanei anona *a vaia*. † ^{4:2:} Abel Wei wavana nonorana me Hebrew ponanei anona *lavutuna tupona*.

⁷ Mepa da kaua aiaina uta kaei, lamna ata vinuawai awarim. Wate am nota da apoapoena ma kaei, lamna ma aramanei da apoapoe am au metaeta e daradaraim da ina vovaiubaim. Wate tam ma virewapania da ma vovaiubai.

⁸ Ma muriai Cain ana tevera Abel i riwei, i pa, "Tana nae, tana babara." Ma maranai i ġeta au wapu, Cain i vomairi ma ana tevera Abel i vunui da i virageni.

⁹ Ma BADA Cain i paridadan i pa, "Am tevera Abel mepa?"

Ma Cain i paribelei, i pa, "Eġa ata aramanei! Tau au tevera taupainina bo?"

¹⁰ Ma BADA i riwa, i pa, "Aiwai u kaei? Am tevera tarana doei e kwatukwatu raubiwa aubaina.

¹¹ Lamna aubaina tam marina apoapoe awarim a tereterei. Am tevera tarana uramei au doa i toi da doa i matave ġaġari.

¹² Ma lamna aubaina maranai u ġoei da doa uta ipiei, lamna uana eġa ma nelaġai ma am animae eġa. Tam ma babara labalababa."

¹³ Cain BADA i riwei, i pa, "Au kovoġa i rata kaua ma eġa tagotagogina da ana avarai!"

¹⁴ Tam wei doanei e viviopuni da naom eġa ana inana-melei. Tau ana babara labalababa ma eġa au animae. Ma rava ina nelaġai ma ina viragenui."

¹⁵ Ma BADA i paribelei, i pa, "Eġa! Aiai da i viraġenim, ana kovoġa ina rata guratana." Ma ana mataira Cain awarina i terei da rava ita viġaei da tauna avena ita vunui, maranai i nelaġai.

²⁵ Adam awana maiteni i matave ma Eve natui ġelauna i ġuni. Eve i riwa, i pa, "Cain ana tevera Abel i viraġen. Ma lamna aubaina God natu orotona i vereu da Abel i raviepaiai." Ma i ġorei Seth.[‡]

²⁶ Seth natuna orotona i tupua ma i ġorei Enosh. Ma nai marana, rava, BADA wavana vivivireina viborumana i vikarei.

6

Rava ai ġo'apoapoe

⁵ Ma BADA i 'nanai da rava anatapui au dobu ai ġo'apoapoe i rata kaua ma aiwai i viogatarei ma i vinua-notenotei anatapui apoapoei.

⁶ BADA i 'nanai ma orana i viara kaua ma i vinuabola da aiwai aubaina rava i kaei.

⁷ Ma BADA i riwa, "Tau rava a kaukaueia ana vipupui dobu au anatapuna ma nanare ġamogħamo ġaeġaei ma ġamogħamo au doa tetetei ma kiu au aidamo. Nuanuau i bola-kauei da tauri a kaei."

⁸ Wate BADA Noah i 'nanai ma i vinuajiae.

Noah ana virarauta

⁹⁻¹⁰ Noah ma ana epaepiae ai virarautua wenanare.

Noah natunatuna nelarai tonuġa: Shem, Ham ma Japheth. Noah ana ġo'apoapoe eġa, tauna ainelana rava aiaina eġa me aiai ġelauna nai au marana. Ma God maiteni i bababani nonoa ma ana au viajajna i mamae.

¹¹ Rava ai ġo'apoapoelei dobu i viapoapoeni God au matana ma vigaigaiawa dobu i oai.

¹² Ma God i 'nanai da rava ai ġo'apoapoe i rata kaua ma lawana apoapoena i maemaelei.

¹³ Ma God Noah i riwei, "Rava pupunana a vivinua-notenotei. Aubaina rava ai ġo'apoapoe dobu i oai, lamna aubaina rava ma dobu anatapuna ana vipupui.

¹⁴ Lamna aubaina a ġoie da wei ma kaei. Waga ġaġaġena ai bagibaginei ma voai tam aubain. Ma babalaṛaġi ma koltei au orana ma au doa ma pasi.

¹⁵ Wenanare ma voai. Waga ana manawa 140 mita ma ana dabora 22 mita ma ana ġae 14 mita.*

¹⁶ Ma poewi ma gavogavo aburuna ma voterei poewa ma biribiri au poui, ive ma madegħa aubaina. Ma au ririvana, metaeta ma terei. Ma vatarra, au gabaurina, au pouna ma au tepeana ma voai.

¹⁷ —Ona rautanġāna! Tau marina ututuva ana paritawaneiāi au dobu ma aiwai anatapui lawalawaii ina amo.

¹⁸ Wate marina tau parivainuāġana bagibaginea ana kaei tam maiteni. Tam, awam, ma natunatun awawai maiteni au waga ona rui.

¹⁹⁻²⁰ Ma ġamogħamo anatapui, wavinena ma orotona ma vigerui, kiu, ma ġamogħamo au doa tetetei ruaruagei ava ina rui da ina lawana.

²¹ Ma lam taputapunei ava ma vaia da taumi ma ġamogħamo aubaii."

²² Ma God aiwai anatapuna i ririweja; Noah i kaei.

[‡] **4:25:** Seth Wei wavana nonorana me Hebrew ponanei anona *i vereu*. * **6:15:** Hebrew pona ana manawa 300 cubits ma ana dabora, 50 cubits ma ana ġae 30 cubits.

7*Ututuva i vikarei*

¹ Ma BADA Noah i riwei, "Tam ainelam rava jjimanim au dobu wei au marana. Lamna aubaina tam ma am numa ravai anatapumi au waga ona geru.

² Ma BADA ġamoġamo i vianinei aniam ma pulo aubaina, ororotoi 7 ma waivinei 7 ma vaia. Ma BADA ġamoġamo ega ita vianinei, orotona tagogi ma wavinena tagogi ma vaia.

³ Ma nanare kiu ma vaia, ororotoi 7 ma waivinei 7. Wei ma kaei da ġamoġamo da kiu anatapui lawalawai ina mae ma ina vinatuna.

⁴ Ma au pom 7 au murina ma garewa ana paritawanei da mara 40 ma au pom 40 ina atuna. Ma aiwai au dobu a kaukaueia, e mamae ma e lavulavutu anatapui ina pupu."

⁵ Anina ma BADA anatapuna i ririweia, Noah i kaei.

¹⁷ Ma au pom 40 au orana ututuva i rarata ma waga i tenam epa.

²³ Anina ma BADA anatapuna lawalawai ina dobu i pupuna-pai, rava ma ġamoġamo ma kiu ma ġamoġamo tetetei, anatapui i viamoai. Noah ma taui aiavoi au waga i gerugeru, taui ava i lawana.

8*Ututuva damona*

¹⁵ Ma God Noah i riwei i pa,

¹⁶ "Tam ma awam ma natunatum ana awawai waga ona oputawanei.

¹⁷ Ma ġamoġamo lawalawai anatapui ma taravaina-opunei, kiu anatapui, ġamoġamo au doa tetetei da ina vinatuna ma ina maġa da dobu ina vioai."

¹⁸ Ma Noah awana ma natunatuna ma awawai waga i opu-tawanei.

¹⁹ Ma ġamoġamo anatapui, kiu ma ġamoġamo ġelaui au doa tetetei, ai au dam nununai nanare waga i opu-tawanei.

²⁰ Ma Noah pulo aniapuna i voai BADA awarina ma ġamoġamo aiaii, kiu aiaii tagotagogi ava taputapuna i apui pulo aniapuna au tepana.

²¹ Ma maranai BADA pulo ġabuna i laġoni ma au nuanuana i pa, "A aramanei da rava melameliaeie ai nota i apoapoe. Wate dobu ega ana viapoapoeni ma ega melanai lawalawai anatapui ana pupuna-melei me a kaei nanare.

²² Ma maranai dobu e mamae
paewa ma tuaruta,
ubauba ma vibola,
bodu ma omra,
garewa ma madęga,
maratom ma au pom,
ina mae-nonoa ma ega ina kwa."

9*BADA ana Parivainuaġana bagibagina Noah maiteni i kaei*

¹ *Ma God Noah natunatuna maiteni i viaiaini ma i riwei i pa, "Ona vinatuna ma ona vimaġaimi da dobu ona vioai.

² Ana kaei da ġamoġamo ġaegħei ma ġamoġamo tetetei, iana ma kiu, anatapui ina rovoemi. Ma au urami ana terei da ona vibadei.

³ Aiwai anatapui lawalawai ami aniam. Modu anoi ma ai uana a veremi, wate marina aiwai anatapuna a vereveremi ami aniam.

⁴*—Wate vioa taratarana ega ona ani, aubaina tara au orana lawana e mamae, ona voterei da tarana ina toi tawananma ma muriae ona ani.

⁵ Ma mepa da ġamoġamo rava i viraġeni. Tau ana raubiwa, wate nanare rava, rava turana i viraġeni. Tau ana raubiwa.

⁶*Tau rava a kaei me tau inanau nanare,
ma lamna aubaina Rava aiai i viraġena,
rava ġelauna tauna ina viraġeni.

⁷*Ma tam natunatum ina maġa da am epaepaia dobu ina maena-pai."

⁸ Ma God Noah natunatuna maiteni i riwei i pa,

⁹ "Ona rautaniġana wei marina, Tau au parivainuaġana bagibagina taumi ami epaepaia maiteni a kaukauei.

¹⁰ Ma ġamoġamo lawalawaii anatapuna, kiu ma ġamoġamo numei ma moduei ma anatapui wagei i opopu, ma ġamoġamo anatapui muriae au dobu ina mae.

¹¹ Wei riwanei au parivainuaġana bagibagina taumi maiteni a terei da ega melanai ututuva ġelauna ana paritawanana-melei au dobu da purapura lawalawaii ina vipupui."

¹² Ma God i riwa, "Parivainuaġana bagibagina a kaukuae taumi ma anatapui lawalawai maiteni anatapui muriae nenei. Wei parivainuaġana matairana wenanare:

¹³ Warilolo au apau ana terei da ina vimataira da tau au parivainuaġana bagibagina a terei tau ma taumi ma anatapui lawalawai au dobu maemaei.

¹⁴ Maranai mara e ġuvaġuvai ma warilolo au apau e egaega,

¹⁵ lamna ina vieġeu da au parivainuaġana bagibagina tau ma taumi ma anatapui lawalawai au dobu. Ma ega melanai ututuva lawana ina vipupui."

11

Babel ana numa ġeġe dewadewana

¹ Au naona rava anatapui au dobu pona tagogi ma riwa tagogina i bababaniei.

² Nai maranai rava i vaġavāgħi nae au maramatanei ma wapu au ġaġġaena i ġeta au Shinar

* ma kampa i mae.

³ Ma i babani vivira i pa, "Ona nei, doa tana vaia ma brik tana pasi ma tana apui da ina bagibagi." Ma nanare ai numa brikie i voai ma koltei i ampasi.

⁴ Ma taui i riwa, "Ona nei melagai ġaġġaena tana voai tauta aubaita ma numa ġeġe dewadewana tana voai da ina ġae au Mara da wavata tana kauei ma ega tana vilamoneeta dobu au anatapuna."

⁵ Anina ma BADA i ġairai da ravai melagai ġaġġaena ma numa ġeġe dewadewana i voavoia ita inanai.

⁶ Ma BADA i riwa i pa, "Wei taui rava tagogi ma pona tagogina e bababaniei. Wei lamna karena, aburuna ava aiwai ai au nota anatapuna ina kauana-paei."

⁷ Ona nei tana ġaira da noi ravai ai pona tana vinua-raġaraġai ma ina babani labalababa."

⁸⁻⁹ Anina ma BADA rava anatapui ai pona i vinua-raġaraġai ma i vilamonei dobu au anatapuna, lamna Aubaina nai melagaina i ġorei Babel.[†] Ma melagai ġaġġaena voana i voterei. BADA taui i vilamonei dobu au anatapuna.

12

BADA, Abram i kwatuei

¹ *BADA Abram i riwei i pa, "Am dobu, am rava ma amam ana dam ravai ma netawanei ma ma nee dobu ana viatataiem kampa ma mae.

² Ma am epaepaia ai dam ana viratai,

ma ana viaiainim,

ma ana kauei da wavam ina rata,

ma tamei viaiaina ina nei rava awarri.

³ Ma aiai i viaiainim, tau ana viaiaini,

ma aiai i parivai-apoapoenim, tauna ana parivai-apoapoeni,

ma tamei dam anatapui au dobu ana viaiaini."

⁴⁻⁵ Ma BADA i riwiea naonar, Abram awana Sarai ma maiana Lot* Haran i opu-tawanei, Abram ana madeġa 75. Ai purapura, ai ġamoġamo ma ai laralaraga ma i vomairi Canaan aubaina.

⁶ I ġeta Canaan ana au parata ma i verautua da au gabu vinevinena, Shekem melagaina ġaġġaena au ririvana. Ma kampa au Moreh[†] ai ġaġġaena au ġouna i raġgaravu. (Nai maranaina mai Canaan, nai au dobuna i mamae.)

⁷ *Kampa BADA i viatataeana-melei ma i riwa i pa, "Wei dobuna Canaan am epaepaia ana verei." Ma Abram pulo aniapuna, i voai BADA awarina ma pulo i apui. Mepa BADA i viatataeana-melei lamna au gabuna aniamapu i voai.

13

Abram ma Lot i vilamonei

* **11:2:** Babilon au paratana. † **11:8-9:** Babel Nonorana me Hebrew ponanei *nuaraġaraġa*.

* **12:1:** Act 7:2-3

* **12:4-5:** Abram ana tevera Haran natuna Lot.

† **12:6:** Mai Canaan weka ai god morumoruna i vimae-ġaġġaeni.

* **12:7:** Act 7:5

⁵ Maranai Lot, Abram maiteni i vaḡavaḡai, Lot maiteni ana ġamoġamo maġamaġau ma ana numa ravai ma ana tauvilaraga.

⁶ Ma taui ai ġamoġamo i maġa guratana ma gabu eġa tagotagogina da anatapui ita ġamoi,
^{7a} Ma lamna aubaina eġa tagotagogina da taui ita mae-gogona.

⁸ Anina ma Abram Lot i riwei i pa, “Ma rautaniġana, tauta tara tagogi ma eġa tana vipariparinīġai ma ata taunola avena ita viġaiġaiawa vivira.

⁹ Weka tana vilamoneta ma ata næi tana nae. Doa au naota e inainanai. Metauna e ġoegħei ma nae ma kampa ma mae. Mepa da tam ma næe au oienā, tau ana nae au kelakela. Mepa da tam ma næe au kelakela, tau ana nae au oienā.”

¹⁰ Anina ma Lot matana i tawanei da waira Jordan wapuna ma Zoar melagaina au paratana. Ma i 'nanai da waira i maġa ma doa maumaurana me BADA ana peipei,* me doa maumaurana au Egypt. (Nai marana BADA eġa Sodom ma Gomorah ita vipupui.)

¹¹ Ma Lot waira Jordan wapuna i vinei tauna aubaina ma i nae au maramatanei. Taui nanare i vilamonei.

¹² Abram au Canaan i mae ma Lot Sodom au ririvana i mae.

¹³ Ma mai Sodom aï lawana i apoapoe kaua ma ġo'apoapoe i kaukuei BADA au matana.

¹⁴ Ma Lot Abram i netawanei ma muriae BADA Abram i riwei i pa, “Mepa u mamae lana, matam ma tawanei au lavaratei ma au rauanaġei ma madęga e gogogolana ma mepa madęga e neneulai.

¹⁵ *Dobu anatapuna e inainanai tam ma am epaepaia ana vere-nonoemi.

¹⁶ Ma am epaepaia ana kauie me doa pokauna ma aiai da pokau e īaċċi lamna am epaepaia tagotagogina ina iavi.

¹⁷ Dobuna anatapuna taumi a vereveremi, ma nae ma dobuna ana manawa ma ana dabora ma babarani.”

¹⁸ Ma nanare Abram ana numagara i naiei Mamre ana ai ġaegħena au ġereġerena au Hebron i mae ma kampa pulo aniapuna i voai ma pulo i apui BADA awarina.

14

Abram, Lot i vai-melei

¹¹⁻¹² Gulagulau 4 Sodom ma Gomorah ai purapura ma ai lam i kwalei. Abram maiana Lot au Sodom i mamae i viai ma ana purapura maiteni i viai ma i nae.

¹³ Abram tauna Hebrewei ma Mamre ana ai ġaegħena au ġereġerena i mamae. Ai tan-wagħana wawana Mamre tauna Amorjei, varevareina Eskol ma Aner. Anatapui Abram ana tauagu, għavia au marana. Ma oroto tagogi għavia i rovoe da i rovo-nae ma i ġeta Abram awarina ma i vibenabenamei.

¹⁴ Ma maranai Abram i nonori da taui maiana Lot i viai. Tauna ana sorodia vinevinei ana au melagai tuputupu 318 i kwatuei. Ma ġavivajai i votaġġoi da i ġae au Dan.*

¹⁵ Waguvarai ana sorodia i ġutai ma ġavivajai i viaġaġei da Damaskas i verautuini da au Hobah i ġeta ma kampa i vovaibai.

¹⁶ Purapura anatapui i vai-melei. Maiana Lot ma ana purapura ma waivine ma rava ġelau.

Melkisedek, Abram i viaiaini

¹⁸ Melkisedek tauna Salem† ai gulau ma God AIDAMO TELARANA ana pirisi pulo tauapuina. Palawa ma wine i neiai,

¹⁹ ma Abram i viaiaini ma i pa,

“God AIDAMO TELARANA mara ma dobu taukaueina,
ina viaiainim.

²⁰ Ma God AIDAMO TELARANA am ġavva au uram i terei,
lamna aubaina tana voepaepai.”

Ma Abram aiwai ana sorodia maiteni i tami i vitagogiei da ġuta 10 i kauie. Ma ġuta tagogi i votawanei ma Melkisedek i verei.

15

BADA, Parivainuqgħana bagibbagħna Abram maiteni i kauie

* **13:10:** Eden peipeina, Gen 2:8. † **13:15:** Act 7:5 * **14:14:** Lamna melagai ġaegħena au lavaratei Canaan ana parata au ġereġerena. † **14:18:** Jerusalem.

¹ Ma muriai BADA Abram ana au rauboni i riwei i pa, “Abram ega ma rovo. Tau am taugagalo am pulo gaeagaena.”

²⁻³ Ma Abram i paribelei i pa, “Oo BADA God. Tau ega natunatu, ma am pulo ega ina voagui. Tam ega natu orotona uta vereu ma lamna aubaina au irage au murina, Eleasar au taunola Damaskasei au vigulau ina vaia.”

⁴ Anina ma BADA i riwana-melei i pa, “Ega! Tauna am vigulau ega ina vaia, wate natum orotona tamei ina tupua, tauna am vigulau ina vaia.”

⁵ Anina ma BADA tauna i taravaina-opunei au doa ma i riwei i pa, “Ma goutata au mara ma ubona ma inanai, mepa da tam tagotagogogina da uta iavi. Lamna am epaepaia ina maga me ubona nanare. Ega aiai tagotagogogina da ina iavi.”

⁶ Abram, BADA riwana i vitumaiganai ma lamna aubaina BADA i riwa da Abram rava jijimanina.

¹² Ma maranai madega i neneulai ma Abram i matave-nuavuru kaua. Ma gimtona ma rovo gaeganai i nei ma i purui.

¹³ ^o Ma BADA i riwei i pa, “Wei ma aramanakauei! Am epaepaia ina vitaomana au dobu gela ma kampa ina vitaunola. Ma dobuna ravai* taui ina rau-iviapoapoele da madega 400 ina kwa.

¹⁴ ^o Wate muriai tau nai dobuna ravai ana kovoigi ma am epaepaia ina vipurapura kaua ma ina nememei.

¹⁵⁻¹⁶ Ma mai Amori[†] ai go'apoapoe ina rata guratana, ma nai maranaina ana kovoigi ma ana viagaiana-opunei wei au dobuna. Ma lamna aubaina am epaepaia ega ina nei lagilaginai da kimta au vi-four-na. Wate tam, Abram ma magura kaua ma ana nuaubam ma irage ma ina doboim.”

16

Sarai ma Hagar

¹⁻³ Abram au Canaan i mae madega 10 i kwa, awana Sarai aipoi ma ega ita vinatuna. Sarai ana taunola wavinena Egyptei wavana Hagar. Ma Sarai Abram i riwei i pa, “BADA i viigaeu da ega ata vinatuna. Ma nae au taunola maiteni ma matave, mepa da ina vinatuna, ma tevera ana vinatunei.” Abram, Sarai ponana i voteletelei ma Hagar i vaia ma i viawanei.

¹⁵ Ma Hagar i vinatuna da Abram natuna orotona i tupua. Ma Abram, natuna i viwavai Ishmael.

17

BADA ana mataira terenana

¹ Maranai Abram ana madega 99 ma BADA i viegana-melei Abram awarina ma i riwei i pa, “Tau God VIVIREWAPANA KAUCAUANA.”* Au naou ma babara ma kaua aiaina ava ma kuae

² da nanare au Parivainuaiana bagibagina ana vovai-virewapani tau ma tam awarita ma am dam ana viaga-guratei.”

³ Ma Abram i mae-gaarda au doa ma i raudune. Ma God Abram i riwei i pa,

⁴ “Tau au navanava au parivainuaiana bagibagina tam maiteni wenanare: Ana kuae, da dam patarana magamagai tam ina viamanem.

⁵ Ma marina wavam Abram, [†] ana terevirai da Abraham; [‡] aubaina marina ana kuae da dam patarana magamagai ina viamanem.

⁶ Ma ana kuae da am epaepaia ina maga ma am damei gulau magamagai ina nei.

⁷ Au parivainuaiana bagibagina ana vovai-virewapani, tau ma tam ma am epaepaia muriai e nenei da tau am God ma taui ai God.

⁸ ^o Canaan dobuna taputapuna marina e mamae-gubai, tam am epaepaia maiteni ana vereonoemi aubaimi ma tau, taui ai God.”

⁹ Ma God Abraham i riwei i pa, “Ma au parivainuaiana bagibagina, tam ma am epaepaia maiteni ona voteletelei.

¹⁰ ^o Wei taumi ami au navanava parivainuaiana bagibagina ona voteletelei, ami nelara anatapui inii ina bori.

* **15:13:** Exo 1:1-14; Act 7:6 * **15:13:** Mai Egypt. * **15:14:** Exo 12:40, 41; Act 7:7 † **15:15-16:** Nai maranai, mai Amori ma mai Canaan au dobuna Canaan i mamae. * **17:1:** God vivirewapani kaucauana. Hebrew El-Shaddai.

[†] **17:5:** Abram. Wei wavana nonorana Hebrew ponaiei anona viawavalatonana. [‡] **17:5:** Abraham. Wei nonorana me Hebrewei anona *dam magamagai amai*. * **17:8:** Act 7:5 * **17:10:** Act 7:8

¹¹ Ma taumi inimi ona bori, lamna ata parivainuağana matairana.

¹² Roaroa melamelai nelarai i tupua ma au pom 8 au murina inii ona bori. Wei kauana ona kaei, natunatumi nelarai ma ami taunola natunatui nelarai ma nelara anatapui am au numa e vivitaunola.

¹³ Riwa kauua, maranai roaroa nelarai i tupua am au dam bo maranai taunola o gimarai, tauri ai mataira lamna inii ona bori. Lamna au parivainuağana matairana au tupuami ina mae-nonoa.

¹⁴ Wate aiai orotona nai matairana eğä au tupuana, lamna au parivainuağana bagibagina i viaigai ma lamna aubaina tauna ina viravağela.”

BADA, Sarai i parivainuağani

¹⁵ God Abraham i riwei i pa, “Awam eğä ma ġorei Sarai, wate ma ġorei Sarah. §

¹⁶ Tau ana viaiaini ma natum orotona ina vitupui. Anina ma ana viaiaini da ina vidam ġaegäe aloi. Ma dam ai gulau mağamağau taunei ina opu.”

¹⁷ Abraham i mae-peu ma i raudune ma i mutu-kaka ma au nuuanuana i pa, “Amapo oroto ana madeğä 100 ma ina vinatuna bo? Ma Sarah ana madeğä 90 ma ina vinatuna bo?”

¹⁸ Ma Abraham God i riwei i pa, “Ma Ishmael menanare, uta viaiaini bo eğä?”

¹⁹ Wate God i riwa i pa, “Eğä! Awam Sarah natum orotona ina vitupui ma ma viwawai Isaac.* Au parivainuağana bagibagina tauna awarina ma ana epaepaia awarii ina mae-nonoa.

²⁰ Ma Ishmael aubaina, am nuabola a nonori. Ana viaiaini ma natunatuna ana vimägai ma ana epaepaia ana vituai. Tauna dam 12 ai babada amai ma ana epaepaia ai dam ana vimägai.

²¹ Wate au parivainuağana bagibagina ana kaei Isaac maiteni. Ma wei marana nanare, madeğä ġelauna Sarah, Isaac ina vinatunei.”

18

Nelara tonuğä i nei Abraham awarina.

¹ Au benai Abraham ana numagara au metaetana i kiakiala.

² I taepai ma nelara tonuğä i 'nanai i maimairi. Maranai i 'nananai i ruba da au naoi i mae-gaira ma i raudune.

³ Ma i riwa i pa, “Au bada. Mepa da u notai da tau anina, eğä ma tutelareu.

⁴ Waira ana neiae da aemi ana oğai ma ona vilauvitau ai au ġouna.

⁵ Lam ana veremi da ina vovai-virewapanimi ma muriai ona vägai. Taumi o notaiu da o nei.”

Tau i paribelei, “Anina U ririweia ma kaeuei.”

⁶ Anina ma Abraham lağilağina i nae au numagara ma Sarah i riwei i pa, “Lağilağina, am palawa aiaina baikena ma vaia ma palawa ma apui.”

⁷ Ma i ruba ma bulumakau orotona ġaubona i vaia da ana taunola i verei ma i vokaukauei.

⁸ Anina ma Palawa ma mereki ma mereki ravi taputapui ma sia i neiae taui awarii au ġou da i am ma tauna i mae-paini.

⁹ Taui i paridadanäe i pa, “Awam Sarah mepa?”

Tauna i paribelei i pa, “Tauna numagara au orana.”

¹⁰ Taui tagogi Abraham i riwei i pa, “Riwa kauua da wei au marana nanare madeğä au ġelauna ana nemememei, lamna awam Sarah tevera orotona ina ġuni.”

Ma Sarah, ravai au muri numagara au metaetana, i rarautaniğana.

¹¹ Sarah ma Abraham i magura kauua ma Sarah ana vinatuna ana mara i kwa.

¹² Sarah i mutu-kaka ma i riwana-melei, “Tau ma awau a magura kauua ma au vinatuna ana mara i kwa. Ma amapo tagotagogina da duama ana morelamei bo?”

¹³ BADA Abraham i paridadanäe i pa, “Aiwi aubaina Sarah i kaka ma i riwa, ‘Tau a magura kauua ma riwa kauua da ana vinatuna bo?’

¹⁴ Aiwi i pipiripi guratana BADA au matana? Me a ririwem nanare, ana nemememei awarim wei marana nanare madeğä au ġelauna ma awam Sarah tevera orotona ina ġuni.”

¹⁵ Sarah i rovo ma i bovi ma i riwa i pa, “Tau eğä ata kaka.”

Tauna i paribelana i pa, “Eğä! Tam u kaka.”

Sodom ana virarautua

¹⁶ Maranai nelara tonuğä i vomairi da ita nae, Abraham taui maiteni i nae da au etanai ita tuterei. Ma taui i 'nana ġaira au Sodom,

§ **17:15:** Sarai - Sarah: Wei wavai ruağä anoi wavalatona natuna wavinena. God Sarai wavana vouna i verei da ita viatataie da tauna dam ġaegäena aloi. * **17:19:** Isaac. Wei wavana Hebrewei anona i kaka.

17-19 ma BADA ana au nota i pa, "Aiwai marina ana kaei, ega ana tere-govaagi Abraham awarina. Abraham ana epaeaia ina vidam gaeagaena ma vivirewapanana ma taunei dam anatapui au dobu ana viaiaini. Tauna a vinei da natunatuna ina riwei ma taui natunatui ina riwei da BADA ana lawana ina votagotagoi da aiaina ma jijimanina, ina kaukuae da tau Abraham a paripari-vainuagania ana kaei."

20 Ma BADA Abraham i riwei, "Tau, vikaruwaagawaaga ma gamaagaui a nonori da Sodom ma Gomorah melagaii ravai ai go'apoapoe i rata guratana.

21 A gaiigaira da ana inanai da wei vikaruwaagawaaga riwa kaua bo ega."

22 BADA Abraham maiteni i maimairi ma nelara ruaga i nae au Sodom.

23 Abraham i nei BADA awarina ma i riwa i pa, "Riwa kaua da rava aiaii ma vipupui rava apoapoei maiteni?

24 Mepa da rava aiaii 50 au melagai, amapo melagaina ma vipupui bo? Ma rava 50 notaiei ma melagaina ega ma vipupui?

25 Lamna ega ita ai, ma ega ma kaei. Tam ega rava aiaii ma virageni rava apoapoei maiteni. Nai kauaei e kauaei rava aiaii awarii, kauana tagogina rava apoapoei awarii e kaukuae, egateni! Tam rava anatapui au dobu tauetareina ma ma etarana-kuelai tapa?"

26 BADA i riwa i pa, "Mepa da rava 50 aiaii ana nelagai au Sodom, dobuna ana voterei taui ai go'aiaii aubaina."

27 Abraham i paribelei i pa, "Au BADA tau am molaka, wate tau wei babanina a vikarei aubaina amapo ana paridadana me.

28 Mepa da rava 50 aiaii ma 5 ina dega, amapo melagaina ma vipupui bo?"

I riwa i pa, "Mepa da rava 45 kampa ana nelagai lamna ega ana vipupui."

29 Abraham i paridadana me i pa, "Mepa da rava aiaii 40 ava kampa u nelagai?"

I riwa i pa, "Mepa da kampa 40, amapo ega ana kaei."

30 Abraham i riwa i pa, "Au BADA, ega awariu ma gaiawa ma vianineu da ana babani me, mepa da 30 ava kampa ma nelagai?"

I riwa i pa, "Mepa da 30 ava ana nelagai, amapo ega ana kaei."

31 Abraham i riwa i pa, "Tau wei babanina a vikarei, mepa da 20 ava kampa ma nelagai?"

I riwa i pa, "Mepa da 20 ana nelagai lamna, ega ana vipupui."

32 Abraham i riwa i pa, "Au BADA, ega awariu ma gaiawa ma vianineu da mara tagogi ava ana babani me. Mepa da 10 kampa ma nelagai?"

I riwa i pa, "Mepa da 10 ana nelagai, amapo ega ana vipupui."

33 Maranai BADA Abraham awarina i babani vorove, tauna i nae ma Abraham i nae ana au melagai.

19

1 Ma raviraviai anela ruaga au Sodom i geta, Lot melagai au metaetana i kiakiala.* Maranai Lot taui i 'nanai, i vomairi da i nae awarii ma i raudune.

2 Ma i riwa i pa, "Au babada, tau ami taunola a nei, ona nei au au numa. Aemi ona oga ma ona matave. Maratotomai ona vomairi da ami au aninae ona nae."

Ma taui i paribelei i pa, "Ega! Tauai weka au deba ana matave."

3 Ma i riwana bagibagi da maiteni i nae ana au numa. Lot, palawa ega yist[†] maiteni i apui ma taui i am.

4 Ma ita matave ma mai Sodom nelarai laralaragai ma magumaguri anatapui i nei da numa i kwaipipini,

5 ma taui Lot i kwatuei i pa, "Nelara ruaga waguvarai i nenei awarim, taui mepa? Ma opuneiai awariai da ana viawawanai."

6 Ma Lot i opu taui awarii ma au murina metaeta i gudui.

7 Ma i riwei i pa, "Au rava a vivibaigaimi, ega wei kauai apoapoei ona kaei.

8 Ona rautaniganue, tau natunatu waivinei ruaga, taui matatapu. Ana opuneiai awarimi da ami goana nanare ona kaei. Wei nelarai a neiai au numa lamna tau au taomana ma ega aiwai awarii ona kaei."

9 Ma Sodom nelarai i paribelei i pa, "Ma maeria! Tam dobu gela ravam weka e mamae-gubai ma marina u goei da ma vibadabada. Marina ana viapoapona-kauem ega me taui ruaga!" Ma taui Lot au metaeta i dudu ratui da gudu ita rikai.

10 Wate nelara ruaga numa au orana urai i tere-opunei ma Lot i taina-ruiei awarii ma metaeta i gudui.

11 Ma nelara anatapui au metaeta matai i viaipotai mara tupona ava da ega tagotagogina metaeta ita inanai.

* 19:1: Melagai, gaiemei i gari-kwaviviroi; ma metaeta tagogi bo ruaga i terererei. Weka i kiakiala gimara bo vivoruboru ma i viviogataro. † 19:3: Eng. Yeast.

¹²⁻¹³ Anina ma nelara ruağā Lot i riwei i pa, “Tauai marina wei dobuna ana pupuni. BADA, vikaruwağawaga mağamağau i nonori wei melagaina ravaai awarii ma Tauna, tauai i paritawanelai da dobuna ana pupuni. Am dam ravai ġelaui weka e mamae bo ega? Natunatum nelarai ma waivinei ma poipoiam ma am rava aiavoi au melagai maemaei; ma taravaina-opunei!”

¹⁴ Ma Lot i opu natunatum ai ġopapara awarii ma i riwei i pa, “BADA marina dobuna ina pupuni. Laġilägħina, wei dobuna ona oputawanei.” Ma tauri i notai da tauna i vivinama.

¹⁵ Ma mara karea i tereterei ma anela Lot i vivibaġai da ita volaġilägħina. Ma i riwa i pa, “Ega ita ai da ma iraġe maranai BADA wei dobuna ina pupuni. Laġilägħina awam ma natunatum maiteni ona opu.”

¹⁶ Wate Lot i tatavira. BADA i ġoie da Lot ita vilawani. Ma anela Lot awana maiteni ma natunatu urai i vojjini ma melagai i taravaina-opunei.

¹⁷ Maranai melagai i opu-tawanei ma anela tagogti taui i riwei i pa, “Ona ruba ami lawana aubaina! Ega au murimi ona inana ma ega au wapu ona tumairi dadana. Ola aubaina ona ruba da ami lawana ega ona vine-boai.”

²³ Ma madeġa i gogogo ma Lot ana numa ravai maiteni au melagai Zoar i ġeta.[‡]

²⁴ Lamna maranai BADA salpa araratana marei i paritawanana ġairei me garewa, Sodom ma Gomorah melagaii au tepai. §

²⁵ Ma melagaii, wapu, rava anatapui ma aiwai gogogoi i aragibui.

²⁶ Ma Lot awana i vivinuri, i mae-tavirei ma i ravi-taputapui.

²⁷ Ma ubaubanai boibogħi Abraham, i vomairi ma i nae mepa BADA maiteni i bababni lana.

²⁸ Ma i 'nana ġaira Sodom ma Gomorah ma wapuna ana taputapuna ma kampa bau potopotona i 'nħanai i ġegħae.

²⁹ Maranai God nai melagaii ma wapuna i pupuni, tauna Abraham ega ita notavai-nuavurui. Ma lamna aubaina God Lot i paritawana-opunei ma muriaeħi nai melagaina i vipupi.

21

Isaac i tupua

¹ Ma BADA Sarah i viałaini ma i paripari-vainu ġāni nanare i kauel.

² Ma God mara i vinevineia nanare, Sarah i duama ma i vinatuna. Natuna orotona i tupua, Abraham i magura ma natuna i tupua.

³ Abraham natuna i viwawai Isaac.

⁴* Ma au pom 8 au murina Abraham natuna inina i bori me God i ririweia nanare.

⁵ Abraham ana madę́ga 100 maranai wei kauai i tupua.

Abraham, Hagar ma natuna Ishmael i paritawanei

⁸ Isaac i rata ma i viedai ma Abraham lam ġaegħena i vokaukauei ma i am gogona.

⁹ Ma Sarah Ishmael i 'nħanai Isaac i vivinamei. Ishmael lamna Abraham natuna ġelauna, ana taunola Hagar Egyptei i ġuġiġunia.

¹⁰ Ma Sarah Abraham i riwei, “Taunola wavinena ma natuna ma viopuni! Ega ata ġoie da tauna am buderi ina vaia. Natu Isaac ainelana am buderi ina vaia.”

¹¹ Abraham wei riwana i nonori ma i vinuabolha kaua aubaina tauna natuna Ishmael.

¹² Wate God Abraham i riwei i pa, “Ega natum ma alona ma vinuabolei. Am epaia Isaac wawam ina mairiei. Aiwai Sarah i ririwem ma kauel.

¹³ Wate am taunola wavinena natuna ana epaepaia ana vimaġai ma ana dam ina rata aubaina tauna tam natum.”

¹⁴ Ubaubanai boibogħi Abraham tamaina i vokaukauei ma waira i ġui ma Hagar i viavarai. Ma wawine natuna maiteni i paritawanei da i nelabalabba au mutulua.

22

BADA, Abraham ana tumaġħana i raudadani

¹ Madeġa mağamağā i kwa ma muriaeħi God Abraham ana tumaġħana i raudadani. God i riwa i pa, “Abraham!”

Abraham i paribelei i pa, “Tau weka!”

‡ 19:23: Hebrewei wawa Zoar anona Aburu. § 19:24: Salpa lamna ġaima logalogħana. Maranaina e ararata, lamna i vibola kaua ma puġuna i apoapoei. * 21:4: Gen 17:12; Act 7:8

² Ma God i riwa i pa, "Natum tagotago Isaac nuanuam pouna, ma taravaini ma ona nae au dobu Moriah. Ma ola ana viatataem, kampa natum ma puloei aniamapu."

³ Mara i tom ma ubaubanai boibogi, Abraham i vomairi, ai i edari pulo apunana aubaina ma ana donki i vokaukauei. Ma ana taunola ruağā ma natuna Isaac i taravaini ma anatapui i nae gabu God i ririweiana kampa.

⁴ Taui au pom tonuğa i babara ma Abraham i taepai ma gabu ueia i 'nanai.

⁵ Ana taunola i riwei i pa, "Weka ona mae. Donki ona paini. Tau natu maiteni ana nae nore ma God ana viborumei. Ma airuağā ana nememei awarimi."

⁶ Ma Abraham ai i tavana Isaac i viavarai. Tauna naipi ma ai mutuara i voai ma i negogona.

⁷ Taui i nenaе ma Isaac i riwa i pa, "Amau!"

Abraham i riwa, "Ee, ma babani natu!"

Isaac i riwa, "Ai ma ai mutuara awarita wate pulo aubaina sипу natuna mepa?"

⁸ Abraham i paribelei i pa, "Natu, God sипу ina vereta pulo aubaina." Ma airuağā i babara nae.

⁹ Maranai gabu God i ririweiana i ġeta, kampa aniamapu ġaime i voai ma ai i vatari. Ma natuna Isaac urana ma aena i ragini ma aniamapu au tepana, ai i vatavataria kampa i vimataveni.

¹⁰ Abraham urana i viloloi da naipi i vaia da natuna ita viraġeni.

¹¹ Wate lamna maranaina BADA ana anela marei i riwa, "Abraham, Abraham!"

Abraham i paribelei, "Tau weka!"

¹² Ma BADA ana anela i riwa, "Eġa natum ma viraġeni! Eġa aiwai apoapoena awarina ma kaei!. Tam natum tagotago eġa uta nuanei ma marina a aramanei da tam anina God e vivivrei."

¹³ Abraham i taepai ma sипу orotona i 'nanai, donana ai raġaraġai potopotona au orana i tapaiei. Ma i nae ma sипу i viraġeni ma sia taputapuna i apui ana pulo God awarina, natuna epaiana.

¹⁴ Ma lamna aubaina wei dobuna i ġorei, "BADA ina verena." Lamna marana da marina rava e ririwa, "BADA ana au ola ina verena."

¹⁵ Ma BADA ana anela marei Abraham i ġorei

¹⁶ "BADA i riwa, 'Tam u voteleteleu ma natum tagotago eġa uta nuanei. Tau wavauei a paripari-vainuağanim da

¹⁷ anina ana viaiainim ma am epaepaia ana vimaġi me ubona au mara ma bubu au gera. Taui ai ġavia ina vovaiubai ma ai melagai ina vaia.

¹⁸ °Ma am epaepaia wawaiei dam anatapui au dobu ana viaiaini. Tam u voteleteleu aubaina wei ana kaei."

¹⁹ Ma Abraham natuna maiteni i nae me ana taunola awari ma anatapui i nae me au Beersheba. Ma kampa i mae.

25

Esau ma Jacob i tupua

¹⁹ Wei lamna Abraham natuna Isaac ana virarautua. Isaac amana Abraham

²⁰ Isaac ana madeġa 40 ma Rebekah i ravaġi. Rebekah tauna Leban novuna aburuna; amai Bethuel. Taui mai Aram au Padan-Aram i mamae.

²¹ Rebekah aipoi ma Isaac i raupari BADA awarina da awana ita voagui. BADA ana pari i nonori ma Rebekah i duama.

²² Raġaraġa i vivitua au manawa aubaina Rebekah i nae ma BADA i vibagai, "Aiwai aubaina wei e tutupupua awariu?"

²³ BADA i riwa i pa:

"Roaroa ruağā au manawam ina vidam ruağā,
ma vinatuna da dam ruağā ma taui ina viġavia vivira.

Tagoggi ina virewapani telara
ma magurina aburuna awarina ina vitaunola."

²⁴ Ana vinatuna ana mara i ġeta ma riwa kaua da raġaraġa nelarai i ġuni.

²⁵ Natuevou opina lebalebarina ma inina ororona ma lamna aubaina i viwavai Esau.*

²⁶ Natuna ġelauna i tutupupua turana au ae karena i vojjina ma i opu ma i viwavai Jacob.†

Isaac ana madeġa 60 ma awana raġaraġa i vinatunei.

Esau, natuevou ana buderi i verenei Jacob awarina

* 22:18: Act 3:25 * 25:25: Mai Hebrew ai pona, *inina ororona* nonorana me Esau. † 25:26: Mai Hebrew ai pona, Jacob anona *ae karena i vojjini*. Wei lamna awanaina, anona lamna *amkwalakwalana*.

²⁷ Maranai rağarağ i vilaraga, Esau tauna rava aroarona. Wate Jacob rava genugenu-nana ma au numa maemena.

²⁸ Isaac ana ġoana ġaeġaena Esau, aubaina sia moduei i vunuvunu amna i ġoei. Wate Rebekah, Jacob i ġoana-kauei.

²⁹ Mara tagogi Jacob gwada i vivitavi ma Esau i aroaro da i nei ma inina i garigari ma am i rağe-kaua.

³⁰ Ma Jacob i riwei i pa, "Tau am a irağe kaua. Nai gwada lebalebarina ma taraiġui da ana anil!" (Wenanare i riwa aubaina wawa i verei Edom.[‡])

³¹ Ma Jacobi i riwa i pa, "Tam natuevou, Mara muriai amata ana buder i voġaeġaena ma vaia. Marina ma riweu da am buder i tau ma vereu ma gwada ana verem."

³² Esau i riwa i pa, "Tau am a irağe kaua ma natuevou buderina amapo eġa ina voagiuu, anina ma vaia!"

³³ Ma Jacob i riwa i pa, "Marina ma parivai-nuaġani da am buder i tau ma vereu." Ma Esau i parivainuāġana da natuevou buderina Jacob ina verei.

³⁴ Ma Jacob gwada i taraiġui ma palawa da Esau i verei ma Esau i am ma i uma ma i vomairi da i nae. Wenanare i kauei lamna Esau ana buder i eġa ita vinuabolei.

26

BADA i parivainuāġana da Isaac ina viaiaini me Abraham

¹ Gomara ġaeġaena i nei au Canaan, me wariağä Abraham ana au mara i tupua nanare. Ma Isaac ana dam maiteni i ġaira au melagai ġaēgaena wavana Gerar, kampa mai Philistia ai gulau Abimelek i mae.

² Ma BADA Isaac awarina i eġa ma i riwa i pa, "Eġa ma ġaira au Egypt, ma dobu ana riwem kampa ma mae.

³ *Weka ma mae-gubai, tam maiteni ana mae ma ana viaiainim. Wei dobuna anatapuna tam ma am epaepaia ana veremi. Ma Abraham aiwai a parivainuāġani ana kauei aubaimi.

⁴ Am epaepaia ana vimaġai, ai maġa me ubona au mara ma wei dobuna anatapuna taui ana verei. Am epaepaia awariei dam anatapui au dobu ana viaiaini.

⁵ Abraham ponau i nonori ma au babani ma au viararamana ma au tarawatu i voletelelei, lamna aubaina wei ana kauei am epaepaia aubai."

⁶ Anina ma Isaac au Gerar i mae.

28

Muriai Isaac i nae da au Beersheba i mae. Maranai tauna i magura kaua (ma matana i oao) natuna orotona keikeina Jacob, amana i moru tauna i viaiaini me tauna natuevou. Maranai tuana Esau wei i nonori, tauna amlona i ġaigħi kaua ma i ġoei da Jacob ita virāġeni.

Isaac, Jacob i paritawanei Laban awarina.

¹ Isaac Jacob i kwatuei, i viaiaini ma i riwei i pa, "Eġa au Canaan awam ma vaia,

² wate ma vomairi ma ma nelāġilāgħina au Padan-Aram, ġogħam Bethuel ana au dam ma kampa avum Leban natunatuna waivinei e mamae, kampa awam ma vaia.

³ Ma God VIVIREWAPANA KAUKAUANA am tavine ina viaiaini ma ina viuaim ma natunatum ina vimaġai ma tam dam borui ġaeġaei ina viamanem.

⁴ *Ma tam am epaepaia maiteni ina viaiainim me Abraham i viaiaini nanare, da dobu marina e mamae-gubai, God Abraham i verevereia tam ma vibuderiei."

Jacob ana rauboni au Bethel.

¹⁰ Jacob Beersheba i netawanei ma i nena au Haran.

¹¹ Madę̄ga i neulai ma gabu au tagogi,* i ġeta ma i rauvirai da i matave ma ġaima tagogi i vaia ma i viunutanei.

¹² Ma i rauboni da tete i 'nanai, karena au dobu ma damona au mara ma God ana anela i ġeġġae ma i ġaigħira.

¹³ *Ma BADA, au ririvana i maimairi ma i riwa i pa, "Tau BADA, Abraham ma Isaac ai God, dobu e matamatave lana tam ma am epaepaia ana veremi.

* 25:30: Mai Hebrew au pona, Edom anona Lebalebarina. * 26:3: Gen 22:16-18 * 28:4: Gen 17:4-8 * 28:11: Gabu vivivireina. * 28:13: Gen 13:14-15

¹⁴ *Ma am dam ana vimağai da me doa pokauna ma ai parata ana viratai au lavaratei, rauanaägei ma karuwabuei. Ma am epaepaia maiteni taumiei rava anatapui au dobu ana viaiaini.

¹⁵ Ma notai da tau au ririvam a mamae ma ana painim am au vägai. Ma ana neiana-meleiaim wei au dobuna. Ega ana voterem da aiwai a parivainuaganim ana kauei."

¹⁶ Jacob i matave vomairi ma i riwa i pa, "BADA anina weka e mamae ma tau ega ataa aramanei!"

¹⁷ Jacob i rovo kaua ma i riwa i pa, "Wei dobuna i vinirovorovo gaga! Wei anina God ana numa, Mara ana metaeta."

¹⁸ Ubaubanai boibogi Jacob i vomairi ma gaima i viviunutaneia i vaia ma i vitura-mairin da ita vimataira. Ma Olive monamonana i buloi gaima au tepana da i vovivirei God aubaina.

¹⁹ Dobuna i górei Bethel* (Melagaina au naona i góregorei Luz).

²⁰ Ma Jacob, BADA awarina i parivainuagana, "Mepa da tam au ririvau ma mae ma ma inana vaiteteu au vägai, lam ma gara ma vereu.

²¹ Ma lawalawaiu ana nememei amau awarina, lamna maranaina Tam tau au God.

²² Ma wei matairana a tereterei, weka ana viborumem, Ma aiwai u verevereu ana gimai da guta 10 ma guta tagogi ana veremelem."

35

BADA, Jacob i viaiaini

⁹ Jacob, Padan-Aramei* i nememei au Bethel. God i ega me Jacob awarina ma i viaiaini

¹⁰ ma i riwei i pa:

"Tam wavam Jacob,

wate marina ega ina górei Jacob

ma wavam vouna Israel.†"

Ma i viwavai Israel

¹¹ *ma i pa:

"Tau God VIVIREWAPANA KAUCAUANA

Ma vinatuna guratana ma ma vimağaimi

Am epaepaia ina virava-gaegaei ma dam borui gaegeaei awarimei ina tupua
ma gulagulau mağamagai ina viamanie.

¹² Dobu, Abraham ma Isaac a verei,

marina tam ana verei

ma am epaepaia

muriae wei dobuna ana verei."

¹³ Ma God i babani vorovei ma i netawanei.

¹⁴ *God weka Jacob awarina i babani lamna matairana Jacob gana i vimairini. Ma au tepana wine i wağı ana pulo* ma Olive monamonana i buloi. §

¹⁵ Weka God Jacob awarina i babani ma lamna aubaina wei gabuna i górei Bethel.*

Rachel ana irage

¹⁶ Muriae Jacob ana dam maiteni Bethel i voterei ma i vägai, ma taui uama i rata da au Ephrath ita geta. Ma Rachel malana i vaia da ina vinatuna ma vinatuna i voiana-guratei ma ana iniiviara i rata kaua.

¹⁷ Ma i voivoia ma iniiviara i rata ma tauvipiavoa i riwa, "Ega ma rovo! Tevera orotona gelauna i tupua!"

¹⁸ Wate Rachel i'rairaäge ma ana lavutu au damona ma tevera i viwavai "Ben-Oni".† Wate amana i viwavai, "Benjamin".‡

¹⁹ Ma Rachel i'räge ma eta e nena au Ephrath (marina wavana Bethlehem) au ririvana i doboi.

* **28:14:** Gen 12:3; 22:18 † **28:19:** Wavana Hebrewei anona *God ana numa*. * **35:9:** *Padan-Aram Wei dobuna Aram au wapuna au Mesopotamia. Haran lamna melagai tagogi wei au dobuna.* † **35:10:** *Jacob anona amkwakalwalana. Israel anona God maiteni i vägaiäiawa.* * **35:11:** Gen 17:4-8 * **35:14:** Gen 28:18, 19 ‡ **35:14:** *Wine i pulo ei gelauni maiteni. Jacob mataira i kaeui da tauna i verena-melei God awarina.* § **35:14:** *Jacob wei gabuna i vovivirei God viborumana aubaina.* * **35:15:** *Bethel anona God ana numa.* † **35:18:** *Ben-Oni lamna anona au iniiviara natuna.* ‡ **35:18:** *Benjamin lamna anona au oienä natuna. Lamna anona au goana bo au tauagu gaegaena.*

²⁰ Ma Jacob gana i vimairini Rachel ana kokoaga au tepana da i vimataira. Matairana amadodo e mamae.

Isaac ana i 'raže

^{22b} Jacob natunatuna nelarai 12:

²³ Leah natunatuna:

Reuben; Jacob ana natuevou

Simeon, Levi, Judah, Isakar, ma Zebulun.

²⁴ Rachel natunatuna:

Joseph ma Benjamin.

²⁵ Bilhah - Rachel ana taunola wavine natunatuna:
Dan ma Naphtali.

²⁶ Zilpah - Leah ana taunola wavine natunatuna:
Gad ma Asher.

Wei lamna Jacob natunatuna anatapui au Padan-Aram i ġuni.

²⁷ *Ma Jacob i nememei amana Isaac awarina au Mamre au Kiriath-Arba; marina e ġoreġorei Hebron. Abraham ma Isaac wariaġa wei dobuna i mae-gubai.

²⁸ Isaac i mae da ana madeġa 180

²⁹ ma i magura kaua, i lavutu tawanana ma iraġe ma amamana i votaġoi. Natunatuna Esau ma Jacob amai i doboi.

37

Joseph, tuatuana maiteni ai virarautua

¹ Jacob ana dam maiteni kampa i mae, wariaġa amana weka i mae, mai Canaan ai au dobu.

² Wei lamna Jacob natunatuna maiteni ai virarautua.

Joseph tauna laraga ana madeġa 17. Tauna tuatuana maiteni, amai awawana Bilhah ma Zilpah natunatui, amai ana sipu ma gote i paipaini. Wate Joseph tuatuana ai kaua apoapoe ġelau amai i vibenabenamei.

³ Jacob ana au magura Joseph i tupua ma lamna aubaina natuna nuanuana i vai-kauei, eġa me natunatuna ġelau nanare. Ma gara girugirumana, maiana ġaegħena i kauei ma Joseph i verei.

⁴ Maranai tuatuana i 'nanai da amai Joseph i ġoana-gurtei eġa me taui, ma ai ora-apoapoe ai tevera awarina i rata ma eġa ita bababani kaua awarina.

⁵ Waguvvara tagogi Joseph i rauboni ma maranai tuatuana ana rauboni i riwei, taui ai ora-apoapoe i virata-gurtei.

⁶ Joseph i riwa, "Ona rautaniġana ma au rauboni ana riwemi.

⁷ Anataputa au wapu witi ta bawabawai. Ma tau au bawa au pouna i mairi ma taumi ami bawa i kwaviviro ma i rauduneleil"

⁸ Ma tuatuana i riwa, "Tam u notai da ma vibada bo? Ma tam ma vibadelai bo?" Ma Joseph ana babani ma ana rauboni aubaina taui amloj i ġaigħi guratana.

Joseph i gimarei

¹² Mara tagogi Joseph tuatuana amai ana sipu ma gote i taravaini ma i naiei au Shekem ma kampa i paini.

¹³ Ma Israel (wavana ġelauna Jacob) Joseph i riwei i pa, "Tuatuam au Shekem sipu ma gote e paipaini. A ġoem da ma nae taui awari."

Joseph i vianina ma i riwa, "Anina ana nae."

¹⁴ Amana i riwa i pa, "Ma nae tuatuam ma ġamogħamo ma i 'nanai, taui anina bo eġa, ma ma nememei da ma riweu." Ma Joseph i paritawanei. Hebron wapuna i netawanei ma i nae.

Maranai au Shekem i ġeta,

¹⁵ ma kampa au wapu i kwavikwaviviro ma oroto tagogi tauna i 'nanai ma i riwei, "Aiwai e baibaieif?"

¹⁶ Joseph i paribelei, "Tau tuatuau a baibaei, tau ai sipu ma gote e paipaini. Uta riweu taui mepa?"

¹⁷ Tauna i paribelei i pa, "Tau i nae. A nonori i bababani i pa, 'Tana nae au Dothan.'

Anina ma Joseph tuatuana i votāgoi da au Dothan i nelāgai.

¹⁸ Maranai tuatuana matai i tawanei ma Joseph i 'nanai i nenei ma i aramanei da tauna.

Muriai da ita ġetai taui ai oga i tarai da tauna ita virāgeni.

¹⁹ Taui i babani vivira i pa, "Taurauboni e nenei.

²⁰ Ona nei tana vunui ma waira dogona paipairana au orana tana tawana ġairei. Ma tana riwa da ġamōġamo moduei tauna i virāgeni. Ma tana inanai ana rauboni mena ina ġoа."

²¹ Wate Reuben ai ogatara i nonori, ma i goei da ana tevera ita gagaloei ma i riwa i pa, "Eġa ana lawwana tana vaitawanei."

²² "Eġa tana virāgeni. Tana tawana ġairei waira dogona paipairana au orana weka au mutulua ma eġa tupuana tana vodadani." Reuben wenanare i babani aubaina i ġoei da ana tevera ita naiana-melei amana awarina.

²³ Maranai Joseph i ġeta tuatuana awarii, tauna i vojjini ma ana gara girugirumana i ġigitawanei.

²⁴ Ma i vaia ma i tawana ġairei waira dogona au orana.

²⁵ Ma taui i kiala da i amam ma i taepai da dam mai Ishmael i 'nanai au Gilead da i nenei au Egypt. Taui ai gimara lam anitavidagiai ma bunama *mur** au kamel i vigerui.

²⁶ Judah varevareina i riwei i pa, "Aiwi aiaina tana vaia mepa da ata tevera tana virāgeni ma tana moru.

²⁷ Ona nei ma tana gimarei dam mai Ishmael awarii ma eġa urataiei tarana ina toi, tauna ata tevera, tara tagogi." Ma varevareina i vianina.

²⁸ *Ma maranai taugimara mai Midian* i ġetai, Joseph tuatuana tauna dogoei i taina-epai ma i gimarei mai Ishmael awarii maiana silva 20 ana ruva nanare ma taui i naiei au Egypt.

²⁹ Muriai Reuben i nememei da au dogo i 'nana ġaira, ma Joseph kampa eġa ma i vinuabol kaua ma ana gara i sikai.

³⁰ Ma i nae me ana roaroa awari ma i riwa, "Ata tevera kampa eġa. Aiwi ana kaei?"

³¹ Anina ma taui gote i vunui ma au tarana ana gara i virai.

³² Ma ana gara i naiei amai awarina ma i riwei i pa, "Tauai wei garana a nelāgai. Ma inanai wei natum ġarinei bo eġa?"

³³ Amai gara i 'nanai ma i riwa, "Anina wei tau natu ana gara. Ġamōġamo ġaġaiawai natui i vunui. Oo natu! Ġamōġamo natu i uta-sikasikai."

³⁴ Ma Jacob i vinuabol kaua ma ana gara i sikai. Ma ġamōġamo opina i oteni ma natuna i moguei da nawaravi biaġa i kwa.

³⁵ Ana numa ravai i nae awarina da ita vinuaubai. Wate tauna vinuauba i geduaiei ma i riwa i pa, "Ana tou ma natu ana moguei da au dogo ina tereġaireu ma ana nae mepa natu i nenelana." Ma natuna i touei.

39

Potiphar awana, Joseph i rauoġarei

¹ Dam mai Ishmael Joseph i ġairei au Egypt, ma Potiphar tauna i gimarai da ana taunola. Potiphar tauna Egyptei ma sorodia ai bada ġaegħena.

² *BADA Joseph i mae-ratui ma i voaqi da anatapuna aiaina i kaukauei ana bada aubaina. Tauna Potiphar ana au numa i mae.

³ Potiphar i 'nanai da BADA Joseph i mae-ratui ma i voaqi da aiwai anatapuna i kauankauei,

⁴ ma wei Potiphar i vinuaiaei ma Joseph i terei da tauna aubaina ina nola, ma ana taunola numa au orana, ma ana purapura anatapuna ina vibadei.

⁵ Nai marana da i nenai, Joseph awarinei ma BADA Potiphar ana numa orana ravai ma ana purapura anatapui au numa ma ana au wapu i viaiaini.

⁶ Anina ma Joseph vaivai i verei da Potiphar ana purapura anatapui i paini, ma ana bada ana nola da am ava ina paipaini.

Joseph i tupua da karawata ma inanana aiaina.

* ^{37:25:} *MurMyrrh*. Wei dobuna ravai ai bunama ġabuabuna ma ana nola i maġa. ^{◊ 37:28:} Act 7:9 ^{† 37:28:} Buka taugirumana dam wawaġi ruāġi i terei, mai Ishmael ma Midian, wate mepa da taui dam tagogi. ^{◊ 39:2:} Act 7:9

⁷ Kampa ega ita mae-pora ma ana bada awana Joseph i 'nana rauogarei ma i riwei i pa, "Ma nei tana matave."

⁸ Wate Joseph i geduai ma wavine i riwei i pa, "Ma i 'nana, tau au bada weka i tereu da a vivipaipai ma lamna aubaina tauna ega aiwai numa au orana ina vinuabolei. Tauna ana purapura anatapuna au urau i terei.

⁹ Tau au rewapana wei au numana nanare tauna, ma ega aiwai ita nuanei anina tam ainelam. Menanare da kaua apoapoaena ana kaeui da God au matana au goa ina apoapoe."

¹⁰ Wavine marana patapatai Joseph i rarauelari da maiteni ita matave, wate Joseph i gedugeduai ma i nene-tawanei.

¹¹ Mara tagogi Joseph i nae au numa da ita nola, ma kampa ega taunola gelaui.

¹² Ma Potiphar awana i nae ma Joseph ana au kareko i voa ma i riwa i pa, "Ma nei tana matave!" Wate Joseph i ruba-opu au doa ma kareko wavine au urana i voterei.

¹³ Wavine i 'nanai da Joseph i ruba-opu ma ana gara au urana i voterei,

¹⁴ ma wavine ana taunola i kwatuei da i nei ma i riwa i pa, "Weka ona inana! Wei Hebreweina awau i neiai awarita, i vinameta. I nei awariu ma i goei da ita viawawaneu wate tau garara a vikarei.

¹⁵ Ma i nonori a garagarara ma i ruba-opu ma ana kareko i ruba-tawanei."

¹⁶ Ma wavine kareko i paini da awana i nememei au numa.

¹⁷ Ma wavine riwana tagogina awana i riwei i pa, "Wei Hebreweina tam u neiai awarita, i vinameta. I nei ma i goei da ita viawawaneu.

¹⁸ Wate maranaina a garagarara, tauna i ruba-opu ma ana kareko au ririvau i voterei."

¹⁹ Potiphar awana ana babana i nonori ma amlona i gaigai kaua.

²⁰ Anina ma tauna Joseph i vaia ma panipani au numana i tawana-ruiei, mepa gulau ana panipani e mamae ma kampa i mae.

Maranai Joseph au panipani-numana

²¹ *BADA Joseph i mae-ratui ma i vaiaini, lamna aubaina da panipani taupainina Joseph i vinuiaiei.

²² Ma tauna Joseph i terei da panipani ravai ita vibadei ma nola au urana i terei.

²³ Panipani taupainina ana nuabola ega aiwai, aubaina Joseph aiwai anatapuna i paipaini. Ma BADA tauna i mae-ratui ma i voagui da aiwai anatapuna i kauana-kauei.

40

Joseph, tauai ai rauboni anoi i viegai.

¹ Ma mara tagogi Pharaoh* ana wine taupainina ma palawa tauapuina babadai, i kauana-boai Pharaoh awarina.

² Pharaoh amlona i gaigai babadai ruagai awari.

³ Ma i vaia ma panipani au numana i terei mepa Joseph i mamae lana, sorodia ai bada ana au numa.

⁴ Sorodia ai bada wei ruagai i naiei Joseph awarina ma tauna ravai i paini. Taui i mae-guratana au panipani numana.

⁵ Waguvvara tagogi babadai ruagai panipani au numana i rauboni. Ma ai rauboni anoi taputapunei ava.

⁶ Ma ubaubanai maranai Joseph i nei awari ma i 'nanai da taui ega ita vinuiai.

⁷ Ma ruagai i paridadanei, "Aiwai aubaina naomi i peu?"

⁸ Taui i paribelei, "Tauai airuaga a rauboni ma ega aiai da ai rauboni anona ita viegelai."

Joseph i riwa, "God ainelana rauboni e viviega. Ami rauboni ona riweu."

⁹ Anina ma wine taupainina ana rauboni Joseph i riwei, "Au rauboni au orana grape gorogorovana a inanai au naou.

¹⁰ Ma gorogorovana ragaraaga tonuaga. Ma i raurugu ma i talai ma anona tapina i magura.

¹¹ Pharaoh ana aniuma kelakana a vovoijini ma grape a purai ma au kelaka a buloi da Pharaoh a verei."

¹² Ma Joseph tauna i riwei, "Am rauboni anona wei. Grape ragaraaga tonuaga, anona lamna au pom tonuaga.

¹³ Au pom tonuaga au murina, Pharaoh ina tere-opunem ma am au nola ina tere-melem. Ma tam, Pharaoh ana aniuma kelakana au urana ina tere-melei, me au noana nanare.

* 39:21: Act 7:9 * 40:1: Mai Egypt ai wavalatona i gorei Pharaoh. Wei lamna ana vaivai ma ega wavana.

¹⁴ Wate maranai wei gabuna u opu-tawanei ma aiwai anatapuna ina ai-me. Tau ma notai, am i viaiai ma kaei da au nuabola Pharaoh ma pariverei da panipani-numanei ina tere-opuneu.

¹⁵ Pharaoh ma riwei aiwai awariu i tupua. Mai Hebrew ai au dobu i daneneu ma weka i neiai, wate tau ega aiwai ata kauana-boai ma weka au dogo i tawaneu."

¹⁶ Ma palawa tauapuina i 'nanai da Joseph nuaiai riwana i viegai ma i riwa, "Tau nanare a rauboni. Palawa irigana tonuغا au kolau a terei."

¹⁷ Iriga au tepana, lamna palawa apuapunana tapuna ma tapuna Pharaoh aubaina, wate kiu i nei ma au kolau, au iriga palawa i amam."

¹⁸ Joseph i paribelei i pa, "Am rauboni anona wei. Iriga tonuغا lamna au pom tonuغا."

¹⁹ Aupom au vitonuina, Pharaoh panipani-numanei ina tere-opunem da uam ina borituini ma tupuam ai au tepana ina vitakei ma kiu ina nei ma vioam ina ani."

²⁰ Ma au pom au vitonuina, lamna Pharaoh ana tupua marana ma torela gaeغاena i kaei, ana gabemani babadai aubaii. Ma ana wine taupainina ma palawa tauapuina panipani-numanei i tere-opunei ma i neiai Pharaoh awarina, ana gabemani babadai au matai.

²¹ Ana wine taupainina, ana au nola i tere-melei me au naona nanare. Ma tauna, Pharaoh ana aniuma kelakana au urana i tere-melei.

²² Wate ana sorodia i egari da ana palawa tauapuina uana i borituini ma tupana ai au tepana i vitakei. Joseph menanare rauboni i vivieಗanei, nanare i tupua.

²³ Wate wine taupainina, Joseph nuanuana i vuru ma ega ita vinua-notenotei.

41

Pharaoh ana rauboni

¹ Ma madeغا ruaga i kwa, ma Pharaoh i rauboni da tauna waira Nile au adana i maimairi.

² Ma bulumakau 7 aiaii ma dododoi wairei i geta ma waira au adana gidagida i amam.

³ Ma bulumakau 7 apoapoei ma kirakiramai wairei i getai da bulumakau aiaii au ririvai i raumairiei waira au adana.

⁴ Bulumakau 7 apoapoei ma kirakiramai i vomairi da bulumakau 7 aiaii ma dododoi i lawana-pai. Anina, ma Pharaoh matana i kala.

⁵ Ma i matave me ma Mara viruaina i rauboni da witi aina tagogi ma rovei 7 aiaii ma dodeidoi i 'nanai.

⁶ Anina ma witi rovei 7 muriai i gogogo wate rauanaغا i ravi da i jinajina.

⁷ Ma witi rovei jinajinai 7 i vomairi da witi rovei dododoi 7 i lawani. Anina ma Pharaoh matana i kala ma i aramanei da i rauboni.

⁸ Ubaubanai Pharaoh nuanuana i bolai ma riwa i paritawanei da rauboni tauvieಗai ma nuaulaulai anatapui au Egypt i nei. Ma ana rauboni i riwei ma ega aiai ravana da ana rauboni anona ita viegei.

⁹ Ma wine taupainina Pharaoh i riwei, "Amadodo ana rupena da tau a kauana-boai.

¹⁰ Mara tagogi tam amlom i gaigaي palawa tauapuina ma tau awariu, da u paniai ma sorodia ai bada ana au numa a mae.

¹¹ Ma waguvvara tagogi tauai tagotagogi ava a rauboni ma ai rauboni anoi taputapunei ava.

¹² Laraga Hebrew kampa tauai maiteni, tauna sorodia ai bada ana taunola. Ai rauboni a riwei ma tauna ai rauboni anona i viegelai

¹³ Ma tauna aiwai i ririweia nanarena i tupua. Tau u tere-meleu au au nola ma palawa tauapuina u viragei."

¹⁴ Ma Pharaoh, Joseph ana riwa i paritawanei ma panipani-numanei laqilaqina i neiai. Joseph i viangari ma ana gara aiaina i otensi. Ma i naiei Pharaoh awarina.

¹⁵ Ma Pharaoh Joseph i riwei, "Waguvarai a rauboni ma ega aiai au rauboni anona ita viegeu. Wate rava i riwa da maranai tam rauboni e nononori, lamna anona e vivieಗai."

¹⁶ Joseph i paribela, "Tau ega tagotagogina, wate God am rauboni anona ina verem da oram ina viubai."

²⁵ Joseph i paribelei, i pa, "Oo bada, rauboni ruaga anoi tagogina. God aburuna ava da aiwai ina kaei lamna gulau i viatataiei.

²⁶ Bulumakau dododoi 7, ma witi rovei aiaii 7, lamna maura madeಗana 7.

²⁷ Bulumakau kirakiramai 7 muriai i nei, ma witi rovei jinajinai 7, lamna anona amapo madeಗana 7 au orana gomara.

²⁸ —Aiwai a ririweia, nanare ina tupua. God i viatataiem da aiwai ina kaei.

²⁹ Madeğā 7 au orana, lamna maura ġaeġaena Egypt au anatapuna.

³⁰ Wate au murina, gomara ġaeġaena ina mae da madeğā 7 da Egypt ana maura marana rava nuuanuai ina vuru ma gomara rava ina vipupui.

³¹ Gomara ina rata kaua da maura marana nuuanuata ina vuru.

³² God i vianina da wei ina tupua ma eġa barana ina uama, lamna aubaina rauboni ruāga i verei.

³³ —Au bada, tam, oroto nuaulaulana ma notanotana uta vinei da Egypt ita vibadei.

³⁴ Wei uta kaei, babada uta terei Egypt au anatapuna da tuaruta au marana ġuta vi-five-na ita vaia madeğā 7 maura au marana.

³⁵ Ma rewapanā ma verei da au maura, taui lam ina tami da au anara ina vidamni ma ina paini.

³⁶ Wei lamii ina tereriei rava aubaii maranai madeğā 7 gomara au Egypt ina nei. Ma wei taunei, mai Egypt eġa am ina iraġe.”

³⁷ Anina, ma Pharaoh ana gabemani maiteni oga-tarana i vianinei.

³⁸ Ma i riwei i pa, “Mepa rava ġelauna tana nelagai me Joseph ma God Aruana tauna au orana e mamae?”

³⁹ Anina ma Pharaoh, Joseph i riwei, “God wei anatapuna i viatataiem, eġa aiai ġelauna nuaulaulana ma notanota kauana me tam.

⁴⁰ *Tam ana terem da au dobu ma vibadei ma au rava anatapui am riwa ina voteletelei. Tau Pharaoh, ma am rewapanā tau ainelau au rewapanā eġa ina ġetawanei.”

⁴¹ Ma Pharaoh i riwa, “Märina tau a vinem da Egypt anatapuna ma vibadei.”

⁴² Ma Pharaoh au urana ana vigulau *ringna* i votawanei ma Joseph au urana i terei,* ma gara maiana ġaeġaena i viotenī ma sein goldei au uana i tere-taġonei.

⁴⁵ Ma Pharaoh Joseph wava Zaphenath-Paneah,[†] i verei ma mai On ai pirisi Potiphera[‡] natuna gugunina Asenath, Joseph i verei da awana. Anina ma Joseph, dobu Egypt i vibadei.

⁴⁶ Joseph ana madeğā 30 ma wei vibadana i vaia. Ma Joseph, Pharaoh i netawanei ma Egypt i naeni ma i tuyrevirei.

⁴⁷ Maura ġaeġaena i nelagai madeğā 7 au orana.

⁴⁸ Joseph ai maura ġelau i tami maura madeğāna 7 au orana au Egypt, ma au melagai nununai i tere-kauei ma i paini. Melagai anatapui ai lam au anara i terei.

⁴⁹ Joseph lam i vidamni da olana i mairi me bubu au gera ma iavana i kauana-avei aubaina lam i rata dewadewa.

⁵³ Ma maura madeğāna 7 au Egypt au damona i ġeta.

⁵⁴ *Ma gomara madeğāna 7 i raukarei, me Joseph i ririweia nanare. Gomara dobu au anatapuna, wate Egypt au anatapuna lam i mamae.

⁵⁵ Maranai mai Egypt raumolaġau i vikarei, taui Pharaoh i vibaġai lam aubaina. Ma taui i riwei da ita nae Joseph awarina ma tauna aiwai i ririweia ita kaei.

⁵⁶⁻⁵⁷ Maranai gomara Egypt anatapuna i vaia, Joseph anara i votawatawanei ma lam mai Egypt awari i gimarei. Anina ma gomara i rata kaua dobu au anatapuna da rava anatapui i nei Joseph awarina au Egypt lam gimarana aubaina.

42

Jacob, natunatuna i paritawanei au Egypt

¹ Ma au Canaan Jacob i nonori da au Egypt lam ma natunatuna nelarai i riwei, “Aiwaina da o mamae labalababa?

² *Anina ona rautanigħana! A nonori da lam au Egypt. Ona ġaira kampa ma aubaita lam ona gimarai da tana lawana ma eġa tana iraġe.”

³ Anina ma Joseph varevareina ten i ġaira au Egypt da lam ita gimarai.

⁴ Wate Jacob eġa Joseph ana tevera oienā Benjamin ita paritawanei aubaina i rovo mepa da aiwai apoapoenā awarina ita tupua.

* **41:40:** Act 7:10 * **41:42:** Mataira da Joseph, Pharaoh ana rewapanāi ma ana riwei i nolanola.

[†] **41:45:**

Safenat-panea Egypt ai ponei anona *God i bababani ma i lawana*. [‡] **41:45:** On Wei lamna dobu wavana, ma wavana ġelauna lamna *Heliopolis*. Wei au dobuna rava, madeğā i raudunelei. * **41:54:** Act 7:11 * **42:2:** Act 7:12

⁵ Taui rava ġelau maiteni i nae au Egypt da lam ita gimarai aubaina gomara ġaegħena dobu Canaan maiteni i via.

⁶ Joseph i vibada ġaegħena au Egypt ma tauna lam i għimġimarei dobu anatapui ravai awari. Varevareina i ġetai ma Joseph au naona i mae-ġāira au doa ma iraudune.

⁷ Joseph taui i 'nanai ma maratagogi i aramanei da taui aiavoi ma i kauana-melei da apamina taui eġa ita aramanei. Ma riwa bagħibaginei i vitara-vireire, "Taumi meiei o nei?"

Taui i paribelei, "Tauai Canaanei a nei da lam ata gimarai."

⁸ Joseph tuatuana i 'nanai da i aramanei, wate taui ai tevera i vinu-nainei.

⁹ [◊] Ma ana rauboni wariagħana i notai ma i riwei, "Taumi i paritawanemi da ai dobu ana ġokkokara ota inanai bo."

¹⁰ Taui i paribelei, "Oo bada eġa! Tauai am laralaraga a nei da lam ana gimarai."

²¹ Ma taui i babani vivira, "Nai maranaina ata tevera ana ora-viarana agu i toutouei awarita ma, eġa tata rau-nu'apoapoelei. Tauta ata wawu lamna kovoġħana marina ta vaivaia"

²² [◊] Reuben i paribelei, "Nai maranaina a riwemi, 'Eġa ata tevera ona vodadani!" Wate taumi eġa ota rautaniġaneu. Marina ata tevera tarana kovoġħana ta vaivaia."

²³ Joseph Egypt ponanei i bababani ma rava ġelauna taui ai ponei i paripari-veresi. Wate taui eġa ita aramanei da Joseph ai babani i nononori.

45

Joseph i viegħana-melei

⁴ Joseph varevareina i riwei, "Ona nei au ġereġereu." Ma taui i nei au ġereġerena. Ma i babani, i pa, "Tau ami tevera Joseph, mai Egypt awari o gimareu.

⁵ Wate eġa orami ina bolai, ma eġa ami rava maiteni tau o gimareu aubaina ona viamparipari. Wate God au naona i paritawaneu da rava ata vilawani.

⁶ Wei gomarana dobu e viviapoapeni marina madeġa ruaġa i kwa. Wate madeġa five ġelauna e mamae da eġa tana ipi bo tana tuarut.

⁷ God i aipari-tawaneu da taumi ma ami dam ravai maiteni ata vilawanimi, ma ami dam avena ita pupu.

⁸ Ma eġa taumi weka ota paritawaneu wate God, ma tauna i tereu da Pharaoh ana taunola ai bada ġaegħena ma ana numa ma aiwai anatapuna au Egypt a vivibadei.

⁹ [◊] Marina laġilägħina ona nae me amau awarina ma ona riwei, 'Natum Joseph wenanare i riwa, God i tereu da Egypt anatapuna a vivibadei, ma tam laġilägħina ma ġairai awariu.

¹⁰ Tam au ġeġereu ma mae au Goshen; ma nanare natunatum ma ġoġogħam ma am ġamoġamo ma aiwai anatapuna ġarimej.

¹¹ Gomara madeġħana five amapo e mamae, aubaina tau lam ana verem. Mepa da wei eġa ana kauet tam ma am dam ma am laraga ma am ġamoġamo anatapui ina vinuapoapoe ma ina raumolagħau."

²⁵ Anina ma Joseph tuatuana Egypt i opu-tawanei ma i nae me amai Jacob awarina au Canaan.

²⁶ Ma taui Jacob i riwei, "Natum Joseph lawalawaina e mamae, ma tauna marina Egypt e vivibadei." Jacob i vinuuanina ma nai babani eġa ita vitumaġħanei.

²⁷ Wate taui aiwai anatapuna Joseph i ririweia amai i pariverei. Ma Joseph ana anigeru i paritawanei da Jacob ita vigerui da ita naiei au Egypt. Maranai wei i 'nanai, Jacob ana nota i nememe.

²⁸ I pa, "Tau marina a aramanei da natu lawalawaina e mamae, ma ana nae da ana inanai ma muriai da ana iraġe."

46

Jacob, natunatuna ma ġoġogħana maiteni i nae au Egypt.

¹ Anina ma Jacob ġarnejni anatapuna maiteni i nae au Egypt. Ma au Beersheba i ġeta, ma kampa pulo i apui amana Isaac ana God awarina.

² Ma wagħvarai God raubonie awarina i babani i pa, "Jacob! Jacob!"

Ma tauna i paribe, "Tau weka."

³ God i riwa, "Tau God, amam ana God. Egypt ġairana eġa ma rovoei, aubaina tau am epaepaia ai dam boruna ana vimaġai kampa.

⁴ Tau maiteni tana nae au Egypt ma am epaepaia ana neiana-meleiwei au dobuna. Joseph amapo au ririvam, maranai ma iraġe."

⁵ Jacob, Beersheba i voterei, ma natunatuna nelarai amai i vojijini, ma anatapui awawai ma natunatuna maiteni, au anivigeru Pharaoh i paripari-tawaneiana i geru.

⁶⁻⁷ *Ai ġamōgamo ma ġariei anatapuna au Canaan i vaivainia i naiei au Egypt. Anina ma Jacob, natunatuna nelarai ma waivinei ma ġoġogħai ma ana numa ravai anatapui i nae au Egypt.

²⁸ Jacob Judah i aiparitawanei au Egypt da Joseph ita riwei da au Goshen ita nebelei. Maranai i ġeta.

²⁹ Joseph ana chariot i gerui ma i nae au Goshen. Maranai amana i nebelei, i taragħwabai ma i tou guratana.

³⁰ Jacob Joseph i riwei, "Naom a inanai ma a aramanei da tam lawalawaim, marina ana nuaubau ana iraġe."

48

Jacob, Ephraim ma Manasseh i viaiaini

¹ Wei kauai au murina, rava Joseph i riwei, "Amam i doria." Anina ma natunatuna Manasseh ma Ephraim i taravaini ma i nae amana da ita inanai.

² Rava tagogi Jacob i riwei, "Natum Joseph i ġetai da ina inanaim." Jacob doridoriani ma i voguratei da i vomairi ma ana animatave au tepanai i kiala.

³ *Anina ma Jacob natuna Joseph i riwei, "God VIVIREWAPANA KAUKAUANA awariu i eġa au Luz (Bethel) au Canaan ma i viaiainiu.

⁴ Ma i riwei, 'Natunatum ana vimaġai ma am epaepaia ai dam ana viratai; wei dobuna am epaepaia ana verei da ina viġariana-nonoei.'

⁵ —Ma lamna aubaina ġoġogħau ruāga Manasseh ma Ephraim au Egypt tutupupuai muriai da a nei; lamna tau ana vaia da natunatu me natunatu Reuben ma Simeon.

⁶ Roarao muriai e tutupupua lamna tam ġarimei; ma ai buderi Ephraim ma Manasseh awariei ina vaia."

¹³ Anina ma Joseph natunatuna ruāga i neiai Jacob awarina, Ephraim amana au oienam lamna Jacob au kelakelauna ma Manasseh amana au kelakelauna lamna Jacob au oienam

¹⁴ Wate Jacob uraoiena i tere-taġonei ma Ephraim au kolana i terei avena da tauna umau, ma ura-kelakelauna i tere-taġonei da Manasseh au kolana i terei avena da tauna natuevou.*

¹⁵ Anina ma Joseph[†] i viaiaini i pa,

"God. Tam Amau Isaac ma ġoġau Abraham ai God,

God taupainiu au lawana au anatapuna,

¹⁶ Ma am anela taugagħloeu au anatapuna wei roaroai ma viaiaini!

Ma wawau ma ammama wawau awarri ina mae-nonoa

ma a raraupari da ai dam ma viratai au dobu."

¹⁷ Wate maranai Joseph i 'nanai da amana aiwai i kaukauei ma tauna eġa ita vinuajai; ma amana urana Ephraim au kolana ita vaitawanei ma Manasseh au kolana ita terei.

¹⁸ Joseph amana i riwei, "Amau eġa nanare. Wei tauna natuevou uraoiem au kolana ma terei."

¹⁹ Wate amana i riwa, "Natu! Tau a aramanei aiwai a kaukauei. Manasseh maiteni ana dam ina rata kaua. Wate ana tevera wavana ina rata ma ana dam ina rata dewadewa eġa me tuuana."

²⁰ Anina ma Jacob roarao nai marana i viaiaini i pa,

* 46:6-7: Act 7:15 * 48:3: Gen 28:13-14 * 48:14: Tau ai nota da au oienam kialana lamna kaua bo nota ġaġaena ma eġa me au kelakelauna kialana nanare. Lamna aubaina Jacob nimana au oienam tevera au kolana i terererei tauna amapo viaiainā ġaġaena ina vaia eġa me għalauna nanare. Lamna aubaina Joseph i baie maranai Jacob nimana au oienam tevera umauna au kolana i terei. † 48:15: Maranai Jacob ġoġogħana i viaiaini, tauna Joseph i viaiaini.

“Mai Israel wavam ina latoni maranai e viaiaina, taui ina riwa,
‘Tauai a raraupari da God ina viaiainim me Ephraim ma Manasseh i viaiaini nanare.”

Wenanare lamna Ephraim wavana i ailatoni ma muriai Manasseh wavana.

²¹ Ma Israel, Joseph i riwei, “Tau aburuna ava da ana irāge. Wate God awarim ina mae da ina naiana-melem au Canaan, amamam ai au dobu.”

49

Jacob, Judah i viaiaini

⁸ “Judah, varevareim ina voepaepaim,
ma amam natunatuna ina raudunelem
aubaina tam am āgāia au uai ma voa ma ma vovauibai.

⁹ Judah natu, tam me lion natuna,
ana sia i am vorovei da i amruruna ma e matamatave,
ēga aiai ana matave ina viapoapoeni!

¹⁰ Gulau ana jīgona Judah ina vojjini
ma ana epaepaia ina vibada nonoa,
anina da jīgona taniwagana ina nei
maranaina dobu anatapui ravai tauna ina raudunelei ma ina vivorumei.”

³³* Ma Jacob natunatuna awarii i babani vorovei, ma tauna ana au animatave i rauvirai ma i 'rāge.

50

Joseph, tuatuana i vinuaubai

¹⁵ Ma maranai Jacob i 'rāge, Joseph tuatuana i rovo ma i riwa, “Mepa da Joseph amlona ina āgāi ma ina raubiwa, kaua apoapoena awarina ta kaei aubaina.”

¹⁶ Ma lamna aubaina riwa i paritawanei Joseph awarina i pa, “Amata maeninai ma wenanare i riwelai i pa,

¹⁷ Joseph wenanare ona riwei, “Tuatuam kaua apoapoe kaukauana awarim i kaei. Wate a īgoe da ai kaua apoapoe ma nota-tawanei.” “Tauai amam ana God a vovoepaepai, ma a vivibāga-guratem da ai īgo'apoapoe ma nota-tawanei.” Maranai Joseph wei riwana i nonori tauna orana i viara kaua ma i tou.

¹⁸ Anina ma tuatuana i nei ma au naona i mae-peu ma i riwa, “Ma inanaiai tauai am taunola a nei.”

¹⁹ Wate Joseph taui wenanare i riwei, “Tau ega ona rovoeu, tau ega God da ana kovoġimi.

²⁰ Wariaġa o īgoe da ota viapoapoeni wate God i virai da aiaina i kaei da rava maġamaġau i ina vilawani ma ega ina pupu.

²¹ Anina, ega ona rovo! Tau ana painimi, natunatumi maiteni.” Ma nanare i babani da orai i raei.

Exodus Oputawanana

Jacob dam ġaegħena i vitupui au Egypt

¹ Jacob natunatuna ana awawai ma natunatui anatapui maiteni i ġaira au Egypt. Taui wavai wenanare:

² Reuben, Simeon, Levi, Judah;

³ Isakar, Zebulun ma Benjamin;

⁴ Dan, Naphtali, Gad ma Asher.

⁵ Jacob natunatuna ma ġoġogħana nelarai, anatapui ai maġa 70 i ġaira, Joseph au Egypt maemaena maiteni i 'avi.

⁶ Muriai Joseph ma varevareina ma nai kimtana i 'raġe-pai,

⁷ ⁸*Wate ai epaepaia - mai Israel, i vinatuna guratana da dam ġaegħena i vitupui ma Egypt anatapuna i vioai.

Pharaoh mai Israel i rau-iviaapoapoelei

⁸*Madeġa maġamaġau au murina Pharaoh vouna i vibada au Egypt, ma Joseph ma aiwai i kaei ega ita aramanei.

⁹ Pharaoh ana rava i riwei, "Ona inana, mai Israel i maġa guratana ma i virewapanā kaua ega me tauta.

¹⁰ ⁹*Tauta tana viogatara da menanare tana kauanei da ai vinatuna ega ina rata guratana. Ma mepa da wei ega tana kaei ma maranai ġavia ina nei, ma taui ġavia maiteni ina vitagogiegi da ina viġavieti, ma ina opu-tawaneta"

¹¹ Ma nola babadai i terei da mai Israel nolei i vunuvunu. Wei babadai mai Israel i egari da taon ġaegħaei ruaqha i voai wavai Pithom ma Rameses, ma kampa Pharaoh ana lam ma purapura ġelau i vidamni.

¹² Mai Egypt amapo da taui i rau-iviaapoapoelei, wate mai Israel amapo da i vivinatuna ma ai dam i rara ta Egypt. Ma lammna aubaina mai Egypt mai Israel i rovoei.

¹³⁻¹⁴ Ma taui mai Israel i egari da nola vivitaina i kaukei ma i vinuapoapoe. Ma brik i kaukei ma doa i gwadai da brik anipasina, ma wapu nolai maiteni i kaukei. Mai Egypt nolei mai Israel i vunuvunu ma ega ita rau-nuapoapoelei.

²² ¹⁵*Pharaoh ana rava i riwei, "Maranai wavine Hebrewei tevera orotona i ġuni, teverana au waira Nile ona tawanei. Wate maranai tevera wavinena i tupua, ona voterei da ina mae."

2

Moses i tupua

¹ Maranai wei kauai i tuputupua, oroto tagogi Levi ana damei ma wavine ana damei i ravagi,

² ¹⁶*wavine i raumanawa ma natuna orotona i ġuni. Ma wavine i 'nanai da natuna inanana aiaina i tupua, ma natuna i tere-govaġi da nawaravi tonuġa i kwa.

³ Wate ega tagotagogina da ita teregovaġa-nonoei ma iriga waira modunei* voavoana i vaia ma koltei gavogavo i pasi-tomeni da waira ega ina rui. Ma tevera au iriga i poai ma waira modui au orai i terei au waira Nile.

⁴ Tevera tuana wavinena aueia i mae ma ana tevera i vineneġanei da ita inanai awarina aiwai ita tupua.

⁵ Ma Pharaoh natuna gugunina i ġairai da ita toa. Ma ana taunola waivinei waira au adana i bababara-nae. Pharaoh natuna iriga i 'nanai modu au orana ma ana taunola i paritawanei da irigana ita nejai.

⁶ Maranai Pharaoh natuna iriga i votawanei ma tevera i toutou i 'nanai, nuanuana i bolai ma i riwa, "Wei mai Hebrewe natui."

⁷ Tevera tuana wavinena i nae ma Pharaoh natuna i vibagħi, "Anina bo ega da ana nae ma tataovao Hebrewei ana baiei da tevera ina viġuġui ma ina ġamoi?"

⁸ Wavine i vianina ma i riwa, "Anina, ma nael!" Ma tevera i nae ma alo oina i taravainiai.

⁹ Ma Pharaoh natuna wavinena i riwei, “Wei teverana ma viğügi aubaiu ma ana vimaiem.” Ma wavine teverana i naiei ana au numa ma i ġāmoi.

¹⁰ *Ma tevera i eda ma i naiei Pharaoh natuna awarina ma tauna i vaini da natuna. Ma Pharaoh natuna i riwa, “Au waira a sinaepai.” Lamna aubaina ana viwawai Moses.†

Moses ana rovona Egypt i ruba-tawanei.

¹¹ *Maranai Moses i vilaraga, ma i nae da ana rava oina ita raugenari, ma i 'nanai menanare mai Egypt ana rava i egari da i nolanola ma i rau-iviapoapoelei, ma i 'nanai Egyptei Hebrewei i vunuvumui.

¹² Moses i 'nanai viravira ma eġa aiai ita inanai, anina ma Egyptei i viraġeni ma au bubu i doboi.

¹³ Ma marana i tom Moses i naeme, da ana rava ruāga i viġaiġaiawa i 'nanai ma ġaiawa tauvikareina i riwei, “Aiwai aubaina turam Hebrewei e raviravi?”

¹⁴ Ma orotona i riwa, “Aiai i terem da ma vibadelai bo ma rauetralai? Tam ma viraġeniu me Egyptei u viraġeni nanare bo?” Kampa Moses i rovo ma i riwa, “Rava boibogħi i aramanei tau aiwai kaeui.”

¹⁵ *Pharaoh wei riwana i nonori ma i ġoie da menanare Moses ina viraġenanei, wate Moses Egypt i ruba-tawanei ma i nae au Midian ma waira dogona au adana i kiala.

3

Moses kampa mai Midian ai pirisi pulo tauapuna maiteni i mae, ma natuna Zippora i ravaġi.

God Moses awarina i babani

¹ Moses poiana Jethro ana sипу ma gote i ġamoġamoi - Jethro lamna mai Midian ai pirisi pulo tauapuna. Mara tagogi Moses ġamoġamo i naiei au mutulua au gia dewadewana ma au Sinai i ġeta, God ana au ola.

² *Kampa BADA ana anela Moses awarina i eġa, inanana me ai menamenana, ai rugurugui au orana da i ġegħae. Moses ai i lebalebara i 'nanai wate aina ruguruguna maiteni eġa ita ararai.

³ Moses i vinua-notanota, “Wei lamna aiwai? Aiwai aubaina ai e lebalebara wate ai eġa ita ararai? Ana nae au għereġerena ma ana tuvireirei.”

⁴ Maranai BADA i 'nanai da Moses i nenei au ġereġere da ita tuvireirei, God ai menamenana au orana Moses i ġorei, “Moses! Moses!”

Ma i paribelei, “Ee, Tau weka.”

⁵ BADA i riwa, “Eġa ma neguratnai. Wei gabuna au tepana e maimairi lamna doa vivireina, lamna aubaina am e uma ma votawanei.

⁶ Tau amamam Abraham ma Isaac ma Jacob ai God.” Maranai Moses wei babanina i nonori i rovo kaua ma naona i tere-govaġi da avena God naona ita inanai.

⁷ Anina ma BADA i riwa, “A inanai menanare mai Egypt natunatu e rarau-iviapoapoelei. Ma ai tou agu aubaina i ġetaj awariu da vibadabada awarrii ata vaitawanei. Menanare e vinuapaopoei a aramanai.

⁸ Lamna aubaina a ġairai da natunatu Egypt awari ana vaitawanei ma ana opunei da dobu wapuna ġaġġiena ma doana maumaurana ina maeni. Kampa marina mai Canaan, mai Hitti, mai Amori, mai Perisi, mai Hivi ma mai Jebus e mamae.

⁹ Ai tou a nonori. A inanai menanare mai Egypt taui e rarau-iviapoapoelei.

¹⁰ Tau a paripari-tawanem, marina ma nae vibadabada Pharaoh awarina da mai Israel au Egypt ma taravaina-opunei.”

¹¹ Wate Moses i riwa, “Tau aiai da ata nae Pharaoh awarina ma mai Israel ata taravaina-opunei?”

¹² Ma God i paribelei, “Tau tam maiteni ana mae. Maranai ravai Egyptei ma taravaina-opunei. Taumi wei au olana ona rauduneleu. Lamna ina vimataira da Tau a pari-tawanem.”

¹³ Wate Moses i riwa, “Maranai ana nae au rava awarrii ma ana riwei, ‘Amamata ai God i paritawaneu awarimi.’ Ma taui ina paridaneu, ‘Tauna wavana aiai?’ Ma aiwai ana riwei?”

* 2:10: Act 7:21 † 2:10: Moses Au Hebrew ponana ana nonora me *sinaepai*. * 2:11: Act 7:23-28 * 2:15: Act 7:29 * 3:2: Act 7:30-34

¹⁴ God Moses i riwei, "TAU MAEMAE-NONOAU." Wei mai Israel ma riwei, Tauna wavana, TAU MAEMAE NONOAU. i paritawaneu awarimi.

¹⁵ Mai Israel ma riwei, "TAU BADA, amamami ai God, Abraham, Isaac ma Jacob ai God, tauna i paritawaneu awarimi."

—Wei Tau wavau Maemae-Nonoana, kimta anatapui wenanare wavau ina ġorei."

Wei au murina Moses i nae poiana ana au dobu, ma i nae au Egypt. Ma kaua anatapui i tuputupua tuana Aaron ma Israel babadai i riwei. Ma Moses ma Aaron i nae Pharaoh awarina ma i riwei, "BADA i paritawaneiāi awarim da ata riwem da natunatuna mai Israel ma vianinei da ina opu au mutulua da pulo ina apui tauna awarina."

Egypt gulauna i riwa, "Tau ega ana vianinei da nanare ina kaei. Taui ega aiwai ġelauna ina kaei ma ina nola."

Ma God kaua maġġaġauna aniba ma viġi nirovorovo i kaukuei mai Egypt awarii, wate Egypt ai gulau amapo da i viviġa. Waira i vitara wate amapo da Egypt ai gulau kolana i vobagibagi. Mai Egypt ai ġamogamo i viġiraġelana ma mai Egypt tupuai paramaitua i oai, Wate amapo da mai Egypt ai gulau ega mai Israel ita voterei da ita nae.

11

Moses, natuevou au Egypt ai iraġe i vinolenolei

¹ Ma BADA Moses i riwei, "Anivinuabola tagogi ava ana neiai Pharaoh ma Egypt awarii. Ma au murina tauna ina voteremi da ona nae ma lamna maranaina ina viägħagna-opunemi.

² Ma nae ma mai Israel ma riwei, 'Anatapumi ona nae ma mae-turami Egypt tei ona vibagai da ai via goldei ma silvei ina veremi.'

³ BADA i kaei da mai Egypt mai Israel i vivirei. Pharaoh ana gabemani babadai ma rava anatapui au Egypt Moses i vivirana-kauei.

⁴ Ma Moses i nae ma Pharaoh i riwei, "BADA e ririwa, 'Nubautuva nanare tau Egypt anatapuna ana babarani.

⁵ Natuevou nelarai au Egypt anatapui ina iraġe, Pharaoh natuevouna orotona, amana ana epaepaia, awarina ina vikarei, ma ina ġaira da taunola awarina ina ġeta, waivinewiti taugudaina natunatui maiteni. Ġamogamo natuevou anatapui ina iraġe.

⁶ Ma dobu Egypt au anatapuna tou ġaegħena ina ġae, rorova ega nanare ma ega melanai nanare ina tupua me.'

⁷ Wate ega aiwai apoapoenia mai Israel awari ina tupua, ega auou tagogi, rava tagogi, bo ġamogamo ina gwauei. Ma kampa ona aramanie da TAU BADA, mai Israel ma mai Egypt awariei a vivilamonei.

⁸ Am gabemani babadai anatapui ina ġairai awariu ma au naou ina mae-ġaira ma ina raudune ma ina riwa, 'Laġiġina ma ruba-nae am rava tauvotaġoġim anatapui maiteni.' Lamna au murina tau ana nae." Moses meji orana i oai ma Pharaoh i netawanei.

⁹ BADA Moses i riwei, "Pharaoh tam ega ina rautaniġanem. Wenanare ina tupua da tau kaua babai ana kaei au Egypt."

¹⁰ Moses ma Aaron kaua ġaegħei ma babai i kaei Pharaoh au matana wate BADA Pharaoh orana i vibdoi da mai Israel ega ita paritawanei.

12

Ragħoġa karenha

¹ BADA, wenanare i babani Moses ma Aaron awarii au Egypt,

²* "Marina da e nenai wei nawaravina lamna nawaravi tagogi ma weka ona vikarei da ami madę́ga ona iavi.

³ Ona vinolola mai Israel anatapui awarii, 'Au pom "i-10" na wei au nawaravina oroto tagotagħi ava sīpu ġauba bo għote ġauba ina rautani ana numa ravai Aubai. Ġamogamo tagogi numa tagogi Aubaina.'

⁴Mepa da numa tagogi ana rava i viruġġa ma sia i rata guratana, lamna mae-turai maiteni sia ina ġutai rava ai maġġa ma ai am ana au ruva nanare.

* ^{3:14:} Pona Hebrewi, *Tau maemae-nonoau* nonorana me *Yahweh*. Vipanipani au Babilon i kwa ma mai Jew i nememei au murina, tau i vitumagħana da wawa *Yahweh* lamna vivivireina ma ega aiai ina latoni. Aubaina da ai au buka giruma ġaegħei wei wvana i girumi da ega melanai ina latoni ma *Adonai* (bada) i latolatoni epaiana. Ma riwa BADA muomuonei i girumi lamna God wvana. * ^{12:2:} Ai madę́ga ivanova (Calenda) weka i vikarei

⁵ Ĝamoĝamo e rarautani lamna orotona ma ana madega tagogi ma aiaina ega ana apoapoe aiwai.

⁶ Ona ĝamo-kaei da au pom ^vi—¹⁴na wei au nawaravina. Ma maranai madega e arearere, mai Israel anatapui ai ĝamoĝamo ina viraĝeni.

⁷ Metauna au numana sia e aniani kampa tara ina taraiĝui ma metaeta au tepana, au gabaurina ma au ririvana ina pasi-naiei.

⁸ Waguvaranaina tagogina taui siana ai moniana au tepana ina apui, ma palawa ega yist maiteni ma siperi vivigorai maiteni ina ani

¹¹ Anatapumi wenanare ona am, vaĝai vigara ona vigarei: Ami ae uma ona oteni, ami jiĝona au urami, Ma ona am laĝilajna. Wei lamna BADA ana Raĝona torelana.

¹² —Wei waguvaranaina, Tau Egypt ana naeni ma ĝamogamo da rava natuevou ororotoi anatapui ana viraĝeni, ma Egypt ai god anatapui ana tuvaidoedoi. Tau BADA.

¹³ Wate tara au metaeta ina vimataira da taumi kampa o mamae. Ma maranai wei matairana ana inanai, ana raĝonimi. Ma ega aiwai apoapoa awarimi ina tupua maranai mai Egypt ana kovoĝi,

¹⁴ Wei torelana ona nota-nonoei madegana patapatana, da TAU BADA aiwai a kaei nu-anuami ega melanai ina vuru. Ami epaepaia anatapui wei marana ina vivrei ai mara au anatapuna.”

Palawa ega yist maiteni ana torela

¹⁵ “Au pom 7 au orana Palawa ega yist maiteni ona ani. Ma torela au karena, au numu yist anatapui ona tawanei. Aiai da palawa yist maiteni i apui ma i ani, wei ravana anina da mai Israel ai damei ona viopuni.

¹⁶ Au pom tagogi torela au karena ona vitagiemi ma nanare torela au damona, ma BADA ona voepaepai ma ona viborumei. Wei au marai ega aiai ina nola dadana, Wate ami lam ava ona lauvoa.

¹⁷ —Taumi palawa ega yist maiteni torelana ona kaei da ega nuanuami ina vuru aubaina wei au marana, mai Israel au Egypt a taravaina-opunei. Am epaepaia wei torelana ina kaukauei madegana au patapatana.”

Raĝona

²¹ Ma Moses Israel dam nununai babadai i kwatuei ma i riwei, “Ona nae ma sипу bo gote natuna orotona ona vunu ma ami numa ravai maiteni Raĝona torelana ona ani.

²² Rugurugu ona turautuvi sипу au tarana au aboma ma ami numa metaetana au tepana ma au adana ona pasi. Ma ega aiai numa ina opu-tawanei da ubaurbanai.

²³ Ma waguvurai BADA Egypt anatapuna ina naeni ma mai Egypt ai natuevou ina viraĝeni. Wate maranai tara ina inanai metaeta au tepana ma au adana, BADA wei numana ina raĝoni ma iraĝe-anelana ina viĝaei da ega ina rui da ina viraĝenimi.

²⁴⁻²⁵ —Ma maranai BADA dobu i paripari-vainuĝanimi ona ġeta, taumi ega nuanuami ina vuru da madegana patapatana Raĝona torelana ona kaukauei. Taumi natunatumi maiteni wei tarawatuna ona vojijina-nonoei.

²⁶ Maranai natunatumi ina paridadana, ‘Wei torelana anona aiwai?’

²⁷ Ma taumi ona paribelei, ‘Wei torelana lamna Raĝona viegualau pulona BADA awarina, aubaina wariaĝa au Egypt BADA mai Israel ai numa i raĝoni, ma mai Egypt ai natuevou i pupuni, ma tauai natunatuiai i voterei.’ Ma mai Israel i mae-ġaira au doa ma BADA i raudunelei.

²⁸ Ma mai Israel i nae ma BADA aiwai Moses ma Aaron i riweia i kaei.

Natuevou nelarai i 'raĝe

²⁹ Waguvurai nubautuva BADA natuevou nelarai anatapui i viraĝeni au Egypt. Pharaoh natuna, ana epaia awarina i vikarei, ma i ġaira da panipani ai natuevou nelarai awari. Ma ĝamogamo ororotoi natuevou anatapui maiteni i pupuni.

³⁰ Waguvura au pouna Pharaoh ma ana gabemani babada ma mai Egypt anatapui i vomairi. Numa tagotagogi ava au Egypt tevera tagogi i 'raĝe, ma tou ma tarakwatu ġaegaena i ġae.

³¹ Pharaoh wei waguvaranaina Moses ma Aaron ai riwa i paritawanei da i nei awarina ma i egari, “Ami rava mai Israel maiteni ona vomairi ma au dobu ona oputawanei! O vivibaġei nanare ona nae ma ami BADA ona voepaepai!

³² Taumi ami ĝamogamo anatapui ona vaia ma ona opu, ona nae, wate ami God ona vibaġai da ina viaiainiu.”

³³ Mai Egypt anatapui mai Israel i egari da ina vipaparana ma Egypt ina opu-tawanei ma i riwa, "Mepa da ega ona nae tauai anatapuiai ana irage."

³⁷ Mai Israel dobu Rameses i netawanei ma i babara-nae au Sukoth. Nelara anatapui 600,000 nanare, waivine ma roaroa ega ita iavi.

³⁸ Patara gaeäena gelauna i vomairi mai Israel maiteni. Taui gamogamo boruna gaeäena maiteni i nae.

³⁹ Maranai mai Egypt i viagägana-opunei taui ega ai tamaina ita vokaukauei ma lagilagina i opu, taui palawa pasipasi nonoana ega yist maiteni i vaia ma palawa bagibagina i apui.

⁴⁰* Mai Israel madega 430 i mae au Egypt.

Ragona torelana ana tarawatu

⁴³ Ma BADA Moses ma Aaron i riwei,
Raägona torelana ana tarawatu wenanare:

Dobu gela wei torelana ega ina ani.

⁴⁴ Ami taunola gimagimaranma inibori i vaia wei torelana ina ani.

⁴⁵ Taomana ma taunola maia aubaina e nolanola taui ega ina ani.

⁴⁶ Raägona sipuna numa tagogiyava au orana ona ani, ma ega sia aiwaina ona opunei au doa ma gelamina ega ona gai.

⁴⁷ Mai Israel anatapui Raägona torelana ina ani.

13

Natuevou vovivirana

¹ BADA Moses i riwei,

² "Natuevou nelarai au Israel anatapui ona vovivirei Tau awariu. Roaroa ma gamogamo natuevoui ororotoi au Israel anatapui, Tau gariuei."

Moses mai Israel i riwei,

¹¹ "BADA ina ruiemi mai Canaan ai au dobu ma dobuna ina veremi, noinoimi i paripari-vainuägani nanare.

¹² Natuevoumi nelarai ma ami gamogamo natuevoui ororotoi anatapui BADA ona verei,

¹³ Wate sipu orotona BADA ona verei ma awarina *donki* natuevouna ona gimara-melei, ma mepa da ega ona gimara-melei, lamna *donkina* uana ona gomui. Taumi natunatumi nelarai natuevoui ona gimara-melei.

¹⁴ —Ma mara au murina, natunatumi ina vitara-viravira, 'Aiwi aubaina wei ta kaukauei?' Tam ma paribelei, 'BADA urana vivirewapananei i taravaina-opunelai, panipani numanei au Egypt.

¹⁵ Pharaoh orana i bagibagi ma ega mai Israel ita voterei da ita nae. Lamna aubaina BADA natuevou anatapui au Egypt i virägeni, rava ma gamogamo anatapui. Lamna aubaina tau gamogamo natuevouna BADA a vereverei ma natuevou orotona a gimagimara-melei'

¹⁶ Wei gimara melanana lamna me mataira au uram ma au muruam e oteotenai ma wei e vivimataira da BADA urana vivirewapananei Egyptei i taravaina-opunelai."

²⁰ Mai Israel Sukoth i voterei ma mutulua au giana au Etham i mae-gubai.

²¹ Ma marai BADA i vinao me apau maimairina ma waguvvarai BADA i vinao me tuatua araratanma maimairina ma lalalainei taui i rau-ataraveni. Ma lamnei, taui marai ma waguvvarai i bababara.

14

Pharaoh mai Israel i viagägana-opunei

⁵ Maranai riwa i geta Pharaoh awarina, da mai Israel i ruba. Pharaoh ana gabegabemani maiteni ai nota i virai mai riwa, "Tauta aiwai ta kauei? Ma ata taunola ta voterei da i nepai!"

⁶ Anina ma Pharaoh ana chariot i vokaukauei, ma ana sorodia i vaia ma i nae.

⁷ Ana sorodia anatapui 600 vinevinei ai au chariot i geru, ma chariot gelaui au Egypt maiteni i nae.

⁸ BADA, i kauai de Pharaoh, Egypt ai gulau nuuanuana i vopotai ma mai Israel i viagägana-tägoei, Mai Israel ana tepatorai i nenae.

⁹ Mai Egypt ana sorodia i viağāga, Pharaoh ana horse ma chariot anatapui ma horse babadai ma ana sorodia anatapui, maiteni i viağāga da au gera i mamaelana, i votani dobu Pi-Hahiroth, Baal-Sephon au baba ġelauna.

¹⁰ Maranai Pharaoh i tuturiai, mai Israel i taepai da i 'nanai ma i rovo kaukaua da orai i sisi, ma BADA awarina i garara agu aubaina.

¹¹ Ma mai Israel Moses awarina amloi i ġaigai i pa, "Au Egypt eġa kokoaga da u taravaina-opunelai da weka au mutulua ana iraġe bo? Aiwai u kaeui awariai?

¹² Tauai au Egypt a riwem, 'Ma voterelai ma ana mae ma Egypt ai taunola!' I ai kaua da tauai ata mae Egypt ai panipani, ma eġa au mutulua ata iraġe.'

¹³ Moses ana rava i paribelei, "Eġa ona rovo! Ona mairi jijina ma ona inana menanarena BADA ina vilawanimi amadodo. Mai Egypt amadodo o inainanai eġa melanai ona inana-melei.

¹⁴ BADA aubaimi ina viġavia. Taumi ona mae-genuatau."

Israel boga au pouna i babara damana

¹⁵ Ma BADA, Moses i riwei, "Aiwai aubaina awariu agu e toutouei? Mai Israel ma riwei da ina vidagu.

¹⁶ Am jiġona ma voepai da ma viloloi boga au tepana ma boga ina vilamonei, ma mai Israel boga au pouna doa au alalana ina babara damana.

¹⁷ Tam ma raubiga, Tau mai Egypt a vitepatorai da mai Israel ina viağāgei. Maranai Pharaoh ana vovaiubai, ana sorodia, chariot ma ana horse sorodai, rava Tau ina voepaepai.

¹⁸ Tau Pharaoh ana vovaiubai, ana chariot ma ana horse sorodai da mai Egypt ina vivivireu ma ina aramanei da TAU BADA."

¹⁹ Anina ma God ana anela, mai Israel ai eta tauravenia i nae ma mai Israel au muri i mairi. Ma apau maimairina au naoi i nei ma taui au muri i mairi.

²⁰ Apau mai Israel ma mai Egypt au poui i mairi, ma maranai au i pom, apau lalalaina mai Israel i verei ma mai Egypt au waguwaguvareina i mae. Ma lamna aubaina mai Israel ma mai Egypt ai au gabu i mae-genuatau.

²¹ Moses ana jiġona i viloloi boga au tepana ma BADA kariwabu ġaeġaena i paritawanei, ma boga i vilamonei, kariwabu i ruba da mara i tom da doa boga au pouna i alala.

²² Ma mai Israel boga i damani doa au alalana, Ma boga olana i mairi au oiei ma au kelakelau.

²³ Anina ma mai Egypt, Pharaoh ana horse ġelau, chariot ma taurubeina mai Israel i votaġoi da au boga i rui, mai Israel au murii.

²⁴ Ubaubanai boibogħi BADA apau maimairina ma ai tuatuana araratana au orana ma i 'nana ġaira ma mai Egypt i viaiġoagoi.

²⁵ Ma chariot ana aniruba i viapoapoeni da ruba i kauana-avei. Ma mai Egypt i riwa, "BADA mai Israel e vovoagu, ma e viviġavieta, lamna aubaina tana ruba-tawanei!"

²⁶ Ma BADA Moses i riwei, "Am jiġona ma viloloi boga au tepana da boga ina nememei, mai Egypt au chariot ma sorodia horse au tepana anatapui ina puru-pai."

²⁷ Madęgħi i ġoġoġo ma Moses urana i viloloi boga au tepana, ma laġilägħina boga i naeme ana au gabu. Mai Egypt ita ruba wate BADA taui au boga i viorereni.

²⁸ Boga i naeme ana au gabu ma mai Egypt sorodia anatapuina i ruirui au boga i monu. Eġa aiai tagogi ita lawana.

³¹ Maranai mai Israel i 'nanai da BADA wei kauana vivirewapanana i kaeui mai Egypt awarii, taui BADA i vivirana-kauei ma i vitumägħanei ana taunola Moses maiteni.

15

Moses ana wela

¹ Anina ma Moses mai Israel maiteni wei voepaepa welana i ravi BADA awarina: Tau ana wela BADA awarina ma ana voepaepai, aubaina ana ġavia i vipupui, ma horse ma chariot taugerui au boga i viorerena-naie;

² BADA au rewapani ġaegħaena,
ma welej ana voepaepai;

Tauna i vilawaniu Tauna au God ma ana voepaepai,

Amamau ai God ma lamna aubaina ana vimae-ġaegħaeni ma ana voepaepai.

³ Tauna wavana BADA.

Tauna ġavia ravana.

⁴ Pharaoh ana chariot ma ana sorodia au boga i viorereni;
 Ana sorodia vinevinei au Boga Lebalebarina i monui.
⁵ Gabinou i wanaiwāgi da taui i purui;
 ma i monu boga au gabaurina me ġaima.

⁶ Oo BADA ura-oiem vivirewapana kaukauana,
 ura-oiem am ġavia e viviaimutumutui.

⁷ Tam ġeġetelaram
 ma taui i viġaviem u vovaiubai.
 Am meji araratana u paritawanei
 da taui i aragibui me ai ragorago.

⁸ Boga au tepana u uvena ma boga olana i mairi,
 i mairi genuatau me birlbiri,
 ma gabinou i alala.

⁹ Am ġavia i riwa, "Ana viaġaġei,
 ana vojjini,
 ai purapura ma ai maura anatapui ana ġutai,
 ma aiwai a ġoegoei ana vaia,
 Au sod ana lavui ma ana vipupui."

¹⁰ Wate lavutumei u uvena,
 ma gabinou taui i purui;
 i monu me ġaima rabama au ġaġġena.

¹¹ BADA, mepa god ġelau me tam bo eġa? Eġateni!
 Tam anina vivivirem,
 am rewapania i rata dewadewa da tauai a rovorovoem,
 Tam kaua babai ma virewapanai taukaueina.

¹² Tam uraoiem u viloloi,
 ma doa am ġavia i lawani.

¹³ Am rava u vaimelei ma u rauetaraveni am nuavaina patupatutunei,
 Ma am rewapanai u taravaina-naiei am au animae vivivireina.

¹⁴ Dобу ġelau wei riwana i nonori ma orai i sisi kaua.
Mai Philistia orai rovo ina vioai.

¹⁵ Edom gulagulaui ina rovo kaukaua,
Moab nelara rewapania ini ina sisi.
Canaan maemaei anatapui inii i wanagwadai.

¹⁶ Rovo ġaġġena anatapui orai i oai,
 uram ana rewapanai taui i mairi kwakwa me kokoitau,
 ma am rava ina verautua BADA,
 da ravai u vaivai-melei ina verautua.

¹⁷ BADA ma taravaina da am au ola ina raunuma,
Gabu u vinevineiana,
 tam uramei voavoaina.

¹⁸ BADA ina vibada nonoa.

¹⁹ Mai Israel doa au alalana i babara damana. Wate maranai mai Egypt ai horse ma ai chariot taugerui i rui au boga, BADA waira i neiana-meleiai da anatapui i purui *Lamna aubaina Moses* ana rava maiteni wei welana i ravi.

Miriam ana wela

²⁰ Peroveta Miriam, Aaron novuna tambourine i vaia ma waivine anatapui, tauna i votaġotāgoi ma tambourine i vilakaloei ma i ara.

²¹ Miriam wei welana i ravi, "Tana raua BADA awarina, aubaina tauna ġavia i vilamolamonei ma horse ma chariot taugerui au boga i viorereni."

Waira viviġorana i aii

²² Anina ma Moses mai Israel i taravaini da Boga lebalebarina i netawanei ma i nae au Shur mutuluna. Aupom tonuġa au mutulua i babara wate waira eġa ita nelāġai.

²³ Maranai au waira vuvvra Marah i ġeta da ita uma wate wairana umana i viġora da eġa ita uma, lamna aubaina wei dobu wavana Marah.*

²⁴ Ma rava Moses awarina i pariġai i pa, "Aiwai tana umai?"

* 15:23: Au Hebrew pona *Mara nonorana me vigora*.

²⁵Anina ma Moses i paritou BADA awarina agu aubaina, ma BADA ai tupona i viatataiei. Ma wei aina i tawanei au waira ma waira i viaini aniuma aubaina.

Nai au gabuna BADA ana tarawatu rava i verei ai lawana aubaina, ma ai votelatela i raudadani.

²⁶BADA i riwa, "Mepa da riwau ona nonora-kauei ma kaua aiaii ona kauei au matau ma riwau anatapuna ona voletelelei, da kovōga mai Egypt a vereverei, ēga ana veremi. Tau BADA tauvilawanimi."

²⁷Muriai taui i nei au Elim kampa vuvura 12 ma mutulua ai me pa 70 i maimairi ma kampa waira au adana i mae mara aburuna.

16

God Israel lam i verei

¹Anina ma mai Israel Elim i netawanei ma i nae au mutulua wavana Sin, wei dobuna lamna Elim ma Sinai au poui. Egypt i opu-tawanei nawaravi tagogi ma wiki ruāga i kwa ma wei au dobuna i āeta.*

²Mai Israel Moses ma Aaron awarri i āgaiāiawa.

³Ma i riwei, "BADA boibōgi au Egypt ita virāgeniai! Kampa sia nauii a kiala kwaviviroi ma ai āgoanei a amam, wate taumi o taravaina-opunelai au mutulua da am-irāge ana irāgelei."

⁴Anina ma BADA Moses i riwei, "Lam marei ana paritawana-āgaireiai me garewa. Au pom patapatana rava ina opu ma lam au pom tagogi ruvana ava ina vaia. Wei taunei rava ana raudadani da riwau bagibagina ina voletelelei bo ēga."

⁵Au pom ^vi-6⁻na au pom ruāga ruvana ina tamai da ina yokaukauei.

¹¹BADA Moses i riwei,

¹²"Mai Israel ai āgaiawa a nonori. Ma riwei, 'Raviraviai taumi sia ona ani, ma ubaubanai lam ona maurei.' Ma lamna maranai ona aramanei da Tau BADA ami God."

¹³Raviraviai kiu iviki boruna i nei da taui i maemae lana gabuna i vioai. Ma ubaubanai āgelauna doa anatapuna turuvani i vioai.

¹⁴Maranai turuvani i paira ma purapura avavai me palawa nanare doa au tepana i mae.

¹⁵Maranai mai Israel wei purapurai i 'nanai ma i vinuanaina ma i vitara-viravira vivira i pa, "Wei aiawai?"

Ma Moses rava i riwei, "Wei aniam BADA i veremi."

¹⁶BADA riwana bagibagina lamna wei, "Rava tagogi lam ana au ruva ina tuarui. Nau muomuoī ruāga[†] ruvana ona tuarui, rava tagogi au numa aubaina."

¹⁷Aiawai i ririweiā nanare mai Israel i kauei, āgelaui ruva āgēgaena i tamai ma āgelaui ruva aburuna i vioai.

¹⁸Wate maranai i ruvai ma i 'nanai da rava anatapui ruva i vioai da tagotagogina, Taui da ruva āgēgaena i tamai ega aiawai ita mae-terei ma taui da aburuna i tamai ma i nelāgai da lamna tagotagogina taui aubaii. Numa nununai ravai lam ruvaruvana i vioai.

¹⁹Anina ma Moses i riwa, "Ēga aiai lam ina tereriei da au maratom aubaina."

²⁰Wate rava āgelaui Moses ēga ita rautaniānei ma lam āgelaui i tereriei ma ubaubanai motamota lam i oai ma i bova, ma Moses amlona i āgaiāi taui awarri.

²¹Ubaubanai patapatana taui lam ai au ruva i tuarui, ma maranai madegā i vibola ma lam i viwaiā da i amoai.

²²Ma au pom ^vi-6⁻na taui au pom ruāga ruvana nanare i tuarui, ma melagai babadai i nei da Moses i pariverei.

²³*Moses taui i riwei, "BADA riwa bagibaginei wenanare i riwa, 'Maratom lauvitau vivireina Sabate ana mara, Tau aubaii. Aiawai apuna o āgoēgoe amadodo ona apui ma aiawai vitavana o āgoēgoe amadodo ona vitavi. Ma aiawai i mae-terei, ona tereriei au maratom aubaina."

²⁴Ma taui lam i tereriei ma ēga ita bova ma ita motamota me Moses i ririwa nanare,

²⁵Moses i riwa, "Wei lamna amadodo ona ani, aubaina amadodo Sabate, lauvitau ana mara vivivireina i terei BADA aubaina. Ma amadodo amapo lam au doa ēga ona nelāgai.

²⁶Au pom 6 lam ona tuarui, wate au pom ^vi-7⁻na Sabate, amapo lam ēga ona nelāgai."

²⁷Ma au pom ^vi-7⁻na rava āgelaui i opu da lam ita tuarui wate ēga aiawai ita nelāgai.

²⁸Anina ma BADA, Moses i riwei da rava i riwei i pa, "Mara biāga au tarawatu ma au viaramana ona rau-āgaiāie?

* **16:1:** Mai Israel au pom 15 nawaravi tagogi (madegā weka iavana i vikarei) ma Egypt i opu-tawanei. † **16:16:** Hebrew ai ponei 1omer ana ruva lamna 2 Ltr ruāga wei lamna ruva tagogi ana ruva. * **16:23:** Exo 20:8-11

²⁹ Ona notai da Tau BADA, Sabate a veremi, ma au pom ^vi—6—na lam a veremi da au pom ruāga aubaina. Ma rava anatapui au numa ita mae ma avena ita opu."

³⁰ Ma au pom ^vi—7—na rava i vilauvitau.

³¹ Rava mai Israel wei lamna i ġorei "manna."

³⁵ *Ma mai Israel manna i amam da madeġa 40 i kwa. Taui manna i amam da Canaan ana au parata i ġeta.

17

Waira kirei i opu

¹ *Mai Israel mutulua Sin i netawanei, ma mepa BADA i ririweia nanare kampa i mae-nae. Taui au Rephidim i rauğaravu, wate kampa ega waira da rava ita uma.

² Anina ma taui Moses maiteni i viparipariniġai i pa, "Waira ma verelai da ana uma!"

Ma Moses i paribelei, "Aiwai aubaina o paripariniġieu? Aiwai aubaina BADA o raraudadani?"

³ Wate rava nuanuai i arelana-kauei waira aubaina ma Moses i eni i pa, "Aiwai aubaina Egyptei u tere-opunelai da natunatuiai ma ai ġañoġamo maiteni nuarelana ana iraġelei?"

⁴ Ma Moses i paritoutou BADA awarina i pa, "Aiwai ana kauei wei ravai awarri? Taui ġaime marina ina virāgenju."

⁵ BADA Moses i paribelei, "Israel babadai ġelaui ma taravaini ma kwapu taunei Nile u raviravia ma vaia ma ma vino.

⁶ Tau kampa au naom au kira ana maimairi au Horeb. Kira ma ravi da waira ina opu da rava ina uma." Ma Moses nanare i kauei Israel babadai au matai.

⁷ Moses wei dobuna i ġorei Massah* ma Meribah, † aubaina weka mai Israel Moses maiteni i viparipariniġai ma BADA i raudadani maranai i riwa, "BADA weka tauta maiteni bo ega?"

Mai Israel ma mai Amalek i viġaiġaiawa

⁸ Mai Amalek i nei ma Mai Israel maiteni i viġaiġaiawa au Rephidim.

⁹ Moses Joshua i riwei, "Rava ma vinei da ona nae mai Amalek maiteni ina viġaiġaiawa. Au maratom tau ola au tepana ana mairi ma God ana kwapu ana vovojjini."

¹⁰ Ma Joshua mai Amalek maiteni i viġaiġaiawa me Moses i ririweia nanare. Moses, Aaron ma Hur i ġiae ola au tepana.

¹¹ Maranai Moses urana ana kwapuna i voepai mai Israel i vivirewapana wate maranai urana i teretere-gairei mai Amalek i vivirewapana.

¹² Moses urana i garigari ma Aaron ma Hur ġaima i neiai da i terei ma au tepana Moses i kiala. Aaron ma Hur, Moses au ririvana i mae, tagogi au navanavana ma ġelauna au navanavana ġelauna ma urana i voepai ma i vojjini da madeġa i neulai.

¹³ Ma Joshua ana sorodja maiteni Amalek ai sorodja sodlej i vovaiubai.

18

Jethro poiana Moses i raugenari

¹ Moses poiana Jethro, mai Midian ai pirisi pulo tauapuna i nonori aiwai anatapuna BADA i kaukaueia Moses ma mai Israel awarri; ma menanare Egyptei i taravaina-opunei.

⁵ Moses poiana - Jethro, Moses awana ma natunatuna nelarai ruāga i nei da Moses ita raugenari au mutulua. Weka Moses ana rava maiteni i rauğaravu God ana ola au ġereġerena.

⁶ Jethro riwa i paritawanei Moses awarina da taui i nenei.

⁷ Ma Moses i opu da poiana ita nebelei. Tauna i mae-ġaira ma poiana i raudunelei ma i vigia-lagħolagħonei. Taui i viegħualu vivira ma i rui Moses ana au numagara.

⁸ Ma BADA aiwai i kaukaueia Pharaoh ma mai Egypt awari mai Israel aubai; ma apoapoe anatapui au eta i nebelei; ma menanare God taui i vilawani; anatapui poiana i parivei.

⁹ Ma Jethro nuanuana i ai kaua maranai i nonori menanare BADA aiwai anatapuna aiai i kauei mai Israel aubai maranai Egypt urai vivirewapanana awariei i tere-opunei.

* 16:35: Jos 5:12 ** 17:1: Num 20:2-13 *** 17:7: Hebrew ponanei, Massah anona raudadana

† 17:7: Pona

Hebrew, Meribah anona viparipariniġai

¹⁰ Jethro i riwa i pa, "Voepaepa BADA awarina. Tauna Pharaoh ma mai Egypt awarii i vaitawanem. Ee, Egypt urai vivirewapanana awarie i vai-tawanem.

¹¹ Marina a aramanei da BADA i ġetelara ega me god ġelau nanare. Aubaina BADA ġogogulagulaui mai Egypt ai kaua apoapoe mai Israel awarii aubaina i kovoġi."

Jethro Moses i vinua-terenei

¹³ Ma marana i tom, Moses ana au anikiala i kiala da ita rauetara. Ma rava Moses i mairi-kwaviviroi ma i vipaipai ubaubanai da madega i ġāira.

¹⁴ Maranai Jethro i 'nanai aiwai anatapuna Moses i kaukauei rava aubaii. Tauna i vitara-viravira i pa, "Wei aiwai rava awarii e kaukauei? Aiwai aubaina ainelam wei e kaukauei, ma wei ravai e maimairi pompom da am riwa ita nonori?"

¹⁵ Moses i paribelei i pa, "Tau wei a kaukauei aubaina rava e nenei awariu da ita aramanei aiwai God e goeġoei da ita kaei.

¹⁶ Maranai rava ruaga e viamparipari. Taui e nenei awariu da a teretere-vajijimani; ma God ana riwa ma ana tarawatu a ririwei"

¹⁷ Moses poiana i riwa i pa, "Aiwai tam e kaukauei lamna ega ita ai.

¹⁸ Nola e kaukaueia i vitai kaua da tam ainelam ega tagotagogina uta kaei. Tam ma rava ona voirařage.

¹⁹ Ma rautaniġana ma ana vinuaterenem; ma God awarim ina mae. Tam anina da rava ma raviapai God au naona ma ai viamparipari ma neiai awarina.

²⁰ God ana parivai-araramana ma ana tarawatu ma viaramana ma taui ma viatataiei da menanara ita maenei ma aiwai ita kaei.

²¹ Wate am patara awariei nelara ġelau araramanii ma God e viviborumei ma ega amkwalakwalai ma vinei da rava ina vibadei: ġelau rava 1,000 ina vibadei; ma ġelau rava 100; ma ġelau rava 50; ma ġelau rava 10 ina vibadei.

²² Taui rava ai viamparipari ina tere-vajijimani. Wate aiwai da i piripiri, ina neiai awarim. Taui ina voaqum da am vita ina avarai ma ina votelateli.

²³ Mepa da God i ririweiha ma kaei amapo ega ma voirařage ma rava anatapui ana nuaiai ina nae ai au num."

²⁴ Moses, poiana i rautaniġanei ma aiwai anatapuna i ririweiha i kaei

²⁵ Ma Moses mai Israel araramana i vinei da rava 1,000 i vibadei, ma 100, ma 50 ma 10 i vibadei.

²⁶ Wei babadai, rava ai viamparipari i teretere-vajijimani ma aiwai da i piripiri i neneiai Moses awarina. Ma kaua telateli i teretere-vajijimani.

²⁷ Anina ma Moses, poiana Jethro i viegualuei, ma Jethro i naeme ana au dobu.

19

BADA i vieġana-melei au ola Sinai

² Mai Israel Rephidim i netawanei da i nae au mutulua wavana Sinai. Ma kampa ola au karenia i raġgaravu.

³ Ma Moses i ġae au ola da God ita nebelei. Ma BADA ola au tepana ma Moses i ġorei i pa, "Wei mai Israel Jacob noinoina ma riwei."

⁴ Taumi matamie i inanai aiwai mai Egypt awarii a kaei ma me manubada natunatuna au papena e avavarai nanare a avaraġi ma a neiana-melemi awariu.

⁵*Mepa da ona voteleteleu ma au parivainuġana bagibagina ona vojjina-kauei, lamna dam anatapui au dobu awariei taumi ana vinem nuuanuau pouna. Avena da dobu anatapuna Tau ġariuei.

⁶ Wate taumi aubaii ona vepiġi, ma ami dam ona vovivirei tau ainelau aubaii, wei babani mai Israel ma riwei."

⁷ Ma Moses i ġaira me ma dogadogara i kwatuei ma aiwai anatapuna BADA i ririwei i pariverei.

⁸ Ma rava anatapui i paribelana gogona i pa, "Tauai aiwai anatapuna BADA i ririwei ana kaei." Ma Moses ai paribelana i ġaiana-melei BADA awarina.

⁹ BADA, Moses i riwei, "Tau apau potopotona au orana ana nei, da rava ina nonoriu Awarim ana bababani da ina vitumaġana-nonoem." Anina ma aiwai rava i ririwei Moses BADA i riwei.

¹⁰ Ma BADA Moses i riwei, "Ma ġaira ma rava ma voaqi amadodo ma au maratom da orai ina ogai da tau ina viborumeu. Ma ai gara ina ogai.

* 19:5: Deu 7:6

¹¹ Ma ina vokaukaua au pom vitonuina aubaina. Nai maranaina Tau ana ġairai au Ola Sinai, rava anatapui au matai.

¹² Parata ma tere-kwaviviroi au ola. Ma riwa bagibaginei ma riwei ma pa, ‘Ona inana-kaua da ega au ola ona ġae bo ola ona tapedadani. Aiai da ola i tapedadani ina iraġe.’

¹³ Mepa da rava bo ġamoġamo wei paratana i voraġoni, taumi ega nai ravana bo ġamoġamona ona vodadanu wate ġaimei bo aierei ona virāġeni. Wate maranai taure ponana i ratara lamna rava ina ġae au ola.’

¹⁴ Ma Moses olei i ġaira memei ma ana rava i riwei da orai i vokaukauei da God ina viborumei ma ai gara i ġoġi.

¹⁵ Ma i riwei, “Ona vokaukaua mara vitonuina aubaina, marina da nai marana ega ona viawawana.”

¹⁶ Ubaubanai au pom vitonuina, waiparara, namanamara ma apau potopotona ola i purui, ma taure i tou. Maratagogi rava anatapui kampa i mamae i rovo kaukaua ma i sisi.

¹⁷ Ma Moses rava i ravena-opunei da God ita nebelei. Taui ola au karena i mairi.

¹⁸ BADA ai araratanei i ġairai ola Sinai au tepana. Ma bau potopotona olana i puru-pai. Bau kampa i ġegħe me modu potopotona e ararai nanare, ma olana anatapuna i vigugni.

¹⁹ Ma taure ponana i ratara. Ma Moses i babani ma God i paribelei ponana nonorana me waiparara.

²⁰ BADA i ġairai ola Sinai au tepana ma Moses i kwatuei da ita ġei ola au tepana. Ma Moses i ġae.

20

God ana tarawatu 10

¹ Ma God i babani ma wei riwai i latoni,

² TAU BADA ami God, panipaniei au Egypt a taravaina-opunemi.

³ Taumi ega god ġelauj ona raudunelei, Tau ainelau ona rauduneleu.

⁴ Taumi ega aiwai au mara bo au dobu bo boga au orana dobu au gabaurina kokoitaui ona kaei da ona raudunelei.

⁵ *Taumi ega kokoitaui ona raudunelei bo ona viborumei, aubaina TAU BADA ami God ununurana. Ma taui i gedugeduaieu ana kovoġi da kimta au ^vi-4-na.

⁶ Wate taui aiavoi nuanuau e vaivaini ma au tarawatu e vovojjini au nuavaina maemae-nonoana ana verei da kimta tausau nanare.

⁷ Taumi ega BADA ami God wavana ona vinamei. Aiai da BADA wavana e vivinamei ina kovoġi.

⁸ *Sabate ega nuanuami ina vuru ma ona notanotai ma ona vovivirei tau awariu.

⁹ Aupom 6 ami nola ona kaei.

¹⁰ Wate au pom ^vi-7-na lamna Sabate, lauvitau marana, i vovivirei BADA ami God aubaina. Wei au marana ega aiai ina nola: ega tam, natum orotona bo wavinena, am taunola orotona ma wavinena, bo am ġamoġamo, ma dobūgħela ravai awarim e mamae.

¹¹ *Aubaina au pom six au orana BADA mara ma dobu i kaei; boga ma anatapui au orana.

Wate i vilauvitau au pom au ^vi-7-na. Lamna aubaina BADA Sabate i viaiaini ma i vovivirei.

¹² *Amam ma alom ma vivirei, da am lawana ina manawa au dobu, BADA am God e vereverem.

¹³ *Ega ma virāġena.

¹⁴ *Ega ravaġela awana ma viawawanei.

¹⁵ *Ega ma danene.

¹⁶ *Ega ma viwawu-moru

¹⁷ Ega ravaġela ana numa ma vikwinei. Ega ravaġela awana ma vikwinei, bo ana taunola orotona bo wavinena, ana bulumakau, ana donki, bo aiwai ġelauj ġarnei.

21

Rau iviapoapoe ai Tarawatu

¹² “Aiai rava ġelauna i ravi da i virāġeni, nai ravana ina virāġeni.

¹³ *Wate mepa da i vunu-boai da i virāġeni. Tauna ina ruba dobu a vinevineia kampa.

* **20:5:** Exo 34:6-7; Deu 7:9-10 * **20:8:** Exo 16:23-30 * **20:11:** Gen 2:1-3 * **20:12:** Mrk 7:10; 10:19 * **20:13:** Gen 9:6; Mrk 10:19 * **20:14:** Mrk 10:19 * **20:15:** Mrk 10:19 * **20:16:** Exo 23:1; Mrk 10:19 * **21:13:** Num 35:10-34

¹⁴ Wate rava i vioga da i viraġena, ma ana lawana aubaina i ruba pulo au aniapuna, ravana ina taravaina-opunei ma ina viraġeni.

¹⁵ —Aiai amana bo alona i ravi, nai ravana ina viraġeni.

¹⁶ —Aiai da rava ġelauna i danenei da i gimarei bo awarina ma i nelagai, nai ravana ina viraġeni.

¹⁷ *—Aiai da amana bo alona e parivai-apoapoeni nai ravana ina viraġeni.”

22

Tarawatu am lawana aubaina

¹⁶ “Mepa da oroto wavine matatapu i gwalai da i viawawanei, ma eġa aiai wei wavinena ita rautani da ita ravagi. Nai orotona wavine mataopana ina vimaiei ma ina ravagi.

¹⁷ Wate mepa da amana i viġa, lamna maranai oroto matatapu ana mataopa ina vimaiei wavine amana awarina.

¹⁸ *Aiai wavinena e paraparauma lamna ina viraġeni.

¹⁹ *—Aiai ġamogħamo i viawawanei lamna orotona ina viraġeni.

²⁰ —Aiai pulo i apui god ġelauna awarina ma eġa tau BADA awariu lamna nai ravana ina viraġeni.

²¹ —Eġa dobugħela ravai ona ġo-a-boai, ona notai da taumi mara tagogi o mae dobugħela ravami au Egypt.

²² —Eġa kaikaibaba ma kedakeda ona ġo-a-boai.

²³ Mepa da nanare ona kaei ma taui ina tou awariu agu aubaina, Tau BADA, ai tou anina ana nonori ma ana voagui.

²⁴ Ma Tau ana meji guratana ma ġavia au orana ana viraġenimi. Awawami ina vikaibaba ma natunatumi eġa amamai.

²⁵ —Mepa da mane u unelei molamolakana awarina, lamna eġa mane ġelauna au tepana ma vibagi.

²⁶ Mepa da rava ġelauna ana kwama u vaia da manena ina veremelem ma muriae ma vere-melei, ana kwama ma vere-melei muriae da madegħa ina ġair.

²⁷ Kwamana lamnei e purpurū da inina e vivibola. Bo aiwai ġelauna e mamae da ina vipuruei? Mepa da kwama eġa uta veremelei ma tauna awariu i tou agu aubaina ma Tau ana paribelei aubaina Tau rau-nuapoapoeu.”

23

Rau-nuapoapoe

¹ *Eġa riwa moru ma vituai. Ma eġa au numa-etara moruei kaua apoapoe ravana ma voagui.

² Eġa patara ma ġoavaivaitei ma ġo'apoapoe ma kaukuei. Maranai au numa etara e maimairi eġa moruei ġo'apoapoe patarai ma voagui.

24

Israel BADA ana parivainuaġġana i vianinei

³ Moses i nae mai Israel awari ma BADA ana viararamana ma ana tarawatu anatapui i riwei ma rava anatapui ponā tagoginei i paribelei i pa, “Tauai BADA aiwai i ririwei anatapuna ana kaei.”

⁴ Ma Moses, BADA aiwai i ririwei anatapuna i girumi. Ubaubanai boibogħi i vomairi ma pulo aniapuna i voai ola au karena ma ġaima ġaegħe 12 i vimairini Israel ana dam 12 i vimentairei.

⁵ Anina ma Israel laralaragħai i paritawanei da ġamogħamo i vumunaiei ma pulo i apui BADA awarina ma bulumakau ġelaui i vunui da ai viturana ma mae-kaua pulona.

⁶ Moses gamogħam tarai navanavana i ġunaiei au aboma ma navanavana ġelauna pulo aniapuna au tepana i voiwaiwaġi.

⁷ Ma parivainuaġġana bagibbagħina bukana i vaia ma rava awarri i 'avi. Taui i paribelei, “Tauai aiwai anatapuna BADA i ririwei ana kaei, ana babani ana voletelelei.”

⁸ *Ma Moses aboma i vaia ma tara i voiwaiwaġi rava au tepai. Ma i riwa i pa, “Wei taranei ata tarawatu i vovai-virewpani ma i vianinei.

—Maranai BADA tarawatu i veremi, Tauna parivainuağana bagibagina taumi maiteni i kaeui."

¹² BADA, Moses i riwei, "Ma ġei awariu au ola ma weka ma mae, ma ġaima dabababai ruāga au tepai, riwau ma au tarawatū a girugirumia ana verem da mai Israel ma viararamani."

¹³⁻¹⁴ Ma Moses ana taunola Joshua maiteni i vokaukaua da ita ġae au ola. Ma Moses babada awarii i babani i pa, "Weka ona painiai da ana opu-memei. Aaron ma Hur e mamae, mepa da ami pariparigai aawai da ona nae awarii."

¹⁵ Ma Moses i ġegħae au ola ma apau ola i purui

¹⁶ Ma BADA ana boruma i peu au ola Sinai. Ma au pom six apau ola i purui, ma au pom au ^vi—⁷na BADA apau au orana ma Moses i ġorei.

¹⁷ Mai Israel i taepai ma ola au tepana BADA ana boruma i 'nanai me ai arata ġaegħena ai menamenana ma bauna potopotona.

¹⁸ Ma Moses i ġae au ola ma apau au orana i rui. Ma au ola i mae au pom 40 ma waguvvarai 40.

25

God ana numagara vivivireina

God Moses i riwei da rava ita pariverei da ai ġoanei ita verena, kaua maġamaġauiee da God ana numagara vivivireina aubaina.

⁸ "Rava Numa Gara Vivivireina ina voai, da taui maiteni ana mae.

⁹ Numa gara ma orana purapurai ana viatataiem nanare ona voai."

Parivainuağana bokisina

¹⁰ "Ma bokisi ai acaciei ina voai, ana manawa 110 cm, ma ana dabora 66 cm, ma ana ġae 66 cm.

¹¹ Ma gold aiainei ma vaitani au orana ma au doa, ma au tepana ana via goldei ma terekwaviviroi.

¹² Ma ana loji 4 ma vokaukauei ma au aena 4 ma terei; ma au baba ġelauna loji ruāga ina mae ma au baba ġelauna loji ruāga ina mae.

¹³ Ma ai acaciei anipawé ma kaeui, ma goldei ma vaitani.

¹⁴ Ma anipawé au loji bokisi au babana ma raviai, da ina pawei.

¹⁵ Anipawé au loji ina mae, ēga ina taina-lavui.

¹⁶ Ma au tarawatū ġaima dabababai ruāga au tepai a girugirumia bokisi au orana ma terei.

¹⁷ —Ma uġu*, gold aiainei ma kaeui, ana manawa 110 cm, ma ana dabora 66 cm.

¹⁸ Ma Cherub ruāga ma kaeui gold gudagudanei ma uġu au giana ruāga ma terei.

¹⁹ Ma Cherubim gelauna au già gelauna ma Cherubim gelauna au già gelauna ma kaeui da uġu maiteni ina vitagogi.

²⁰ Ma Cherubim papei au aidamo ina viloloi, ma ina vinao vereverena, da ġo'apoapoe tauvaitawaneina uġuna ina gagaloei.

²¹ Uġu au tepana ma terei, ma ġaima dabababai ruāga bokisi au orana ma terei.

²² Ma uġu au tepana, Cherubim ruāga au poui kampa tana vinenebelana da au tarawatu ana verem rava mai Israel aubaii."

28

Ma God nanare Moses i riwei da wei purapurai i voai, kepakepa vinevinena ma incense aniapuna goldei, ma rampa anivojjinana rampa seven aubaii. Ma i viararamani menanare BADA ana numagara vivivireina ina voai ma au orana gara ġamogħamo opinei ina babalaraġi da gabu ruāga, ma gabuna ana gari ina kaeui da wei gabuna ina gari-kwaikwaipipini. Ma wate maiteni i riwei da pulo aniapuna bronzei, ma aboma gaegħena ina kaeui anioġa aubaina.

Pirisi ai gara

¹ Ma God i riwa, Tuam Aaron natunatuna Nadab, Abihu, Eleasar ma Ithamar maiteni mai Israel awariei ma tereriei. Ma ma viaiaini da Tau aubaiu ina vipirisi pulo tauapuina.

² Ma pirisi ana ġara vivivireina ma popoi vareim aubaina da inanana ina vinualaulauna ma rava ina vivirei,

³ Rava rarau-ġaroġroi ma nuaulaulai, ma ġoreiħi da Aaron ana pirisi garana ina popoi da ina oteni ma ina viaiaini da aubaiu ina vipirisi.

* ^{25:17: uġu ġo'apoapoei e viviātani}

31

God ana numagara taukaueina

¹ Ma BADA Moses i riwei,

² "Ma inana, Tau Besalel, Judah ana damei a vinei, tauna Uri natuna, ma Hur āgōgana,

³ ma Aruuau Vivivireina a verei. Ma nuaulaula ma nota ma aramana a verei da rau-āgaroāgaro anatapui awari tauna tagotagogina.

⁴ Tauna taurauāgaroāgaro amai, Gold, Silver ma Bronze taunoleina aiaina.

⁵ Tauna i ai kaua āgaima e boribori ma e laāgalāgai, ma amtaí awarina. Tauna rau-āgaroāgaro anatapuna awarina tagotagogina.

⁶ Ma nanare Oholiab a vinei, tauna Ahisamak natuna, Dan ana au dam da ana tauagu. Ma nanare taurauāgaroāgaro nuaulaula ma aramana a verei da aiwai anatapuna a ririwem ina kaei.

⁷ Numagara Vivivireina ma parivainuaāgana bokisi ma uḡu ma numagara ana purapura:

⁸ keapeka ma ana purapura; rampa gold aiainei ma purapura āgelauí ma incense aniapunana.

⁹ Pulo aniapuna āgamoāgamo taputapuna apuna aubaina.

¹⁰ Ma gara vinualaulaunai ina popoi, gara vivireina ina popoi Pirisi Čegetelarana Aaron aubaina ma natunatuna pirisi nolana aubaina aubaii,

¹¹ monamona viaiaina aubaina ma incense BADA ana numa aubaina. Taurauāgaroāgaro wei purapurai ina rauāgaroāgaroei me a ririwei nanare."

32

Bull natuna goldei

¹ *Maranai rava i 'nanai da Moses barana i uama au ola, taui i nei Aaron awarina ma i riwei, "Ma nei ma god ma voai da ina painita. Wei ravana Moses, Egyptei i neiaita weka, egaata aramanei aiwai i tupua awarina."

² Aaron i paribelei, "Awawami ma natunatumi waivinei ma nelarai ai loji goldei ona neiai awariu!"

³ Anina ma rava anatapui ai loji i votawatawanei ma i neiai Aaron awarina.

⁴ *Tauna i vaia ma ai au menamenana i apui da i wanagwadai ma bull natuna kokoitauna i voai. Maranai rava wei i 'nanai ma i riwa, "Oo mai Israel wei ami god, Egyptei i tere-opunemi."

⁵ Maranai Aaron wei i 'nanai ma pulo aniapuna i voai bull au naona ma i vinolanola i pa, "Au maratom tana torela BADA aubaina."

⁶ Ma Ubaubana boibogi rava i vomairi da āgamoāgamo taputapuna i apui ma viturana maiteni pulona i terei. Muriai kiala da i am gogona ma i uma-bua guratana da i kaua labalababa.

⁷ Anina ma BADA Moses i riwei, "Ma āgaira ma am rava Egyptei u tere-opunei. Tau i geduaieu ma kaua apoapoena i kaei.

⁸ Taui me marana au tarawatu i geduaiei ma bull natuna kokoitauna i kaei. Ma i raudunelei ma pulo i apui awarina ma i riwa, 'Wei ami god, Oo Israel, Egyptei i tere-opunemi.'

⁹ Ma BADA Moses i riwei, "Wei ravai a inanai ma a aramanei taui kolai bagibagii, ma nuapoui ega.

¹⁰ Ma votereu da au meji ana vikwai taui awarii ma ana pupuni. Ma tam Moses ana terem da am epaepaia maiteni dam patarauāgaroāgaro āgēgāena ona vitupui."

¹¹ Wate Moses God i vigigimanei i pa, "Oo BADA am rewapanā āgēgāenei am rava Egyptei u tere-opunei lamna aubaina ega am rava awarii ma meji ma ma pupuni.

¹² Mepa da ma pupuni, Mai Egypt ina riwa, 'Ana nota apoapoena maranai i tere-opunei da au ola anatapui ita pupuni.' Meji avena, oram ina uba, ma ega ma vipupui.

¹³*Am taunola Abraham, Isaac ma Israel ma notai, tam wavamei u parivainuaāgani, 'Tau am epaepaia ana vimāgai me ubona au Mara ma wei dobuna a paripari-vainuaāgani ami epaepaia ana vere-nonoei.'

¹⁴ Anina ma BADA orana i uba ma ega apoapoena ita neiai awarii.

¹⁵ Ma Moses i āgaira me, au urana āgaima ruaāgaroāgaro dabababai. God ana tarawatu wei āgaimai au naoi ma au murii i girumi.

¹⁶ Āgaima dabababai lamna God ana kaua. Tauna ainelana i girumi.

¹⁹ Maranai Moses i turiai mepa rava i rauğaravu ma bull natuna goldei i 'nanai i maimairi ma rava i arara i 'nanai. Tauna meji orana i oai ma ġaima dabababai ruaga i viorereni au doa. I viaigimagimai ola au karea.

²⁰ Moses bull natuna goldei i vaia ma i apui ma i tutu-gwadagwadai da i vipokau ma au waira i tawanei ma mai Israel i egari da i uma.

²¹ Ma Aaron i riwei, "Rava aiwai i kaei awarim da u kaei da kaua apoapoe kaukauna i kaei."

²² Aaron i paribelei, "Au bada ega ma ġaiawa, rava ai kaua u aramanei, kaua apoapoe ai ġai.

²³ Ma i riweu, 'god ma kaei da ina ravenita. Ma wei ravana Moses, Egyptei i tere-opunelai, tauai ega ata aramanei aiwai awarina i tupua.'

²⁴ Lamna aubaina rava a riwei, 'Aiaia awarina via goldei ona votawanei ma i vereu.' Ma ai au menamenana a tawana-ruiei ma wei bull natuna i opui!"

²⁵ Moses i 'nanai da Aaron ega tagotagogina da rava ita vibadei, ma ana ġavia ai anivinama i kaei.

²⁶ Lamna aubaina ai rauğaravu au metaetana i mairi ma i garara, "Aiai da BADA au murina, ona nei awariu!" Ma Levi ana dam i nae Moses au murina.

²⁷ Ma Moses taui i riwei, 'BADA, Israel ana God e ririwa. Nelara sod ona lavui ma ona nae ġaravu au giana da ona nenememei ma dam turam ma vareim ma mae-turam ma virägeni."

²⁸ Levi ana dam Moses i voteletelei ma nai au marana nelara 3,000 i virägeni.

²⁹ Ma Moses i riwa, "Amadodo BADA taumi i viviviremi ma i viaiainimi da aubaina ona vipirisi pulo tauapuina, aubaina taumi BADA o voteletelei da natunatumi ma varevareimi o virägeni."

³⁰ Ma maratomna Moses rava i riwei, "Taumi ġo'apoapoe ġaeġaena o kaei wate ana ġae BADA awarina da ana kauana dadanei da ami ġo'apoapoe ina nota-tawanei."

³¹ Anina ma Moses i ġae me BADA awarina ma i riwa, "Au rava kaua i apoapoe ġaġa i kaei. Taui ai god goldei i kaei ma i raudunelei!

³² Wate marina BADA a vivibaġaim da ai ġo'apoapoei ma nota-tawanei ma mepa da ega lamna avena ma wavau am au buka ma boa-tawanei."

³³ Ma BADA Moses i paribelei, "Aiavoi ġo'apoapoei i kaei awariu, Tau wavai au buka ana boai.

³⁴ Marina ma nae, rava ma naiei dobu a ririweia ma au anela ina ravenim. Wate mara ina ġeta da ana kovoġa, taui ai ġo'apoapoe aubaina ana kovoġi."

³⁵ Ma BADA doria apoapoenei rava i kovoġi aubaina taui god bull natuna Aaron i voai i raudunelei.

34

Gaima ruāga

¹ BADA, Moses i riwei, "Gaima ruāga dabababai ma bori inanana me ruāga u wamawamaia, ma au tepana riwana tagogina ana girumi me au naona.

² Ma vokaukaua ma ubaubanai ma ġei ola Sinai au tepana ma nebeleu."

⁴ Ma Moses, ġaima ruāga i bori me au naona nanare. Ubaubanai boibogħi ġaimai i voai ma i ġae au ola BADA i ririwei nanare.

⁵ Ma BADA apauei i ġairai ma au ririvana i raumairiei, ma wavana i latoni, "BADA!"

⁶ [◊]Ma Moses au naona i babara ma i viġoreġore, "TAU MAEMAE NONOANA! Tau raraunuapoapoeu ma iċċiu aiaina, tau ega laġilagħina amlou ita voġaġġai.

⁷ Au nuavaina maemena ina mae au rava awarri da kimta tausin ina kwa ma kaua apoapoe, mae-ġaeġae ma ġo'apoapoe ina nota-tawanei. Wate tauna ega kaua apoapoe taukuei ita inana-tawanei, natunatui ma ġogġaj, amamai i kaukuei kovoġana e vaivaia da kimta vitonuina da vi-four-na."

⁸ Moses maratagogi i mae-peu au doa ma BADA i viborumei.

⁹ I riwa, "Au bada mepa da riwa kaua da tam nuanuau u vaia, a vivibaġaim da uta vinao ma tata nae. Wei ravai orai badobadoi, wate ai kaua apoapoe ma ai ġo'apoapoei ma nota-tawanei, ma ma vai-meleiai am buderi."

Parivainuagħana bagibbagħina i ravivouni

¹⁰ BADA, Moses i riwei, "Ma rautaniġanal! Au parivainuagħana bagibbagħina tam maiteni a kaukuei am patara Israel maiteni. Ma au matami kaua ġaeġae aniba kauai ana kaei. Ega melanai aiai wenanara ita kaei au dobu. Rava anatapui au ririvami e mamae, au rewapanha inanai da tau, BADA kaua gaġġae ana kaei aubaimi."

²⁸ Moses kampa i mae BADA maiteni au pom 40 ma waguvarei 40, ega ita am ma ega ita uma nai au marana. Ma BADA gaima au tepana parivainuagana riwai - Tarawatu 10 i girumi.

Moses naona i lalai

²⁹ Moses gaima ruaga au tepai parivainuagana riwai i vinimavoei ma ola Sinaiei i gairai. Wate ega malana ita vaia da naona i lalalai aubaina tauna BADA maiteni i babani.

³⁰ Aaron ma Israel patarai i 'nanai da Moses naona i lalalai ma awarina naena i rovoei.

³¹ Wate Moses taui i gorei, ma Aaron ma dogadogara i nei awarina, ma awarii i babani.

³² Ma mai Israel i riei Moses awarina ma tarawatu ola au tepana i vereverei rava i pariverei.

³³ Moses naona garei i purui maranai awari i babani-vorovei.

³⁴ Maranai Moses e ruirui au numagara da BADA maiteni ina babani, garana naona i purupurui lamna, e vovotawanei. Ma e opuopu memei ma BADA aiwai i riwei mai Israel e paripariverei,

³⁵ ma mai Israel, i 'nanai da Moses naona i lalalai. Lamna maranai Moses naona i purumelei da ina rui me da BADA awarina ina babani.

40

Ma Moses rava i vibagai numa voa purapurai BADA ana numa gara vivivireina voana aubaina, ma wate purapura vivivirei numa au orana bada vimae-gegaaena aubaina, ma pirisi ai gara popona aubaina, ma rava i amverena da tagotagogina da nola ita vikwai. Bezalel ma Oholiab ma rava nolanolai nelara ma waivine wei purapurai i kauie me BADA i ririwei nanare.

Numa gara vivivireina i vikwai

¹ Ma BADA Moses i riwei,

² "Au Numa Gara Vivivireina ma vimairini aupom tagogi, madega au vouna.

³ Tarawatu 10, Parivainuagana bokisina au orana ma poai, ma au naona aniteregagara ma teretagoni da numa garana ina babalaragi.

⁴ Teibol ma ruiei ma au tepana aiwai i kaukauei aubaina ma terei. Ma rampa anivojijinana ma ruiei, ma rampa ma terei

⁵ Ma incense aniapuna goldei ma terei bokisi au naona ma aniteregagara gelauna ma terei da BADA ana numa gara vivivireina ina gudui.

⁶ Numa gara au metaetana, au doa, pulo aniapuna ma terei.

⁷ Anirauoga numa gara ma pulo aniapuna au poui ma terei ma waira ma vioai.

⁸ Numa gara ma pulo aniapuna aniteregagara ma tere-kwaviviroi da dobuna ma gari. Ma au anirui aniteregagara ma vidawei.

⁹ —Ma oil viaiaianana ma vaia ma numa gara ma purapura anatapui au orana ma buloi ma ma vovivirei da vivivireina.

¹⁰ Ma puto aniapuna ma ana purapura maiteni ma buloi ma ma vovivirei da vivivireina.

¹¹ Aniogaa abomana ma ana animairi maiteni ma buloi ma ma vovivirei da vivivirei.

¹² —Aaron natunatuna ma neiai numa gara vivivireina au metaetana ma wairei ma ogai.

¹³ Ma Aaron pirisi ana gara vivivireina ma viotenai ma oilei ma vovivirei da aubaiu ina vipingi puto tauapuina.

¹⁴ Ma natunatuna ma neiai ma pirisi puto tauapuina ai gara ma viotenai.

¹⁵ Ma ma buloi me amai u buloi nanare da ina vipingi puto tauapuina. Wei viaiaianana Aaron ana epaepaia i vovivirei da mara nonoa kimtana patapatana awari ina vipingi puto tauapuina.

¹⁶ Moses anatapuna i kauana-paiei me BADA i ririwa nanare.

¹⁷ —Anina ma madega au viruaina au pom tagogi nawaravi tagogi, taui numa gara vivivireina i vimairini.

¹⁸ Moses dogo i garai ma tuatua i tonei ma terewaba ma anitapejijinana i ragini.

¹⁹ Ma gara gamogamo opinei i gaugauri au tepana i ebani, BADA i ririwei nanare."

²⁰ Anina ma Moses gaima dabababai ruaga bokisi au orana i terei. Ma anipawe loji au orana i vionagi bokisi au adana, ma uguna i vaitani.

²¹ Ma bokisi i ruiei God ana au numa gara vivivireina ma aniteregagara i terei da bokisi i mae-gegari, BADA i ririwei nanare.

²² Ma nanare teibol i ruiei God ana au numa gara, aniteregagara i mae ma au doei, au laubadei i terei

²³ ma teibol au tepana palawa i pulopuloei BADA awarina i terei, BADA i ririwei nanare.

²⁴ Rampa aniterenana i vaia ma au numa gara teibol au naona, au babaaga lauanaagei i vikalai.

²⁵ Ma rampa i apui BADA awarina, me i ririwei nanare.

²⁶ Incense aniapuna goldei aniteregagara au naona i terei numa gara vivivireina au orana.

²⁷ Anina ma au tepana incense ġabuġabui i apui, BADA i ririwei nanare.

²⁸ Ma aniteregagara i terei da aninae au numa gara vivivireina i gudui.

²⁹ Pulo aniapuna BADA ana numa gara vivivireina au metaetana. Au tepana ġamogħamo ma palawa i apui me BADA i ririwei nanare.

³⁰ Ma aboma ġaeġaena numa gara ma pulo aniapuna au poui i terei, ma au orana waira i waġi anioġa aubaina,

³¹ ma kampa Moses ma Aaron ma natunatuna urai ma aei i oġai.

³² Taui aei ma urai e oġaoġai maranai e ruirui au numa gara bo e nenaē pulo au aniapuna.

³³ Ma Moses Numa gara ma Pulo aniapuna i gari-kwaviviroi. Ma aniteregagara i terei au anirui. Anina ma Moses ana nola i kwa.

BADA ana Numa Gara Vivivireina viborumana

³⁴ *Ma apau BADA ana Numa Gara Vivivireina i purui ma ana boruma numana i vioai.

³⁵ Apau numa gara vivivireina au tepana i kiala ma BADA ana boruma numana i vioai ma lamna aubaina Moses eġa tagotagogina da ita rui.

³⁶ Ma apau i vooepta lamna maranai mai Israel ina vaġai au dobuġela.

³⁷ Ma mepa da apau eġa ita voepa lana taui eġa ina nae.

³⁸ Maranai mai Israel e vaġavaġai, BADA ana animae apau au orana numa gara vivivireina au tepana ma waguvvarai tauna ai apau au orana e ararata.

Leviticus Levi ai kaua

Wei bukana wavana Leviticus, aubaina Levi ana dam e bababaniei. Taui pirisi pulo tauapuna i vovoagui. Ma BADA ana Numa Gara Vivivireina i paipaini.

Pulo taputapuna apuna

¹ BADA au Numa gara Vivivireina ma Moses i kwatuei ma i riwei i pa,

² "Wei au pariverena puto apunana aubaina. Mai Israel ma riwei ma pa, 'Aiai da BADA awarina ġamoġamo e apuapui, lamna bulumakau tagogi bo sipu bo gote i ġamoġamoi ina neiai ana puto.

³ —'Mepa da ġamoġamo taputapuna e apuapui am puto, ma inanai da ġamoġamo orotona aiaina ma ega ana apoapoe aiwai. Ma neiai Numa gara Vivivireina ana au anirui, da BADA ina vianinem.'

⁴ Ma uram ġamoġamona au kolana ma terei, wei e vivimataira da ġamoġamo i raviepaiam da ina iraġe am go'apoapoe ina oġa-tawanei.

⁵ Ma bulumakau BADA au naona ma virägeni, ma pirisi Aaron natunatuna tara, ina neiai da puto aniapuna au adana ina voiwaiwaġa-naiei.

⁶ Anina ma ġamoġamo ma opai ma ma api.

⁷ Ma Aaron natunatuna, ai ina viviri puto aniapuna au tepana.

⁸⁻⁹ Taui sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oġai, ma pirisi siana anatapuna ina apui. Wei pulona apuapunana lamna ġabuna aiaina BADA ina vinuaiaiñi."

Wate God Moses i riwei da rava sipu bo gote, gabubu bo bunebune ita puloei me puto e apuapui nanarena. Tauna wate Moses i riwei da menanare wei ina poloana-nei.

3

Viegualau pulona

¹ BADA Moses awarina i babani i pa, "Aiai da nuauba amna aubaina ana puto bulumakau e apuapui, ma inana-kaei da burumakauna orotona bo wavinena, aiaina ma ega ana apoapoe aiwai.

² Ma urana ġamoġamo au kolana ina terei ma ina virägeni Numa Gara Vivivireina ana au anirui. Ma pirisi Aaron natunatuna tara puto aniapuna au adana ina voiwaiwaġa-naiei.

³⁻⁴ Ma amoamo monamona ava ma kaina monamona ma ganigani ana monamonana, pirisi ina verei da ina apui nuauba pulona.

⁵ Ma Aaron natunatuna wei monamonai sia taputapuna e ararai au tepana ina terei ma ina apu-tagogie, puto aniapuna au tepana. Wei amgogona pulona ma ġabuna i ai kaua BADA awarina."

Ma ġamoġamo taupuloina ana numa ravai maiteni ma ai rava ġelaui sia mae-terenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.

13

Opi doriana ana tarawatu

¹ BADA Moses ma Aaron i riwei i pa,

² "Mepa da aiai kero bo paramaitua i vaia bo opina i lebara ma e notanotai da wei kerona e viviopardiana, lamna ana rava tauna ina neiai pirisi Aaron bo natuna tagogi awarina.

³ Pirisi kero vioana ina inanai. Mepa da apara au kero e vivimairiana i arapoiria ma dogona i ġaira lamna opidoriania. Ma pirisi ina riwa da tauna ega aiaina BADA au matana.

⁴⁵ —Rava aiai opidoriania i vaia, tauna gara wanasiġikana ina oteni, aparana ega ina jinai ma naona ina purui ma ina kwatu ina pa, 'Tau ega aiai! Ega ona nei au ririvau!'

⁴⁶ Maranai doriana awarina e mamae lamna tauna anina miramirana, Tauna ainelana ina mae au tano."

17

Tara ana tarawatu

¹⁰ *Aiai Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei.

¹¹ Aiwai anatapui da lawalawai ai lawana au tarai e mamae ma lamna aubaina BADA i riwa da tara pulo au aniapuna ona voiwaiwağı da rava ai ġo'apoapoe ina vaitawanei. Tara lamna lawana, ma lamnei ġo'apoapoe e vaivai-tawanei.

18

Viauwawana ana tarawatu

¹ BADA Moses i riwei i pa,

² "Mai Israel awari ma babani ma ma riwei, 'TAU BADA ami God.'

³ Mai Egypt ai kaua eġa ona ġovaivaiti, Wariaġa kampa o mae, marina a taratara-vainanaiem au Canaan ma ai kaua eġa ona ġovaivaiti. Eġa ai lawana ona votaġotāgoi.

⁴ Taumi au tarawatu ona voteletelei ma riwau ona votaġotāgoi. Tau BADA ami God.

⁵ Mepa da au tarawatu ma riwau ona voteletelei taumi lawana ona nelaġai. TAU BADA a riwa."

⁶ TAU BADA wei au babani bagibagii a vereveremi, "Eġa aiai novuna bo vareina ina viawawanei.

¹⁹ —Maranai wavine nawaravi i vunui tauna miramirana, eġa maiteni ma viawawana.

²⁰ —Eġa oroto ġelauna awana maiteni ma viawawana, lamna tam u vimira-melem.

²¹ —Natunatumi eġa ona puloei god Molek* awarina, aubaina TAU BADA ma vinimala e neineiaw awariu.

²² —Eġa aiai orotona, oroto ġelauna ina viawawanei, me oroto waivine e viawawanei, wei lamna ġo'apoapoe kaukauana God au matana.

²³ *—Eġa aiai orotona ġamōġamo ina viawawanei bo wavine ina verena-melei da ġamōġamo ina viawawanei. Mepa da wei u kauei tam u vimira-melem.

²⁴ —Eġa wei kauai ona kauei da ina vimiramraimi. Dam au Canaan maemaei anatapui wei kauai i kauei ma i vimira-melei. Lamna aubaina ana viaġaġana-opunei ma taumi ona rui."

19

Apoapoe terevai-jijimanina riwai

¹ Ma BADA Moses i riwei i pa,

² "Dam Israel anatapui ma tuarui ma ma riwei, 'Taumi lawana vivivireina ona maeni. Aubaina Tau BADA ami God vivivireiu.'

¹⁷ —Eġa oram ina raviapiae kaua apoapoenia ravana awarina, wate maiteni ona kiala da kaua ona tere-vajijimani, da eġa ġo'apoapoe ona kauei.

¹⁸ *—Eġa ma raubiwa am rava awarii, eġa aiai ma ġoägaiei, wate rava turam nuanuam ina vaia me tam nuanuam e vaivai-melei. TAU BADA."

20

Konaga riwana

⁶ Aiai ravana i ġoei da kaua anoi ita aramanei, lamna Tau ina vibaġaiu. Eġa vinuaterena aubaina ina nae konakonaġa awarii ina bababani. Mepa da aiai wei i kauei, nai ravana ana mae-puputei, ma au rava awariei ana viopuni.

24

Vimaimaia riwana

¹⁹ Mepa da aiai turana i vikeroi, aiwai i kaukaueia awarina nanare ina kauei.

²⁰ Mepa da gelama i viaigai, gelamina tagogi ina wanagai, mepa da mata tagogi i viapoapoeni, matana tagogi ina apoapoei. Mepa da ivo tagogi i viaigai, ivona tagogi ina wanagai. Aiwai kerona rava ġelauna i verei, tauna nanare ina kero.

²¹ Aiai ravana ġamōġamo i viraġeni ina vimiae, wate aiai da rava i viraġeni, tauna ina iraġe.

²² Wei tarawatuna taumi anatapumi aubaimi, mai Israel ma dobu ġela ravai, aubai TAU BADA ami God.

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biaña sorodia. Wei bukana nanare Mai Israel ai mae au mutulua madega 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

- 22 BADA Moses i riwei i pa,
- 23 "Aaron ma natunatuna ma riwei da wenanare mai Israel ina viaiaini ina pa,
- 24 'BADA ina viaiainimi
ma ina gagaloemi.
- 25 BADA ivina ina ai awarimi
ma ina paina-kauemi.
- 26 BADA ana nuaiaina ina mae-tavirei awarimi
ma nuuba ina veremi.'
- 27 Ma nanarena, maranai Aaron ma natunatuna Tau wavauei mai Israel e viviaiaini, ma Tau ana viaiaini."

13

Taurauivu Canaan i tuvirevirei

- 1 BADA Moses i riwei i pa,
- 2 "Mai Israel ai dam 12 au orai rewapano tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei."
- 3 Ma BADA i ririweia nanare Moses i kaeui. Mai Israel ai dam 12 babadai i paritawanei. Taui ai garavu au mutulua Paran i voterei da i nae au Canaan.

17 Maranai Moses ravai i paritawanei da dobuna ita ivui ma i riwei i pa, "Au Negev ona virautua da dobu violaolana ona naeni da au navanava ġelaunu.

18 Dobu ona tuvirevirei, ma ana patara ona inanai menanare, rava ai maġa ma ai rewapano bo ai ġokokokara?

19 Doa maumaurana bo ega? Ai melagai ona tuvirevirei, garigarina bo e mamae lota?

20 Doa maumaurana bo ega? Ai e gogogo bo ega? Ma ona kauana-guratei da ai anoi ġelaui ona purai da ona neiai."

21 Anina ma taui dobuna i naeni, au mutulua Zin* i vikarei ma dobuna i naeni da au gia dewadewana au Rehob, wei lamna Lebo Hamath au geregerena.

Taurauivu i nememei

- 25 Au pom 40 taurauivu dobu i tuvirevirei ma i nememei,
- 26-27 I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i pariverei i pa, "U paritawanelai da dobuna a ivui, marina grape ana ġou marana ma a inanai da ani ipi gabuna aiaina ma doa maumaurana, ma aina anoi ġelaui a neiai da ona inanai.

28 Wate kampa rava ġaigħaiaw e mamae, ma ai melagai i rata kaua ma i gari-kwaviviro da ega ġavia ina rui. Ma kampa mai Anak a inanai.

29 Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae."

30 Ma Caleb, rava i riwei da i genuana ma i riwi i pa, "Tana nae dobuna ravai tana virubai ma dobuna tana vaia!"

31 Wate taurauivu maiteni i ġeġae i pa, "Ega! Ravai i virewapana kaua ega me tauta. Ega tana viġavie."

32 Ma nanare taui nai dobuna ana apoapoe riwana i vibabarai mai Israel awari i pa, "Nai ega ani ipi doana aiaina ma rava manamanai ma ġaigħaiaw kampa e mamae.

* 13:21: Wei lamna dobu ġaegaena Negev au paratana i vikarei da i nae da ola Hermon au ġeregerena ma Hamath melagaina.

³³ Ma kampa rava ġaigaiwai Mai Nephili[†] a inanai (Mai Anak noinooi) tauai a inana-meleiai lamna me kapau ma nanare taui au matai lamna tauai me kapau."

14

Mai Israel Moses ma Aaron i viġavie

¹ Ma nai waguvraina rava anatapui i tou mara.

² Taui anatapui Moses ma Aaron i viġavie i pa, "Airake au Egypt ata iraġe ota! Bo weka au mutulua.

³ Aiwai aubaina BADA e nainaieta wei au dobuna da ravai sodei ina virāgenita ma awawata ma natunatuta ina pani-naiei. I ai kaua da tata wanaviraita au Egypt."

⁴ Ma taui i babani vivira i pa, "Bada tana vinei da ina naiana-meleta au Egypt."

⁵ Anina ma Moses ma Aaron i mae-ġaira da naoi au doa Israel patarana au matai.

⁶ Nun natuna Joshua ma Jephune natuna Caleb ruagai, taui maiteni dobu i tuvirevirei, ai gara i sikai,

⁷ ma mai Israel anatapui i riwei, "Dobuna anatapunana a naeni ma a tuvirevirei ma dobu maumaurana.

⁸ Mepa da BADA nuanuana ina ai awarita ma ina ruieta dobuna maumaurana awarina, weka sia ma lam eġa anibaiana.

⁹ Wate BADA eġa ona viġavie. Ma ravai dobuna e maemaeni eġa ona rovoei, tana viägaġana-opunei. Taui ai agu eġa. Tauta BADA maiteni ta mamael Ravai eġa ona rovoei!"

¹⁰ Mai Israel Caleb ma Joshua ġaimej ita virāgeni wate BADA ana borumana i eġa numagara au tepeña.

God Moses i riwei da ita wanavirai ma ana rava ita taravaina-naiei au mutulua da etanai e nena e au Boga lebalebarina ita naeni.

God i riwa da rava ina kovoġi

²⁶ BADA Moses ma Aaron i riwei,

²⁷ "Wei ravai apoapoe ai beura awariu a nonora, iauel! Mai Israel ai pariviravira awariu a nonor!"

²⁸ Wenanare ma paribelei, "BADA i riwa, 'Tau wavauei a ririwa da aiwai o vivibägei, nanare ana kaei.'

²⁹ Taumi au mutulua tupuami urabovai ina nae. O pari-virevireu aubaina taumi ami madeġa 20 ma e ġegħae ona iraġe.

³⁰ A parivainuġġami da wei au dobuna ota mae wate eġa aiai tagogi wei au dobuna ina rui anina Jephune natuna Caleb ma Nun natuna Joshua.

³¹ Ma o ririwa da natunatumi ina vaia ai panipani, wate taui kampa ana ruiei da dobuna o gedugeduaieja ina maeni.

³² Wate taumi patarami tupuami au mutulua ina bova-nae.

³³ *Eġa ota vipatutu ma lamna aubaina natunatumi ina vinuapoapoe au mutulua ma ina kovoġi da ina viġamogamo-nae da madeġa 40 ina kwa nai maranaina taumi kimta magurimi ona iraġe-pai.

³⁴ Aupom 40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo'apoapoei Aubai au kovoġa malana ona vaia.

³⁵ TAU BADA, A riwa! Tau wei ana kaei taumi ġo'apoapoe ravami anatapumi awarimi. Ami rava maiteni o vitagogiemi ma o viġavieu. Taumi anatapumi au mutulua ona kwa, taumi weka ona iraġe.

20

Miriam i 'raġe

¹ Nawaravi au vouna mai Israel anatapui au mutulua Zin i ġeta ma au Kadesh i rauġaravu. Weka Miriam i 'raġe da i doboi.

Mai Israel Moses maiteni i viparipariniġai

² *Kampa Waira eġa ma lamna aubaina taui i vitagogiei ma Moses ma Aaron ai ġavia i vomairi,

³ ma Moses maiteni i viparipariniġai i pa, "Rorova varevareiai maiteni ata iraġe tagogi BADA au matana!"

⁴ Aiwai aubaina BADA ana rava u neiai au mutulua ana ġamogamoj da ina iraġe

[†] **13:33:** Mai Nephili ega tata aramana-kauei, wate taui rava gogogoui. Gen 6:4 e ririweta da taui meie i nei. ^{*} **14:33:**

⁵ Aiwai aubaina Egyptei u tere-opunelai ma u neiai wei dobuna apoapoena awarina? Weka ega ani ipi doana aiaina da witi da damala aina bo grape warami bo *Pomegranates* aina ina gogo, ma ega waira aniuma!

⁶ Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i ega.

⁷ Ma BADA Moses i riwei,

⁸ “Am jigona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai gamogamo maiteni.

⁹ Anina ma Moses jigona BADA au naona i vaia, i ririwei nanare.”

Moses kira i ravi

¹⁰ Ma Moses ma Aaron dam Israel i vitagogiei kira au naona ma Moses i riwei, “Ora potapotami! Ona genuana! Tauai waira kira au orana ana tere-opuniai aubaimi!”

¹¹ Ma Moses ana jigona i voepai ma kira i ravi mara ruaga. Ma waira gaegaena i ruba-opu da rava ma gamogamo i uma.

¹² Anina ma BADA, Moses ma Aaron i riwei, “Taumi ega ota vitumaiganakaueu da Tau vivivireu ami dam Israel au matai, ma lamna aubaina taumi ega wei ravai ona ruiee dobuna a vereveremiana awarina.”

Aaron i 'raage

²³ Au ola Hor, Edom ana au parata, kampa BADA Moses ma Aaron i riwei,

²⁴ “Taumi riwau o rauagaiagiae au Meribah ma lamna aubaina, dobu mai Israel a verevereia, Aaron kampa ega ina rui. Tauna noinoina ina votagoi.

²⁵ Aaron ma natuna Eleasar ma taravaia ma ma gaei au ola Hor.

²⁶ Kampa Aaron ana pirisi garana ma votawanei ma natuna Eleasar ma vioten. Aaron kampa ina irage ma noinoina ina votagoi.”

²⁷ Moses BADA i ririwei i kaei. Taui ola i gaei, mai Israel anatapui au matai.

²⁸ Moses Aaron ana pirisi garai i votawanei ma natuna Eleasar i vioten. Ma kampa ola au tepana Aaron i 'raage. Ma Moses ma Eleasar i gaira memei.

²⁹ Maranai patarana i aramanei da Aaron i 'raage ma i touei da au pom 30.

21

Mota bronzei i kaei

⁴ Taui ola Hor i netawanei ma boga lebalebarina etanaina i vaia da Edom ita vorei. Au etanai rava amlo i gai gai aubaina ai vaagi i manawa,

⁵ ma Moses ma God i eni i pa, “Aiwai aubaina Egyptei o taravaina-opunelai da au mutulua ana irage? Ai lam ega! Ai waira ega! Ma wei lam tagogina manna a amgeduaiie.”

⁶ Ma BADA mota gaigaiawai i paritawanei awari ma magamaagaui i ani ma i 'raage.

⁷ Rava i nei Moses awarina ma i riwa, “Tauai go'apoapoena a kaei maranai BADA ma tam a parivreviremi. Ma raupari da BADA mota ina vaitawanei.” Ma Moses i raupari rava aubaii.

⁸ Ma BADA Moses i riwei i pa, “Mota gaigaiawana kokoitauna ma kaei ma ai au damona ma ragini. Maranai mota, rava aiai i ani ma i taepai da mota kokoitauna i 'nanai, ma tauna ina lawana.”

⁹* Ma Moses mota bronzei i kaei ma ai au damona i ragini. Maranai mota aiai i ani ma ravana i taepai da mota i 'nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauigaravu.

¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei.

¹² Kampa da i nae Zered au wapuna i rauigaravu.

¹³ Ma wei dobuna i netawanei mai nae waira Arnon au baba gelaua au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i voyauibai

²¹ Ma mai Israel taupariverena i paritawanei da Sihon mai Amori ai gulau i pariverei i pa,

²² "Tauai a ġoei da am au dobu ata verautua. Tauai eġa ana deġa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei."

²³ Wate gulau Sihon mai Israel eġa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ġeta da Israel maiteni i viġaiġiawia.

²⁴ Wate mai Israel i virewapano ma gulau Sihon i viubai ma ai dobu waira Arnon i ġae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauei ma lamna aubaina mai Israel eġa ai au dobuna ita rui.

²⁵ Ma mai Israel i viġavia da, mai Amori ai melagai i vaipai da i maeni, taon Heshbon ma melagai ġelau kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae

³² Ma Moses tauivu i paritawanei da Jaser taon i tuvireirei, ma muriae mai Israel i nae ma ai melagai anatapui i vaia ma mai Amori kampa maemaei i viġaġana-opunei.

³³ Ma mai Israel i vira ma etanalei i ġae au Bashanei. Ma Bashan ai gulau Og ai sorodia anatapui maiteni i opui da taui i nebelei au Edrei.

³⁴ Ma BADA Moses i riwei i pa, "Eġa tauna ma rovoei, aubaina tauna, ana rava anatapui, ma ai dobu maiteni au uram a tereterei. Aiwai u kauei Amori ai gulau Sihon awarina, au Heshbon taon, nanare gulau Og awarina ma kauei."

³⁵ Ma gulau Og i viraġeni natunatuna nelarai ma rava anatapui i viraġena-pai, eġa aiai ita mae. Ma mai Israel dobuna i vaia da ai dobu.

22

Balaam Israel ġaġalana i geduaiei

¹ Ma mai Israel i vomairi da Moab au wapuna, Waira Jordan au adana i rauġaravu, ma au baba ġelauna Jeriko taon.

² Ma mai Israel aiwai i kauei mai Amori awari, Zippor natuna Balak anatapuna i 'nana-pai.

³ Mai Israel i maġa kaua ma lamna aubaina mai Moab i rovo kaukaua, rovo ita iraġelei.

⁴ Ma mai Moab mai Midian babadai i riwei i pa, "Aburuna ava ma wei patarana aiwai anatapuna au ririvata ina pupuna-pai, me bulumakau au wapu modu e amam."

⁵ Anina ma Moab ai gulau Balak, Beor natuna Balaam ana riwa i paritawanei au Pethor, waira ġaġaena wavana Euphrates au ririvana. Ana riwa wenanare, "Dam tagogi Egyptei i opu, ma dobu anatapuna e vaivaia ma marina au ririvau i rauġaravu.

⁶ Taui i virewapano kaua eġa me tau, ma nei ma ravai ma parivai-ivipoapoeni, mepa da tau ravai ana vovaiubai ma wei dobunei ana viġaġana-opunei. Aramanei da maranai tam rava e viviaiaini tauna viaiaina e vaivaia ma maranai u parivai-apoapoeni tauna ina apoapoe."

⁷ Ma Midian ma Moab babadai mane i vaia Balaam vimaiana aubaina ma i vomairi. Ma i ġeta Balaam awarina ma Balak ana riwa i pariveresi.

⁸ Balaam ravai i paribelei i pa, "Weka ona matave ma au maratom BADA aiwai ina riweu ana pariveremi." Ma babadai kampa Balaam maiteni i mae.

⁹ God i nei ma Balaam i vitara-vireirei i pa, "Aiavoi i nei awarim?"

¹⁰ Balaam i paribelei, "Zippor natuna Balak, Moab ai gulau wei riwana i paritawanei i pa,

¹¹ "Ma rautanigħana dam ġaġaena Egyptei i opu ma dobu anatapuna e vivoai. Ma nei ma aubaiu ravai ma ġaġalei, da maitenī ana viġaiġiawia ma ana viagħeqi da ina vinelana."

¹² Wate God Balaam i riwei i pa, "Eġa maiteni ma nae. Eġa wei ravai ma ġaġalei aubaina Tau au viaiaina awarii."

¹³ Ubaubanai Balaam i nae ma Balak ana taupariverena i riwei, "Ona nae me ami au melagħajil BADA eġa ita vianineu da maitemi tana nae."

¹⁴ Ma Moab babadai i nae me ai bada Balak awarina ma i riwei i pa, "Balaam eġa ita goei da ita nei."

Anina ma Balak babada ġaġġaei i paritawanei Balaam awarina. Ma i riwei da pulo ġaġaena ita verei mepa da tauna ita nei da mai Israel ita ġaġalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauei.

²¹ Ma ubaubanai Balaam i vomairi ana donki i vokaukauei ma Moab babadai maiteni i nae.

²² Wate God amlona i ġaigai kaua da Balaam i nena, ma ana anela i paritawanei da ana etanai i mae-tomeni. Balaam donki i gerui ma ana taunola ruāga maiteni i nena.

²³ Ma maranai donki BADA ana anela i 'nanai ana sodna au etanai i maimairi ma i tawana-ruei au ririva. Balaam donki i kwakwapui da ita opu me au etanai.

²⁴ Ma BADA ana anela etanai ġuriġuririna i mae-potai, Grape ġoroġorovai epaepana ruāga gaimei i garigaria au poui.

²⁵ Maranai donki BADA ana anela i 'nanai ma ita deġa lamna Balaam aena au gari i viairaturati. Ma Balaam donki i kwapu-melei.

²⁶ Ma BADA ana anela i nae ma etanai au ġuriġuririna i mairi, weka eġa gabu ita mamae-dadana da taui ita deġa.

²⁷ Maranai donki anela i 'nanai, i mae-ġaira da i kiala, Balaam amlona i ġaigai kaua ma ana jīgħonei donki i kwapui.

²⁸ Anina ma BADA donki gamona i votawanei da i babani i pa, "Aiwai apoapoena a kauet awarim da mara tonuġa u kwapui?"

²⁹ Balaam donki i riwei i pa, "Tam u vikalokaloeu me bua! Awariu sod lamna marina ata virägenim."

³⁰ Ma donki Balaam i riwei i pa, "Tau donkina tagogina marana patapatai u gerugerui bo? Wenanare a kauana dadanei awarim bo ega?"

Balaam i riwa, "Eġa!"

³¹ Ma BADA Balaam matana i vikalai da ana anela i 'nanai ana sodna i maimairi au etanai. Ma i mae-ġaira au doa ma i raudune.

³² Ma BADA ana anela i riwa i pa, "Aiwai aubaina am donki mara tonuġa u ravi? Ma nonori am vāgħi lamna eġa aiaina, Tau a nei da ata viġaem.

³³ —Mara tonuġa am donki i 'nanai ma mara tonuġai i deġeu. Mepa da eġa, lamna tau ata virägenim ma donki ata voterei."

³⁴ Ma Balaam BADA ana anela i riwei i pa, "A kauana-boai. Eġa ata aramanei da tam au etanai u maimairi da uta viġġaei. Marina mepa da u notai da ega ita ai au matam, tau ana nae me."

³⁵ BADA ana anela i riwa i pa, "Ravai maiteni ma nae, wate aiwai ana riwem lamna ava ma latoni." Anina ma Balaam, Balak ana babadai maiteni i nae.

23

Mara tonuġa Balak polo i apui Balaam ana god awarina da mai Israel ita ġagħalei. Wate marana patapatai Balaam eġa mai Israel ita ġagħalei. Ma God aiaina ita kauet mai Israel awarri lamna ava i babbanie. Balaam mara 4 God ana babani mai Israel awarri i babaniei. Wei lamna ana babani viruaina.

¹⁸ Ma Balaam wei riwana i riwei i pa,

"Balak, Zippor natuna ma vomairi;

ma Ma rautanigħana kaua.

¹⁹ God eġa rava ota, Tauna eġa ita morumoru.

Bo ana nota ita viravirai.

Tauna aiwai i babbanie,

nanare ina tupua

Aiわい i parivainuāġani;

nanare ina kauet.

²⁰ I riweu da wei ravai ana viaiaini;

maranai God e viaiaina, tau eġa tagotagogina da ana virai.

²¹ BADA ai God

taui maiteni e mamae, ma taui e vovoepaepi da Tauna ai gulau.

Tauna eġa nuabola bo apoapoe ita neinei Jacob ġoġġana - mai Israel awari.

²² God taui Egypte i tere-opunei,

Aubaii i viġavia me bulumakau moduei.

²³ Eġa aiai Israel ina ġagħalei,
bo ina baravui.

Marina rava ina riwa,

'Ona inanai God aiwai i kauet mai Israel aubai.'

²⁴ Mai Israel lamna me Lion vivirewapanana.

E vovomairi da ana ġavia e viviraġeni
ma tarana e umaumai,

Anina ma ina rauvirai da ina matave."

24

Anina ma Balaam mara vi-four-na God riwana i babaniei, i pa:

17 “God i viataataeu da rava muriai e nenei,
a inanai wate ega lagilagina ita nenei,

Jacob ana damei gulau ana ji'gona

Ana borumana me ubona gamrina Israelie e opuopu.

Moab muruai ma Seth natunatuna
anatapui kolai ina viaigwadagwadai.

18 Ana gavia Edom ina vovaiubai
ma ai dobu ina vaia,
ma mai Israel ina virewapana guratana.

19 Gulau, Jacob ana damei ina nei
ma mai Moab mae-tereterei ai au melagai ina pupuni.”

25

Mai Israel, Baal i raudunelei

1 Maranai mai Israel au Shittim i mamae, nelara i vikarei da Moab waivinei i viawawanei.

2 Wei waivine, nelara i riwei da i nei da ai god awarii puloi i apuapui.* Ma anatapui i am gogona ma ai godna i raudunelei.

3 Wei kauanei mai Israel Baal-Peor i voepaepai ma lamnei BADA ana meji i vikalai.

4 BADA Moses i riwei i pa, “Babadaianatapui ona vaia ma madegai BADA au matana ona vira'gena-nai'i, da tau au meji awarimi ina dauva.”

5 Ma Moses Israel babadai i riwei i pa, “Taumi tagotagogi ava ami au dam anatapui da Baal-Peor i raudunelei ona vira'geni.”

6 Moses ma Israel patarana BADA ana numa gara au metaeta i toutou, ma au matai oroto Israelie wavine Midiane i taravaina-ruiei ana au numa gara.

7 Maranai Aaron go'gana pirisi wavana Phineas wei kauana i 'nananai, boru i voterei ma pawasi i lavui,

8 ma Israel ie i votagoi da ana au numa gara ma pawasiei uporana i tonai da wavine au uporana i opu-vivira. Ma doriana apoapoena au Israel i kwa.

9 Wate wei gimna rava 24,000 i virageni.

10 BADA Moses i riwei i pa,

11 “Aaron go'gana pirisi Phineas au meji mai Israel awari i viubai; da taui ega ata pupuni aubaina tauna ana nota me tau au nota, rava ega god gelau ina voepaepai anina Tau ava.

12 Lamna aubaina tauna ma riwei da maiteni parivainuagana bagibagina ana kaei da ata ruaga tana viturana vivira.

13 Tau aubaiu ina vipsiri nonoa.”

27

God Joshua i vinei

18 *Muriae BADA Moses i riwei i pa, “Aruau Nun natuna - Joshua awarina, lamna aubaina ma taravaini ma uram au tepana ma terei da ma vovivirei au nola aubaina.

19 Ma naei Pirisi Eleasar awarina, Israel patarana anatapui au matai ma ma viaiaini da ina raviepaiem.

20 Ma vovai-virewapani da Israel patarana tauna ina rautani'ganei.

21 Tauna Pirisi Eleasar maiteni ina nola da gaima e goregorei *urim*, * awarinei au nota ina vaivaia. Wei taunei Eleasar, ma Joshua ina agui Israel ai au lawana.”

22 Ma BADA aiwai i ririwei, Moses nanare i kaei. Joshua i taravaini ma Pirisi Eleasar ma Israel patarana au naoi i vimairini.

23 Ma urana au tepana i terei ma i vinei da ana raviepaia.

* **25:2:** Wei kauai lamna god gelau i raraudunelei, ma lamnei Moab waivinei ai vituma'gana nanare i eraerawa. Maranai Israel nelarai wei waivinei maiteni i viviawawana, taui ai god Baal i raraudunelei ma i vovoaguia da ai dobu ita viaiaini da ita maura. * **27:18:** Exo 24:13 * **27:21:** *Urim* lamna gaima aburuna. Ma nai gaemana pirisi e viviatataiei da God ana nota i ririweta. Tauta ega tata aramanei 29-30 Exodus ma inanai.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana i mamae ma, mai Jeriko au baba ġelauna. Ma BADA Moses i riwei,

⁵¹ “Wei riwai mai Israel ma riwei, ‘Maranai Jordan o damani da au Canaan,

⁵² Dobuna taumaenina anatapui ona viaġaġana-opunei. Ai gana da ai kokoitau anatapui ona rika-viamoamoi.

⁵³ Dobu a veremi ona vaia, ġariemi da ona maeni.

⁵⁴ Doa ona ġutai dam damai awarii, au ġaima ina viatataiemi nanare. Doa vounaina dam vounaina ona verei ma dam voaburuna nanare ana ġuta voaburuna. Wate ġaimej ana pariveremi metauna damna, metauna doana ina vaia. Dam anatapui doa ina vaia.

⁵⁵ —Wate mepa da nai dobuna taumaenina eġa ona viaġaġana-opunei ma o vianinei da ina mae, taui lamna me vunavuna au matami bo donadona au ririvami maemaena, ma wei vita gaegħena ina veremi wei au doana.

⁵⁶ Mepa da ravai eġa ona viaġaġana-opunei. Lamna taumi ana pupunimi me a viogej da taui ana pupuni.”

35

Anigagalo melagaii

⁹ Ma BADA Moses i riwei i pa,

¹⁰ “Mai Israel ma riwei, ‘Maranai Wairu Jordan o damani da au Canaan o rui,

¹¹ melagai ġelau ona vinei da rava ai aniġāgalo. Maranai rava turana i vunu-boai da i ‘raġe, taui weka ina ruba da ina gagaloei.’

¹² Ona riwei, ‘Weka ma mae da raubiwa ravai eġa ina vodadanim ma rauetara ma paini.’

Deuteronomy Tarawatu Viruaina

Pariverena

Moses wei au *bukana* mai Israel i pariverei menanare ina kauanei maranai au Canaan ina rui da ina vaia da ina viigariei. Moses ega maiteni au dobuna ina rui ma lamna aubaina i vitauririwei muriai da tauna ita irage. I parivainotai menanare God taui Egyptei i taravaina-opuneiai ma au mutulua i 'nana-vaitetei. I riwana-melei menanare God ina voteletelana-kauei maranai i rui au Keinan.

Mai Greece ai ponei, wei bukana wavana^{*} anona Tarawatu Viruaina, aubaina Moses marina mara viruaina God ana tarawatu mai Israel e vereverei. Wei lamna ega tarawatu vouna bo tarawatu tapuna ma tagogina.

4

Moses mai Israel i egari da God ina voteletelei

¹ Ma Moses, Israel i riwei i pa, "Mai Israel Ona rautanihana kaua! Au Tarawatu ma au viararamana anatapui ona votelatelana-kauei da ona lawana da BADA, noinota ai God, dobu i vereveremi, ona vaia da ina vigarimie.

² BADA ana tarawatu a ririwemi, ega tarawatu gelaui au tepana ona viruini ma ega ona vaitawanei. Anina ona voteletelei."

⁶ Tarawatui ona vojjina-kauei da dam gelaui ami nuaulaula ma ami aramana ina inanai. Ma tarawatui ina nonori ma ina riwa, "Riwa kaua da dam Israel lamna dam nuanuaulalai ma araramani.

⁷ Ata BADA au ririvata ma e vovoaguita maranai ta raraupari awarina. Metauna damna gelaui, gaegae bo muomuoi, ai God nanare ai rava awarii e kaukauei.

⁸ Tarawatui aiaiai ma jijimani anatapui amadodo a ririwemi, Ega mepa dam gelauna aburuna bo gaegeena ana tarawatu jijimanina me wei."

³²⁻³⁴ Maranai BADA urana vivirewapananei Egypt ei i tereopunemi, tauna kaua babai ma virewapanai i kaei. Mai Egypt i vipupui aubaimi. Ma i vainimi da natunatuna, ma au ola Sinai o nonori awarimi i babani, ma o nonori ai menamena au orana ma awarimi i babani, ma lawalawaimi o mae! Wenanare wariaga i tupua dadana awarii bo ega? Ega! Ona nae me da au karea, maranai God oroto ma wavine i kaei da marina; ma dobu au giana da dobu gela au giana ona baiei. Kaua wenanare aniba i tupua-dadana bo ega?

³⁹ Amadodo ona aramanei ma ega melanai nuanuami ina vuru da BADA lamna God au mara ma au dobu. Ega god gelauna ita mamae.

⁴⁰ Ana tarawatu amadodo a vereveremi anatapuna ona voteletelei. Da aiwai anatapuna ina ai taumi ma ami epaepaia au murimi ma ami mae ina manawa wei au dobuna BADA e verevere-nonoemi.

6

BADA ami God nuanuami ina vaia

⁴ [◊]"Ona rautanihana Oo Israel! BADA ata God, Tauna ava BADA.

⁵ [◊]Nuanuami ina vaia orami anatapunei ma aruami anatapunei, ma ami rewapanan anatapunei.

⁶ [◊]"Wei tarawatuna amadodo a vereveremi ona vojjina-kauei.

⁷ Natunatumi ona viararamani. Ona babaniei maranai o viboruboru numa au orana bo o bababara-nae, bo muriai da ona matave bo o matave-vomairi."

7

BADA ana rava vinevinei mai Israel

¹ [◊]Ma Moses mai Israel i riwei, "Maranai BADA ami God i ruiemi dobuna i vereveremiana; Tauna au naomi ami gavia anatapui ina viagaiana-opunei: mai Hitti, mai Girkash, mai Amori,

* :: Deuteronomy [◊] 6:4: Mrk 12:29 [◊] 6:5: Mrk 12:30 [◊] 6:6: Deu 11:18-20 [◊] 7:1: Act 13:19

mai Canaan, mai Perisi, mai Hivi, ma mai Jebus. Dam seven ġaeġaei ma vivirewapaña kauai eġa me taumi.

² Ma maranai BADA ami God taui au urami i terei ma o vovaiubai lamna taumi wei ravai ona pupuni. Eġa maiteni aiwai babanina ona kaei; ma eġa ona rau-nuapoapolei.

³ Eġa awarii ona tavine. Eġa natunatumi guguinii bo laragai ona verei da ina ravaġi.

⁴ Aubaina natunatumi ina raveni da BADA ina voterei ma god ġelau ina raudunelei. Ma BADA ana amlogaġai awarimi ina nei ma ina pupunimi.

⁵ Wenanare awari ona kaei. Ai pulo aniapuna ona viairkarikai ma ganai ona viaigwadagwadai; ma Asherah kokoitaui ona viaigaġai ma ai au menamenana ona apui.

⁶* Aubaina BADA taumi i vinemi ma i viaiainimi Tauna aubaina. BADA rava maġamāġau au dobu ma taumi i vinemi da ġarinei.

⁷—Ma BADA eġa ita rauoġarem ma ita vinem aubaina taumi dam patarana ġaġaena, eġa me dam ġelau. Riwa kaua da taumi dam aburuoina au dobu.

⁸ Wate BADA nuanuami i vaia ma parivainuağħana bagibagina noinoimi maiteni i kaei. Ma lamna aubaina urana virewapananei panipani au orana i vai-melemi, Pharaoh - mai Egypt ai gulau awarina.

⁹* Ona aramana-kauei da BADA ami God. Tauna ava God ma tauna God vipatutuna ma aiwai e ririwei e kauakei. Taui da nuanuana e vaivaiwa ma ana babani e vovoteletelei, Tauna taui nuanuana e vaivai-kauei ma e viaiaina-kauei i parivainuağħani nanare da kimta tausan.

¹⁰ Wate taumi da BADA o rauaġġaie; Tauna eġa ina volatelatemi ma ina pupunimi.

¹¹ Nanare taumi ona inana-kauei da tarawatu ma viararamana anatapui amadodo a vereveremi ona vovoteletelei.”

8

BADA ami God eġa nuanuami ina vuru

² Moses ana rava i riwei i pa, “Nuanuami eġa ina vuru; menanare BADA ami God au mutulua i ravenimi da madiegħi 40 da volaġota ota aramanei ma orami ana rewapani ita inanai. Ma ita aramanei ana tarawatu ona vovoteletelei bo eġa.

³ Ee nanare! I viamiraġenimi da o volaġota ma mannei i viambagibagim. Amamami maiteni manna o vinuanahei; eġa mepa ota amdadani. I kaei da ita viararamani da rava eġa lam ava awarinei ita mamae, wate riwa anatapui BADA gamonei e opopu.

¹²—Maranai o amam kaua, ma numa aiai o maemaeni,

¹³ ma maranai ami bulumakau ma sипу borui e maġamāġa, ma e vivipurapura; ma e maumaura-kaua.

¹⁴ Ona inana-kaua da eġa ona mae-ġaeġae, ma nuanuami ina vuru! Da BADA menanare Egypt ei panipani au dobuna i tere-opunemi.

¹⁵ I taravaina-naie mi au mutulua ġaġaena ma vi'nirovorovona mota ġaġaiawai ma tanara ai dobu. Dobu paipairana ma eġa waira. Wate i kaei da kira i ravi ma waira i ruba-opu taumi aubaimi.

¹⁶ Au mutulua *manna* i veremi da o am; amamami nai lamna eġa ita am-dadani. Wei lamnei i rauadanimi da ota volaġota; da au damona ami lawana ita ai.

¹⁷ Ona inana-kaua da eġa au nuanuami ona riwa, ‘Tauai ai rewapani ma ai egolei a vüpürapura ma a maura.’

¹⁸ Wate BADA am God eġa nuanuami ina vuru aubaina tauna tepanei ta maumaura, ma lamnei parivainuağħana bagibagina noinoimi maiteni i kauakei e rarauso.

11

God aiwai i kauakeia ona notai

¹⁸* Moses mai Israel i riwei, “BADA riwana eġa nuanuami ina vuruvuru ma ae-tuġuna ona rereġi. Ona girumi da au urami ona raġini ma ġelau au muruami ona raġini ami mataira.

¹⁹ Natunatumi ona viararamani, ona babaniei: ami au viboruboru bo maranai o bababara bo o vivilauvitau ma maranai o vovobagibagi.

²⁶—Ona inana! Au naomi viaiaina ma kovoġa a tereterei, ma tam am ġoana.

²⁷ Marina BADA ami God ana tarawatu a vereveremi. Mepa da Ona votaġoġoi; tauna ina viaiainimi.

²⁸ Mepa da ana tarawatu ona geduaiei ma ona mae-taviremi ma god ġelaui ona vborumei; BADA ina kovogimi.

³² Lamna aubaina tarawatu ma viaramana a vereveremi, ona kauana-kauei da ona voteletelei."

17

Gulau vinena

¹⁴ *“Maranai BADA ami God dobu e vereveremia o ruiriana, ma o vaia, ma numa o voanaiei da o maeni. Ma ona riwa, ‘Dam ġelaui ai gulau e mamae ma tauta menanare?’

¹⁵ Ona inana-kauei da BADA ami dam nununai awariei ami gulau ina vinevinei, ma eġa dobu ġela ravai ona vinei.

¹⁶ Ma tauna eġa ana horse maġamaġau ina ġamoi. Ma eġa rava ina paritawanei au Egypt da horse ina gimarai. Aubaina BADA i riwa da natunatuna eġa melanai ina naeme kampa.

¹⁷ *Ma gulau eġa awawana ina maġa, ma eġa gold ma silver ina maurei da nuapouna ina vinua-raġarāġai.

¹⁸ Ma maranai i vigulau, tauna pirisi Levi ana damei maiteni ina kiala da nimanei tarawatu bukana ina giruma tauna aubaina.

¹⁹ Wei bukanu au ririvana ina mae ma ina iava-nonoei ma lamnei BADA ina vivrei ma ana tarawatu ina vipatutuei.

²⁰ Ma lamnei eġa ina terepa-melei ma ana rava ina inana-ġairei bo eġa tarawatu ina mae-puputei ma ina deġa au kelakelauna bo au oieno. Ma tauna ma ana epaepaia ina mae gulau au Israel da kimta maġamagaui ina kwa.”

18

BADA wei kauai i geduaina-kauei

⁹ Maranai BADA dobu i vereveremiana o ruirui, eġa dobuna taumaeni ai kaua apoapoe ma vinimalamai ona ġovaivaiti.

¹⁰ *Eġa melanai:

aiai tam natum orotona bo wavinena ma verenei da pulo aubaina ina apui;
bo ma vimata gamgam, mataira aiwai ma inainanai ma muriai aiwai ina tupua, rava
ma ririwei;

bo ma parauma;

bo ma ġaġala;

bo ma vigwergweri;

¹¹ ma eġa konaqba bo arua maiteni ma babani bo arua ma ġorei da ina rui awarim.

¹² BADA taui da wei kauai apoapoe e kaukauei, i geduaina-kauei. Ma lamna aubaina aburuna ava Tauna rava wei dobuna maemaei ina viaġaġana-opunei au naomi.

¹³ Marana patapatana BADA ami God ona voteletelei.

¹⁴ Wei ravai barabaravui ma paraparaumai. Wate aburuna ava da ai doa anatapuna ona kwalei. Ma BADA ami God e viviġaemi da wei ravai eġa ai kaua ona ġovaivaiti.

God Peroveta me Moses ina paritawanei

¹⁵ *BADA ami God, Peroveta me tau ami damei ina paritawanei. Taumi nai ravana ona rautaniganei.

¹⁶ Aubaina taumi wei lamna o vivibägei maranai o vitagogiemi ola Horeb au karena ma o riwa, “Eġa BADA ponana tana nonori bo ai ġaegħena menamenana tana inana-melei da tana vi'rāġeraġelana.”

¹⁷ BADA i riweu, “Ai vibaqha i ai.

¹⁸ Tau ai damei peroveta ana terepai me tam nanare, Ma riwau au gamona ana terei, da aubaiu ina vitau-vibabani.

¹⁹ *Tauna wavauei ina jima, ma pariviravirai ana kovoġi.

²⁰ Wate maranai peroveta i mae-ġaegħae ma e ririwa da wavauei e jimajima wate tau eġa babani ata verei, bo god ġelaui aubai e nolola, Nai perovetana ona virażeni.

²¹ Mepa deo in vinuanina, ‘Menanare tana aramanei da lamna eġa BADA ita babani?’

²² Wenanare ona aramanei. Maranai peroveta i babani BADA au wawanei ma anona eġa ita tupua lamna nai babanina tauna ana babani ma eġa BADA. Lamna tauna ana vinuanotanota, nai ravana eġa ona rovoei.”

31

Joshua Moses i raviepaiai

⁷ Ma Moses Joshua i kwatuei da i nei. Ma Israel patarai au matai i riwei i pa, "Ma virewapana ma tepam ina tora. Tam wei patarai ma ruiei dobu BADA noinoim i verevereiana. Dobuna ma ġutai da Israel dam ma patai ma ma voagui da ina viġariei.

⁸ [◊]BADA Tauoina awarim ina mae ma am etanai ina raveni. Eġa melanai ina netawanem bo ina voterem. Lamna aubaina eġa ma rovo bo oram ina peul!"

34

Moses i 'raġe

¹ Ma Moses Moab wapuna i netawanei ma ola Nebo i ġaeni da au tepa dewadewana e ġoreġorei Pisgah, ma au navanava ġelauna lamna Jeriko. Weka au Pisgah BADA Moses dobu anatapuna i viatataiei, au Gilead i vikarei da i ġae au Dan.

² Ma dobu Naphtali, dobu Ephraim ma dobu Manasseh, dobu Judah, ma i nae da au Mediteranean bogana.

³ Ma BADA Moses mutulua e ġoreġorei Negev i viatataiei; ma Jordan gaubana da i nae da au Jeriko da i nae da au uama Zoar melagaina.

⁴ [◊]Ma BADA i riwa, "Wei dobuna lamna Abraham, Isaac ma Jacob a parivainuagani da 'ami epaepaipaia ana verei.' A voterem da dobu matamei u inanai, wate au dobuna eġa ma rui."

⁵⁻⁹ Muriai Moses urana Joshua, Nun natuna au kolana i terei ma i viaiaini ma nuaulaula orana i ruini. Ma lamna aubaina mai Israel Joshua i voteteleli Moses i ririweia nanare. Ma BADA ana taunola Moses, i 'raġe mai Moab ai au dobu, BADA i ririwei nanare.

Joshua

Pariverena

Wei bukana e ririweta da menanare mai Israel i rui au Canaan da rava kampa maemaei i vovaiubai. Ma nanare e ririweta da mai Israel menanare dobu i ġutanei ai dam 12 awari. Wei bukanawavana Joshua aubaina bukana au karena e ririweta da aiwai aubaina da Joshua i terei da mai Israel ai bada, maranai Moses i 'raġe.

BADA, Joshua i vinei

¹ Maranai BADA ana taunola Moses i 'raġe; ma Joshua, Nun natuna ma Moses ana tauagu i riwei,

² "Au taunola Moses i 'raġe. Marina mai Israel maiteni ona vokaukaua ma Jordan ona damani da dobu a vereveremiana kampa ona ġeta.

³ Metaui dobui ae-lapalapami o terei, lamna ina viġarimie, Moses wenanare a parivainuagāni.

⁴ Ami dobu lamna mutulua Negev da Lebanon; au waira Euphrates (au maramatanei) da mai Hitti ai dobu anatapuna da i ġaira madeġa e arearere lana Mediteranean au bogana.

⁵ *Eġa aiai ina vobelem bo ina viubaim am au lawana. Tau awarim ana mae, me Moses awarina a kaukauei nanare. Tau eġa melanai ana tere-ġairem bo ana votrem.

⁶*—Parivainuagāna bagibagina a kauei wei ravai noinooi maiteni da wei dobuna ana verei. Lamna aubaina ma virewapana ma tepam ina tora ma am rava ma ruiei wei au dobuna.

⁷ Anina ma virewapana ma tepam ina tora; ma nuanuam eġa ina vuru da tarawatu Moses i verem, anatapuna ma voteletei. Ma ma vojjina-kauei da awarina eġa ma deġa au oiem bo au kelakelaum da aiwai anatapuna e kaukauei ina ai.

⁸ Marana patapatai wei tarawatuna ma iaiavi. Ma marai da waguvvarai ma vinua-notenotei; wei lamnei tarawatu anatapuna ma aramanei. Mepa da wenanare ma kauel lamna tam ma maura ma nuaiai ġaegaena ma nelāġi kaua au anatapuna."

5

Raġona naona au Canaan

¹⁰*Mai Israel au Gilgal i mae Jeriko au wapuna. Ma Aupom vi-14-na aubigai nawaravi naona taui raġona torelana i apui.

¹¹⁻¹²*Ma ubaubanai ġelauna, raġona au murina, taui witi au wapu i tuarui ma palawa dabababai i apui ma i am. Ma ubaubanai ġelauna Manna raua i votrei, taui wei lamna eġa ita am-melei, ma ai lam wapuei i tuarui. Mai Israel eġa manna ita am-melei, lam ai au doa au dobu Canaan i vaia da i amam.

24

Muriai Joshua ma mai Israel mai Canaan maiteni i viġaiġaċċawa, dobu au giana da au giana. Ma dobuna ravai i viragħeni, wate ġelau eġa ita viragħeni ma maiteni i mae. Muriai Joshua dobu i ġutai Israel ana dam twelve awari. Taui i nae ma ai doa i maenī melagai nonoana mai Canaan i voavoa. Madeġa maġgamagaui i kwa ma Joshua mai Israel i vitagogħana-melei.

Mai Israel i riwa da BADA ina vitaunolei

¹ Muriai Joshua dam anatapui i ġorei da au Shekem ita vitagogie. Maranai kampa i ġeta Joshua, dogadogara, dam babadai ma melagai babadai i ġoreiai da ita nae BADA au naona ita mairi.

² Joshua rava anatapui i riwei i pa, "BADA mai Israel ai God e ririwa, 'Wariaġa noimi Terah ma natunatura Abraham ma Nahor waira Euphrates au baba ġelauna i mae, ma god maġgamagaui i raraudunelej.

³*Wate noimi Abraham nai dobunei a vaitawanei ma i naiei da Canaan doana ana tapuna a viatataie, ma ana epaepa a vimaġai. Ma natuna Isaac a verei.

13 —Tau dobu a veremi ana debagauna ma ana peipeina, doana ega ota nolei ma taon gaegaei a vereoimi, marina o maemaeni, ega ota voai, ma grape ma olive o amam wate ega, taumi ota paewi.'

14 —Lamna aubaina BADA ona voteletelei ma orami taputapunei ona vipatutu. Noinoimi god morumorui kokoitau, i raraudunelei au Egypt bo au waira Euphrates ona kwajieiau modu ma BADA ainelana ona viborumei.

15 Wate mepa da BADA viborumeina o geduaiei, lamna amadodo ona vine da noinoimi ai god waira Euphrates au baba gelauna bo marina ravai ai au dobu o mamae mai Amori ai god ona nolei. Wate tau au numa ravai maiteni BADA ana viborumei."

16 Ma rava i paribelei, "Tauai ega melanai ai BADA ana voterei ma god gelaui ana viborumei.

17 BADA ata God tauoina au Egypt i tere-opuneta noinoita maiteni maranai au Egypt ta vilaraga. Ma kaua vivirewapanai ma aniba i kaei au mataiai. Ma ai au vaigai manamanaina i painiai dam gelaui au poui da wei au paratana.

18 Mai Amori ma dam gelaui wei au dobuna i mamae wate BADA aubaiai ravai i viaigaianaopunei. Lamna aubaina tauai BADA ana borumei, aubaina tauna ainelana ata God."

Judges Taurauetara

Pariverena

Wei au bukana Joshua ana iraäge marana ma i nae da Samuel ana tupua marana e ririweta.

Vinevinena

Joshua au murina aiwai i tupua (Jdg 2:7-19).

2

Joshua au murina

⁷ Mai Israel BADA i viborumei maranai Joshua lawalawaina i mamae ma i 'raäge ma kintana magumagurii biağa i mamae i 'raäge-pai, wei ravai BADA kaua gaegae i kauei i vimatematei.

⁸ Nun natuna - Joshua BADA ana taunola ana madeğä 110 ma i 'raäge.

⁹ Ma doa i verevereia au Timnat Herek i doboi, Ephraim au olana, wei lamna Ola Gaash ana au laubadei.

¹⁰ Anina ma wei kintana i nepai amamai awarii ma kimta ġelauna ai gabu i vaia. Wate taui BADA eğä ita aramanei ma nanare aiwai i kauei mai Israel aubai.

¹¹ Ma kaua apoapoei i kauei BADA awarina ma Baal kokoitaui i raudunelei.

¹² Taui BADA amamai ai God i votere-tawanei; Wei Godna taui Egyptei i taravaina-opunei. Ma i nae ma dobūgela ravai au ririvai maemaei ai god i viborumei. Wei kauana BADA i viamlo-ġaiġaini.

¹³ Taui BADA i voterei ma Baal ma awana Ashtoreth kokoitaui i viborumei.

¹⁴ Ma BADA amlona i ġaiġai kaua mai Israel awari, da i veredamanei ai ġavia awari ma taui ai purapura i tama-naiei. Ma i voterei ai ġaviai maġamāġau au ririvai awari, ma taui eğä tagotagogina da ita vobelei.

¹⁵ BADA mai Israel i viġavie maranai i opopu viġavia aubaina. Lamna aubaina eğä ita vovaiuba BADA i ririwei nanare. Ma taui i vinuabola kaua.

¹⁶ Anina ma BADA taurauetara bo ġavia babadai i terepai, da i voagui da ai ġavia i vovaiubai.

¹⁷ Wate taui ai taurauetara i parivirevirei ma god ġelau i erawai ma i raudunelei. Taui laġilġagina amamai i babbara lana i voterei ma BADA i rau-agħajnej.

¹⁸ BADA mai Israel ai tou i nonori menanare ai ġavia taui i rau-iviapoapoelei. BADA taurauetara i terei ma i voagui ma i gagħloei. Maranai taurauetara i mae, BADA mai Israel i raunuapoapolei.

¹⁹ Wate maranai taurauetara i 'raäge, rava, BADA i mae-puputei ma i apoapoe kaua eğä me amamai nanare ma god ġelau i vitaunolei ma i raudunelei. Taui i geduai kaua da ai kauai apoapoei ma ai ora pota ita voterei.

Mai Israel kaua apoapoei i kaukaei lamna ai parivainuāġana bagibagina BADA maiteni i kaukaei i viviagħi. BADA amlona i ġaiġai ma ana nota i terei da mai Israel ita raudadani da ita voagui da dobūgela ravai ita viäġaġana-opunei. Dobūgela ravai mai Israel i raudadani da taui BADA ina votaġġotagoi bo eğä me amamai i kauei nanare.

1 Samuel Samuel ana buka tagogi Pariverena

Buka 4 ma Samuel ana buka i vinao da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai taurauetara damona. Tauna, Saul ma David au kolai monamona i waġi da i vigulau, lamna aubaina wei bukana i viwawai Samuel. Wei bukana mai Israel ai kaua e bababaniei i næ da Saul ana au iraġe.

Vinevinei

Samuel ana tupua (1; 2:1-11; 3:1-21)

Mai Israel gulau i vibaġei (8:1-22a)

Samuel Saul i buloi (9:1-3, 15-16, 10:1-2, 5-24)

Saul i vivibada (11:14-15; 13:13-14; 15:1-4)

BADA Saul i geduaiei (15:7-23, 27-29, 34-35)

Samuel David i buloi (16:1-7)

Saul David i unurei (18:7-9)

David Saul i ruba-tawanei (21:1-6)

Saul ana iraġe (31:1-5)

Samuel i tupua

¹ Oroto tagogi wavana Elkanah, ana dam Ephraim ma ana melaġai Ramah, Ephraim au olana i mae. Elkanah amana Jeroham, ġoġana Elihu ma noina Tohu, ma ai bariawa Zuph, ai dam Ephraim.

² Tauna awawana ruaġa Hannah ma Peninah. Peninah i vinatuna ma Hannah aipoi.

³ Madegħana patapatana Elkanah Ramah i netawanei ma i næ au Shiloh da BADA VIVIREWAPANA KAUKAUANA ita voepaepi ma pulo ita apui awarina. Weka Eli natunatuna Hophni ma Phineas BADA ana pirisi pulo tauapui i mae.

⁴ Maranai Elkanah pulo i apuapui ma sia sikasikana i ġutai da awana Peninah ma natunatuna i patai.

⁵ Wate awana Hannah sia vinevinena i verei aubaina awana nuanuana i vai-kauei avena da BADA i kauē da tauna aipoi.

⁶ BADA Hannah manawana i gudui ma lamna aubaina turana i vivinamei ma i vivijiboganonoei da ita vinuabolai.

⁷ Wei kauana i mae madeġħana patapatana. Maranai Hannah i næ BADA ana au numa, Peninah tauna i vivinuabolai ma i vitoutouni da eġa ita amam.

⁸ Maranai Elkanah awana Hannah i paripari-dadanei, “Hannah aiwai e toutouei? Aiwai aubaina ega uta amam? Aiwai aubaina e vivinuabolai, natunatum eġa lamna e vivinuabolei bo? Tau weka! Natunatum nelarai 10 epaiai!”

⁹⁻¹⁰ Mara tagogi maranai taui i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirisi Eli kampa ana au gabu tempol au metaetana i kiakiala.

¹¹ Ma i parivainuagħana i pa, “Oo BADA VIVIREWAPANA KAUKAUAM. Ma inanai am taunola au ora-tou uta inanail! Ma uta notai ma eġa nuanuam ina vuru. Mepa da natu orotona uta vereu lamna teverana ana veremelem da ina vilaragem ana au lawana au anatapuna, ma aparana eġa ina bori-dadanei.”

¹² Ma i raraupari BADA awarina ma Eli tauna ipirina i 'nainanai.

¹³ Hannah au nuanuana i raraupari ma ipirina ava i vidagudagu wate eġa babani ita opuopu. Ma Eli i notai da tauna i uma-bua,

¹⁴ ma awarina i riwa, “Ina baem bo, uma bua ma voterei!”

¹⁵ Wate Hannah i paribelei, “Eġa nanare au bada tau eġa wairā bagibagina ata umai, tau au nuabola i rata kaua ma lamna aubaina a toutou BADA awarina.

¹⁶ Wenanare a raraupari aubaina nuanuau i bola-kauei ma eġa ma notai da tau wavine apoapoeu.”

¹⁷ Eli i paribelei, “Ana nuaubam ma nael! Ma BADA Israel ana God am vibaġa ina kauēi.”

¹⁸ Tauna i paribelei, “Au bada egualau kaua ma eġa ma nota-boaiu.” Ma i næ ma i am da orana i uba.

¹⁹ Ma ubaubanai boibogi Elkanah ana numa ravai i vomairi ma i nae da BADA i raudunelei ma i ġaira me au Ramah. Elkanah awana Hannah maiteni i matave ma BADA wavine ana pari i paribelei.

²⁰ Hannah i duama ma natuna orotona i ġuni ma wavana i ġorei Samuel ma i riwa, “Wei lamna Aubaina BADA a vibagai.”*

Samuel i puloei BADA awarina

²¹ Ma madega ġelauna i ġetai ma Elkanah ana numa ravai maiteni i ġae au Shiloh da pulo ita apui BADA awarina ma pulo ġelauna BADA i parivainuaġani ita kaei.

²² Hannah ega maiteni ita nae ma awana i riwei, “Maranai tevera ina eda ma ana ġaiei BADA ana au numu ma kampa ina mae-nonoa.”

²³ Elkanah i paribelei, “Ee nanare aiwai e notanotai da i ai ma kaei, ma weka ma mae da tevera ina eda. Ma BADA ina voaqim da am parivainuaġana anona ina tupua.” Ma wavine au numu i mae da natuna i eda.

²⁴ Maranai tevera i viedai ma alona i naiei au Shiloh, bulumakau orotona ana madega tonuġa, palawa baikena tagogi ma wine wagina ġaegħena maiteni. Avena da tevera melamelana ma alona i naiei da Eli au urana i terei.

²⁵ Ma burumakauna i apui God awarina ma tevera i naiei Eli awarina.

²⁶ Ma Hannah i riwa, “Oo BADA e notanotai rorova tau weka a raraupari BADA awarina.

²⁷ BADA a vibagai wei teverana Aubaina ma a vivibagħei i vereu.

²⁸ Lamna Aubaina marina natu a vereverei BADA awarina. Ana lawana anatapuna BADA ina verei.” Ma kampa taui BADA i voepaepai.

2

Hannah ana voepaepa

¹ Ma Hannah i raupari BADA awarina i pa,
Tau a vinuajai kaua BADA awarina;

Tauna rewapania i vereu.

A vinuajai Aubaina Tam u vilawani
ma lamna Aubaina au ġavia a vivinamei.

² Oo BADA ega aiai ġelauna vivivireina me tam;
ega mepa god ġelaui anina tam ava;
ega taugħagħol ġelauna me tam, ai God.

³ Tau a ririwa, “Vogulagħulau ma pari-gulagħulau ona voterei;
Mae-ġaegħe babanina ona voterei.

Aubaina BADA ami kaua anatapui e araramanei
ma ina kovoġimi.”

⁴ BADA Tam sorodia vivrewapanai ai pidu u viaigaigai;
wate vovokokarai u vovai-virewpani

⁵ Amam iauai marina ina nola da ina am;
am-irairagei ega am ina iraġe.

Wavine aipojna roaroa 7 i ġuni;
wate roaroa maġgamägħui aloi i netawanei ma tauna ava e mamae.

⁶ BADA, iraġe ma lawana e neinei;
Tauna rava au kokoaga e teretere-ġairei ma e vovvai-mairini.

⁷ BADA rava ġelau i vivimaurai ma ġelau i vivigomari;
ma ġelau e teretere-ġairei ma gelau e teretere-ġaie.

⁸ Tam rava molamolakai pokau au orana e sinasina-epai;
ma rava vigigimħan l-oġiġi au orana e sinasina-epai; da gulagħulau maiteni e kiakiala
ma vigilau taui ina viġariei.

Dobu anatapuna tam ġarimei;
ma aiwai anatapuna ana au animae u terei

⁹ Tam am rava patupatutui e gagħgaloei;
ma apoapoe taukauei e amoamoa au iraġe

Rava ega ai rewapani ita vovaiuba;

¹⁰ Tam am ġavia ma pupuni;
am meji ina viarapawa me waiparara

BADA tam dobu ma rauetarei

* ^{1:20:} Samuel pona Hebrewi nonorana me God awarina agu i vibagħei.

ma am gulau ma vovai-virewapani,
ma am vinevine bulobulona ina virewapani kaua.

¹¹ Eli kanah natuna Samuel i voterei ma i nae me ana au melagau au Ramah. Samuel pirisi Eli au urana i mae au Shiloh ma BADA aubaina i vitaunola.

Maranai Samuel i rarata tauna au numa gara i vovoagu da God ana nola i kaukauei. God ma rava Samuel ana nola i ġoana-kauei. Eli natunatuna ruaga pulo tauapui, pirisi apoapoei. Maranai rava i nei da ai goa apoapoe aubaina pulo i apui BADA awarina, taui wei siai vovivirana i voviviri da i amam. Ma lamna aubaina Bada peroveta i paritawanei da Eli i riwei da tauna natunatuna ega ita vinua-terenei aubaina go'apoapoe i kaukauei, ma natunatuna ina viragena ruagei. Wei au murina Eli ana epaepaia laragai ma anatapui ina iraġe-pai.

3

BADA Samuel i ġorei

¹ Wei au marai BADA ega rava awari ita bababani bo ai au rauboni bo ai au inana ita viviegħana-melei, mara tagotagogi ava wei i tuputupua. Tevera Samuel Eli i voagui ma BADA awarina i vitaunola.

² Eli matana i apoapoe kaua ma ega ita inainana kaua. Ma waguvvara tagogi ana au gabu i matamatave.

³ Ma Samuel BADA ana au numa i matamatave Parivainuāġana bokisina au ririvana ma God ana rampa au Gabu vivivireina i ararata.

⁴ Ma BADA Samuel i ġorei, "Samuel!"

Ma Samuel i paribelei i pa, "Ee tau weka!"

⁵ Ma i vomairi ma i ruba Eli awarina ma i riwa, "U ġoreu da a nei."

Eli i riwa, "Ega ata ġorem, ma nae me da ma matave."

⁶ Ma BADA i viġore me, "Samuel!"

Samuel i vomairi me ma i ruba Eli awarina ma i riwa, "U ġoreu da a nei."

Eli i riwa, "Natu tau ega ata ġorem ma nae me da ma matave."

⁷ BADA ega Samuel awarina ita babani dadana lamna aubaina ponana ega ita aramanei.

⁸ Anina ma mara vitonuina BADA i viġore me Samuel i vomairi ma i nae Eli awarina ma i riwei, "U ġoreu da a nei."

Anina ma Eli i aramanei da lamna BADA tevera i ġoreġorei.

⁹ Ma Samuel i riwei, "Ma nae me da ma matave. Mepa da ina viġore me lamna wenanare ma riwei, 'BADA ma babani, am taunola a rarautaniġana.'"

Anina ma Samuel i nae me da i matave.

¹⁰ Ma BADA i nei ma i mairi ma i viġore me au naona i kaukaueia nanare, "Samuel, Samuel!"

Samuel i paribelei i pa, "Ma babani am taunola a rarautaniġana."

¹¹ Ma BADA Samuel i riwei, "Tau kaua vivi-inirovorovo kaukauana ana kauei mai Israel awarii ma maranai rava riwana ina nonori taui orai ina sisi.

¹² Rorova a riwa nanare, Eli ana numa ravai maiteni ana kovoġi.

¹³ A riwana-guratei da ana numa ravai ana kovoġa-nonoei aubaina natunatuna i vijibogiu ma i vinimalamalaū ma tauna natunatuna i vibae-naenaelei.

¹⁴ Riwa bagibaginei a ririwa da Eli ana numa ravai ai go'apoapoe ega melanai ana notawanei. Avena da pulo ina apui awariu."

¹⁵ Samuel ana au aravi i mae da mara i tom ma BADA ana numagara metaetai i votawawanei. BADA aiwai Samuel i riwei tauna i rovo da Eli ita pariverei.

¹⁶ Wate Eli Samuel i ġorei i pa, "Samuel natu."

Ma i paribelei i pa, "Tau weka."

¹⁷ Eli i paridadana, "BADA aiwai i riwem? Anatapuna ma riwei ma ega lamna BADA ina kovoġa-guratem!"

¹⁸ Anina ma Samuel anatapuna i riwei, ega aiwai ita tajjini. Ma Eli i riwa, "Tauna BADA, ma aiwai awarina i jijimana ina kauel."

¹⁹ BADA Samuel i mae-ratui maranai i rarata ma Samuel aiwai i ririweia ma nanare i tuputupua.

²⁰ Ma Israel au giana da au giana, au Dan i vikarei da au Beersheba, anatapui i aramanei da Samuel lamna BADA ana peroveta.

²¹ Mara i maġa BADA au Shiloh Samuel awarina i ega ma i babani.

8

Mai Israel Gulau i vibagħi

¹⁻² Samuel natunatuna ruağā, natuevou wavana Joel ma umauna Abijah. Maranai Samuel i magura ma natunatuna i vinei taurauetara au Israel ma i terei da au Beersheba i nola.

³ Wate taui eğā amai ana kaua ita vaia ma ai nuvaina mane ma lamna aubaina manelei i gwlai ma rauetara i vibarai.

⁴ Ma lamna aubaina Israel babadai i riei Samuel awarina au Ramah.

⁵ *Ma i riwei, "Ma rautaniğana bada! Tam u magura ma natunatum eğā am kaua ita ġoavaitei. Ma lamna aubaina tauai a ġoei da gulau ma verelai da ina raveniae, me dobu ġelaui ravai e kaukauei nanare."

⁶ Wate maranai wenanare i riwa Samuel eğā ita vinuaiai dadana, ma i raupari BADA awarina.

⁷ BADA i paribelei i pa, "Aiwai anatapuna ravai e ririwem ma kaei, taui eğā tam ita geduaiem wate Tau ai gulau i geduaieu.

⁸ Maranai Egyptei a teretero-opunei da wei paratana, taui marana patapatana i mae-puputei ma god ġelaui i raraudunelei; marina nanare tam awarim e kaukauei.

⁹ Ai ġoana ma verei wate riwa bagibaginei ma riwei menanare gulau ina kauanei taui awari."

¹⁰ Samuel BADA ana babani anatapuna taui gulau i vivibägei i riwei

¹¹ i pa, "Maranai gulau ina vibademi lamna awarimi wenanare ina kaei. Tauna natunatum ina tama-naiei sorodia da ana chariot ma ana horse ina gerui ma ġelaui ana chariot au naona ina ruba.

¹² Gelaui sorodia 1,000 ma ġelaui 50 ina vibadei. Gelaui ana wapu ina ipiei ma ana lam ina tuarui. Gelaui ġavia apiai iramei ma chariot iramai ina kaukauei.

¹³ Gulau, natunatum guguinii ina egari da ana monamona ġabuġabui ina kaukauei ma ġelaui ana palawa ina apuapui ma ana taulauvoa.

¹⁴ Am wapu ma grape wapui ma nanare olive wapui aiaii avavai ina vaia da ana gabemani babadai ina verei.

¹⁵ Ma maranai ami witi ma grape ma olive o tuarui ma ġuta 10 ona terei ma tauna ġuta tagogi ina vaia ma ana gabemani babadai ina ġutei.

¹⁶ Ami laraga nelarai ma guguini ma am bulumakau ma donkey vinevinei ina vaia tauna aubaina.

¹⁷ Ma ami sipu ma gote ġuta 10 o terei ma tauna ġuta tagogi ina vaia tauna aubaina, ma taumi ina vainimi ana taunola.

¹⁸ Maranai wei kauai i tupua ma ona tou guratana BADA awarina da gulau taumi o tereterei awarimi ina vaitawanei, wate BADA eğā ina voaguimi."

¹⁹ Wate rava Samuel ana babani bagibagina eğā ita rautaniğanei. Taui i riwa, "Tauai anatapuiai a ġoei da gulau ina vibadelai,

²⁰ da tauai me dobu ġelaui ravai nanare ma ai gulau ina raveniae ma ana opu viġavia aubaina."

²¹ Anina ma Samuel BADA i riwei aiwai ravai i ririweia

²² ma BADA i paribelei i pa, "Ai ġoana ma kaei, gulau ma verei."

Ma Samuel ravai i paritawanei ai au numa.

9

Samuel, Saul i buloi gulau

¹ Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ġoġana Zeror ma noina Bekorath ma ai magura Aphiah, Benjamin ana damei.

² Kish natuna Saul i tupua kaua ma laraga inanana aiaina eğā me laraga ġelaui au Israel, ma tevera ae manawa.

³ Maratagogi Kish ana donkey i kwako ma natuna Saul i riwei, "Am taunola ma taravaini ma ona nae donkey ona baiei!"

Saul ma ana taunola donkina i baiana-gurati wate eğā ita nelagai ma i nae da peroveta Samuel ita raugenari da ita vibagai da mepa donkey ita baiei.

¹⁵ Ma maratomna da Saul ana taunola maiteni ita ġeta Samuel awarina, BADA Samuel i riwei,

¹⁶ "Wenanare marana au maratom oroto laragana Benjamin ana damei ana paritawanei. Olive monamonanei kolana ma buloi da ina vimataira da tauna a tereriei da au rava Israel

ina vibadei. Tauna mai Israel ina voagui da mai Philistia ina vovaiubai. Au rava mai Israel a inanai i vinuapoapoe ma ai tou awariu agu aubaina a nonori."

10

¹ Ma Samuel olive monamonana wagina i vaia ma monamona i waġi Saul au kolana. Ma i vigia-laġoġaġonei ma i riwei, "Wei a kaukauei aubaina BADA i terem ana rava vinualaulaunai Israel ma vibadei.

² Amadodo rava ruāga ma nebelei Rachel ana kokoaga au ririvana au Zelsah, Benjamin ana au dobu. Taui ina riwem, 'Donkina o baibaei i nelāgai. Ma marina amam eġa donkey ita baibaei wate tam e vivinuabolem, e paripari-dadana, Menanare natu ana nelāganei.'

⁵ —Ma ona nae God ana au Gibeah ola aburuna, weka mai Philistia ai sorodja i raugarravu. Ma ona ruirui au taon ma Peroveta borui olei ina ġaigairai. Taui gitar* ma harp, tambourine ma duraio ina vikalokaloei ma BADA ana babani ina garagararei.

⁶ BADA Aruana Vivivireina ana rewapanana oram ina naen i ina vibadem, ma taui maiteni BADA ana babani ona jimej. Ma oram ina ravivouni da tam me rava ġela.

⁷ Maranai wei kauai i tupua, aiwai BADA e viviatataiem ma kauei."

⁸ Samuel i riwa, "Tam ma vinao au Gilgal, ma kampa ana nebelem da ġamogħamo ana vunui ma taputapuna ana apui ma ġamogħamo ġelaui ana apui viturana pulona. Wate kampa ma vipaipai aupom 7 da ana ġetaj ma riwa ġelaui ana riwei."

Saul i terei gulau

⁹ Ma Saul i mae-tavirei da i nena ma God ana nota i ruini ma orana i ravivouni. Wei marana aiwai anatapuna Samuel i ririwei i tupua.

¹⁰ Maranai Saul ana taunola maiteni au ola Gibeah i ġeta, peroveta borui i 'nanai i nenei awarri. Anina ma God Aruana Saul i ruini ma i vibadei da tauna maiteni God ana babani i garagaraei.

¹¹ Maranai ravai Saul i araramaneia Saul i 'nanai peroveta au borui i jimajima taui orai i auepai ma ai rava i ririwei, "Riwa kaua bo aiwai i tupua Kish natuna awarina? Saul i vipherova bo?"

¹² Ma nai dobuna ravana i paribelei i pa, "Amana aiai lamna avena aubaina maraġela ravarava ota e viviperoveta." Anina ma wei babanina i mae kampa, "Moina riwa kaua da Saul peroveta?"

¹³ Ma Saul jima i voterei ma i ġae au ola au dobu vivivireina.

¹⁴ Muriai maiana Saul ana taunola maiteni i nelāgai ma i paridadanei i pa, "Mepa o nae?"

Saul i riwa, "Donkey a baibaei ma a baiana-avei da a nae Samuel awarina da ata paridadanei ġamogħamo mepa."

¹⁵ Maiana i riwa i pa, "Ma riweu Samuel aiwai i riwem."

¹⁶ Saul i paribelei, "I riwelai da donkina i nelāgai." Wate maiana eġa ita riwei Samuel aiwai i riwei, da tauna ina vigulau Israel aubaii.

¹⁷ Muriai Samuel mai Israel anatapui i ġorei da ita rieħ au Mispa da BADA riwana ita nonori.

¹⁸ Ma Samuel i riwa, "BADA Israel ai God wei e ririwemi, 'Tau noinoimi mai Egypt vivrewapanau au urai a vaitawanei. Ma a neħħaimi wei au dobuna ma nanare ami ġavia au ririvami a vovaiubai."

¹⁹ Wate amadodo tau ami God o geduaiei, i kauana-guratei ami au nuabola ma ami au piriġiri.' Ma o riwa, 'Eġa! Tauai gulau a ġoegħoei da ina vibadelai! Lamna aubaina dam damai ona opui tau ami BADA au naou."

²⁰ Maranai Samuel damdamai i neħħi BADA au naona ma BADA Benjamin ana dam i vinei.

²¹ Ma Benjamin ana dam i neħħi au naona ma BADA Matri ana epaepaia i vinei ma kampa BADA Kish natuna Saul i vinei. Ma maranai i baibaei tauna kampa eġa.

²² Ma lamna aubaina i raupari BADA awarina, "Tauna mepa?"

BADA i paribelei, "Tauna kampa purapura au orai e raraugovaġa."

²³ Taui i nae da i taravaini da i neħħi, tauna rava aena manamanaina ma i mairi ma rava anatapui i votani.

²⁴ Samuel rava anatapui i riwei, "BADA rava i tereriei da ami gulau, o inainai bo eġa? Eġa aiai ġelauna au orata me wei orotona." Ma rava anatapui i garara, "Gulau ana lawana ina manawa."

* **10:5:** Eng. lyre

11

Saul ana vigulau i vianinei

¹⁴ Muriai Samuel mai Israel i riwei, "Ona nei ma anataputa tana nae au Gilgal ma Saul ana vigulau tana vianinei ma tana amei.

¹⁵ Anina ma anatapui i nae au Gilgal ma BADA i voepaepai ma i riwei da Saul lamna taui ai gulau. Ma taui viturana ma mae-kaua pulona i apui Bada awarina ma mai Israel siana i am ma i uma ma i vinuiai-kaua."

Saul ana madega 30 maranai i vigulau. Tauna sorodia mai Israel i rau-ataraveni da mai Ammon maiteni i vīgaīgaiawa da i vovaiubai. Muriai taui mai Philistia maiteni i vīgaīgaiawa. Wate nai ravai ai sorodia i maga guratana aubaina da mai Israel i rovo. Saul i vipaipai da Samuel ita nae da BADA ita puloi ma muriai ita nae ita vīgaīgaiawa. Wate Samuel ega lāgilagina ita nei. Lamna aubaina Saul pulo i apui BADA awarina. Ma BADA i viamlo-̄gaīgai. Ma muriai Samuel i ġetai.

13

Saul BADA i rau-āgaīgai

¹³ Samuel Saul i riwei, "Tam u bual Tam Ega BADA ana tarawatu uta voteletelei. Uta votelatela lamna am epaepaia maiteni ita teremi da ota vigulau nonoa au Israel.

¹⁴ *Wate marina tam am vibada ega ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA ega uta voteletelei."

15

BADA Saul i geduaiei

¹* Muriai Samuel Saul i riwei, "BADA tau i paritawaneu da a buloim da u vigulau Israel aubaini. Lamna aubaina BADA ana riwa ma nonora-kauei.

² *BADA Vivirewapana Kaukauana i riwa i pa, 'Tau mai Amalek ana kovoġi aubaina amamai mai Israel i vīgavie maranai Egypte i opu da i nenei.'

³ Marina ona nae mai Amalek ona vīgavie ma ona pupuni, ega tagogi ona voterei, nelara, wavinne, roaroa melamelai, bulumakau, sipu, kamel ma donkey.'

⁴ Ma Saul ana sorodia ai riwa i paritawanei da ita nei. Ma anatapui au Telaim taon i vinenebelana. Sorodia 10,000 Judah ana damei i nei ma 200,000 mai Israel ġelauiei i nei.

⁷ Ma Saul ana sorodia maiteni i opu ma Amalek i vunu-naiei ma i vovaiubai, i vīgavia au Havilah ma au Shur i vikwai Egypt au ġereġerena.

⁸ Agag mai Amalek ai gulau lawalawaina i vovijini wate rava anatapui i viraġeni.

⁹ Wate Saul ana sorodia maiteni Agag ega ita viraġeni ma ai sipu ma bulumakau vinevinei ma bulumakau ma sipu natunatui aiaii ega ita viraġeni. Taui ġamoġamo kirakiramai ava i viraġeni.

¹⁰ Ma BADA Samuel i riwei,

¹¹ "Tau orau i viara kaua da Saul a terei Gulau aubaina tauna i mae-puputeu ma riwau i rau-āgaīgai." Samuel nuanuana i bola-kauei maranai wei riwana i nonori ma BADA awarina i tou-maratom.

¹² Ubaubana boibogħi Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepaepai, ma i ġaira me au Gilgal.

¹³ Ma Samuel i ġeta Saul awarina, Saul, tauna i viegualaei ma i pa, "Samuel, BADA ina viaiainim. Tau BADA riwana a voteletelei."

¹⁴ Samuel i paribelei, "Aiwai aubaina sipu ma bulumakau e vivitouana a nononor?"

¹⁵ Saul i pa, "Sorodia mai Amalek awarii i vaia, bulumakau ma sipu vinevinei i vovijini da ina puloei BADA am God awarina wate ġelau anatapui a viraġena-naiei."

¹⁶ Anina ma Samuel Saul i riwei, "Ma genuana! Wagħuvarai BADA awariu i babani ana riwem." Saul i paridadanei, "Ma riweu!"

¹⁷ Samuel i paribelei, "Avena da u nota-melem da tam rava labalababa, tam marina mai Israel ai rauetaravena. BADA i terierem da mai Israel ai gulau.

¹⁸ Riwa bagibagħina i riwem ma i paritawanem da taniga potapotai mai Amalek uta vīgaviei da anatapui uta pupuna-pai.

¹⁹ Aiwai aubaina BADA ega uta voteletelei? I riwem da ega purapura i rairaäge-tawanei ona tami, wate tam vipurapura u goei ma u vai-labalababai da u nuanei, wei lamna kaua apoapoe BADA au matana."

²⁰ Saul i paribelei, "Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiai.

²¹ Wate au sorodia sipu ma bulumakau aiaii ega ita virağeni wate i neiai weka au Gilgal da ita apui pulo BADA am God awarina."

²² Anina ma Samuel i riwa,

"BADA metauna e vinuaiae!"

Votelatela bo pulo ma gamogamo apuapunana.

Votelatela i ai-telara, ega me pulo apuapunana;

Ma rautanigana i ai-telara, ega me sipu monamonana.

²³ Pariviravira BADA awarina lamna me parauma

ma mae-gaegea lamna me god gelau e viviborumei

Ma tam BADA riwana u geduaiei;

lamna aubaina BADA am vigulau i geduaiei,

Tam am vigulau i vai-tawanei."

²⁷* Ma Samuel i mae-tavirei da ita nae ma Saul i goei da ita viğaei ma ana kwama adana i vojjini ma i sikai.

²⁸ Samuel i riwa, "Me au gara u sikasikai nanare amadodo BADA am vibada mai Israel awarii i vai-tawanei ma rava gelauna aiaina ega me tam i verei.

²⁹ Israel ai God vinualaulaunana ega morumoruna bo nuanuana ita viravirai. Tauna ega rava da nuanuana ita viravirai."

³⁴ Ma Samuel i nae au Ramah ma Saul i nae me ana au numa au Gibeah.

³⁵ Samuel ega Saul ita inana-melei da i 'raäge wate Saul i vinuabolana-maelei. Ma BADA nuanuana i bola-kuae da Saul i terei mai Israel ai gulau.

16

BADA David i terei gulau

¹ BADA Samuel i riwei, "Amapo da Saul ma mogumoguei bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awariei gulau a vinei."

² Wate Samuel i paribelei, "Menanare ana naenei? Saul riwana ina nonori ma ina virağeniu."

BADA i riwa, "Cow gaubona ma viniimavoei ma ma nae da ma riwa, 'Tau a nei viturana pulona ana apui BADA awarina.'

³ Jesse ma rauğorei viturana pulona aubaina ma ana viatataiem aiwai ma kuae, rava ana viatataiem ma buloi Tau aubaiu."

⁴ BADA Samuel i ririwei nanare i kuae. Samuel au Bethlehem i geta ma taun babadai ana sisisi i nebelei. Ma i paridadanei, "Ana nuaubam u nei bo?"

⁵ Samuel i paribelei, "Ee! A nei da pulo ana apui BADA awarina. Anatapumi ona vokaukauana-melemi ma tana nae pulo aubaina. Ma Jesse natunatuna maiteni i viaiaini ma i paritawanei da i nae pulo apuna aubaina."

⁶ Maranai tau i geta ma Samuel Jesse ana natuevou Eliab i 'nanai ma ana au nota i riwa i pa, "Wei teverana e maimairi BADA au naona lamna anina ana vinevine."

⁷ Wate BADA Samuel i riwei, "Tau ravana a geduaiei, ega inanana bo ana manawa ma notanotai. BADA aiwai e inainanai, rava ega ita inananai. Rava tupua e inainanai wate Tau nuapou a inainanai."

¹⁰ Nanare da natunatuna anatapui 7 i nei, ma Samuel i riwa, "BADA ega aiai ita vinei."

¹¹ Ma Jesse i paridadanei, "Natunatum anatapui weka bo?"

Jesse i riwa, "Natu umau e mamae wate tauna sipu e paipaini." Samuel Jesse i riwei, "Riwa ma paritawanei da ina getai da tana am."

¹² Ma Jesse riwa i paritawanei da i nei. Tauna i tupua karawata, tevera inanana aiaina ma matana namanamarana. BADA Samuel i riwei, "Wei tauna! Ma nae ma au kolana olive monamonana ma iwagi!"

¹³ Anina ma Samuel olive monamonana i vaia ma David au kolana i waġi, kampa taui au matai, ma nai au marana da i nena BADA ana Arua Vivivireina David maiteni i mae. Ma Samuel i nae au Ramah.

¹⁴ Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovo.

David marina Gulau Saul ana sorodia.

18

Saul David i unurei

⁵ Saul, David ġavia au anatapuna i paripari-tawanei ma i kaukauana-kauei ma ġavia i vovoviaubai ma lamna aubaina i terei da ai sorodia ai bada ġaġaena. Ma wei kauana patara ma sorodia babadai i vinuaiae.

⁶ David oroto Philistie ġaġaena ma inanana vi'nirovorovona i viraġeni ma i nenememei ma waivine taon anatapuie i nei ma ketaketara ma gita i vikalokaloei ma i arara ma gulau Saul i nebelei.

⁷ Waivine i vikalokalo ma i welawela i pa;

“Saul ġavia tausan i vunui
ma David tausan dam viriviri i vunui.”

⁸ Wei welana Saul i vimeji-kauei ma ana au nota i pa, “Taui David e vovoepaepai ma e ririwa da tauna rava tausan dam viriviri i vunui ma tau tausan ava.” Ma marina ina terei ai gulau.

⁹ Ma lamna aubaina tauna David i unurana-kauei ma i 'nana-vaitetei.

Wei au marana Saul David i viġġavie i ma i goei da ita viraġeni. Saul natuna Jonathan, David i vibenabenamei. Lamna aubaina i vororovo-nae ma i rauraugovaġa-nae.

21

Wei marana au murina Saul David i viġġavie i ma i goei da ita viraġeni. Saul natuna - Jonathan David i vibenabenamei ma David i ruba au dobu ġela da Saul ita raugovaġei.

Ahimelek David i voaqi

^{1*}David i nae au Nob da Pirisi pulo tauapuna Ahimelek ita inanai. Tauna ana rovona i opu da David i viegualuaeui, ma i riwa, “Aiwai aubaina u nei, ma am rava mepa?”

² David pirisi Ahimelek i paribe i pa, “Gulau Saul nola tagogi aubaina i paritawaneu wate wenanare i riweu, ‘Eġa aiai ina aramanei aiwai a kaukauei.’ Au sorodia a riwei da e paipainiu.

³ Awarim lam da uta vereu? Palawa apuapunana 5 ma vereu bo aiwai ġelauna kampa.”

⁴ Wate pirisi i riwa, “Awariai eġa pälawa ota ita mamae, wate vovivirana BADA awarina. Wei palawana ma vaia mepa da am sorodia aupom biaġa eġa waivine maiteni ita viawawana.”

⁵ David i paribelei, Riwa kaua tauai eġa waivine maiteni ata matamatave, maranai a opuopu ġavia aubaina au nelara e ujiuji. Amadodo lamna gulau ana nola a kaukauei ma wei nolana aubaina a vokaukaua kaua.

⁶ Nai marana palawa waduboi i votawanaei ma palawa voui i terei BADA au naona au tempol. Kampa eġa lam ġelauna ita mamae ma pirisi palawa vovivirana David i verei.

Anina ma David rava i tama-naiei ma nai au dobunga i raugovaġa-nae ma i terei ai bada. Maranai Saul i nonor da pirisi gegetelarana Ahimelech David i voaqi. Tauna pulo tauapui pirisi i vunu-pai ma Abiathar lawalawaina i voterei, ma tauna i ruba govaġa da David awarina i ġeta. Maranai dobuġela ai sorodia Israel i viġġavie, lamna David ana sorodia maiteni taui i viġġavie ma Israel i gagaloei. Saul ana sorodia maiteni dobunga i naeni ma David i baiei da ita viraġeni, wate eġa ita nelagħi. Mara tagogi David Saul ita viraġeni wate lamna eġa ita kauai aubaina tauna God ana vinevine. Wate Saul amapo i ġoei da David ina viraġeni.

31

Saul ana iraġe

¹ Mai Philistia mai Israel i viġġavie au ola Gilboa ma taui mai Israel i virubai ma maġamaġau i viraġeni.

² Mai Philistia Saul ma natunatuna i viġġaġei da natunatuna Jonathan, Abinadab ma Malki-Shua i viraġeni.

³ Gavia i potopoto kaua Saul au ririvana ma ġavia ana piduei Saul i tonai ma i vikero-kauei.

⁴ Ma Saul ana apia tauavaraina i riwei, “Am sodei ma virāgeniu. Eġa ata goei da Philistia-eteni ina vijibogiu ma ina virageniu.”

Wate tauna i rovo da viraġenana i kauana-avei. Ma Saul ana sod i lavui da au manawana i tonei ma au tepana i peu da i 'raġe.

⁵ Maranai ana apia tauavaraina wei i 'nanai ma tauna nanare ana sod au tepana i peu ma gulau au ririvana i 'raġe.

2 Samuel

Samuel ana buka viruaina Pariverena

Wei bukana lamna David ana vibadana marana e ririweta. Kapita 1 da au 4 e ririweta da David menanarena Judah au rauanaägei lamna ava i vibadei. Ma kapita 5-24 Israel au lavaratei maiteni i vibadei. Wei girumana e ririweta da menanare David ana ġavia Israel au orana ma dobu ġelauiei i viġaviana-nei ma e viviatataeta menanare David God nuanuana i vaia ma i vitumaġanei, wate maiteni ana ġo'apoapoe ma ana ġokkokara ġelau i viatataeta. Tauta ta inanai menanare God David i kovoġi maranai ana ġoa i apoapoei, wate maiteni ta inanai menanare David i rupena-nei ma God tauna ana ġo'apoapoe i nota-tawanei. David piripiri maġamaġau i nelaġai maranai Israel i vibadei wate God tauna i gagaloei ma parivainuaġana awarina ma ana epaepaia awarii i vijijini.

Vinevinei

David mai Israel ai gulau (5:1-4)

God ana parivainuaġana bagibagina David awarina (7:1-5, 8-17)

David Bathsheba maiteni i matave (11:1-17, 26-27)

Peroveta Nathan ana pariverena (12:1-25)

5

David mai Israel ma Judah ai gulau

¹ Israel dam damai i nei David awarina au Hebron ma i pa, “Tauta tara tagogi

² Au naona maranai Saul ata gulau, tam sorodia u rauetaraveni ma o viġavia.

—Ma BADA i riwem, ‘Tam au dam Israel ma paini me sипу taupaini ai sипу e paipaini ma aubaii ma vibada.’

³ Maranai dam babadai i ġeta gulau David awarina au Hebron, David parivainuaġana bagibagina taui maiteni i kaei BADA au matana. Ma olive monamonanei David i buloi da Israel ai gulau.

⁴ *David ana madeġa 30 ma i vigulau ma i vibada da madeġa 40 i kwa.

Ma David ana sorodia i egari ma Jerusalem mai Jebu awarie i vaia. Kampa David ana gulau numana i voai. Anina ma rava i tami ma i nae ma God ana parivainuaġana bokisina i vaia ma i naei au Jerusalem ma kampa au numagara i terei.

7

BADA parivainuaġana i kaei David maiteni

¹ Ma BADA David i gagaloei ma nanare ana ġavia anatapui i vovaiubai. Ma ana nuaubana i mae.

² Ma David peroveta Nathan i riwei i pa, “Tau numa vigulauna, ai cedei voavoana a maemaeni wate God ana parivainuaġana bokisina au numa gara e mamae.”

³ Nathan i paribelei, “Aiwei e notanotaia ma kaei aubaina BADA i mae-ratuim.”

⁴ Wate lamna waguvvaraina BADA Nathan i riwei i pa,

⁵ “Ma nae ma taunola David ma riwei ma pa, BADA wei e ririwei ‘Eġa tam numa ma voai da Tau au animae.”

⁸ BADA i riwa me, i pa, “Au taunola David ma riwei, ‘BADA VIVIREWAPANA KAUCAUANA wei i riwei:

Tam au naona ravarava ota sипу u paipaini au wapu, wate Tau a terepaim da mai Israel ai bada.

⁹ Mepa u unelana, Tau tam a mae-ratuim ma au matam am ġavia anatapui a pupuna-pai. Ma marina wavam ana voepai, me rava wawai naenaei au dobu.

¹⁰⁻¹¹ Ma au rava Israel dobu ana verei da ina raunuma ma ana nuaubai ina mae. Au naona i vivikareiana da marina babada a terei da mai Israel ita vibadei, wate rava apoapoei taui i viġavie i marina amapo ega ina kauana-melei. TAU BADA a riwem da am epaepaia ana vimägai ma tam ma am epaepaia ona vivigulau.

¹² *Ma am epaia tagogi ana vinei, tam natuoim tagogi da ina vigulau maranai tam am mara damona ina ġetai da amamam ma votagoi. Ma tauna ana kaei da ina vibada gaġaġena,

¹³ ma ega aiai ana vigulau ina vaitawanei. Ma tauna tempol ina voai Tau aubaiu,

¹⁴ Tau ina viamaneu ma tauna ana vinatunei. Ma maranai i kauana-boai, ana kovoġi me ama natuna e kovokovoġi nanare.

¹⁵ Wate eġa melanai au nuavaina awarina ana vaitawanei me Saul awarina a vaitawanei, tauna ana vigulau a vaitawanei ma epaiana tam a terem.

¹⁶ Am numa ravai rereġana eġa melanai ina kwa ma am epaepaia ina vigulau ma ina vibada nonoa."

¹⁷ Ma BADA aiwai Nathan ana au rauboni i riwei anatapuna David i pariverei.

11

David turana awana i kwalei

¹ Omra e tomtom maranaina gulagulau e opuopu ġavia aubaina. David sorodia ai bada Joab ma Israel ana sorodia i paritawanei da mai Ammon ai sorodia ita vipupui. Ma ai taon Rabbah etanaina i matave-potai da ravai eġa ita rui bo ita opu, David eġa ita nae ma au Jerusalem i mae.

David ma Bathsheba

²⁻⁴ Mara tagogi aubigai David i matave-vomairi ma ana au poewa vatavatarana i bababaranae. Ma i'nana damana da wavine i'nana i toatoa, i oġaġa-melei aubaina marina ana nawaravi doriane i kwa, wavine inanana aiai kaukauana anina ma David, rava i paritawanei da ita aramanei tauna aiai. Ravana i ġeta memei ma i pariverei i pa, "Wavine wavana Bathsheba, Eliam natuna ma Uriah Hitti ei awana." Ma David ana taunola i paritawanei da wavinena i neiae awarina ma tauna maiteni i matave ma i nae me au numa.

⁵ Wavinena i duama ma riwa i paritawanei David awarina i pa, "Tau a duama."

⁶ David riwa i paritawanei Joab awarina i pa, "Uriah Hitti ei ma paritawanei awariu."

Ma Uriah i paritawanei David awarina.

⁷ Maranai i ġeta David awarina ma David tauna i paridadanei, "Joab ana sorodia maiteni menanare, anina bo eġa? Ma ġavia menanare?"

⁸ Ma David Uriah i riwei, "Ma nae au numa ma ma vilauvitau."

Ma Uriah gulau ana numa i opu-tawanei da i nae ma au murina David ana pulo i paritawanei Uriah ana au numa.

⁹ Wate Uriah eġa ita nae ana au numa, ma kampa ana au metaeta ana bada ana taunola maiteni i vimatave lana.

¹⁰ Ma taui David i riwei, "Uriah eġa ita nae au numa." David Uriah i riwei, "Tam u vaġavaġai da u nei. Aiwai aubaina eġa ita nae am au numa?"

¹¹ Uriah David i riwei i pa, "Parivainuagħana bokisina, mai Israel ma Judah ai sorodia au numa gara e matamatave. Au bada Joab ana sorodia maiteni au wapu i rauġaravu, wei lamna aubaina eġa ata nae au numa da ata am ma ata uma ma awau maiteni ata matave. Lamna eġa ana kauei, eġġateni!"

¹² Anina ma David Uriah i riwei, "Weka ma mae amadodo ma au maratom ana paritawana-melem."

Uriah au Jerusalem i mae da au pom ġela.

¹³ Ma David Uriah i raugorei da maiteni i am ma i viuma-buai. Wate waguvvarai Uriah i opu David ana taunola awarii da ana au aravi i matave; eġa ita nae ana au numa.

¹⁴ Ma ubaubanaina David pepa i girumi ma i paritawanei Joab awarina.

¹⁵ Pepa au orana i giruma i pa, "Mepa ġavia potopotona kampa Uriah ma terei ma am sorodia ma tere-opunei da tauna ava ina mae ma ina kero ma ina iraġe."

¹⁶ Joab Rabbah taona i vivineneġanei da i aramanei mepa ġavia i virewapano kaua ma kampa Uriah i terei.

¹⁷ Ġavia taonei i opui ma Joab ana sorodia maiteni i viġavia ma David ana sorodia ġelaui i viraġeni. Taui Uriah oroto Hitti ei maiteni i viraġeni.

²⁶ Ma Uriah awana riwana i vaia da awana Uriah i 'raġe ma i touei ma i moguei.

²⁷ Maranai i mogu-vorovei David rava i paritawanei da i neiae ana au numa da awana ġelauna, ma tauna David natuna orotona i ġuni. Wate David aiwai i kauei, BADA eġa ita vinuiaiei.

12

Peroveta Nathan David i eni

¹◊Anina ma BADA peroveta Nathan i paritawanei David awarina ma i riwei i pa, “Nelara ruāga au taon tagogina i mae, oroto tagogi manemanena ma maumaurana ma gelauna molamolakana.

² Ravana manemanena awarina sипу ma bulumakau maгамаgai.

³ Wate ravana molamolakana sипу natuna wavinena i гimarai, ma natunatuna maiteni i гamoi da i rata, molamolakana ana sипу tagotago. Ana lam momogina sипу i aniani ma waira ana au kelaka i umaumai ma au arona i matamatave, wei lamna me tauna natuna guguinina.

⁴—Marina taomana i nei oroto manemanena ana au numa, ma oroto manemanena eѓa ita ѓoei da ana sипу bo bulumakau ita vunui da ana taomana ana lam ita vokaukauei. Eѓa, tauna oroto molamolakana ana sипу natuna wavinena i vunui ma i vitavi ma ana taomana i verei.”

⁵ Nai maranaina David i meji guratana ma Nathan awarina i ѓaiawa, “BADA lawalawaina wavanei a ririwa da aiiai wei kauana i kaei anina ina iraѓe!

⁶ Kaua apoapoe kaukauana i kaei lamna aubaina sипу ѓaubona 4, orotona molamolakana ina verei.”

⁷ Anina ma Nathan David i riwei, “Tam nai ravana! Wei lamna aiwai BADA Israel ana God i riwei, ‘A vinem da Israel ana gulau ma Saul au urana a vaitawanem.

⁸ Ma am bадa Saul ana vibadana ma ana buderi a vere-tawanem ma awawana au uram a terei. Ma nanare a terem da Israel ma Judah u vibadei. Mepa da wei anatapui i muomuo guratana awarim, tagotagogina au tepana ata vaitapetepani.

⁹ Aiwai aubaina riwau bagibagina u rau-агaѓaie? Aiwai aubaina wei kauana apoapoenia u kaei? Uriah Hitti ei sodei u piѓi; awana mai Ammon ai sodei u viraѓeni. Ma awana u vaia da awam.

¹⁰ U rau-агaѓaieu ma Uriah awana u vaia da awam lamna aubaina am au numa viгaiѓaiawa ina mae-nonoa.”

¹¹—BADA wei e ririwei, ‘Tau aburuna ava da apoapoenia ana neiai am au numa. Au matam awawam ana vaia ma oroto au ririvam ana verei. Ma tauna awawam maiteni ina matave, patara au matai.

¹² Tam u kauana-ѓovaѓei wate tau madegai ana kaei, mai Israel au matai.”

¹³ David Nathan i riwei, “Tau, BADA awarina a kauana-boai!”

Nathan, David i riwei, “Ee wate God am apoapoe e vaivai-tawanei. Tam eѓa ma iraѓe.

¹⁴ Wate kaua apoapoenia u kaei ma lamnei BADA u vijiboѓa-kauei lamna aubaina natum ina iraѓe.”

¹⁵ Nathan i nae ana au numa. Ma BADA doria i paritawanei David ma Uriah awana, natui awarina ma i doria kaua.

¹⁶ David i raupari guratana God awarina natuna aubaina. Am i voterei ma i rui ana au numa ma au debidebi i matamatave.

¹⁷ Ana numa babadai i nei awarina, da au debidebi ita voepai ma maiteni ita am, wate i geduai.

¹⁸ Aupom 7 au murina tevera i 'raѓe ma ana numa babadai i rovo da David eѓa ita pariverei. Taui ava i babani vivira i pa, “Maranai tevera lawalawaina David eѓa ita rautaniganeta ma marina menanare tana riwanei da natuna i 'raѓe? Mepa da ina viapaoapoenia-melei!”

¹⁹ David i 'nanai ana taunola i pari-ararava ma i aramanei da natuna i 'raѓe.

Ma i paridadanu, “Tevera i 'raѓe bo?” Ma taui i paribelei, “Ee tauna i 'raѓe.”

²⁰ Anina ma David debidebiei i vomairi ma i toa ma i vigara ma monamona gabugabui i toai ma i nae au numa gara da i voepaepa. Ma i nae me au numa ma lam i vibagei da i neiai ma i am.

²¹ Ana numa babadai i baei ma i riwa, “Maranai tevera lawalawaina, tam u uji ma u mogu, ma tevera i 'raѓe, tam u vomairi da e amam!”

²² David i paribelana, “Ee tau a uji ma a mogu maranai natu lawalawaina. A notai da BADA ina rau-nuapoapoeleu ma natu ina lawana.

²³ Wate marina i 'raѓe aiwai aubaina ana u uji? Ana neiana-melei bo? Amapo ana nae awarina wate tauna eѓa ina nei awariu.”

²⁴ Anina ma David awana Bathsheba i vinuabai ma maiteni i matave. Ma tevera orotona i ѓuni ma David i ѓorei Solomon. BADA tevera nuuanuana i vaia,

²⁵ ma lamna aubaina BADA peroveta Nathan i paritawanei da tevera wavana i ѓorei Jedidiah*.

1 Kings Gulagulau Naona

Pariverena

Wei bukana ana ġuta tonuġa, ġuta tagogi (Kapita 1-2) lamna gulau David ana iraġe i bababaniei ma natuna Solomon tauna ana gabu i viaia da i vigulau. Guta viruaina (Kapita 3-11) Solomon ana vibada mai Israel awari lamna e vivieġeta ma menanare ana vibada nai au dobuna i tua-nae ma i rata. Ma maiteni e ririweta da tauna menanarena God ana tempol i voanei au Jerusalem. Ma ġuta damona (Kapita 12-22) e ririweta da menanarena mai Israel i kai da navanava ruāga, Israel ana dam ma Judah ana dam. Ma dam tagotagogi ava ai gulau i mae. Wei bukana lamna nai gulaui ai virarautua e bababaniei ma e viviatataieta da metaui gulaui Bada riwana i votaġoġoi me David i kauei nanare, ma metaui gulaui Bada i mae-puputei ma god ġelau i raudunelei.

Wei bukana au orana.

Gulau David i'rāġe ma natuna Solomon i vigulau (2:10-12)

Solomon God i vibaġai da nualaula ma nota aiaina ita verei (9:3-5, 7-4, 16-18)

Solomon ana vibada i tua nae (4:20-21, 25)

Solomon God ana tempol i voai ma i raupariei (5:1-6, 6:1-7, 11-14, 8:1, 3-6, 10-11, 22-23, 27-30, 41-43)

Mai Sheba ai gulau wavinena Solomon i raugenari (10:1-9)

Solomon God i mae-puputei (11:1-5, 7-13, 26-33, 35, 40)

Solomon i'rāġe ma natuna Rehoboam gabu i vaini (11:42-43)

Rava i kai da dam ruāga, Israel ma Judah (12:1-20)

Israel ai Gulau Ahab God i mae-puputei ma god ġelau i raudunelei (16:30-33)

Peroveta Elijah kaiababa ma natuna orotona i voaqui (17:1, 8-16, 17-24)

Bada Baal ana peroveta i vovaiubai au ola Kamel (18:1-2, 17-46, 19:1-21)

2

David i'rāġe

10-11 ^{*}David Israel i vibadei madeġa 40; au Hebron madeġa 7 ma au Jerusalem madeġa 33.

David ana mara i kwa ma au Jerusalem au kokoaga noinoina au ririvai i vimataveni.

¹² Ma Solomon amana ana gabu i vaia da Israel ai gulau ma God i kauei da ana vibada i virewapana.

3

Solomon nuaulaula i vibaġei

³Solomon, BADA nuantuana i vaia ma lamna aubaina amana David ana tarawatu i vojjinakauē. Wate kaua tagogi i kaukauana-boai lamna pulo i apuapu labalababai nai dobuna ravai ai pulo ai au aniamapuna.*

⁴ Wei lamna pulo aniapuna gabuna, wavana naenaena i mae au Gibeon. Solomon i nae weka da ġamōgamo 1,000 i apu-tapui BADA awarina.

⁵ Waguvara tagogi BADA, Solomon ana au rauboni i riwei i pa, “Aiwei e ġoegħei, ma vibaġei ma ana verem?”

⁷ Solomon i paribeli, “BADA au God, tam u tereu da amau a raviepaiai da gulau, wate tau tevera otta ma eġa ata aramanei menanare ana vibadanei.

⁸ Ma tau weka am rava u vinevineia au poui, taui i maġa dewadewa da eġa aniavana.

⁹ Eġa aiai ainelana tagotagogina am rava, u vinevineia ina vibadei. Lamna aubaina nuaulula ma vereu da ana aramanei metauna aiaina ma metauna apoapoena.”

¹⁰ BADA i vinuiai da Solomon nuaulaula i vibaġei.

¹¹ Ma Solomon i riwei, “Tam eġa lawana manamanaina bo mane, uta vibaġei bo uta vibaġaiu da am ġavia ata viraġeni. Eġa! Tam u vibaġaiu nuaulaula aubaina da au rava ma vibadana-kauēi.

¹² Aiwei u vibaġei ana verem! Nota aiaina ma nuaulaula ana verem, eġa me aiai ġelauna au naona nanare bo aiai ġelauna muriai ina vaia nanare.

* 2:10-11: 2Sa 5:4-5 * 3:3: Eng. High places Weka ola muomouu au tepai pulo aniapuna i voa-naiei Canaan

¹³ Avena da mane ma vipurapura ma wavam vimae-ḡaeṅānena aubaina, eḡa uta vibāḡei, wate ana verem, da am au lawana eḡa aiai gulauna am vigulau ina votani.

¹⁴ Ma mepa da ma rautanīgāneu ma au tarawatu ma voteletelei me amam David i kaukauei nanare, tam am lawana ina manawa.”

Solomon ana nuaulaula i vieḡai

¹⁶ Muriae etanai waivinei ruaḡa i ġeta gulau awarina da tauna ai ġaiawa ita okei.

¹⁷ Wavine tagogi i riwa, “Au bada tauai airuāga ai numa tagogi. Ma tau tevera orotona a vinatunei au numa, maranai noi wavinena kampa.

¹⁸ Ma aupom tonuāga au murina wavine viruaina nanare tevera orotona i vinatunei. Eḡa aiai ġelauna au numa anina airuāga ava.

¹⁹ —Ma waguvara tagogi wavine natuna i matave-jijini da i ’raġe.

²⁰ Ma waguvavarai au pouna i vomairi, ma natu au ririvau i matamatave i vaia. Tauna natuna irairaġena au ririvau i vimataveni ma tau natu lawalawaina i vaia da au ririvana.

²¹ Ubaubanai a vomairi da natu ata viġuġi, lamna a baei da natu i ’rairāġena. Ma mara i tom kaua ma ata inana-kaei lamna eḡa tau natu.”

²² Wate wavinena ġelauna i riwa, “Eḡa! Tau natu lawalawaina; tam natum irairaġena.”

Ma wavine au naona i vinatuna i riwa bagibagi i pa, “Tevera irairaġena lamna tam natum ma lawalawaina lamna tau natu! Ma nanare airuāga i viġeġae.”

²³ Anina ma gulau Solomon i riwa, “Wei tauna e ririwa, Tau natu lawalawaina ma tam natum irairaġena.” Ma noi tauna e ririwa, ‘Eḡa! Tam natum irairaġena ma tau lawalawaina.”

²⁴ Ma gulau i riwa, “Sod ona neiai.” Ma i neiai gulau awarina.

²⁵ Ma i eġara, “Tevera lawalawaina au pouna ona vialaraġi da navanava tagogi wavine tagogi ma navanava ġelauna wavine ġelauna.”

²⁶ Tevera lawalawaina alo oina, nuanuana i bola-kauei ma gulau i riwei, “Au gulau a vivibaġaim da tevera lawalawaina noi wavinena ma vereil! Eḡa ma virāġeni!”

Wate wavinena ġelauna i riwa, “Eḡa tam bo tau teverana tana vaia. Tevera au pouna ma vialaraġi!”

²⁷ Anina ma gulau ana paribelana i tere-ġairei i pa, “Eḡa tevera ona virāġeni ma wavine au naona i vivinatuna ona verei, tauna tevera alo oina.”

²⁸ Maranai mai Israel Solomon ana etara riwana i nonori, marina taui Solomon ina vivirei, ma i aramanei da God, Solomon nuaulaula i verei da lawana ina tere-vajijimani.

4

Solomon i vibada kaua

²⁰ Mai Judah ma mai Israel ai patara i maġa dewadewa me bubu au gera. Taui ai lam ma ai uma tagotagogina ma i vinuajai kaua.

²¹ Ma Solomon dobuna anatapuna i vibadei. Ana parata au waira Euphrates i vikarei da i ġaira au Philistia ma kampa da i ġaira Egypt ana au parata. Wei ravai tax i vivimaiei gulau Solomon awarina ma i voteletelei maranai lawalawaina.

²⁵ Maranai Solomon i vibada mai Judah ma Israel ana nuaubai i mae, ai nuabola eḡa aiwai. Au lavaratei Dan ana dam ai au dobu i vikarei da i ġaira au Beersheba au rauanaġei, numa nununai ravalai anatapui ai numa ma ai wapu i mae.

5

Solomon Tempol voana aubaina i vokaukaua

¹ Maranai David maemaeninai, tura-kauana lamna Gulau Hiram, Tyre ai gulau. Maranai gulau Hiram riwana i via da Solomon i vigulau au Israel, amana David epaiana, Tauna ana taunola i paritawanei da gulau vouna i viegualaei.

² Ma gulau Solomon wei riwana i paritawanei gulau Hiram awarina i pa:

³ Tam u aramanei da amau dam maġamaġaui au ririvajai i mae-kwaviviroi ma maiteni i viġaġaiwa nonoa. Ma lamna aubaina eḡa tagotagogina da tempol ita voai Bada ana God, viborumana aubaina. Wate i vivipaipai da au naona Bada ana aguei ana ġavia ita vipupui.

⁴ Wate marina Bada nuuba i vereu. Au ġavia ma au nuabola eḡa.

⁵* A vinua-notanota da tempol ana voai, Bada God viborumana ma vimaē-ḡaeḡenana aubaina. Me Bada amau i ririwei nanare maranai i riwa i pa, "Natum orotona ana terei gulau, am au gabu, ma tauna numa ina voai tau viborumau aubaina."

⁶ Lamna aubaina am taunola ma paritawanei au ola Lebanon, da aubaiu ai bagibagi cedar ina tarai. Tam am nelara ai tarana i aramana-kauei. Tau au nelara ana paritawanei da ina taro agui. Am nelara ana vimaiei, biaḡa e vivibaḡei nanare ana vimaia.

Anina ma gulau Solomon ai cedar i vimaiei. Ma mai Israel nelara 30,000 i vaia ma i voagui da ai ma purapura ḡelau numavoa aubaina i vimeinai au Jerusalem.

Solomon wate nanare nelara 150,000 i terei da i nola, wei ravai ai nola da ḡaima ina wamawamai ma ina boribori numa voa aubaina.

6

Solomon tempol i voai

¹ Solomon mai Israel i vibadei da madeḡa tonuḡa ma au vi-4-na, nawaravi au viruaina e ḡoreḡorei Ziv, tauna BADA ana tempol voana i vikarei. Wei lamna madeḡa 480 i kwa maranai mai Israel, Egypt i opu-tawanei.

⁷ Ġaima ḡaegaei numa voana aubaina anatapui au weia i ḡarai ma kampa i bori-naiei, da eġa irama bo aniambori gugurai numavoa gabuna ita vitaniġa-potai.

¹¹ Ma BADA Solomon i riwei,

¹² "Wei Tempolna voana aubaina ana riwem, mepa da riwau ma rautaniġanei, ma au tarawatu anatapui ma votaḡotāgoi, ma aiwai a ririwem ma kaukauei, Tau aiwai amam David a parivainuağanī ana kuae aubaim.

¹³ Ma tau au rava mai Israel maiteni ana mae, ma eġa melanai ana netawanei."

¹⁴ Anina ma Solomon tempol i voa-pai.

8

BADA ana Parivainuağana bokisina i ruie i au tempol

¹ BADA ana parivainuağana bokisina au Zion, David ana taon* ita vaia da ita neiae au Tempol. Gulau Solomon, Israel babadai ma dam nununai babadai anatapui i goreiawarina au Jerusalem.

³ Maranai Israel babadai i ġetai, pirisi parivainuağana bokisina i voepai.

⁴ Pirisi ma Levi ana dam ravai parivainuağana bokisina ma numa gara ma ana purapura vivirei i avara-naiei au Tempol.

⁵ Gulau Solomon ma mai Israel anatapui parivainuağana bokisina au naona; sипу da bulumakau i vunuunu-naiei, ġamogamo i maġa guratana da iavana i kauana-avei.

⁶ Ma pirisi parivainuağana bokisina i ruie tempol au orana da ana au gabu vivivira dewadewana cherub[†] ruāga papei au gabaurina i vikialai.

¹⁰* Maranai pirisi gabu vivivireina i opu-tawanei, bau potopotona i ḡairai, ma ana boruma numana i puro.

¹¹ Pirisi eġa tagotagogina da ai nola ita kuae aubaina bau potopotona; BADA ana boruma, tempol i vioai.

Solomon Israel aubaina i raupari

²² Ma Solomon pulo aniapuna au naona i mairi, ma au murina Israel patarana. Urana i voepai au mara,

²³ ma i raupari i pa, "Oo BADA, Israel ana God, eġa mepa God ġelauna me tam nanare, au tepana au mra bo au gabaura au dobu! Tam am parivainuağana anatapuna e kaukauei, ma mra nonoa am rava nuanuai e vaivaia maranai orai taputapunei e votaḡotāgoim.

²⁷—Wate amapo God au dobu ina mae bo eġa? Eġateni! Mara, ma nanare mara ġedewadewa eġa tagotagogina da tauna ina vojjini. Wei tempolna aovoaoia lamna anina bo eġa?

²⁸—Wate au pari ma nonori. BADA au God, tau am taunola ma aiwai amadodo a vivibaḡei ma vereu.

* 5:5: 2Sa 7:12-13 * 8:1: Zion lamna melagai aburuna, Jerusalem taon garina au orana. † 8:6: Cherubwei purapurai lawalawaii wate ruāga ai Olivei i tai ma i vimairini (4 mtr) ma papei i terei da numa au giana dagia ġelauna i tonei. * 8:10: Exo 40:34-35

²⁹ Am tempol ma inana-vaitetei, marai ma waguvvarai, wei gabuna aubaina u riwa u pa, 'Tau wavau kampa.' Lamna aubaina au pari weka ana pariparitawaneiai mai rautaniiganei.

³⁰ Au pari ma nanare am rava mai Israel ai pari ma nonori, maranai naoi i tereiai weka ma i raupari. Au mara ai pari ma nonori ma ai apoapoe ma nota-tawanei.

⁴¹⁻⁴² —Ma maranai jentail ueia maemaei, riwam ma am rewapana ma kaua ġaeġaei u kaukaueia riwai ina nonori; ma ina nei da ina vimae-ġaeġaenim. Ma am numa au naona ina mairi ma ina raupari

⁴³ am au animae au mara, ai pari ma nonori ma ai ġoana ma kaei. Ma jentail wavam ina aramanei ma ina vimae-ġaeġaenim me am rava oina mai Israel. Ma jentail ina aramanei da wei tempolna a voai. Tam vimae-ġaeġaenam aubaina."

10

Sheba ai Gulau wavinena Solomon i raugenari

¹ Solomon ana vigulau wavana naenaena ma lamnei Bada i vimae-ġaeġaeni. Ma Sheba ai gulau wavinena, wei riwana i nonori ma i ġei au Jerusalem da paridadana piripirinei Solomon ana nuaulaula ita raudadani.

² Wavine ana taunola ma kamel maġamaġau i pulo i vigerui ma ana borui i derirui. Taui ai pulo lam tauvidagiai, ġaima maiġaġeġi ma gold ġaeġaena. Wavine i nei Solomon awarina ma kaua maġamaġau i vinua-notenotei Solomon i paridadanei.

³ Solomon ana paridadana anatapuna i paribeli, kampa ega aiwai tagogi ita piripiri guratana awarina.

⁴ Sheba ai gulau i aramanei da Solomon nuanuana i ulaula kaua ma; i 'nanai ana gulau-numana, vigulauna i voai,

⁵ Jam au kepakapea, ana gabemani babadai ai gara, ana wine taupainii, ma pulo i apuapui Bada ana au tempol. Ma wavine ana nota i kwa!

⁶ Ma Solomon i riwei, "Am kaua anatapuna ma am nuaulaula au au dobu a nononoria lamna anatapuna riwa kaua!

⁷ Au naona ega ata vitumaġanei wate marina a nei da matauei a inanai da a vitumaġana. Ma a inanai da aiwai a nononoria lamna ega. Tam am vigulau i rata dewadewa.

⁸ Am taunola* i vinuaiai kaua! Am gabemani babadai au naom e maimairi marana patapatai ma am nuaulaula e rarautaniġanei.

⁹ Bada am God ana voepaepai, i vinuaiaiem ma i terem Israel ai gulau. Bada ana nuavaina maemaena mai Israel aubai i terem gulau, da riwa kaei ma kaua jijimaninei ma vibada."

¹³ Solomon, Sheba ai gulau aiwai anatapuna i raru-ögarei ma i vivibaġei, i verei, wate ġelaui i vereoi. Anina ma gulau wavinena i wanavira-melei ana au dobu ana taubagibagi maiteni.

11

Solomon Awawana

¹*Gulau Solomon, Egypt ai gulau* natuna i ravaġi ma nanare jentail waivinei i ravaġa-naiei, ġelaui mai Moab, mai Ammon, mai Edom, mai Sidon ma, mai Hitti.

²*Au naona BADA mai Israel i riwana-guratei i pa, "Jentail waivinei ega ona ravaġi aubaina taui nuanuami ina vovirai da ai god ona voepaepai." Wate Solomon nai ega ita rautaniġanei, ma awawana nuanuai i vai-kauei.

³Tauna awawana 700, anatapui gulagulau natunatui, wate awawana ġelaui 300 lamna me ana taunola. Taui Solomon ana vitumaġana BADA awarina i vikwkaoi.

⁴ Maranai Solomon i magura, awawana ana nota i virai da god ġelaui i votaġotaġoi, ma ega BADA awarina ita vipatutu me amana David.

⁵ Tauna mai Sidon ai god wavinena Ashtoreth, ma mai Ammon ai god apoapoe kaukauana Milkom* i viviborumei.

⁷ Au Ola Olive au Jerusalem kampa Solomon voepaepa gabuna i voai mai Moab ai god apoapoe kaukauana, Chemosh aubaina ma ġelauna mai Ammon ai god apoapoe kaukauana, Molek aubaina.

* **10:8:** Giruma ġelaui e ririwa *awawana* * **11:1:** Deu 17:17 * **11:1:** Pharaoh * **11:2:** Deu 7:3-4 † **11:5:** Hebrew *Milkom* wate giruma ravai maġamaġau e notanotai da wei lamna mai Ammon ai god wavana ġelauna *Molek*

⁸ Voepaepa gabui wenanare i voanaiei awawana anatapui aubaii da taui weka incense ma ai pulo ita apapui ai god awarii.

⁹⁻¹⁰ Maraotai BADA, Solomon awarina mara ruāga i ega ma i riwana-guratei da god ġelau viborumai ina voterei. Wate tauna ega ita voteletelei, ma Israel ai God viborumana i voterei. Lamna aubaina BADA amlona i ġaġġai kaua Solomon awarina.

¹¹ Ma i riwei i pa, "Wei kauai i visina-viraviraim ma au parivainuaġana bagibagina ma au tarawatu ega uta votaġotaġoi, lamna aubaina vibada au uram ana vaitawanei ma am taunola tagogi ana verei.

¹² Wate amam David notanei wei ega ana kaei maranai tam lawalawaim. Wate natum au urana ana vaitawanei."

Jeroboam ma Solomon ai virarautua

²⁶ Solomon ana gabemani taunoleina wavana Jeroboam maiteni gulau Solomon i viġavie. Tauna Nebath natuna, ana taon Zeredah au Ephraim, ma alona kaiababa wvana Zeruah.

²⁷ Jeroboam ana virarautua wenanare: Solomon ana taunola doa i taratarai da gwagwa i purupurui ma Jerusalem taon garina ġaimei gavogavoi i vopotapota-naiei.

²⁸ Jeroboam oroto araramanina ma maranai Solomon i 'nanai da tauna i nola kaua, ma i terei da Joseph noinooi dam Ephraim, ma Manasseh, ai taunola i vibadei.

²⁹ Mara tagogi, Jeroboam Jerusalem i voterei da i nena ma au mutulua peroveta Shilohei wvana Ahijah maiteni airuāga ava i vinenebelana, Jeroboam kwama vouna i oteoteni.

³⁰ Ahijah, Jeroboam ana kwama vouna i vojijini ma i sikanaiei da 12.

³¹ Ma i riwei, "Wei garai sikasikai 10 ma vaia aubaim, BADA Israel ana God e ririwa, 'Tau Israel ana vibadana Solomon au urana ana sikatawanei ma ana dam 10 au uram ana terei.'

³²⁻³³ Solomon Tau i geduaieu ma mai Sidon ai god wavinena, Ashtoreth, Moab ai god, Chemosh ma mai Ammon ai god, Milkom i vovoepaepai ma ega au iviu ita babara bo ita kauana-kauei au matau bo riwau bo au tarawatu ita votaġotaġoi me amana David i kaukauei nanare. Wate au taunola David ma Jerusalem notaiei, Jerusalem a vinei da Tau gariuei, lamna aubaina Solomon dam tagogi ana verei da ina vibadei.

³⁵ —Wate Solomon natuna au urana Israel ana dam 10[‡] ana verem."

⁴⁰ Solomon i ġoēi da Jeroboam ita virāgeni, wate tauna i ruba au Egypt, ai gulau Shishak awarina ma kampa i mae da Solomon i 'raġe.

⁴² Solomon au Israel i vigulau da madeġa 40 i kwa.

12

Rehoboam

¹ Mai Israel anatapui i nae au Shekem ma i vipaipai da Rehoboam ita nei ma ita terei ai gulau.

² Maranai au Egypt, Nebath natuna Jeroboam, wei riwana i nonori ma Egypt i voterei ma i naeme. (Tauna au naona Solomon i rovoei da kampa i ruba nae.)

³ Ma Israel babadai riwa i paritawanei da Jeroboam i nei ma anatapui i nae Rehoboam awarina ma i riwei, i pa,

⁴ "Amam nola vitaikaukauai au teapaiai i terei, wate ai vita marina uta votelatelai, ma ana vitaunolem."

⁵ Rehoboam i paribelei i pa, "Ona nae ma aupom vitonuina ona nememei ma ana paribelemi." Ma rava i vilamonei.

⁶ Ma gulau Rehoboam, dogadogara awari vinuaterena i vaia, taui amana Solomon ana taunola maranai lawalawaininai. I paridadanei i pa, "Wei ravai menanarena ana paribelana-nei?"

⁷ Taui i paribelei i pa, "Mepa da u ġoēi da rava ma voagui, ai vibaġa ma vianinei, ma taui aubaim ina vitaunola nonoa."

⁸ Wate Rehoboam dogodogara ai vinuaterena i geduaiei ma i nae ana kimta awarii, maiteni i rata tagogi, ma marina tauna e vivitaunolei

[‡] 11:35: Dam ruāga Judah ma Benjamin i voterei

⁹Tauna i paridadana, "Ami nota aiwai? Menanare tana kauanei, wei ravai e ririwa da ai vita tana viaburui?"

¹⁰Ma ana kimta i paribelei i pa, "Nai ravai awarim i ririwa, 'Amam vita ġaeġaena i vereverelai marina ai vita ma viaburui.' Wenanare ma riwei, 'Tau vita ġaeġaena ana veremi eġa me amau!'

¹¹Amau vita ġaeġaena i veremi wate tau ġaegħeotana ana terei au tepana! Tauna kwapuei i ravimi wate tau ġorōġorova donadonanei ana kwapuimi."

¹²Aupom tonuġa au murina i riwa nanare Jeroboam ana babada maiteni i nememei Rehoboam awarina.

¹³Gulau Rehoboam dogadogara ai vinuaterena eġa ita vaia ma pona bagibaginei rava awari i babani.

¹⁴Tauna ana kimta ai vinuaterena i rautaniġanei ma nanare i riwa, "Amau vita ġaeġaena i veremi; wate tau ana viaitpepani. Amau i ravimi wate tau ġorōġorova donadonanei opimi ana sikai."

¹⁵Au naona God ana peroveta Ahijah, Shilohei aiwai Nebath natuna Jeroboam i pariverei marina anona i tupua. Gulau rava ai vinuaterena eġa nonorana ita ġoie, wate lamna BADA i kaukauei da aiwai peroveta i ririwei nanare ina tupua*.

¹⁶Maranai Israel patarana i 'najdi da gulau taui ai babani i parivirevire, ma gulau i riwei i pa:

"Tauta eġa Jesse natuna David ana damei!

Eġa ana dam ravai!

Oo Israel ona naeme me ami au numu
Oo David am dam oina ma inanai!"

Anina ma mai Israel i nae ai au numu.

¹⁷Wate Rehoboam mai Israel au Judah maemaei i vibadei.

¹⁸Adoniram, mai Israel anatapui al taunola i vibadei. Gulau Rehoboam, Adoniram i paritawanei au Israel da ai taunola ita nejai au Jerusalem wate taui ġaime i viraurauei da i viraġeni. Gulau Rehoboam laġilägħina ana chariot i gerui ma i nae me au Jerusalem.

¹⁹Ma wei marana da i nae mai Israel David ana dam ma ai vigulau i geduaiei ma i parivirevirei.

²⁰Maranai mai Israel anatapui i aramanei da Jeroboam Egyptei i nememei, taui riwa i paritawanei da i nei awarri ma i terei Israel dam anatapuna ai gulau. Dam tagogiava, Judah ava, i mae David maiteni.

Jeroboam bulumakau goldei i kaei

²⁵Ma ġavia rovona aubaina Jeroboam Shekem taon ġaime i gari kwaviviroi ma kampa i mae. Wei lamna dobu violaolana, dam Ephraim ai dobu. Muriae i nae ma nanare Penuel taon i gari-kwaviviroi.

²⁶⁻²⁷Mara tagogi gulau Jeroboam wenanare i vinua-notanota, "Mai Israel anatapui e ġeġae au Jerusalem da au tempol pulu e apuapui BADA awarina. Ma mepa da nuanuai ina virai ma ina audamana Judah gulauna Rehoboam awarina amapo tau ina viraġeniu." Ma wei vigulauna ina nae me David ana epaepaia awarri.

²⁸*Ma ana dogadogara maiteni i babani da i vinua-terenei ma bulumakau ruāga goldei i kaei ma ana rava i riwei, "Jerusalem ġaena i vinigarigari, Oo Israel wei ami god, tauna Egyptei i tere-opunemi."

²⁹Ma bulumakau goldei tagogi au Bethel ma ġelauna au Dan i terei.†

³⁰Wei lamnei i ġo-apoapoe; aubaina rava ġelaui uama ġaegħena i naeni da au Dan da burumakauna i voepaepa.

³¹Jeroboam maiteni voepaepa gabui ma pulu aniapuni i voanaiei ola au tepai ma rava labalababa eġa mai Levi i vinei da pirisi, pulu tauapuna.

Rehoboam au Judah i vigulau, ma i vigulau da madeġa 17 i kwa. Maranai tauna gulau i maemae, mai Judah god morumorui i rarauduneli. Ma mai Egypt i nei da Judah i viġavie i ai tempol

* ^{12:15}: ...da vigulau Solomon natunatuna awariei ina vaitawanei † ^{12:28}: Exo 32:4 † ^{12:29}: Mai Israel ai nota da Dan ma Bethel lamna dobu vivivirei. Bethel lamna au Israel (dam 10) au laubadei ma lamna 16 kilometer ota Jerusalem au kolanana. Wei eġa uama, ma wei lamna Jerusalem e teretere-ġairei ma rava e ririwei da au Bethel ina voepaepa. Dan lamna Israel au kolana au lavaratei.

purapurai maiai ġaeġäei ma gulau ana numa purapurai maiai ġaeġäei anatapui i pupuni da i vivanei.

Rehoboam ma Jeroboam i viġaiġaiawa nonoa. Maranai Rehoboam i 'raġe, natuna Abijah au Judah i vigulau madeġa tonuġa i kwa. Tauna maiteni Jeroboam i viġaviei. Maranai Abijah i 'raġe, natuna Asa au Judah i vigulau da madeġa 41 i kwa. Tauna gulau aiaina, ma God i raudunelei ma mai Judah ai god morumorui i viparipariei. Tauna mara nonoa mai Israel ai gulau Baasha maiteni i viġaiġaiawa. Maranai Asa i 'raġe natuna Jehoshaphat i vigulau mai Judah awari.

Au Israel Jeroboam natuna Nadad lamna gulau apoapoena, ma nanare aiavoi da tauna au murina i vivigulau anatapui gulau apoapoei. Nadab mai Israel i vibadei da madeġa ruaga i kwa ma Baasha tauna i virägeni, ma Jeroboam ana dam mamae-terenanai maiteni. Wate rava wavana Baasha i vigulau da madeġa 24 i kwa ma i 'raġe. Ma natuna Elah i vigulau da Israel i vibadei da madeġa ruaga i kwa ma ana sorodia badana tagogi, wavana Zimri, tauna i virägeni ma i terepa-melei da i vigulau. Wate wiki tagogi au murina mai Israel ai sorodia Omri i terei da gulau, anina ma Zimri i virägena-melei. Omri i vigulau da madeġa 12 i kwa, anina ma natuna Ahab tauna Israel ana gulau ma i mae da madeġa 22 i kwa.

16

Israel ana Gulau Ahab

³⁰ Omri natuna Ahab, ana ġo-apoapoe i rata guratana BADA awarina ega me gulau anatapui au naona i vivibada nanare.

³¹ Tauna i notai da lamna kaua labalababa da i ġo-apoapoe me Nebath natuna Jeroboam i kaukauei nanare. Wate tauna i kauana-guratei maranai mai Sidon ai Gulau Ethbaal natuna Jezebel i ravaġi ma i vikarei da ai god Baal i raudunelei.

³² Ma Baal ana voepaepa gabuna pulu tauapuna au Samaria i voai ma au orana pulu aniapuna i voai.

³³ Ahab god wavinena Asherah kokotauna i vituramairini*. Ma kaua maġamaġau i kauuei da BADA, mai Israel ai God ita viamloġaġaini, me mai Israel ai gulau au naona i kaukauei nanare.

17

Elijah ma Ahab

¹ Peroveta Tishbelei wavana Elijah* ana dobu Tishbe au Gilead, Ahab i riwei, "Riwa kaua! BADA Israel ana God lawalawaina, ma tauna a vivilaragei. Wavanei a riwa da turuvani ega ina peu ma garewa ega ina atuna madeġa biäga da tau ana riwa da nanare."[†]

Ma nanare i mae. Madeġa biäga garewa ega ita atuna, marapoi i ġetai ma ega lam.

⁸ Ma BADA Elijah i riwei

⁹ "Laġiġina ma nae au taon Zarephath, Sidon au ġereġerena[‡] ma kampa ma mae. Kampa kaiababa e mamae, a riwei da ina viambagibagim."

¹⁰ Ma Elijah i nae au Zarephath. Maranai i ġetai taon ana au anirui, ma kaiababa i 'nanai ai i ġuñaġuna, ma i riwei, "A viviġaim da waira aburuna uta neiae da ata umal"

¹¹ Ma i nenaе vainana aubaina ma orotona i garara me i pa, "Ma palawa apuapunana aburuna maiteni uta neiae."

¹² Kaiababa i paribelana i pa, "Riwa kaua! Am BADA God lawalawaina ma wavanei a ririwa, tau awariu ega palawa apuapunana. Awariu palawa aburu kaimojina ma monamona aburuna. Ai a ġuñaġuna da ana nae au numra ma lam damona ana vitavi da natu maiteni ana am ma au murina ana raumolaġau da ana iraġe."

¹³⁻¹⁴ Wate Elijah kaiababa i riwei, "Ega ma vinuabola! BADA Israel ana God e ririwa, 'Am palawa abomana ega ma monamona wagina ega ina kwakwawa ma BADA garewa

* **16:33:** *Asherah* lamna god wavinena, Baal awana; mai Canaan, mai Egypt ma Phonsia anatapui wei godna e vivibumei. * **17:1:** *Elijah* anona BADA lamna God. † **17:1:** Mai Canaan e vivitumagħana da ai god Baal garewa e vivibadei, wate maraġela god għelawa wavana Mot anona iraġeta tauna Baal i virägeni. Mepa da Baal i lawana me, lamna tauna dobu ina vituvanei. Lamna aubaina, Elijah Baal i vimarumaru ma i ririwa da tauna God lawalawaina awarina i vitaunola, ma God garewa ma iraġe i vibadei, muriai tana inanai maranai ina vomairi da kaiababa natuna ina vilawana-melei

‡ **17:9:** BADA Elijah i paritawanei au Sidon - kampa rava Baal i raudunelana-guratei. Wei lamna Ahab poiana orotona Ethbaal ana gabu, ma wei au marana, Elijah Ahab i raraugovaei.

ina paritawaneiai da wapu ina gogo me! Anina ma nae au numa ma u ririwa nanare ma kaei, wate au naona palawa aburuna ma apui aubaiu. Ma mae-terenana ma apui aubaimi."

¹⁵ I nae ma menanare Elijah i ririwei, nanare i kaei. Ma awari lam i mae da aupom biaga i kwa.

¹⁶ Ma me BADA Elijah i parivainuağani nanare palawa au aboma ega ita kwa ma monamona au wagi ega ita kwa.

¹⁷ Muriai kaiababa natuna i doria ma ana doria i vovoguratei anina ma i 'rağe.

¹⁸ Ma wavine Elijah awarina i riwa, i pa, "God ana taunola, Aiwai aubaina wei u kaei awariu? U nei weka da au go'apoapoe uta viegai ma natu uta vi'rağeni bo?" §

¹⁹ Elijah i paribelei i pa, "Natum ma vereu." Elijah taubeu, alona au urana i vaia ma i avara-ğaei au vatavatara mepa i mamae lana ma ana au animatave i vimataveni.

²⁰ Anina ma ponana i rata ma i raupari BADA awarina, "Oo BADA au God, aiwai aubaina kaua apoapoe kaukauana u kaei kaiababa awarina? Tauna i taravainiu da ana au numa a mamae, ma u kaei da natuna i 'rağe?"

²¹ Anina ma Elijah i taduru ma mara tonuga taubeu au tepana i matave ma ponana i rata ma i raupari BADA awarina i pa, "Oo BADA au God, A vibağaim da tevera ana lawana ma veremelei!"

²² BADA Elijah ana pari i nonori ma tevera lavutu i vikarei ma i lawana.

²³ Elijah tevera i voepai ma i avara ğairei alona awarina ma i riwei, "Ma inanai natum lawalawaina."

²⁴ Wavine i riwa, "Marina aramana-kauei da tam God ana taunola, ma BADA ana riwa gamomei e opuropu lamna riwa kaua!"

18

Elijah ma Baal ana peroveta

¹⁻² Madega tonuga garewa ega ma gomara ğaeğena i mae. Madeğau vitonuina BADA Elijah i riwei, I pa, "Ma nae gulau Ahab ma inanai. Ma tau garewa ana paritawaneiai." Ma Elijah i nae da gulau Ahab ita inanai.

¹⁷ Maranai tauna Elijah i 'nanai ma i riwa, "Wei tam bo, mai Israel rauağaiğai amai?"

¹⁸ Elijah i paribelei, "Tau ega ata rauağaiğai au Jerusalem, wate tam, ma amam ana numa ravai maiteni o rauağaiğai. Taumi BADA ana tarawatu o geduaiei, ma Baal kokoitaui o viviborumei."

¹⁹ Marina mai Israel anatapui ma ğorei da ina nae au ola Carmel ina nebeleu. Baal ana peroveta 450 ma Asherah god wavinena ana peroveta 400 Jezebel ana au aboma e amam, anataputapui ma neiai.

²⁰ Ma Ahab mai Israel anatapui ma Baal ana peroveta i ğorei da au ola Carmel ina vinenebelana.

²¹ Elijah patara au naoi i mairi ma i riwei, "Wei vinua-rağarağai mara aiwai ina kwa, ona vinuanaina nae ma ona vianuanaina nei, metauna notana ona vaia? Mepa da BADA God, tauna ona raudunelei. Mepa da Baal god, tauna ona raudunelei." Wate rava ega aiwai ita riwei.

²² Ma Elijah taui awarii i riwa, "BADA ana peroveta anina tau a mamae. Wate Baal ana peroveta 450.*

²³ Aubaita bull ruaga ona neiai, ma taui ai sia ina rautani ma ina bori muomuo i ma ai au tepana ina terei, wate ega ina ravivoi. Ma tau nanare ana kaei.

²⁴ Ma taumi ona raupari ami god awarina, ma tau ana raupari BADA awarina. Metauna godna ai araratanei i paribelana tauna God ririwa kauana!" Ma rava anatapui i vianina.

²⁵ Elijah Baal ana peroveta i riwei, "Taumi o mağga aubaina ona vinao, Bull tagogi ona vinei ma ona vokaukauei. Ami god awarina ona raupari ma ega ai ona ravivoai."

²⁶ Ma taui ai bull i vaia ma i vokaukauei. Anina ma Baal awarina i raupari, ubaubanai i vikarei da i raviaubenai. Taui i garagarara, "Oo Baal, ma paribelei!" Ma pulo aniapuna i arara kwaviviroi, Wate ega paribelana; ega aiia ita paribelei.

§ **17:18:** Nai marana rava i vitumağana da doria ma irage lamna God ana kovoga go'apoapoe aubaina. Kaiababa i vitumağana da Elijah tauna ana au numa i mamae ma lamna BADA matana i taini awarina ma lamna i kaei da natuna orotona i 'rağe. * **18:22:** Elijah ana babani lamna gulau wavinena Jezebel e ririwei, tauna i ğoei da God ana peroveta anatapuna ina virägeni. Ahab ana taunola Obadiah i voagu da God ana peroveta ġelaui au guba i tere-govağı ma waira ma lam i vereverei wate ega tata aramanei biaga lawalawaii e mamae.

²⁷ Aubenai Elijah i vikarei da i vimarumarui i pa, "Ona raupari guratana! Tauna god! Mepa da e rarauboni bo i nae au ririva bo e vağavağai bo e matamatave! Ona ravidagudagi!"

²⁸ Ma taui garara i voguraguratei ma me ai au kaua nanare, naipiei ma aierei tupuai i boribori-melei ma tara i toitoi.

²⁹ Taui i garagarara da i garagarara da aubigai pulo apuna ana mara. Wate amapo da ega paribelana, ega aiai ita paribelei, ega aiwai ita nonori.

³⁰ Ma Elijah rava i riwei, "Ona nei awariu." Ma anatapui i nei ma Elijah i mae-kwaviviroi, tauna BADA ana pulo aniapuna i voaovo-melei.

³¹*Elijah ġaima 12 i vaia, ġaima tagogi da Israel ana dam tagogi aubaina. Wava Israel BADA taui noii Jacob i verei.

³² Ma ġaimanei pulo aniapuna i voa-melei BADA viborumana aubaina. Ma au adana doba i ġarai da waira ana ruva 14 Ltr nanare ina vojjini.

³³ Pulo aniapuna au tepana ai i vatar, bull i bori-naiei ma siana ai au tepana i terei. Ma i riwa, "Nau 4 ġaegħaei wairā ona vioa, ma sia ma i ai u tepana ona iwagi."

³⁴ Ma nanare i kaei, ma i riwei, "Ona kauana-melei." Ma nanare i kaei. Ma i riwei, "Mara vitonuina ona kauana-melei." Ma nanare mara vitonuina i kaei.

³⁵ Waira i toi ġaira da dogo maiteni i vioa.

³⁶ Ma aubigai pulo apuna ana mara i ġetai, Elijah i babara-ġae pulo aniapuna au ririvana ma i raupari i pa, "Oo BADA, Abraham, Isaac ma Jacob ai God, amadodo rava ma viatataiei da tam God au Israel ma tau am taunola, ma anatapuna u ririwei a kaei.

³⁷ BADA ma paribelei, Oo BADA ma paribelei da rava ina aramei da tam, au BADA, tam anina God, ma marina rava orai e taitaina-melei awarim."

³⁸ Maratagogi BADA ana ai marei i ġairai ma pulo bull, ai, ġaima ma doa i aragibui. Ma waira i 'waiwagia i ġuġuva-pai.

³⁹ Maranai rava wei i 'nanai taui i mae-ġaira au doa da i matave-taitaina ma i garara BADA awarina, "BADA anina God! BADA ainelana anina God!"

⁴⁰ Ma Elijah rava i egari, "Baal ana peroveta ona vojjini; Ega tagogi ona voterei da ina rubal" Peroveta anatapui i vojjini ma Elijah tau i riwei da i ġairei au Kishon gaugaubana ma anatapui i virägeni.

⁴¹ Ma Elijah gulau Ahab i riwei, "Ma nae da ma am ma garewa ġaegħena gugurana a nononori."

⁴² Ma Ahab i nae da ita am ma Elijah i ġae ola Carmel au tepana, ma i mae-ġaira au doa ma kolana au ae-tutuna ma i raupari.

⁴³ Ma ana taunola i riwei, "Ma nae ma au bogei ma inana." Ana taunola i nae da i nememei Elijah awarina ma i riwei, "Ega aiwai ata inanai." Anatapuna mara 7 i paritawanei da inana.

⁴⁴ Ma mara vi-7-na i nememei ma i riwa, "Apau aburuna ana rata me oroto urana a inanai bogei i ġeġġe."

Ma Elijah i riwa, "Ma nae ma Ahab ma riwei, 'Am chariot ma gerui ma ma ġaira muriai da garewa ina rautomenim."

⁴⁵ Ma aburuna ava ma lada i ġei ma dobu i waguvarei ma ivena i ruba ma garewa ġaegħae otana itoi. Ahab ana chariot i gerui ma i ruba au Jesreel.

⁴⁶ Ma BADA ana rewapani i rui Elijah awarina; ma ana gara giana i taini da ana au jigorägħi i raġita-jijini ma i lavui da Ahab i votani da i aigeta au Jesreel.

19

Elijah i ruba govaġa au Sinai

¹ Ma Ahab awana Jezebel i vibenabenamei, aiwai anatapuna Elijah i kaukauei ma menanarena Baal ana peroveta anatapui i vununaiei.

² Ma Jezebel taupariverena i paritawanei Elijah awarina ma i pa, "Wenanarena marana au maratom, tau ana virägenim me au peroveta u virägenanei nanare. Mepa da wenanare ega ana kaei, a raraupari da god ina kovoġa-kaeu bo ina virägeniu."

³ Elijah i rovo ma ana lawana aubaina i ruba. I nae au Beersheba au Judah, ma kampa ana taunola i voterei.

⁴*Ma tauna ainelana i nae aupom au mutulua, ma i ġeta ai *brum* au ġouna ma i kiala ma i raupari da ita iraġe. I riwa i pa, "BADA, tau malau a vai-avei. Au lawana ma vaitawanei marina, tau irairaġeu, me noinou."

⁵ Ma i mae-ġaera ai *brum* au karena ma i matave. Ma maratagogi BADA ana anela Elijah i vodadani ma i riwa, "Ma vomairi, ma am."

⁶ I 'nana viravira ma i matamatave lana au kolanei palawa apuapunana ma waira aniuma. I am ma i uma ma i matave me.

⁷ BADA ana anela i nememei, i vodadani ma i riwei, "Ma vomairi ma ma am aubaina am vaġai ina manawa guratana."

⁸ Elijah i vomairi da i am ma lamnei rewapania i vaia da ina babara aupom 40 ma maratom 40 da au Sinai^{*}, BADA ana au ola i ġeta.

⁹ Ma kampa i ġeta au guba ma i matave. Wate BADA i riwa, "Elijah weka aiwai e kaukauei?"

BADA Elijah awarina i ġeġa

¹⁰ Elijah i paribelei, "Oo BADA vivirewapana kaukauam, Tau mara nonoa tam a vivorumem - tam ainelam. Mai Israel am parivainuāgana bagibagina i viaigai, am pulo aniapuna i viairikarikai, ma am peroveta i virāgena-pai, tau ainelau i votereu, ma marina i ġoei da tau maiteni ina virāgeniu!"

¹¹ BADA i riwa, "Ma opu au ola ma au naoi ma mairi."

Ma Elijah kampa i maimairi ma labu ġaegħena olana i ravi, da i gunevi, wate bada ġeġa nai kojkojirana au orana. Ive au murina lolo, wate BADA ġeġa nai lolona au orana.

¹² Lolo au murina ai araratana, wate BADA ġeġa nai aina au orana. Ma ai au murina pariararava jinajinana i nonori.

¹³ Maranai Elijah wei i nonori ana kwama i vaia da naona i purui[†] ma i opu guba au naona i mairi. Ma pona i riwa, "Elijah weka aiwai e kaukauei?"

¹⁴ I paribelei, "Oo BADA God, vivirewapana kaukauam, mara nonoa tam ainelam aubaim a vivilaraġa. Wate Israel ravai am parivainuāgana bagibagina i geduaiei, am pulo aniapuna i rikaniae, ma am peroveta anatapui i virāgeni. Tau ainelau a mamae. Ma marina i ġoei da tau maiteni ina virāgeniu."

¹⁵ BADA i riwa, "Meiei e nenei nanare ma nae me, ma ma-rui au mutulua Damaskas, maranai u ġeta au taon, Hasael ma buloi, mai Syria ai gulau;

¹⁶ Nimshi natuna Jehu ma buloi Israel ai gulau, ma Shaphat natuna Elisha, ana taon Abel-Mehola ma buloi peroveta da am gabu ina vaia.

¹⁷ Aiavoi da Hasael i rovoei da e rubaruba, Jehu taui ina virāgeni ma aiavoi da Jehu i rovoei da e rubaruba, Elisha taui ina virāgeni[‡]

¹⁸ Wate mai Israel ai maġa 7,000 ġeġa melanai Baal ita raudunelei bo kokoitaui ita vigia-lagħonei, ina lawana!"

BADA Elisha i kwatuei

¹⁹ Ma Elijah i nae da Shaphat natuna Elisha i viaroni doa i uauatai, bulumakau 12 ruaruāgei ava raġiraġitai aniuata i taitaini ma i uauata. § Elisha ana bulumakau, au murioina i nolanola. Elijah i għira awarina ma ana kwama i votawanei ma Elisha i voten.^{*}

²⁰ Elisha bulumakau i votere-tawanei ma Elijah i rubei, mai i riwa, "Au naona ma votereu da ana nae amau ma alou ana inanai ma ana vigia-lagħolagħonei ma tana nae."

Elijah i paribelei, "Anina ma nae wate aiwai a kauet awarim ma vinuanotenotei!"

²¹ Ma Elisha i nae da ana bulumakau ruāġi i virāgeni, pawe bulumakau au uai i viaigaigai da ai i viviri da sia i apui ma rava i verei da i am. Anina ma i opu da Elijah i votagħotagoi.

* **19:8:** Sinai wawana ġelauna lamna *Horeb* Weka BADA i viatataiana-melei mai Israel awarri ma ana tarawatu i verei. (Exo 19:20) † **19:13:** Mai Israel i vitumagħana da ega aiai BADA ita inanai ma lawalawaina ita mae. (Exo 3:6) ‡ **19:17:** BADA ana rava ina kovogħi ana parivainuāgħana bagibagina i għi aubaina. § **19:19:** Mai Israel burumakauei ipa iramei taitaini da u uauata. * **19:19:** Wei lamna mataira da Elisha Elijah ana gabu i vaia da peroveta.

2 King Gulagulau Viruaina

Pariverena

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruāga gulagulau naona ma viruaina e ririweta. Gulagulau bukana naona e ririweta David au murina Solomon menanarena da i vigulau.

Solomon i'rāge ma au murina Israel i kai da baba ruāga. Dobuna au rauanaäge i ġorei Judah ma au lavaratei i ġorei Israel. Maranai mai Judah ma mai Israel gulagulau, God i voletelei lamna nuauba i mae. Wate maraġela gulagulau God i rawaġaigaiei ma god ġelau i rauduneli. Anina ma nuabola i tupua.

Maranai mai Israel God votelatela i voterei, Tauna peroveta i paritawanei awari. Ma Gulagulau bukana viruaina au orana lamna peroveta wawana naenaena Elisha. Tauna God ana rewapanie kaua ġaegħei i kaukauei, ma rava awari i jimajima da ita mae-tavirei God awarina.

Elisha i'rāge ma au murina, gulagulau maġamaġau i apoapoe kaua. Anina ma God ana rava i kovoġi ma lamnei ai ġavia taui i vovaiubai ma i pani ma i niae. Au naona mai Israel awari i tupua ma muriai mai Judah awari i tupua. God ana rava mai Judah eġa ita vianinei da ita nae me ai au dobu da madeġa 70 i kwa.

Virarautua reregħana

Israel i kai da Vibadana ruāga, Israel ma Judah 1:1–17:41

Peroveta Elijah ana virarautua 1:1–13:20

Judah gulagulau ma Israel gulagulau ai virarautua 8:16–17:4

Assyria gulauna Samaria i vovaiubai ma Israel i pupuna-naiei ma ana vibadana i kwa 17:5–40

Judah gulagulau ai virarautua 18:1–21:26

Gulau Hezekiah ana au vibada i raukarei ma i nae da gulau Josiah ana au vibada 18:1–21:26

Judah gulagulau damona ai virarautua 23:31–24:20

Babilon gulauna Jerusalem i vovaiubai da Judah ana vibadana i vikwai 25:1-30.

2

Elijah i ġaiei au mara

¹ Ma mara i ġetai da BADA Elijah labuei ita ġaiei au mara. Elijah ma Elisha Gilgal i voterei ma i nenea.

² Ma Elijah, Elisha i riwei i pa, "Weka ma mae ma BADA i riweu da ana nae au Bethel."

Wate Elisha i paribelei, "Riwa kaua da BADA lawalawaina ma nanare tam lawalawaim, tau nanare eġa melanai ana voterem." Anina ma airuāga i ġaira au Bethel.

³ God ana peroveta borui au Bethel maemaei i opui Elisha awarina ma i riwei i pa, "Tam u aramanei da BADA am bada amadodo awarim ina vaitawanei?"

Elisha i paribelei, "Ee a 'ramanei, wate lamna eġa ona babaniei."

⁴ Ma Elijah, Elisha i riwei, "Weka ma mae, BADA i riweu da ana nae au Jeriko."

Wate Elisha i riwa, "Riwa kaua da BADA lawalawaina ma nanare tam lawalawaim, tau nanare eġa melanai ana voterem." Anina ma taui i nae au Jeriko.

⁵ Ma God ana peroveta borui kampa au Jeriko maemaei i opui ma Elisha i nebelei ma i riwei, "Tam u aramanei bo da BADA am bada amadodo awarim ina vaitawanei?"

Elisha i paribelei, "Ee a 'ramanei, wate lamna eġa ona babaniei."

⁶ Ma Elijah i riwei, "Weka ma mae, BADA e paripari-tawaneu au Waira Jordan."

Wate Elisha i paribelei i pa, "Riwa kaua da BADA lawalawaina ma nanare tam lawalawaim, tau nanare eġa melanai ana voterem." Ma airuāga i babara nae.

⁷ God ana peroveta 50 taui i votaġoġoi, ma au muri i tumairi maranai Elijah ma Elisha Waira Jordan au adana i tumairi.

⁸ Elijah ana kwama i votawanei ma i piri ma lamnei waira tepana i ravi. Da i vilamonei au oien a ma au kelakelauna ma taui au pouna au alalana i babara damana.

⁹ Maranai au baba ġelauna i ġeta Elijah, Elisha i riwei, "Ma riweu aiwai ana kauei aubaim muriai da ina ġaieu."

Ma Elisha i paribelei, "Tau am gabu ana vaia da peroveta ai bada lamna aubaina a ġoei da am rewapanā gaeġaena, ma viaitepatepani ma ma veredamaneu."

¹⁰ Elijah i riwa, "Lamna kaua piripirina e vivibägei, wate mepa da u inanai ina ġaigaieu, lamna u vivibägei u vaia ma ega, lamna ega."

¹¹ Ma airuaga i bababara ma i vibababani ma hosi araratana, chariot araratana i taina ġetei ma taui i ravigori. Ma Elijah ma Elisha au poui i ruba ma BADA Elijah labuei i ġaiei au mara.

¹² Elisha weii 'nanai mai garara, "Amau! Amau! Mai Israel taugagaloinein vivirewapanā! Tam u nae!" Ma Elijah ega ita inana-melei. Nuanuana i bola-kauei ma ana kwama au pouna i sikai.

¹³ Ma Elisha i nae ma Elijah ana kwama au doa i vivipeunia, maranai i ġaigaiei au mara, i voepai ma i nae me waira au adana.

¹⁴ Ma kwamana i peupeu i vaia ma waira tepana i ravi ma i riwa, "BADA Elijah ana God mepa?" Maranai waira i ravi, waira i vilamonei ma au pouna au alalana i babara damana.

¹⁵ Jeriko ai peroveta boruna 50 au weia ma i 'nanai aiwai i tupua ma i riwa, "Elijah ana rewapanā i damana Elisha awarina." Ma i nae da ita nebelei ma i mae-ġaira au doa ma i raudune.

¹⁶ Ma i riwai pa, "Tauai rewapanā 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugauba i teretawanei."

Elisha i paribelei, "Ega! Ega ona nae."

¹⁷ Wate taui i voigħiġiġi da tauna i vinimala da i paritawanei i pa, "Anina ona nae." Wate taui 50 aupom tonuġa i baia ma ega ita nelagħi.

¹⁸ Maranai taui i nememei au Jeriko, Elisha taui i riwei, "A riwemi da avena ota nae!"

4

Elisha wavine Shunemei i voagui

⁸ Mara tagogi Elisha i nae au Shunem taon. * Weka wavine manemanena i mae, ma Elisha i vibaga-gurtei da ita mae da ita am. Ma maranai Elisha wei au dobuna e vaġavāgai, tauna weka i amam.

⁹ Wavine awana i riwei, "Aramanei da orotona weka e nenei lamna BADA ana peroveta vivivireina.

¹⁰ Ana numa aburuna au poewa[†] tana voai ma ani matave, kepakepa, ani kiala ma rampa tana terei au orana tauna aubaina. Ma kampa ina mae maranai e nenei."

¹¹ Mara tagogi Elisha i nei ma i ġae ana au numa da i rauvirai.

¹⁴ Muriae Elisha ana taunola wavana Gehasi i paridadanei, "Aiwai ana kauei wavinena aubaina."

Ma Gehasi i paribelei, "Tauna ega natuna orotona ma awana i magura."

¹⁵ Ma Elisha i riwa, "Ma ġorei."[‡] Ma Gehasi wavine i ġorei ma i nei da au metaeta i raumairieci.

¹⁶ ♦Ma Elisha wavine i riwei, "Wenanare marana madegħa au ġelauna tam natum orotona ma ġuniġuni."

Wavine i paribelei, "Ega au bada. Tam peroveta ma tau am taunola, ega ma morui!"

¹⁷ Wate wavine i raumanawa. Ma marana wenanare madegħana au ġelauna wavinena natuna orotona i ġuniġuni, Elisha i ririweia nanare.

Elisha rava 100 i viambagibagi

⁴² Mara ġelauna, oroto tagogi melagai Baal-Shalishahei i nei. Tauna nai madegħana witina naona i labai ma palawa i apui da iavana 20. Ma witi majiġai baikena maiteni i neiai da Elisha i verei. Elisha ana taunola i riwei, "Rava lam[§] ma verei da ina am."

⁴³ Ma ana taunola i garara, "Aiwai! Wei lam ega tagotagogina da rava 100 tana viambagibagi?" Wate i paribelei i pa, "BADA i riwa da rava ma verei da ina am ma lam ina mae-terei."

⁴⁴ Ma lam au naoi i terei ma taui i am ma lam i mae-terei, BADA i ririweia nanare.

5

Elisha Namaan i vilawani

* **4:8:** Shunem taun 50 Km da au Samaria taun. † **4:10:** Mai Israel ai poewa dabababai. ♦ **4:16:** Gen 18:14 § **4:42:** Peroveta ġelaui Elisha maiteni i mamae, kampa gomara i peu ma rava i vinuapoapoe.

¹ Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kuae i vitumāganei. Namaan sorodia wavana naenaena wate doria lepera i vaia.

² Marana patapatai mai Syria i nenei au Israel i vivigavia. Mara tagogi tevera guguinina i pani da i naei da ai bada Namaan awana i verei da ana taunola.

³ Mara tagogi guguinina ana bada wavinena i riwei, "Au bada, am bada uta riwana-dadanei mepa da ita nae perovetana au Samaria maemaena awarina. Tauna ana doria ita inanai ma ita vilawani."

⁹ Ma Namaan ana hosi ma chariot borui i nae ma Elisha ana au metaeta i raumairiei.

¹⁰ Wate Elisha taupariverena i paritawanei da i riwei i pa, "Ma nae da au waira Jordan ma oga-melem mara seven ma lepera doriana ina voterem ma opim ina ai-me."

¹¹ Wate Namaan amlona i ġaġġai kaua ma i riwa i pa, "Tau au nota ġaġġaena da peroveta ita opui da ita inanai da urana, opiu au tepana mataira ita kuae i ma ana BADA God awarina ita raupari da ata lawana.

¹² Wate waira Amanah ma Pharpar au Syria i ai telera ega me Israel wairai. Tau kampa ata toa ma ata lawana." Ma Namaan i mae-tavirei ma ana amloġaġaina i nae.

¹³ Ana laralaraga i nae awarina ma i riwei, "Au bada mepa da ita riwem da aiwai piripirina uta kuae, lamna uta kuae tapa? Wei lamna kaua telatēlana i ririwei nanare, 'Ma toa ma ma lawana'."

¹⁴ Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera doriana i kwa.

¹⁵ Ma Namaan ana laralaraga maiteni i nae me Elisha awarina ma i riwa, "Marina aramanei da au dobu, god ega ita mamae anina Israel ana God tauna ava; lamna aubaina au bada pulo a vereverem ma vaia."

¹⁶ Wate Elisha i paribelei, "Riwa kaua da BADA a vivitaunolei lamna BADA lawalawaina, ma wavanei a ririwa tau ega pulo ana vaia." Ma Namaan i babani bagibagi da Elisha pulona ita vaia, wate tauna pulona i geduaie.

¹⁷ Ma Namaan i riwa, "Mepa da nanare lamna ma vianineu da donki ruāga ai vita ruvana Israel doana ana vigerui da ana naei au num. Ma marina da e nene, ega melanai pulo ana apui bo sia taputapuna ana apui god ġelau awarri, anina BADA ainelana awarina.

¹⁸ Tau am taunola ma a ġoie da BADA au ġoa apoapoei ina nota-tawanei, kaua tagogi ava awarinei; maranai au gulau a ruriruiee ana au tempol ma tauna au urau e vovovijina ma maiteni a mamae-ġaira ma Syria ai god Rimmon a viviborumet."

¹⁹ Elisha i riwa, "Ana nuaubam ma nae." Ma Namaan i nae.

Mai Israel ai gulau Ahab au 851 BC. i'rāġe. Au murina gulagulau ġelau i mae ma taui au Samaria i mae. Maranai Hoshea i vigulau. Au 724 BC. mai Assyria ai sorodia Israel i viġavie.

17

Samaria i peu

Mai Israel ai gulau damona lamna Hoshea. Tauna i mae gulau au Israel madeġa 9, wate Assyria ai gulau i pariparinīġiae i lamna aubaina i pani.

⁵⁻⁶ Assyria ai gulau Israel anatapuna i naeni, da i ġeta da Samaria taon I mae-kwaviviroi, ma i gudu-tomeni da madeġa tonuġa i kwa. Maranai Hosea ana vigulau madeġana 9 i ġetai, Mai Assyria Samaria taon i ruini mai Israel i pupuna-naiei au Assyria. Ma au Halah, taon, waira Habor au ririvana ma mai Mede ai au taon nununai i verei da i raunuma.

⁷⁻⁸ Wei kovoġai i nei mai Israel awari aubaina taui god ġelau i viviborumet. Taui ai ġoa apoapoei i rata kaua BADA ai God awarina, Wariaġa Tauna Egypt ai gulau Pharaoh au urana Israel i vai-tawanei ma aiai i ravena-opunei. Mai Israel ai God eteni i pupuna-opunei ai kaua i votaġotagoi da i kaukau ei ma kaua waduboi ġelau Israel ai gulagulaui i kaukau ei.

⁹⁻¹⁰ Mai Israel kaua apoapoei i kaukau ei BADA ai God awarina ma BADA wei kauai ega ita vinuiae. Taui voepaepa gabui i voanaiei god morumorui voepaepaei aubaina au taon nununai, melagai aburuoina da au taon ġaġġaei. Ola muomuo anatapui au tepai ma ai anatapui au goui gana vinualaulau i terenaei ma Asherah ana tuuata ma kokoitaui i vituramairini.

BADA mai Israel ai ġoa apoapoe aubaina i viopuni

²⁴ Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiae da Samaria, ana au taon nununai kampa i terei da i mae. Taui mai Israel numa i ruba-tawanei i raunumei.

²⁵ Vouvounai wei ravai ega BADA ita viborumei, lamna aubaina lion gelaui i paritawaneiae da rava i vivirageni.

²⁶ Ma rava Assyria ai gulau ana riwa i paritawanei i pa, "Rava au Samaria u terenaiei, dobuna Godna ana tarawatu ega ita aramanei. Lamna aubaina ma dobuna ana God, lion i paritawanei ma ravai e vivirageni."

²⁷ Ma mai Assyria ai gulau rava i egari, i pa, "Pirisi tagogi au Samaria o panipania, ona paritawana-melei ma, dobuna ana God, ana kaua ravai voui ina viararamani."

²⁸ Anina ma pirisi tagogi au naona i naenaei au Assyria i neiana-melei da au Bethel i mae. Kampa rava i viararamani da BADA viborumei.

²⁹ Wate jentail ravai nununai ai god morumorui kokoitaui i kaukauei ma metauna au taona i mamae, kampa ola au tepai au naona mai Israel au Samaria ai voepaepa gabui i voavoailana, kampa i terenaiei.

18

Hezekiah i mae mai Judah ai gulau

¹ Elah natuna Hosea i vigulau au Israel madega tonuga i kwa. Wei maranaina au Judah Hezekiah, Ahaz natuna i vigulau.

² Tauna ana madega 25 ma i vibada au Jerusalem da madega 29 i kwa. Alona Abi, Zekariah natuna.

³ Tauna kaua aiai avai i kaukauei BADA awarina me noina David nanare.

⁴ *Ma god morumorui ai ani voepaepa gabui anatapui i votawawanei. Ma kokoitaui i viairikarikai ma Asherah tuatuana i taratuituina-naei. Ma wariaaga Moses mota bronzei, kokoitaui i kaei, i viviborumei. Hezekiah motana kokoitauna maiteni i viaigimagimai. (Mai Israel motana i gorei Nehushtan.)

⁵ Hezekiah BADA, Israel ana God i vitumañanana-kauei. Ega gulau gelauna au Judah nanare me tauna, ma ega aiai gelauna nanare au naona i mae bo muriai i mae.

⁶ I vipatutu BADA awarina au anatapuna ma i vovoguratei da God ana tarawatu Moses i vereverei anatapuna i vovotañotagoi.

⁷ BADA tauna awarina i mae ma ana nola anatapuna i davudavu. Tauna Assyria ai gulau i parivireirei ma ega aubaina ita vilaraga.

⁸ Ma mai Philistia anatapui i vovaiubai, melañai da taon gaimei garigarina anatapuna i pupuni da au Gaza i geta.

Maranai Hezekiah i rage, Manasseh amana i raviepaiai da i vigulau.

21

Manasseh i vigulau au Judah

¹ Manasseh ana madega 12 ma i vigulau au Jerusalem, ma i vibada madega 55. Tauna alona Hephisbah.

² Wariaaga BADA eteni ravai i virubai ai kaua vinuamedamedai aubaina maranai mai Israel i riurui au Canaan. Manasseh wei ravai ai kaua i votañotagoi da i kaukauei ma ana goa apoapoe i rata BADA au matana,

³ Manasseh ola muuomoi au tepai god morumorui awari voepaepa gabui amana i viairikarikai, i voa-melei. Ma nanare pulo aniapuna i voanaiei Baal awarina, ma Asherah tuatuana i tonanaiei me Israel ana gulau Ahab. Manasseh wate nanare ubona i viviborumei.

⁴ *Tauna god morumorui ai pulo aniapuna i voanaiei BADA ana tempol au orana, wei gabuna aubaina BADA i riwa i pa, "Wavau au tempol ina mae."

⁵ Tempol au metaetana, gabu garigarina au orana Pulo aniapui ruaga i voai ubona god aubaii.

⁶ Manasseh natuna orotona ai au araratana i apui ana pulo,* ma parauma ma baravu ma gweri da ginauri ravai i rautaniñe. Kaua magamañau apoapoe kaukauai i kaei ma BADA amlonia i ñaigai kaua.

* 18:4: Num 21:9 * 21:4: 2Sa 7:13 * 21:6: I apui mai Canaan ai god Molek awarina.

¹⁰ Ma lamna aubaina BADA ana peroveta awariei i babani i pa,

¹¹ “Gulau Manasseh kaua mağamağai vinuamedamedai i kaukauei, ma tauna i apoapoe kaua ega me mai Amori, taui wei dobuna i maeni muriai da mai Israel. Ai kokoitau miramirai awariei mai Judah i raveni da i go'apoapoe.

¹² Lamna aubaina BADA Israel ana God wenanare e ririwa, ‘Kovoğa gaeğaeotana ana neiae Judah ma Jerusalem awarii da maranai rava anatapui riwana tanigaiei ina nonori ma orai ina auepai.

¹³ Ruvana tagoginei Samaria a kovoği ma ruvana tagoginei Jerusalem ma Israel ai gulau Ahab ana epaepaia maiteni a kovoği. Jerusalem ravai ana amaga-tawanei, me aboma ita amamağı, ma i vitaragabubui.

¹⁴⁻¹⁵ Au rava i go'apoapoe awariu, maranai noinoi Egypt i opu-tawanei da marina. Wei e viviamloğaiğainiu. Ma rava mamae-terenai ana inana-tawanei, ma ana veredamanei ġavia awarii ma taui ina vovaiubai ma ai purapura ina kwalei.”

¹⁶ Manasseh mai Judah i raveni da god morumorui i viborumei ma BADA i vijibogi; wate ega lamna ava ma rava aiai i viraġena labalababai da tara i kororo da Jerusalem etanaina i vioai au giana da au giana:

¹⁸ Manasseh i raġe ma ana numa au ririvana dobu wavana Uzza ana au wapu i doboi, Ma natuna Amon ana gabu i vaia da i vigulau.

Amon i vigulau au Judah

¹⁹ Amon ana madeğa 22 ma i vigulau. Ma i vibada madeğaruaġa au Jerusalem. Tauna alona Meshulemeth, oroto Jotbahei wavana Harus natuna

²⁰ Tauna ana go'apoapoe, i rata kaua BADA awarina me amana nanare.

²¹ Amana i govaivaiti ma god morumorui i viborumei.

²² Tauna noinoi ai God, BADA i rawaġaiğiae i ma ana tarawatu ega ita votaġotaġo.

²³ Ana gabemani babadai Gulau Amon i viogej da ana au gulau numana i viraġeni.

²⁴ Wate mai Judah, rava gulau Amon viraġenana i viogatarei anatapui i viviraġena-naiei ma natuna Josiah i terei da i vigulau.

22

Josiah i vigulau au Judah

¹ Josiah ana madeğa 8 maranai i vigulau au Judah ma i vibada au Jerusalem madeğa 31. Tauna alona Jedidah, oroto Boskathei Adaiyah natuna.

² Tauna BADA au matana aiwai ana tapuna i kauana-kauei ma noina David au ivina i tua ma BADA ana tarawatu ana tapuna i votaġotaġo-kauei.

Josiah nelara ġelau i terei da BADA ana tempol i voavoa-virai lamna marancaina Moses ana tarawatu au buka i girugirumi i nelagħi da i neiae Josiah awarina.

¹¹ Maranai gulau i nonori aiwai Tarawatu au bukana i girumi, ma ana gara i viaisikasikai.

¹² Ma gulau Josiah ana taunola pirisi Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa,

¹³ “Noiñoito wei bukana riwana ega ita votaġotaġo, ma aiwai i ririwei ega ita votaġotaġo, lamna aubaina BADA amlona i ġaġai awarita. Lamna aubaina ona nae au tempol ma BADA awarina ona raupari tau ma wei dobuna ravai aubaii ma Judah ravai ġelau i aubai. Ma ona paridadadon wei au bukana aiwai i girumi.”

Josiah ana taunola babadai i nae BADA ana peroveta tagogi awarina. Wei perovetana lamna wavyne ma riwa i paritawanee i nae me gulau awarina.

¹⁶⁻¹⁷ BADA wenanare i riwa, “Tau wei dobuna ma dobuna taumaenina ana kovaġa kauei.” I girugirumia nanare, ma lamna gulau awarimi i avu, BADA wenanare i riwa, “Tau i geduaieu ma god ġelau i viviborumei ma lamna i viamloğaiğainiu. Jerusalem awarina orau amapo da e ararai ma amapo ega ina dauva.”

¹⁸ Wate ona naeme Judah gulauna, i paritawanemi awarina da ona riwei, “BADA Israel ana God e ririwa da

¹⁹ Maranai u nonori menanare Jerusalem ma taumaenina ana kovoġanei. Tam u rupena ma u vilamolamona tau BADA awariu, am gara u viaisikasikai ma u tou, Tau ana kuae da ina apoapoe kaua, rava ma dobu ana kovoġi da ega aiai wei doana ina maeni.

²⁰ Ma kovoġana a neneiai au Jerusalem eġa ina nei da am iraġe au murina. Ana voterem da ana nuaubam ma iraġe.”

Ma wei pariverena i naiei ma gulau i riwei. Josiah god morumorui viborumai i viġaei.

23

Josiah i parivainuaġana da ina votelatela

¹ Gulau Josiah babada anatapui au Judah ma Jerusalem i ġoreiāi.

² Ma pirisi ma peroveta ma rava molamolakana da manemanena, anatapui i ġae BADA ana au tempol. Kampa gulau parivainuaġana bagibagina bukana tempol au orana i nenelāġaia i iava-tapui awarii.

³ Gulau ana au gabu i mairi tempol tuatuana au naona ma BADA maiteni parivainuaġana bagibagina i ravivouni da tauna BADA ana tarawatu ma ana riwa bagibagina orana ma aruana taputapunei ina vojjini, i ririwei nanare au bukana. Ma rava anatapui nanare i parivainuaġana.

⁴ *Ma gulau, pirisi ġetelarana Hilkiah, ana pirisi babadai ma tempol taupainii i egari da BADA ana tempol au orana aiwaiei Baal ma god wavinena Asherah ma ubona godna morumorui i viviborumei anatapui ita opuneiāi. Gulau wei purapurai anatapui i naiei da gaugauba Kidron au ririvana i apu-naiei, ma lapukarei i vivanei au Bethel.

Aninama Josiah mai Judah ma mai Israel ai dobu i naeni ma meparava kokoitau i raraudunelei ola muomuoi au tepai anatapui i pupuni ma pirisi kokoitau taurauduneleina anatapui i viragħen.

Ma gulagulau aiavoi Josiah i votaġotagħoi taui BADA eġa ita vivirei ma ai ġo a i apoapoei BADA awarina.

2 Chronicles Vinolanola Viruaina

Pariverena

Wei bukai Chronicles 1 ma 2 virarautuana tagogina Samuel 1 & 2 ma gulagulau ai au buka 1 & 2 e mamae. Chronicles 1, gulau David e virarautuei ma ana oga tempol au Jerusalem aubaina. David nola ogana pirisi i verei. Tauna i ġoēi da rava anatapui BADA ina vivorumana-kaei. Chronicles Viruaina mai Israel ai gulagulau ai nola i babaniei, menanare Solomon ana taunola BADA ana tempol i voai au Jerusalem. Solomon iraġe ma au murina menanare ana dobu i kai da ruāga. Chronicles 2, gulagulau ruāga ai kaua e bababaniei. Gulau ġelaui aiaii taui BADA i vivorumei wate gulau maġamagaui i apoapoe kaua. Taui eġa BADA ana tarawatu ita votagotagoi. Taui god morumorui i votagotagoi. Wei gulaui nuabola ai rava i verei. Ma BADA ai ġavia i vianinei da i nei ma dobui ruāgai i viġavie i pupuni. Ma muriae BADA Judah mamae terenai i neiana-meleiai.

36

Judah e vovoapoapoe

¹⁴ Ma pirisi ai babada ma rava anataputapui, BADA ana parivainuaġana bagibagina eġa ita vojijini ma jentail au ririvai maemaei ai kaua apoapoei kaukauai ma ai bua i ġoavaitei. Ma lamnei BADA ana Tempol vivivireina au Jerusalem i vimiramirai.

¹⁵ Mai Judah ġoġogħai ai God BADA, ana rava ma ana tempol nuanuana i bolai ma lamna aubaina ana peroveta nununai i paripari-tawanei da rava ai ġoġi apoapoei ita rupeni.

¹⁶ Wate taui God ana peroveta i vijibogħi ma eġa ita vivirei ma au damona BADA ana amloġaiġai i rata guratana da menanare ita viubanei.

Mai Babilon Jerusalem i vipupui

¹⁷ Anina ma BADA mai Babilon ai gulau i paritawanei da Jerusalem i vipupui. Ai sorodia nelara voui tempol au orana i viraġena-naiei. Taui mai Judea eġa ita rau-nuapoapoei ma waivine ma laraga ma rava magumaguri ma doridoriai. BADA mai Judea anatapui i verenei Babilon ai gulau Nebuchadnezzar au urana.

¹⁸ Tauna Tempol ana purapura ġaegħaei da muomuo i mane anatapui i pupuna-naiei. Gulau ana gabemani babadai ai numa i viairikarikai ma mane ma purapura i pupuna-naiei au Babilon.

¹⁹ Ma God ana Tempol i apui ma Jerusalem garina i viairikarikai; ma gulau ana numa ma numa ġelau anatapui ma purapura mae-terenana anatapui i viairikarikai ma i apu-naiei, eġa aiwai ita mae.

²⁰ Ma aiavoi lawalawaii i mamae, anatapui i paniniae au Babilon da i vitaunola. Ma muriae mai Persia nai dobuna Babilon i pupuni ma i vibadei.

²¹ Mai Israel ai doa ipipipie i taui madeġa au vi-7-na ai doana eġa lauvitau ita verei, lamna aubaina i kovoġi, da i pupuna-naiei au Babylon da madeġa 70 i kwa. BADA ana peroveta Jeremiah i ririweia nanare i tupua.

²² Au Persia gulau Sairas ana vibada madeġana tagogi, ma BADA ana peroveta Jeremiah aiwai i ririweia marina i tupua, Persia ai gulau orana i ravi-dagudagui da i giruma ma i vibabarai ana au vigulau au anatapuna.

²³ Mai Persia ai gulau Sairas, wei i riwei,

“BADA, Aidamo ana God, dobu anatapuna vibadana au urau i terei. Ma i vineu da ana Tempol au Jerusalem, Judah au paratana ana voa-melei. Ma taumi aiavoi BADA ana rava, o ġoēgi da ona nae me kampa, lamna anina da ona nae. Ma BADA ami God ina gagaloemi.”

Ezra

Pariverena

Wei bukana Ezra e ririweta da menanare mai Judea au Babilon i mae ma ġelaui i naeme ai au dobu au Jerusalem da BADA ana Tempol ina voa-melei.

3

Pulo aniapuna i voa-melei

¹ Mai Israel ai au dobu i mae nawaravi ^vi7ⁿa ma marina taui anatapui i netagogiai au Jerusalem.

² Nai maranai Josadak natuna Jeshua ana rava pirisi ġelaui maiteni, ma Shealtiel natuna Zerubabel ana dam ravai maiteni; pulo aniapuna i voai Israel ana God awarina. Me God ana peroveta Moses, ana Tarawatu i ririweia nanare.

³ Avena da taui nai dobuna taumaeni i vororvoe; wate pulo aniapuna ana au gabu wadubona i voai. Ma i vikarei da ubaurbanai ma aubigai patapatana pulo i apuapui BADA awarina.

Tempol i voa-melei

⁷ Gulau Sairas i riwa da wenanare ita kuae. Taui mane ġaima taubori ma kamda ravai ita verei. Malam, wain ma oil mai Sidon ma mai Tyre ita verei da ai cedar au Lebanon bogei ita towana-neiai au Joppa.

⁸ Ma Madega viruaina nawaravina au viruaina Zerubabel ma Jeshua ma varevarei (pirisi ma mai Levi ma rava ġelaui maiteni i vivipanipani i nememei au Jerusalem) ma BADA ana Tempol voana i vikarei. Ma Levi ana damei nelara ai madega 20 da nore i ġeġae i terei da nola i vibadei.

Rava i nola da God ana Tempol i voa-melei madega 21 au orana.

6

Tempol i viaiaini

¹⁶ Anina ma Mai Israel piripirisi ma dam Levi ravai ma rava anatapui panipaniei i nememei ana nuaiaii God ana Tempol i vovivirei God voepaepana aubaina.

Nehemiah

Pariverena

Nehemiah Wei au bukana e ririweta, menanare mai Judea ġelaui au Babilon i mamae, i naeme ai au dobu Jerusalem da garina ina voai-melei.

8

Ezra tarawatu bukana-rava awari i 'avi

¹ Rava anatapui Jerusalem ana au anirui e ġoreġorei Samaim,* i vitagogiei. Ma taui tarawatu badana Ezra i riwei da Moses ana tarawatu bukana ita neiai, wei tarawatuna BADA mai Israel i verevereria.

² Ma aupom naona au nawaravi au vi-7-na, pulo tauapuna pirisi Ezra tarawatu bukana i neiai patarana i vitagogieina awari, nelarai ma waivinei ma roaroa awari metaui da iava i aramanei.

³ Ma Ezra au deba i mairi ma ponana ġaġaenei bukana i 'avi rava awarii, maratomtomai i vikarei da aubenai ma anatapui i rautaniġana kaua.

⁵ Ezra vatara au tepana i mairi rava au matai ma maranai buka i votawanei, rava anatapui i vomaimairi.

⁶ Anina ma Ezra BADA God ġaġaena i voepaepai; ma rava urai i voepai ma i paribeli i pa, "Amen, Amen!" Ma i raudune au doa ma BADA i voepaepai.

⁸ Ma Levi ana dam ravai, bukana rava awari i 'avi ma i viararamanī† da taui riwana anona i aramanei.

⁹ Anina ma Gavena Nehemiah, ma pirisi, taugiruma Ezra ma dam Levi ravai, rava awari i viararamana. Marina rava awarii i riwa i pa, "Wei marana tana vovavivirei BADA ata God awarina. Lamna aubaina ega ona vinuabola ma ona tou."

¹⁰ Ma Nehemiah i riwa, "Ona nae ami au numa ma ona am kaua ma ona uma-kaua ma rava ega ita lauvoa, ona taraiġuei. Wei marana lamna mara vivivireina BADA awarina. Lamna aubaina BADA ina vinuainimi, ega ona vinuabola, aubaina BADA ana nuaiai awarimi lamna ami rewapan!"

* **8:1:** Wei metaetana lamna Jerusalem garina ana anirui tagogi e ġoreġorei Samaim wate ata ponei *Waira*. Wei aniruina lamna *waira dogona au ġereġerena au maramatanei*. † **8:8:** Bible pona Hebrewei i girumi ma wei ravai pona arama i aramanei lamna aubaina viararamana maiteni i kaukauei.

Job

Pariverena

Rava jijimanina tagogi vinuabola apoapoei mağamağau i nenelağai lamna au bukana e vivirautuei. Job ana nota ma ana rava ai nota wei nuabolai awari lamna e viviatataeta. Ana rava e notanotai da Job kaua apoapoei i kaei aubaina God, tauna e kovokovogi. Job i aramanei da wei ega riwa kaua. Tauna, God i vivitumağanei, wate i goegeoi da ita aramanei aiwai aubaina wei nuabolana e tuputupua. God, Job ana vinuapoapoe anona ega ita viegei, wate God ana rewapanma ma ana nuaulaula i rata guratana au baina rava ega tagotagogina da ina aramanei aiwai e viviatataeta. Maranai i aramanei da God ana rewapanma ma ana nuaulaula i rata guratana, tauna God vitaraviravirana i voterei ma i voepaepai. Wei virarauktana au damona God Job i vilawani ma natunatuna i vimagai ma i vimaura-melei. God Job ana rava tonuga i ena-guratei aubaina taui ega ita aramana-kauei aiwai i latolatoni ma Job i vinuapoapoe.

Job ana virarautua

¹ Oroto wavana Job au Uz i mae. Tauna rava jijimana kaukauana ma go'apoapoei i geduaiei. Tauna God i vivirei ma goa aiaii ava i kaukuae.

² Tauna natunatuna nelarai 7 ma waivinei tonuga,

³ ma ana sипу 7,000; kamel 3,000; uata bullna 1,000 ma donkey waivinei 500 ma ana taunola mağamağau. Ma i vipurapura ma i maura kaua ega aiai ġelauna nanare nai au dobuna, au maramatanei.

⁴ Ai mara i tereterei nanare Job natunatuna nelarai nununai ai au numa i toretorela, ma varevarei ma novunovui i raugoreiia ma anatapui i amam ma i umauma gogona.

⁵ Aupom biaġa nanare torela au murina, Job ubaubañai boibog i na vovomairi ma natunatuna nununai ina raugoreiia ma epaiai ġamogamo taputapuna ina apupui BADA awarina da natunatuna ina viaiaini. Tauna i notanota da, "Mepa da roaroa i kauana-boai ma au orai God i parivaiapoapoeni."

Satan Job ana tumaġana i raudadani

⁶ Marina mara i ġetai da anela au mara i ġeta BADA awarina ma tauviwatu - Satan taui i votagoi da i ġeta.

⁷ BADA Satan i paridadanei, "Tam meieie e nenei?"

Satan i paribelei i pa, "Tau were ma nare a nenaie ma a nenei, dobu a tetetei."

⁸ Ma BADA i paridadana, "Au taunola Job u inanai bo ega? Tauna rava aiai kaukauana, ega aiai ġelauna au dobu nanare. Tauna rava jijimanina ma patupatutuna. E vivivirei ma e paipaina-melei da ega kaua apoapoe ita kaukuae."

⁹ Satan i paribelei, "Tam Job e paipaina-kauei lamna aubaina e voepaepaim!

¹⁰ Marana patapatatai tauna ana numa ravai ma ana purapura e gagagaloei, ma anatapuna uranei e vovodadani e viaiaini, ma bulumakau u verei da wapuna i oai.

¹¹ Wate uram ma viloloi ma anatapuna ġarinei ma vaitawanei, ma au matam ina parivai apoapoeni."

¹² BADA i riwa i pa, "Anina, ana purapura anatapuna au uram a tereterei, wate ega tupuana aiwaina ma vodadani." Ma Satan BADA i netawanei.

¹³ Mara tagogi, Job natunatuna nelarai ma waivinei i toretorela, tuai ana au numa,

¹⁴ ma taupariverena i ġeta Job awarina ma i riwei i pa, "Am taunola burumakauei doa i uuatai ma au ġereġerei donkey modu i amam,

¹⁵ ma mai Sabea i ruba-ġairai ma ġamogamo anatapui i kwalei, am taunola anatapui i viraġena-naie, ma tau ainelau a ruba da ata pariverem."

¹⁶ I bababani ma taupariverena ġelauna i ġetai ma i riwa, "Namanamara marei i ġairai da sипу ma taupainii i viraġena-pai, ma tau ainelau a ruba da ata pariverem!"

¹⁷ Ravana i bababani ma taupariverena ġelauna i ruba ġetai ma i riwa, "Mai Caldia boru tonuga ana melaġina i ġairai ma am kamel i viġaġana-naie, ma taupainii i viraġena-pai, tau ainelau a ruba da ata pariverem!"

¹⁸ Amapo i bababani ma wate taupariverena ġelauna i ruba ġetai ma i riwa, "Natunatum nelarai ma waivinei, natuevou ana au numa i toretorela,

¹⁹ ma maratagogi kojkojira mutuluei i opui ma numa i vipeuni au tepai ma anatapui i viaijiji, tau ainelau a ruba da ata pariverem!"

²⁰ Anina ma Job i vomairi ma ana kwama i sikai. Kolana i ġari ma i peu ġaira au doa ma BADA i voepaepai.

²¹ Ma i riwa,

“Ana kovakovau a nei;

ana kovakovau ana nae.

BADA i verena ma i vai-melei;

BADA wavana ana voepaepai ma ana viborumei.”

²² Wei anatapuna au orana, Job eġa ġo'apoapoe aiwaina ita kaei bo God ita viwavui.

2

Satan Job i raudadana-melei

¹ Mara ġelauna, anela au mara i ġeta me, BADA awarina ma tauviwavuna - Satan taui i votaġoi.

² Ma BADA Satan i paridadanei, “Tam meiee e nenei?”

Satan i paribeli i pa, “Tau were ma nare a nena e ma a nenei, dobu a tetetei.”

³ Ma BADA i paridadana, “Au taunola Job u inanai bo eġa? Tauna rava aiai kaukauana eġa aiai ġelauna au dobu nanare. Tauna rava jijimanina ma patupatutuna. Ma e vivivireu ma ġo'apoapoe e gedugedaiei. Ana lawana anina jijimanina e maemaen avena da orau u taini da a kovoġa labalababai.”

⁴ Tauviwawu BADA i paribeli, “Tauna ana lawana ava e vinuabolei, me rava ana purapura anatapuna ina verenei da eġa ina kero.

⁵ Wate uram ma viloloi ma tupuana ma ġelamina ma ravi, ma au matam ina parivai-apoapoenim!”

⁶ BADA i riwei, “Anina, tauna au uram a tereterei wate eġa ma viraġeni.”

⁷ Ma Satan BADA i netawanei ma i nae da Job kero apoapoei i verei, au loulouna da i ġaira au ae lapalapana.

⁸ Ma Job nau gebona i vaia da kerona i kakakaroi ma au lapukare i kiakiala.

⁹ Awana Job i riwei i pa, “Amapo da am lawana jijimanina ma vovojjini bo? God ma parivai-apoapoeni ma ma iraġe!”

¹⁰ Wate Job i paribeli i pa, “Tam opaopam! Eġa nanare ma babani. Tauta God kaua maġamaġau i aiai e verevereta, ma apoapoei e paripari-tawanei, maiteni tana vaia.”

Wei kauai maġamaġau apoapoe Job awarina i tupua, wate tauna ana babani awarinei eġa ġo'apoapoe ita kaei.

Job ana rava i nei da i raugenari

¹¹ Maranai ana rava tonuġa riwana i vaia da Job wenanare ma menanare i vinu'apoapenei, taui i vitagogiei ma i nae Job ita raugenari ma ita vinuaubai. Taui wavai Eliphas tauna Temanei, Bildad tauna Shuahei ma Zophar tauna Naamah ei.

¹² Taui tapunei Job i 'nanai ma i vinuanainei da lamna Job. Maranai i 'nana-kauei. Taui i vitouana, ma ai kwama i viaisikasikai ma pokau au tepai i tawatawanei.

¹³ Ma aupom ma waguvvarai 7 taui au doa i vikiakialei, Job i mae-vereverei. Ma i 'nanai da ana nuabola i rata guratana ma gamoi i pota ma i kiala genuatau.

3

Job ana tupua marana i parivaiapoapeni

¹ Wiki tagogi au murina Job gamona i laġi ma ana tupua marana i parivaiapoapeni.

² I pa,

³ Au tupua marana ma boai,

ma waguvvaraina i vinolanolada tevera orotona i tupua.

⁴ Nai marana ina waguvarei!

Ma God au aidamo wei marana ina nota-tawanei,

ma au tepana eġa ina rarana.

⁵ Waguvvara ma gimtona potopotona wei marana ina vibadei;

ma lada marana ina purui

ma gimtona lalalaina ina purui.

⁶ Gimtona nai waguvvaraina ina viamoai

wei marana eġa ma iava-melei;

madeġana bo nawaravina.

- ⁷ Nai waguvaraina ega aiai ina tupua,
ma ega nuaiai gararana ina nonori.
- ⁸ Vijiboga amamai,
mepa da ai vijiboga boga bariawana ina vidagui;
taui wei marana ina vijibogi.
- ⁹ Maratotom ubonana ina guvai
ma mara karena ina paina-avei
ma madega vuduna ega ina inanai.
- ¹⁰ Aubaina taui manawa metaetana ega ita guduui
ma vita magamaagaui i vereu.
- ¹¹ Airake, boiboogi ita gomuiu!
Bo ata i raage maranai a tuputupua.
- ¹² Aiwai aubaina au arona i vimatavenu
ma gugunei i viiguguui?
- ¹³ Maranaina a tupua, matau ita pota;
ma ata matave ma ata vilauvitau.

4

Eliphas i babani

- ¹ Ma Eliphas rava Temanei Job i paribelei i pa,
- ² Job ega amlom ina gaigai ma ana babani,
tau ata genuana ava, ana babani!
- ³ Rava magamaagaui u viararamani
ma gokokokarai u vovaivirewapani.
- ⁴ Riwan, rava peupeui u dugui,
ma ae tutui viviarai u dugui.
- ⁵ Wate marina nuabola i nei awarim, ma am nota i peu
i vodadanim ma u rovo-kaua.
- ⁶ Am vitumaaga God awarina,
ma am lawana jijimanina.
Lamna, am rewapana, tapa?
- ⁷ Ma tumairi ma ma vinua notanota!
Rava jijimani e irairaage bo?
Mara aiwai rava jijimani i kero ma i raage?
- ⁸ A inanai rava goa apoapoe i paewi
ma nuabola i tuarui.
- Job ana rava amapo da i ririwa-gerigiri da tauna kaua apoapoe i kaei aubaina wei nuabolana
e nenelagai. Wate Job e ririwa da tauna ega aiwai apoapoena ita kaei.*

38

BADA Job i paribelei

- ¹ Ma BADA labu au orana ma Job i paribelei, i pa,
- ² Tam aiai e bababani labalababa,
ma au nuaulaula e paripari-virevirei?
- ³ Ma mairi jijimana me oroto,
ana vitaravirevirem
ma ma paribeieu!
- ⁴ Tam mepa maranai dobu tuatuana i tonei?
Ma riweu, mepa da u aramanei?
- ⁵ Aiai dobu ana manawa ma ana dabora i terei?
U aramanei tapa? Ma aiai i ruvai?
- ⁶ Aiwai dobu tuatuana e vovoijimi?
Ma aiai dobu tuatuana i tonei,
maranai maratotom ubonai i wela tagogi,
ma BADA ana anela ana morelanai i voepaepa ma i vigaragaraei?
- ⁸ Aiai boga ana au parata i terei

maranai boga manawana ana goba i wanaiwağı?"

40

- ¹ Ma BADA Job i riwei i pa,
- ² "Tam, God Vivirewapana Kaukauana e viviwavui;
Aiai God e viviwavui, ina paribelei."
- ³ Anina ma Job BADA i paribelei,
- ⁴ "Tau rava labalababa, menanare ana paribelananem?
Gamou ina pota.
- ⁵ Boibogi a babani guratana.
Ega aiawai ġelauna ana latoni."

42

- Job i babani me*
- ¹ Ma Job i babani me, i pa
 - ² "Tau a aramanei da tam aiwai anatapuna e kaukauei;
Ega aiai am oga ina viġaei.
 - ³ *U paridadaneu, 'Tam aiai e bababani labalababa,
ma au nuaulaula e pari-virevirei?'
Riwa kaua am boruma vivinualaulaunana ega ata aramanei,
da a vogħana guratana."
 - ⁴ *"U riweu, 'Ma rautaniġana, ma ana babani,
Ana paridadanem ma tam ma paribelei.'
 - ⁵ Taniġau ava riwam i nonori
Wate marina matau i 'nanaim.
 - ⁶ A vinimala, ma au lapukare ma au debidebi ana kiala.
A ruperupena ma a mae-tavireu awarim ma au ġo-apoapoe ma nota-tawanei."
- Damona*
- ⁷ BADA i babani vorovei Job awarina ma marina Eliphas rava Temanei awarina ina pa,
"Amlou i ġaġġiġ awarim am rava ruāġa maiteni, taumi ega riwa kaua ota babaniei me Job nanare.
 - ⁸ Lamna Aubaina, bull 7 ma sipu ororotoi 7 ona vaia ma ona nae au taunola Job awarina
ma siai taputapuna ona apui awariu. Tauna Aubaimi ina raupari ma ana pari ana nonori da
ega ana vinimalaimi ami kaua apoapoei Aubaina. Taumi ega riwa kaua ota babaniei me au
taunola Job nanare."
 - ⁹ Anina ma Eliphas, Bildad ma Zophar BADA aiwai i ririweia nanare i kauei, ma BADA
Job ana pari i nonori.
 - ¹⁰ *Ma maranai Job i raupari-vorovei, BADA ana maura i veremelei ma raviai-tepetepani.
 - ¹¹ Varevareina ma novunovuna ma ana rava waduwaduboi i nei ana au numa ma
maiteni i am ma i uma gogona. Ma Job i vinuabai Aubaina BADA vita ġaegħena Job i verei. Ma
taui anatapui kampa i ġeġeta mane ma loji goldei Job i verei.
 - ¹² BADA, Job i viaiaina-kauei ega me au naonei. Awarina sipu 14,000; kamel 6,000; uata
bullna 2,000 ma donki waivine 1,000.
 - ¹³ Ma nanare, natunatuna nelarai seven ma waivinei tonuāġa.
 - ¹⁴ Natuna wavinena magurina wavana Jemimah*, ma keikeina wavana Keziah† ma
vitonuina Keren-Hapuk. ‡
 - ¹⁵ Job natunatuna guguinii inanai i ai dewadewa ega me guguini ġelaui nai au dobuna. Ma
Job natunatuna nelarai ma waivinei ai buderi i terei da anatapui ruvana tagogina ina vaia.
 - ¹⁶ Job i mae madeġa 140 ġelauna; da ġoġogħana ma nonoina da i nae kimta au
v*i-4* nainanai.
 - ¹⁷ Anina ma i magura kaua ma i'rāġe.

* 42:3: Job 38:2 * 42:4: Job 38:3 * 42:10: Job 1:1-3 * 42:14: Heb. wei wavana anona **Gabubu** † 42:14:
Heb. wei wavana anona **Cassia**. bo **kaidara talana**. ‡ 42:14: Heb. wei wavana anona **mata penitana**.

Psalm Wela ma Pari

Pariverena

Mara manamanaina i netawanana rava mağamağau taputapunei ava wela ma pari i girumi wei au bukana. Mai Israel wei welai ma pari i tami ma i teretagogiei da lamnei God i viviborumel.

Wei au bukana wela ma pari tapuna ma tapuna. Ĝelaui God e viviborumei ma e vovoepaepai ma ana iviaiai aubaina e viviegualaei. Ĝelaui e vivibağ a agu ma gagalo aubaina, bo notatawanana aubaina. Wela au ĝelaui, rava e raraupari ai gilau aubaina ma god e vivibagai da ai ġavia ita kovög. Ma wela au ĝelaui tauamgiruma ana apoapoe ma ana nuabola aubaii God awarina i beubeura.

Ma maraġela Iesu riwa wei au parii i vaia da i viaramana. Kerisiana wei welai ma parii i welelelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiaii ririwa-kauana

¹ Rava viaiainana, lamna ega go'apoapoe ravai ita votaġotagoi,
ma ponai ega ita rarautaniġanei;
ma vivijibogai ega awarii ita kiakiala.

² Wate BADA ana tarawatu i vinuaiae,
aupom ma marai e notanota-vaitetei.

³ *Tauna me ai, waira au adana gogogona,
ana au mara e rarauno;
ma rugurugui ega ita poipoi.

Wei ravanana, aiwai anatapuna e kaukauana-kauei.

⁴ Wate go'apoapoe ravai ega nanare!
Taui me rugurugu, ive i kapupuana-naiei;

⁵ Lamna aubaina go'apoapoe taukaei BADA ana au etera ita mairi ava,
ma nanare goa apoapoei ta kuae rava jijimani ai au dam ita mae ava.

⁶ BADA goa aiaii ravai e rarauetaraveni ma e paipaini;
wate go'apoapoe ai etanai au damona, pupui.

23

*Bada taupainiu **

David ana wela

¹ BADA taupainiu
ma ega aiwai ana voladägei.

² Gidagida majimajiġai au tepana i vimatavenui,
ma i raveniu waира au raraunairina au adana.

³ Au rewapani e raviravivouni
ma wavana aiaina aubaina etanai jijimaminei i raveniu.

⁴ Avena da gwagwa waguwaguvareina ana naeni,
wate ega aiwai apoapoeni ana rovoe.

Aubaina tam au ririvau da am kwapuei ma jiġonei e gagagaloeu ma e vivinuaubai.

⁵ Aubaiu torela e vokaukuae au ġavia au naoi.
Oilei kolau u volaġolagoi da tam u vinuavaineu,

ma au kelaka i oa-karagelai.

⁶ Ee! Riwa kaua da am iviaiai ma am raunuapoapoe maemae nonoana awariu ina mae, da
au mara au damona.

Ma BADA ana au numa ana mae-nonoa.

* 1:3: Jer 17:8 * 23:: Taupainiu me sипу taupainina.

27*Voepaepa parina*

David ana wela

¹ BADA au lalalaina ma au tauvilawana,
aiwai ana rovoei!

BADA au taugagagalo
aiwai ana rovoei!

² Maranai ġo'apoapoei ravaii i ġetai
da ita vunuui,

au ġavia
aei ina pakana-melei da ina peu.

³ Avena da sorodia borui ina mae-gariġuruviu,
tau eġa ana rovo dadana.

Maranai au ġavia i vomairi,
tau anina da God ana vivitumaġanei.

⁴ Kaua tagogi ava aubaina a vivibaga.

Au ġoana ġaġaena da,
BADA ana au numa, boruborumana ana mae,
ma ana voepaepai. Au lawana au anatapuna.

⁵ Nuabola au marana
ina tereġagariu.

Ana gabu au vivivireina, ina teregovaġiu.
Ma ola au tepana ina tereu
da ġavia eġa ina vodadaniu.

⁶ Ma au ġavia i garigari kwaipipiniu, ana tuvaidoedoei.

Da au tempol ana morelanau pulo ana apui BADA awarina.

Ana vinuaiai ma welei ma arei ma ana voepaepai.

⁷ BADA ma rautaniġaneu maranai awarim a kwatukwatu,
ma raunu'apoapoleu ma ma paribelev.

⁸ Au orau u riwa, u pa, "Ma nei da ma rauduneleu."
Tau a paribelem a pa, "BADA a nenei."

⁹ Eġa ma raugovaġeu,
eġa awariu ma ġaiawa.

Am taunola eġa ma inana geduaiei,
au anatapuna tam, au tauagu.

Eġa ma netawaneu,
au God, tam au tauvilawana.

¹⁰ Avena da amau ma alou ita teretawaneu,
wate BADA ina paina-kaeu.

¹¹ BADA, ma viararamaniu da am ġoana ana kaei.
Ma etanai au ġadaġadarana ma taravainiu aubaina au ġavia i maġa

¹² Tauer moruei ma parivairovorovoei e vunuvinuui.

Lamna aubaina, eġa ma teretawaneu awarii

¹³ A 'ramanei da BADA ana viaiaina ana inanai,
weka lawalawai ai au dobu.

¹⁴ BADA ma vitumaġanei,
da ma virewapana ma tepam ina tora.
Anina BADA ma vitumaġanei!

34*BADA ma viborumei*

¹ BADA ana vimaegħaġaeni marana patapatai,
ma ana viborumana-nonoei.

² Orau taputapunei BADA ana voepaepai;
Vilamolamona i riwau ina nonori ma ina vinuaiai.

³ Ona nei ata BADA tana vimaegħaġaeni
wavana tana voepae-gogonei.

⁴ A raupari BADA awarina ma i paribelev,
awariu rovo anatapui i vaitawanei.

⁵ Aiaħovi awarina e inainana,

- taui naoi ina ravidalai
ma ega melanai ina vitepa-ubaubai.
- ⁶ Au nota i kwa da a gorei, ma i nonori
ma nuabola au orau i vaitawanei.
- ⁷ Aiai da BADA e vivivirana-kauei,
ana anela taui e inana-vaitetei, ma e vivilawani.
- ⁸ Taumi ona raudadani ma ona aramanei da BADA i aii.
Taui BADA au gouna maemae nuaiai gaegeena awari.
- ⁹ Taumi vivitumaiganami ega aiwai ona voladagei.
Lamna aubaina, BADA ona vivirei.
- ¹⁰ Lion gauboi mara gela am e irairaige,
wate aiavo da BADA awarina e vitumaganaga ega ina voladaga.
- ¹¹ Natunatu, ona nei, ona rautaniganaga,
ma ana viararamanimi da BADA ona vivirei.
- ¹² Taumi o goei da ami lawana ina aii
ma ina manawa bo?
- ¹³ Nanare, lamna menami ona paina-melei da ega babani apoapoe bo moru ona babaniei.
- ¹⁴ Goa apoapoe ona geduaiei ma kaua aiaii ona kauakei,
ma ona voguratei da nuauba lawanana ona maeni.
- ¹⁵ BADA, matana goa aiaii ravai awari e tereterei,
ma taniganaga e tonetonei mepa da agu e toutouei.
- ¹⁶ Wate tauna go'apoapoei ravai e mamae-puputei
taui ina irage ma rava nuanuai ina vuru.
- ¹⁷ Rava jijimanii agu aubaina e vivigore BADA awarina
tauna e raurutaniaganaga ma ai vita e vaivaitawanei.
- ¹⁸ Tauna rava peupeui, rovorovoi, ma vinuabolai e vivilawani,
tauna rava orana i peu kaua e vovoepai.
- ¹⁹ Rava jijimanii ai nuabola i maga
wate BADA taui e vovoagui ai au nuabola.
- ²⁰ E inainana-vaitetei da ega gelamina tagogi ina wanagai.
- ²¹ Goa apoapoe ravai ai apoapoe ina vunumelei,
ma aiavo da goa aiaii ravai e gedugeduaiei, ina kovoagi.
- ²² BADA ana taunola e gagagaloei,
aiai da e nenei BADA au gouna, kovoaga ina vorei.

51

David ana rupena

- Mara tagogi, Gulau David ana taunola Uriah awana Bathsheba i tavimatanei da maiteni i matave.
- ¹ Oo God, ma raunu'apoapoeleu. Tam nuavaina maemae-nonoana amai.
Tam raraunuapoapoei amai
au go'apoapoe ma notatawanei.
- ² Au rauagaiagai ma ogai
ma au go'apoapoe ma oga-tawanei.
- ³ Au rauagaiagai a aramanei
marana patapatai a notanotai.
- ⁴ Kaua apoapoei a kauei.
Tam ainelam awarim Goa apoapoei a kauei,
ma am viwavu lamna riwa kaua.
Amapo anina da ma kovogiu.
- ⁵ Tau rauagaiagai, melamelaei da marina
Au manawa da marina tau go'apoapoe taukaueina.
- ⁶ Wate tam u goei da riwa kaua auradewadewau ina mae.
E viviararamanu da nuaulaula orau ina oai.
- ⁷ Au go'apoapoei ma oga-tawanei,
ma ogaiu da ana arapoira da gonu rovena arapoirana ana getawanei.
- ⁸ Ma riweu da au go'apoapoe u nota-tawanei
da ana vinuajaii ma ana morelana

avena *da gelamiu u viaigaigai, marina ana vinuaiai.
⁹ Au go'apoapoe ma inana-tawanei
 ma au apoapoe mirai ma boai.
¹⁰ Oo God nuanua ma ravivouni
 da ana vipatutu kaua awarim.
¹¹ Ega au naom ma tawana-opuneu
 ma awariu ega Aruam Vivivireina ma vaitawanei.
¹² Vilawana nuaaina ma ravivouni me au naona nanare
 araua ma viaiaini da ana voteletelem.
¹³ Lamnei, go'apoapoei taukauei am kaua ana viaramani,
 da ina mae-tavrei awarim.
¹⁴ Oo God, vi'rāgena vitana awariu ma vaitawanei,
 da am kaua jijimanii ana welei.
¹⁵ Oo Bada ipiriu ma votawanei da gamou ina vimaēgǣgaenim.
¹⁶ Au pulo, āamōamo atapuui awarim,
 wate tam pulo apuapunana ega uta vinuaiae.
¹⁷ Bada, pulo e āoēgoe lamna vilamolamona.
 BADA, ega au vilamolamona ma au rupena ma geduaie!

¹⁸ Am nuavaina Jerusalem ma viaiaini,
 ma ana gari ma voa-melei.
¹⁹ Anina ma ai pulo nota aiainei ina vikarena-melei da ina kaukauei ma ma vinuaiae.
 Taui pulo tapuna ma tapuna ina apui awarim.
 Bull māgamāgai am au aniamapu ina apuapui.

67

Viegualau welana

¹ Oo God ma raunu'apoapoelelai ma ma viaiaini, ma naom weka ma tereiai da ma voaguai!
² Da au dobu am kaua ina aramanei, da rava anatapui au dobu ina aramanei da tam ai tauvilawana.
³ Rava ina voepaepaim Oo God, rava anatapui ina vimaēgǣgaenim.

⁴ Rava anatapui au dobu ina vinuaiai ma ana morelanai ina wela, aubaina tam rava anatapui au dobu, kaua jijimaninei e vivibadei ma e paipaini.
⁵ Rava ina voepaepaim Oo God.
 Rava anatapui ina voepaepaim.

⁶ Anina ma doa maura āgǣgaena ina vereta
 ma God ina viaiaina-kaueta
⁷ Riwa kaua, God ina viaiainita
 ma rava anatapui au dobu tauna ina vivirei.

90

God ana taunola Moses ana pari

¹ Bada ai animae
 kimta wariāga da marina.
² Tam God maemae nonoana
 muriai da ola
 ma dobu uta kaei.
³ Tam rava e ririwei da e vipokau, ma e ririwei,
 “Rava ona wanaviraimi”
⁴ Tam awarim madēga 1,000 lamna me aupom tagogi, i tupo kaua
 me raviravi, ega ita manawa dadana.
⁵ Rava ai lawana e vaivaitawanana lāgilaginei me rauboni damona.
 Taui me modu, ubaubañai e raraupairei,
⁶ da e rarata ma e latatalai,
 wate aubigai e givigivi.

* 51:8: Au vinuabola lamna me gelamiu wanagaina

- ⁷ Nanare am meji tauai e lagulaguriai ma
maranai e ġaiġaiawa tauai a rovorovo kaua.
- ⁸ Ai ġo'apoapoe anatapui au naom u lavaei,
ai ġo'apoapoe govagovaġana, wate anatapuna e inainanai.
- ⁹ Am meji ai lawana i vitupoi,
ma ai madęga laġilägħina e kwakwa, a lavutu-tawanana.
- ¹⁰ Madęga 70 i vereta da tana mae,
mepa da tana virewpana lamna 80;
Wate wei lamna nuabola ava ina vereta,
eġa tana mae-pora ma tana nae.
- ¹¹ Eġa aiai am ġaiawa malana ita vai-kauei.
Mepa da am ġaiawa ata aramana-kauei, lamna tauai ata vivirana-kauem.
- ¹² Ma nanare, ma viararamaniai da ai lawana i tupo kaua,
ma lamna Aubaina awarim nuaulaula ana vaia.
- ¹³ Oo BADA! Ma nememei awariai.
Ma mae-tavirem, ma vinuaboləlai, tauai am taunola.
- ¹⁴ Ubaubanai marana patapatatai am nuavaina maemaena ma verelai,
da ana morelanai ana logoi ma ai au Mara anatapuna ana vinuajai.
- ¹⁵ Madęga biäga u kovogħaj, nuaiai ma verelai
da madegħana biäga a vinuapoapoe ina kovoġi.
- ¹⁶ Tauai am taunola, am nola vivirewpanana ma viatataielai.
Ma natnatuiai am boruma ma viatataiei.
- ¹⁷ Ma Bada ata God ana vianina ina viatataieta
ma ina kauei da aiwai anatapuna ta kaukuei anona ina tupua.
Nanare ai nola ma viuai.

91

God ata rawena

- ¹ Aiai ravana e nena Aidamo Telarana awarina agu aubaina,
lamna Vivirewpanana Kaukauāna au ririvana ina mae.
- ² BADA au God awarina ana riwa ana pa, "Tam au anigagalo ma au tauviġavia.
Tam au God, a vivitumāġanem."
- ³ Aubaina tauna, ġavia ana waro govagovaġai
ma numa raraububu awarinei ina gagaloemi.
- ⁴ Tauna papenenei ina tereġovaġimi ma papena au gabaurina ina gagaloemi;
ana viapatutu, am rawena ma am anigagalo.
- ⁵ Waguvvara kauai vi'ni-rovorovo eġa ona rovoei,
bo ġavia madęgħai e viviġavia,
- ⁶ bo numa raraububu waguvvara e viviġavia,
bo doria madęgħai e viviġena.
- ⁷ Avena da rava tausin au ririvam i peu,
bo ten tausin au oiem i peu;
wate tam ita vodadana-avem.
- ⁸ Matamiei ona inana ma ona inanai
go'apoapoe ravai ai kovoġa.
- ⁹ Aubaina BADA o vaia ami rawena; Getelarana ami taugagalo.
- ¹⁰ Eġa aiwai apoapoenia awarimi ina tupua bo au numa ina ġeta.
- ¹¹ God ana anela ina terei da ina painimi
ma ina gagaloemi ami au babara.
- ¹² Taui uraiei ina voepaim
da aem eġa ġaima au tepana ma rauei.
- ¹³ Taumi lion ma mota ona vovaiubai,
lion ġaġġaċċaw iż-żebha.
- ¹⁴ God i riwa i pa, "Aiai nuanuau e vaivainonoei, ana vilawani;
ma ana gagaloei, aubaina i aramana-kauei.
- ¹⁵ Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- ¹⁶ Ai lawana ana vimanaini,
ma au vilawana mamae-nonoona ana viatataiei."

95*BADA tana welei*

- ¹ Ona nei! Tana wela BADA awarina.
 Ana nuaiaita tana wela God ata tauvilawana vivirewapana awarina.
- ² Tana nei au naona ma tana viegualaei
 ma welei tana voepaepai.
- ³ Aubaina BADA lamna God virewapana kaukauna,
 ma god anatapui e inainana-ǵairei.
- ⁴ Dobu anatapuna au urana,
 guba ǵaeǵaei doa ua orana da ola ǵaeǵaei au tepai.
- ⁵ Boga tauna ǵarinei, tauna i kauei
 ma nanare tauna uranei dobu alalana i tere-kauei.
- ⁶ Ona nei ma tana raudune ma tana vimaeḡaeǵaeni,
 ae tututa tana tapeǵaroei taukaueta BADA awarina.
- ⁷ Aubaina tauna ata God.
 Tauta natunatuna. Ana sipu ma e ǵamoǵamoita ana au wapu.

Mepa da ponana o nonori amadodo,

⁸*E riwei i pa “Eǵa orami ona gudui me amamami au Meribah;
 me au mutulua au Massah.

⁹ Kampa amamami i 'nanai, kauababai a kauei
 wate ǵega ita vitumáǵaneu, ma i raudadaniu.

¹⁰ Madeǵa 40 wei kimtana awari amlou i ǵaiǵai ma a riwa,
 ‘Wei ravai orai i bagibagi ǵaga!
 Ega ita rarautaniǵaneu.’

¹¹ Ana mejiu a parivainuáǵani,
 ‘Gabu a vokaukauei ami lauvitau aubaina wate kampa eǵa melanai ona rui.’

100*Voepaepa welana*

- ¹ Rava anatapumi au dobu ona logoimi BADA awarina!
- ² Ana nuaialmi BADA ona voepaepai,
 ona nei au naona ma ona welei.
- ³ Ona aramanei da BADA anina God.
 Tauna i kaueta.
 Ma tauta tauna ǵarinei. Tauta tauna natunatuna. God ana sipu ma e gagaloeta me sipu taupainina.
- ⁴ Ana welami ana au gari ona rui ma voepaepami
 ana au aniviboru ona rui,
 ma ona vimaeḡaeǵaeni.
- ⁵ Aubaina BADA i aii;
 natunatuna e vivinuavaina-nonoei,
 ana vipatutu e mamae-nonoa, kimta au anatapui.

103*BADA ana nuavaina*

David i girumi

¹ Orau taputapunei BADA ana voepaepai.

Wavana vivivireina ana voepaepai.

² Orau taputapunei BADA ana voepaepai,
 kaua aiaii i kauei aubaiu eǵa nuuanau ina vuru.

³ Au ǵoapoapoe anatapui e notanota-tawanei,
 ma doria awarinei e vivilawaniu.

⁴ Ata iraǵe ma i sinaepaiu
 ma nuavainei ma raunuapoapoelei e vivigulaueu.

⁵ Au lawana au anatapuna

purapura aiaii avai i verevereu, au vilaraga marana i raviravivouni me *manubada.

⁶ BADA ana kaua anatapuna jijimanina.

* 95:8: Exo 17:1-7; Num 20:2-13 * 103:5: Manubada tawarana waduboi e peupeu ma vouii e gogogo. Me manubada tawarana voui e gogogo nanare tam au lawana e raviravivouni.

- ⁷ *Ana oga Moses i viatataiei,
ma mai Israel BADA ana kaua vivirewapanai i 'nanai.*
- ⁸ *BADA raraunuapoapoena ma ivina aiaina,
Ega lagilagina amlona ita voigaigai. Ana nuavaina maemae-nonoana.*
- ⁹ *Ega mara nonoa ina enita,
ma ana amlogaigai ega ita mamae-nonoa.*
- ¹⁰ *Anina da ita kovaaga-kaueta,
wate i rauuapoapoetelet da kovooga ega gaeagaena ita verevereta.*
- ¹¹ *Dobu weka ma mara nore au tepadewadewana.
Nanare, BADA ana nuavaina i rata guratana taui da BADA e vivivirei awarii.*
- ¹² *Mepa madega e gogolana da mepa e gaigairalana, lamna uama,
ma nanare ata goapoapoe vinimalana e vaivaitawana-naiei aueia.*
- ¹³ *Me ama natunatuna e rarau-nuapoapolei,
nanare BADA natunatuna e rarau-nuapoapolei.*
- ¹⁴ *Aubaina i aramanei da tauta pokaei i kaueta.*
- ¹⁵ *Ata mara au dobu lamma me modu.
Ta gogogo ma ta rarata me berana moduei;*
- ¹⁶ *Anina ma ive i uvena-kapupuei,
ega ita mamae, ana gabu i kwakwava.*
- ¹⁷ *Taui da BADA e voepaepai ana nuavaina maemae-nonoana
awarii ma nanare noinoii ma ai epaepaia awarii*
- ¹⁸ *taui aiavoi da ana parivainuagan bagibagina e vovojijini
ma ana patupatutui tarawatu e vovojijini.*
- ¹⁹ *BADA ana vigulau anikialana au mara i terei,
ma kampa ana vigulau e vivibadei.*
- ²⁰ *BADA ana anela, vivirewapanami,
BADA riwana o rarautaniganei ma o kaukauei,
BADA ona voepaepai.*
- ²¹ *Anina BADA ana anela marei,
BADA ona voepaepai taumi ana taunola ma ana goana anatapuna o kaukauei.*
- ²² *Taumi anatapumi BADA uranei i kaei, ana au vigulau maemaei, BADA ona voepaepai.
Tau nanare orau taputapunei BADA ana voepaepai.*

110

Gulauna vinevinena

David ana wela

¹**BADA au bada wenanare i riwei,
"Au oieu ma kiala*

*da am gavia
au ae karem ana terei da ma tuvaidoedoei."*

²*BADA, am gabemani vivirewapanana Zion * ana parata ina viratai,
da am gavia ma vibadei.*

³*Am laraga ana nuaii ina verena-melei da ina visorodia,
ma ona gae BADA ana ola au tepana viigavia aubaina,
ma ami rewapano ina ravivouni ubaubanai patapataname ubaubanai turuvanina.*

⁴*BADA i parivainuaganim ma ega nuanuana ina virai;
"Tam pirisi maemae nonoana me Melkisedek."*

⁵*BADA au oiem e maimairi da e paipainim;
tauna gulagulau ina piagi maranai amlona ina gaigai.*

⁶*Dobu nununai ai goa apoapoe ina kovoigi,
ma taubeu dobuna ina viuai
ma dobu gulagulau anatapui kolai ina viaigwadagwadai.*

⁷*Wate au etanai au vuvura ina uma
ma rewapano ina verei ma ina vovaiuba.*

119

BADA ana tarawatu boruborumana

⁹*Rava vouna menanare lawana aiaina ina maeni?
Tauna riwamei ina paina-melei.*

* 110:1: Mrk 12:36; Act 2:34-35 * 110:2: Jerusalem wavana gelauna.

- ¹⁰ Lamna aubaina a baibaiem orau taputapunei;
eğa ma votereu da riwam ana geduaiei.
- ¹¹ Riwan a iaiai ma au nuanuau a tereterei,
da eğa ġo'apoapoei awarim ana kaei.
- ¹² BADA, a voepaepaim!
Am tarawatu ma viararamaniu.
- ¹³ Ipiruei ana bababani ma
am tarawatu anatapui u vereverei ana jimei.
- ¹⁴ Am tarawatu votelatelana a vinuaiaina-kauei,
eğa me vipurapura bo vimane.
- ¹⁵ Riwan ana iavi
ma ana vinuanotenotei.
- ¹⁶ Am tarawatu a vinuaiaina-kauei,
eğa riwan ana voteretawanei.

139

Bada anatapuna i aramanei.

David ana wela

- ¹ BADA orau u inanai ma au kaua anatapui u aramanei.
- ² U aramanei mara aiwai a kiala ma a vomairi.
Avena au uama wate au nota e araramanei.
- ³ E ininanai maranai a babara bo au numa a vivilauvitau.
Anatapuna a kaukauei e araramanei.
- ⁴ Muriai da ata babani tam e araramanei aiwai ana latoni.
- ⁵ Tam e garigari-kwaipipiniu,
ma uram virewapananei e paipainiu.
- ⁶ Lamna riwa kauana, awariu i aii kaua
ma i ġe-dewadewa da kolau i kwauna-kauei.
- ⁷ Mepa ana nae da Aruam ana raugovaġei?
Mepa ana ruba da ana raugovaġem?
- ⁸ Ata ġae au mara da tam kampa;
mepa da i 'rairagei ai au dobu ata rauviraiu, tam kampa.
- ⁹ Mepa da ana lave nae au maramatanei,
bo mepa madeġa e neneulai,
- ¹⁰ avena kampa ma uram ina raveniu,
ma am rewapani ina painiu.
- ¹¹ Mepa da ana riwa, "Gimtona ina tereġovaġiu
ma lalalaina ina gimtona."
- ¹² Wate avena da gimtonana amapo eġa ana raugovaġem.
Tam awarim gimtona ina rarana me marai, aubaina tam awarim gimtona ma lalalaina
lamna tagogina.
- ¹³ Tam tupuau anatapuna u voai da alou au manawana u teretagogieu.
- ¹⁴ A viviequaluem aubaina tam am nuavainei ma am borumei u voa-kauei! Am rauġaroġaro
i aii,
A voepaepaim aubaina a aramana-kauei.
- ¹⁵ Tam u vivineneġaneu maranai a tutupupua au govagovaġana, alou au manawana,
tam ainelam anatapuna u aramanei.
- ¹⁶ Tam u inanai muriai da a tupua.
Aupom biaġa u vereu da ana mae
lamna au buka u girumi,
muriai da aupom naona i ġotai.
- ¹⁷ God! I pripiri guratana da am nota ana aramanei.
Am nota kolau i kwauni, eġa aiwai ġelaunei am kaua ana aramanei.
- ¹⁸ I maġa guratana eġa me bubu, iavana ana kauana-avei,
avena da ata iava-pai, tau amapo da tam ana vivinuaninem.
- ¹⁹ Oo God! A ġoie da ġo'apoapoei ravai uta virāġeni.
Tauviraġena uta viaġaġei da eġa ina nei awariu.
- ²⁰ Aubaina e vivijibogim,
ma wavam eġa ita vivivirei.
- ²¹ BADA, rava e gedugeduaiem, tau ravai a gedugeduaiem.
Tau i eġa ita voteletelem lamna aubaina taui au ġavia.

22 Taui a geduaiana-kauei,
anina taui au ġavia.

23 Ma tuvirevireu, ma orau ma inana-pai.

Ma raudadaniu da nuanuau ma aramanei.

24 Mepa da ġoa apoapoe au orau, ma viatataieu,
ma ma raveniu etanai e nenea au lawana maemae-nonoana awarina.

Proverbs Nuaulaula Riwai

Pariverena

Wei au bukana awanaina maḡamāḡau, ma God ana rava e viviararamani da ina mae-kaua. Gulau Solomon maḡamāḡau i girumi ma rava ġelau i ruāga ota i girumi. Orotō e ġoreġorei Agur ġelau i girumi ma gulau Lemuel ġelau i girumi.

Viararamana ġaġaġena tagogi wei au girumana lamna nuaulaula anatapui pulo Godei. Rava nuanuaulaulana au naona God ina vivrei.

Mara au anatapuna ata au animae wei nuaulaulauna e vovoaguita, au melagai, au gabemani ma au nola.

Ma maiteni wei girumana e viviararamanita da lawana aiaina tata maenī, ma kaua aiāiai tata kaukauei. Ma avena tata gogulagulau ma tata nola guratana ma ivita ita ai molamolakai awari.

Vinuaterena etana

⁷ BADA vivirana, lamna aramana karena,
Wate opaopai, nuaulaula ma aramana e gedugeduaiei.

⁸ Natu, amam ma alom ai vinuaterena anatapui ma voteletelei.

⁹ Ai vinuaterena lamna me kunuteia au kolam,
bo gadogado au uam
da inanam ina ai.

5

Wavine matana maḡamāḡauna ma vorei

⁸ Wavine matana maḡamāḡauna ma ruba-tawanei!
Eġa ma nae dadana ana au metaeta!

⁹ Mepa da nanare lamna rava eġa ina vivivrem.
Tam am vilaraga ma am lawana aiaina ma vitupoi.

²¹ BADA rava ai kaua anatapui e inainanai,
Metauna etanaina e vaivai, tauna kampa da e inana-vaitetem.

²² Taniġapota ravana ana ġo'apoapoelei ina waro-melei.
Ana ġo'apoapoe tauna ina tupajjini.

²³ Tauna opaopana ma eġa ita paina-melei,
Ana kaua opaopai aubaii i'rāġe.

6

Amam ma alom ai vinuaterenana

²⁰ Natu, amam ma alom ai vinuaterena anatapui ma voteletelei.

²¹ Ma vojjina-kauei au nuanuam; marana patapatai au uam ma gadoi.
²² Maranai e bababara, ai vinuaterena am etanai ina rauġadaġadari.

Maranai e matamatave, ai vinuaterena ina matave-painim.
Maranai u vomairi, ai vinuaterena awarim ina babani.

²³ Aubaina wei tarawatui lamna rampa.
Wei viararamana lamna ravilala, etanaina e lalalai.
Nuaterena bagibagina lamna lawana aiaina etanaina.

²⁴ Taui ina aguim da wavine matai maḡamāḡau ma vorei,
ma wavine tavitavinena ana gwalameru.

²⁵ Eġa wavinena inana aiaina ma erawai.
Eġa! Ma voterei da matanei oram ina taini da ina waroim.

8

BADA nuaulaula i terei

Nuaulaula e ririwa,

²² “Au karena, BADA tau i tereu.

Muriai da aiwai ġelauai i kaei.
 23 Tau kampa au kare oina,
 muriai da dobu.
 24 Tau a tupua muriai da BADA gabinou i kaei,
 muriai da waira vuvura i kwakwa-ġetai.
 25 Tau a tupua muriai da ola,
 muriai da ola muomuoai au gabu i terei, tau kampa.
 26 Muriai da dobu bo wapu
 bo doa pokauna.
 27 Tau kampa maranai mara ana au gabu i terei,
 maranai parata i taini da mara au tepana ma boga au gabaura.
 28 Maranai apau i terei au mara
 ma vuvura doa au orana i votawanei.
 29 Tau kampa, ma boga ana parata i terei
 ma i egari da nai paratana ega ina raġoni.
 Tau kampa, maranai dobu oġona i tonana-naiei.
 30 Nai marana tau BADA au ririvana a mamae me tauvioga,
 marana patapatai a vinuaianini ma tau a vinuaiai.
 31 A vinuaiai kaua maranai dobu i kaukaueia a inanai,
 a vinuaiai kaua maranai rava a inanai.”

9*Nuaulaula ma opa*

¹ Nuaulaula ana numa i voai
 tuatua ġaegħae 7 i tai ana numa aubaina.
² Torela ġaegħaena i apui,
 sia i api ma wain aliai i waġi ma keparek i vokaukauei,
³ ma ana taunola ġelauai i paritawanei,
 au deba da i viġoreġore,
⁴ i riwa i pa, “Taumi ega notanota kauami ona nei!”
 Ma opaopai i riwei,
⁵ “Ona nei au lam ona ani
 ma wine a viravirai ona umai.
⁶ Ami lawana opaopai ona voterei
 ma ona lawana,
 ma aramana lawanana ona maeni.”

13

¹ Tevera nuaulaulana Amana ana vinuaterena e nonori,
 wate tevera maeġaġaena vinuaterena e gedugeduaiei.
⁴ Mata-galagalawana purapura e raurauoġarei ega ina vaia,
 wate egoegolana ana ġoana aiwai anatapui ina vaia.
²⁴ Aiai natuna ora-potapotana ega ita kwapukwapui, lamna natuna nuanuana ega ita vaivaia.
 Wate aiai da natuna nuanuana e vaivaia lamna ina viararamani.

17

²¹ Ama tevera opaopana i vinatunei lamna nuabola ava e vivitupui,
 laragħana amana awarina ega nuaiai.

20

⁴ Rava mata galagalawana e paepaewa labalababa, ega iri ita votaġoġi;
 tuaruta ana mara e baibaia ma ega aiwai.

22

⁶ Natunatumi lawana aiaina ona viararamani, da maranai i vorata,

nai lawanana ega ina voterei.

23

- ¹³ Natum e viviorapota ega ma inana-tawanei,
boreborelei u kwapui Amapo ega ma viraġeni.
¹⁴ U raukwapui
lamna iraġe awarinei u gagaloei.

24

- ³⁰ Rava mata-galagalawana ana wapu adanei a nae,
ravana opaopana ana grape wapuna au ririvana.
³¹ A inanai da modu i gogo-nae,
ma donadona wapuna i vioai.
Ma ana gari, i wanarikarikai.
³² Lamna a inanai ma a vinua-notanotei.
A tuvireirei ma wei i viaramaniu.
³³ Matam ma potai, ma rauviraim.
Wapu nolana avena, uram au nuanuam ma terei ma ma matave.
³⁴ Ma gomara ina ravim me taudanene;
anatapuna ina pupuni.

26

- ¹³ Rava mata-galagalawana e ririwa, “Gamoġamo ġaiġaiawana au doa! Ĝamoġamo ġaiġaiawana
au etanai!”
¹⁵ Mata-galagalawana lam au urana e vaivaia
wate ega ina voepai au gamona.

29

- ³ Aiai ravana nuaulaula i ġoana-guratei, nuaiai ġaeġaena amana e vereverei.
Wate aiai da etanai waivinei maiteni e nenei lamna ana mane ma ana purapura
anatapuna e vikalokaloei.
¹⁵ Kwapu ma nuaterena riwai, natum nuaulaula e vereverei.
Wate tevera ega viaramanana, alona e vivitepaubaubai.
¹⁷ Natunatumi ona vinuaterenei, da mara nonoa awarim nuauba;
ma oram ina vinuiaini.

31

Wavine aiaii kaukauana

- ¹⁰ Mepa nanare wavine aiaina ma egoegolana uta nelāġai?
Wavinena i vinualaulauna kaua ega me ġaima lebalebarina maiana ġaeġaena.
¹¹ Orotu awana i vitumāġanei,
ma ega aiwai ina voladagei.
¹² Wavine, kaua aiaii ma ega kaua apoapoe ita neneiaw awana awarina
ana lawana au anatapuna.
¹³ Wavine sипу aparana ma waiape i vaia
ma i vinuiai da ina rauġaroġaro.
¹⁹ Wavine sипу aparana ma waiape ina metani
ma gara ina ġaūġauri.
²⁰ Ana numa ma orana i votawanei
molamolakai ma vovoladagħi awarii.
³⁰ Erawa lamna kaua morumoruna

ma inanana aiaina ina amo;
wate wavine BADA e vivivirei, rava tauna ina voepaepai.
³¹ Wavinena ina voepaepai aubaina i kauana-kauei.
Rava anatapui, wei wavinena ona voepaepai.

Ecclesiastes Tauviararamana

Pariverena

Aiai da wei bukana i giruma lamna ega wava nata aramanei. Wate rava gelaui e ririwa da gulau Solomon i girumi. Ma aiai i girumi lamna anina da rava araramanina. E ririwa da wava nata lamna *tauviararamana*. Aubaina purapura vopiripirii e bababaniei. Rava ma'gama'gau God ega ita aramanei aubaina da i goei da ina baiei da aiwai e tuputupua. Wate anona ega ita nenelegai. Tauviararamana wei ravai ai nota e ririweta. Mara gelauna rava aiwai i kaukauei lamna ega anoi Ma e ririweta da wei kauai lamna me ive tata via'gagai. Rava i nenelegai da lawana wei au dobuna lamna anona ega aiwai.

Tauviararamana ana giu

- ¹ Wei lamna tauviararamana, David natuna, mai Israel ai gulau ana viararamana;
- ² Tauviararamana i riwa, "Anona ega!
Anatapuna kwakwavinal"
- ³ Ma nolanola da ma magura ma anona aiwai?
- ⁴ Kimta e nenei ma e neneae,
wate dobu maemaena e mamae.
- ⁵ Madega e gogogo ma e areare,
- ⁶ ma e wanawanavirai da ina vikarena-melei.
- ⁷ Kariwabu e goga'gota,
rauanaga e opuropu,
e kwavikwaviviro
ma e wanawanavirai da ina vikarena-melei.
- ⁸ Waira anatapui au boga e opuropu,
wate boga ega ita oaoai.
- Waira matanei,
e gaigairai ma e neneae me au matana.
- ⁹ Kaua anatapuni i vi'nigarigari,
menanare tana riwa nei?
- Matata ega melanai ina inana iaua;
Tani'gata ega melanai ina nonora iaua.
- ¹⁰ Aiwai wariaga i tupua ina tupua me,
aiwai wariaga i kaei ina kauana-melei.
Ega aiwai, kaua vouna wei au dobuna!
- ¹¹ E ririwa, "Ona inanai! Wei kaua vouna."
Wate egal Wei kaua maemaena;
wariagana, muriai da ta tupua.
- Kaua wariaga i tuputupua, ega aiai ita notanotai.
Ma kaua marina da muriai e tuputupua, ega aiai ina notai.

Nuaulaula anona ega

- ¹² Tau lamna tauviararamana ma Israel ai gulau au Jerusalem.
- ¹³ Orau a terei da aiwai anatapuna au dobu e tuputupua, nuaulaulei ana girumi. Ma a aramanei da God vita gaegaena rava i verei.
- ¹⁴ Aiwai e tuputupua au dobu a vinua-notenotei ma a inanai da;
anatapui anona ega, kwakwavina. Ive ava ta vivi'gagai.
- ¹⁵ Aiwai barabarai amapo ega ma vojjimana-melei,
aiwai awarim ega, lamna menanare ma iavanei.
- ¹⁶ Au orau a riwa, "Tau a nuaulaula guratana,
ega me aiai gelauna au Jerusalem i vivigulau nanare.
A' ramanei nuaulaula aiwai ma aramana aiwai.
- ¹⁷ A goei da ata aramana-kauei nuaulaula aiwai ma bua ma opa aiwai.
Wate a aramanei da wei lamna me ive a vivi'gagai.
- ¹⁸ Aubaina au nuaulaula e rarata, mae-boaboa e rarata
au aramana e rarata, au nuabola e rarata."

¹ A vinotanota a pa, “Abeka nuaiai ana baiei, ana raudadani, da i aii bo ega.” Wate a nelagai da wei lamna kwakwavina.

² Lamna aubaina a riwa da kaka labalababa ma erawa lamna bua. Ma erawanai aiwai aiaina e vereverem?

³ Nuaulaula a goana-guratei, ma a goei da wine ata umai da orau ita telatela ma kaua opaopai ata kaei, da ata aramanei metauna i aii rava au dobu awari, maranai mara tupona ava au dobu e mamae.

⁴ Kaua gaegaei a vikarei, au numa gaegaei a voa-naiei ma grape wapui a paewi.

⁵ Wapu da peipei a kaei ma ai uauai tapuna ma tapuna a paewi.

⁶ Dogo a garai da garewa ma wapaketa i vojjini, lamnei wei wapui a vivituvanei.

⁷ Awariu taunola au numa tuputupuai, ma taunola magamagaui nelarai ma waivinei a gimarai. Au bulumakau ma sипу i maѓa guratana ega me aiai gelauna au naona au Jerusalem nanare.

⁸ Awariu gold ma silver gaegaena ma nanare dobugela gulaui ai via. Tauwela nelarai ma waivinei a vimaiei ma guguini inanai aiai a vivanei au numa, au ani vieraerawa. Aiwai a goegoei ana tapuna awariu.

⁹ Tau a maura ma a vipurapura kaua ega me aiai gelauna au Jerusalem nanare. Ma wei anatapuna au orana au nuaulaula i mae-kaua.

¹⁰ Aiwai a inanai ma a rauogarei a vaia,
anatapuna a notai da ita vinuaianiu.

Au nola anatapui a kauana-kauei,
ma nuaiaina lamna au nola maiana.

¹¹ Anina ma aiwai anatapuna a voavoai ma a polepolei, a vinua-notenotei
ma a aramanei da wei anatapui lamna anona ega,
lamna me ive ata viviagagei wei au dobuna
amapo ega aiwai tana vaia.

Nuaulaula i aii ega me bua

¹² Nuaulaula, bua ma opa anoi a vinua-notenotei.
Gulau ana raviepaia, aiwai gelauna ina kaei?

¹³ Ma aramanei da nuaulaula i aii kaua ega me opa,
ma lalalaina i aii kaua ega me gimtona.

¹⁴ Rava nuaulaulana matana au kolana e mamae
wate opaopana waguwaguvareina e bababara.

Ma aramanei da ravai ruagai ai damona tagogi.

¹⁵ A vinua-notanota a pa, “Tau ma opaopana ai damona tagogina.

Au nuaulaula aiwai gelauna ina vereu?”

Au nota a pa, “Wei maiteni anona ega.”

¹⁶ Rava nuanuaulaulai lamna me rava opaopai
amapo nai ravaii nuanuata ina vuru.

Kapore! Rava nuaulaulauna ma rava opaopana e irairaѓe.

¹⁷ Tau lawana a geduaiei, au dobu aiwai anatapuna ta kaukuei iniviara ava e verevereta.
Anatapuna kwakwavina, me ive taviviagagei.

Bagibagi gaegaei ega anona

¹⁸ Anatapuna au dobu a polepolei a geduaiei, aubaina nai ana voterei, da rava au muriu e nenei aubaii.

¹⁹ Ma aiai i aramanei da tauna rava nuaulaulauna bo rava opaopana? Wate tauna aiwai a polepolei ma au aramanei a vitupui ina vaia. Wei anona ega.

²⁰ Au bagibagi anatapuna wei au dobuna a notai ma orau i peu.

²¹ Aubaina rava ana nuaulaulai ma ana aramanei i nola kaua, da i maura ma anatapunana ina voterei da rava gelauna, ega taunoleina ina vaia.

²² Marana patapatai nola ma nuabola inina e viviarei au dobu ma aiwai ina vitupui?

²³ Tauna ana nola da iniviara ma nuabola; waguvarei maiteni ega ita matamatave. Wei maiteni ega anona.

²⁴ I aii da rava ita am ma ita uma ma ana nola ita vinuaiae, ma a inanai da vinuaiai lamna God uranei.

²⁵ Aubaina God ega. Lamna ega am ma ega nuaiai.

²⁶ Aiai God e vivinuaiai, God tauna nuaulaula, aramana ma nuaiai, e vereverei. Wate goa apoapoe ravana ana nola i verei da mane ma maura gaegaei ina vitupui, Wate God nai maurana ina vaivaitawanei ma aiai e vivinuaiai ina verei. Goa apoapoe taukauei ai nola lamna kwakwavina, me ive i taviviagagei!

3

Aiwai anatapui ai au mara e tuputupua

¹Mara ma iri i terei da aiwai anatapui au dobu ai au mara e tuputupua.

²Vinatuna ana mara ma iraäge ana mara
paewa ana mara ma tuaruta ana mara.

³Virağena ana mara ma vilawana ana mara,
amrika ana mara ma voa ana mara.

⁴Tou ana mara ma kaka ana mara,
mogu ana mara ma ara ana mara.

⁵Gaima viorerena ana mara ma tama melanana ana mara,
taragwaba ana mara ma ega taragwaba ana mara.

⁶Baia ana mara, ma baia voterena ana mara,
ma purapura vojjinana ana mara ma purapura vineboana ana mara.

⁷Sika ana mara ma popo ana mara,
genuana ana mara ma babani ana mara.

⁸Nuavaina ana mara ma goagai ana mara
viigaigaiawa ana mara ma nuaua ana mara.

4

⁹Rava ruaga i aii ega me rava tagogi,
aubaina taui ina viagu vivira ma maura ina nelaagi.

¹⁰Mepa da tagogi ina peu, turana e mamae da ina voepai.
Wate tam ainelam ma u peu lamna i apoapoe kaua,
aubaina kampa ega aiai da ina voaguim.

¹¹Ma nanare mepa da rava ruaga i matave tagogi, taui ega inii ina ubauba.
Rava tagogi menanare ainela ina vibolabola-melei?

¹²Am gavia, ainelam ina viigaviem ma ina vovaiubaim, wate maranai taumi ruaaggi
e vivigaviem amapo ona vobelei.
Ma rava tonuga i virewapana kaua me gurava barawa tonugei metametanana.
Wei guravana vaituinana ma kauana-avei.

5

¹⁰Aiavoi mane nuanuai e vaivai ega melanai nuanuai ina rauei;
aiavoi e goegoei da ina vipurapura;
taui ega melanai ai rauogara anatapuna ina vaia.
A inanai da wei anona ega.

¹¹Maranai am maura e rarata,
lamna maranai patara e gegetai da e amam vereverem.

Wate wei maurana aiwai aiaina e vereverem?
Ega aiwai, anina e viatataim da tam maumauram, wate rava gelauna am maura
ina tawanei aubaim.

¹²Taunola e amam kaua bo ega,
wate e matamatavate kaua.
Mane ravana ega nanare, tauna ana maura e notanota-maratomei.

¹³Au dobu kaua apoapoe kaukauana a inanai;
Mane ma purapura ravana ana maura au anara e tereterei muriai aubaina. Wate wei
lamnei, ana nuabola gaegaena i tuarui.

¹⁴Ana mane ma ana maura i kauana
labalababai ma anatapuna i vine-boai.
Natuna ega ana buderi ita terei.

¹⁵*Menanarena dobuna ta ruinei
nanarena tana nae me, kovakovata ma ana ura kwakwavita.
Amapo ega ata purapura, ta vopolepolei tana vinimavoei.

7

- 15 Au lawana kwakwavina au orana kaua ruağā a inanai;
 Rava aiaina BADA ana nola e kaukauei i'rağe lağilägina
 ma ġo'apoapoe taukaueina God ana tarawatu e viviaigai wate ana lawana i manawa.
- 16 Lamna aubaina eğā ma vígoa aiaina guratana bo ma vinuaulala guratana,
 mepa da ma virägena-melem.
- 17 Wate nanare, eğā ma vitaniğapota guratana
 ma eğā ma opa;
- ega ita ai da ma irağe muriae da am mara.
- 18 I aii mepa da wei riwai bagibagina ma nonori
 Aiai God e vivivirei lamna ina paina-melei
 da wei kauai ruağai eğā ina kuae.
- 19 Rava nualaulaunana tagogi rewapana ġaeğäena ina verei
 ega me gulagulau 10 au taon.
- 20 Riwa kaua! Weka au dobu eğā aiai tagogi kaua aiaii ava taukaueina.
 Ma eğā ġo'apoapoe ita kaukauei.

8

- 16 A ġoei da nuanuau ita ulaula lamna aubaina rava ai mae au dobu a inanai, ma lamnei
 a aramanei da marai ma waguvvarai eğā matave kaua.
- 17 God aiwai i kaukauei eğā ata aramana dadanei. Ma voguratei da ma nelägai, wate amapo
 ega ma aramanei. Nuaulaulai e ririwa da i aramanei, wate egateni dadana.

11

Ami au vilaraga ona vinuaiai

- 9 Laralaraga, ami vilaraga ona vinuaiae.
 Nuanuami ina morelana ami au vilaraga.
 Orami ma matami ana rauoğara ona kuae.
 Wate ona aramanei da aiwai o kaukauei
 God ina etaremi, anatapuna aubaina.
 10 Lamna aubaina nuabola au murimi ona terei ma tupuami ona paina-melei,
 aubaina amapo eğā ona vilaraga nonoa.

12

- 1 Ami au vilaraga, taukauemi eğā nuanuami ina vuru,
 muriae da nuabola ona nelägai;
 maranai magura i tuğereğerei,
 ma ona riwa, "Lawana marina eğā ita ai!"
- 2 Lamna maranai madęga, nawaravi ma ubona ina ġuvai,
 ma apau ina nememei da mara ina ġuva-nonoei.
- 3 Anina ma nimami, taugagaloemi ina sisi
 aemi marina vivrewapanana ina vokokokara.
 Ivomi ina viruağā da ami lam eğā ona uta gwadagwadai,
 matami ina vinawanawa da eğā ona inana kaua.
- 4 Taniğami ina pota da gugura au etanai eğā ona nonori,
 kiu ina logologoi ina ravidagdagumí wate ai wela anatapui ina amo.
- 5 Taukauemi ona vinuanoteneote:
 Maranai aidamo ona gagatei ma babara ona rovoei,
 maranai kora ina tonaimi me rei talana,
 ma tam ma gwağā-nae me kapau e gwağagwağā-nae irağe aubaina.
 Erawa ma morelana anatapui ina kwa. Tauta kokoaga ta tuğereğerei ma tou ina vikarei
 au doa.
- 6 Taukauemi ona vinuanoteneote,
 muriae da lavutu ġuravana ina wanautuini,
 bo nau goldei ina wanawamai
 ma redüğorū ina wanakabakabari.
- 7 Ma tupuami ina naeme au doa
 ma aruami ina naeme God, tauverena awarina.

⁸ Tauviararamana i riwa, "Anona ega! Anona ega!
Anatapuna anona ega."

Damona, God ma vivirei ma riwana ma voteletelei

⁹ Tauviararamana nuanuana i ulula kaua, ma aiwai i aramanei rava i viararamani. Riwa nuaulaulaui ma ġamāġau i 'avi ma i girumei ma i rereġa-kauai.

¹⁰ Tauna riwa vinuaubana i baiei ma aiwai i girumi lamna jijimanina ma ririwa-kauana.

¹¹ Tauviararamana riwai lamna me kwapu ma riwa nuaulaulai i gam me tutu, nuanuam ita tonatonai. Wei anatapuna BADA i vereta.

¹² Anina natu, ma aramanei da kaua ġelaui ma inana-kauei. Buka girumai ega ina kwa ma giruma ġirigiri i vinigarigari.

¹³ Wei anatapui au murina.

Riwa tagogiaja ma aramanei:

God ma vivirei ma ponana ma voteletelei.

Wei lamna aubaina rava i vitupui.

¹⁴ God ata kaua anatapui govagovaġai,
aiaii bo apoapoe, ina kovoġi.

Peroveta Isaiah ana buka

Pariverena

Wei bukana lamna peroveta ġaēgaena au Jerusalem i mae tana riwa 750 BC. nanarena, wavana Isaiah. Bukana iavana tonuġa:

Kapita 1-39 e ririweta da mai Assyria ai gulau ma ai sorodia vivirewapanai dam ġelaui Israel ma Judah au ririvai i vipupuni. Gulagulau Israel ma Judah i vibadei.

Kapita 40-55 lamna mai Babylon ai gulau mai Judah i vipupui ma i pupuna-naiei da au Babylon. Perovetana i vinuaubai ma i riwei da God ina naiana-melei ma lawana vouna ina verei.

Kapita 56-66 lamna mai Judah i nememei au Jerusalem. Ma perovetana God ana ogatara Jerusalem ravai aubaii e bababaniei.

2

BADA ana ola

¹ God ana pariverena, Judah ma Jerusalem aubaii wenanare, Isaiah - Amoz natuna i verei.

² Mara au murina,
ola mepa tempol marina e maimairi, ina mae-nonoa.
Ina ġetelara kaua eġa, me ola ġelaui.
Dam nununai patarai ina taini kampa da ina voepaepa.

³ Dam patarai ina nei ma ina riwa,
“Ona nei, tana ġae BADA ana au ola,
Jacob ana God ana au numa.

Weka ana kaua ina viararamanita
da au iviña tana babara.
Aubaina BADA Riwana au Zion da ina opu,

BADA ana tarawatu Jerusalemei ina opu.

⁴ Tauna dam ġaēgħe ai viġaiġaiawa īna rauetarei,
ma ina kovoġa.

Ai sod ina guda-virai da ipa uata,
ma ai pawasi ina guda-virai da naipi i raġarāġai kosii aubaii.

Dam damai eġa ina viġaiġaiawa vivira me,
bo ina vokaukaua, ġavia Aubaina.

⁵ Ona nei Israel natunatui, BADA ana au ravilala au iviña tana babara.”

5

BADA ana grape wapuna welana

¹ [◊]Ona rautanigħana ma au nuavainana ana wela ana ravi.
Au nuavainana ana grape wapuna i paewi,

doa au maumaurana, ola au barana.

² I auni ma ġaima i viopuni ma i gari
ma grape ġorōgorovai aiai, avavai, i paewi.

Violaġa numana i voai
ma nanare wine anigudana i bori au kira.

Anina ma i vipaipai da grape uena aiai ita verei,
Wate grape anatapui i viġora.

³ Marina taumi Mai Jerusalem ma Mai Judah,
Tau ma au grape wapuna ona babinie!

⁴ Aiwiġ ġelauna eġa ata kauei au wapu?
Anatapuna a kauana-paiei!

A notai da grape uena aiai ita vereu wate viviġorai i vereu.

⁵ Marina ana riwem,

wenanare ana kaei au wapu awarina.
 Garina ana viairikarikai da gamogamo ina rui
 Ma wapuna ina ġara-viravirai.
⁶ Ana voterei da modu ura gogoi ina vinelana
 ma ega alai grape ina taragadagadari
 bo modu ina tuperaguragui.
 Modu ma donadona, wapuna ina puru-pai.
 Apau ana egari da ega kampa garewa ina atuna.

⁷ BADA Vivirewapanana Kaukauana
 ana grape wapuna lamna, Israel
 ma grape ġorōgorovana ae tuġuna e rerereġ;
 lamna ana dam mai Judah,
 I notanotai da lawana aiaina ita maeni
 wate i 'nanai da tara i vitoini;
 kaua jijimanina ita nelaġai
 wate viġaiġaiawa gararai i nonori.

6

BADA Isaiah i ġorei da ina viperoveta.

¹ Madegħana gulau Uziah i raġe, tau Bada a inanai. Tauna ana au anikiala, au aidamo telarana i kiakiala ma ana gara adana tempol i vioai.

² Au ririvana lamna Seraph ruāġa. Tagotagogi ava papei six; papena ruāġei naoi i purui, ruāġei aei i purui ma ruāġei, i lavelave.

³ Ma tauiava i viġoreġore vivira;
 "Vivivirem, vivivirem, vivivirem tam BADA, Vivirewapanana;
 Dobu anatapuna am boruma i oai."

⁴ Ponai gugurana tempol tuatuana i qui ma bau tempol i vioai.

⁵ Ma a riwa, "Aio! A kauana-boai! Babani apoapoei gamou i vimiramirai, ma rava gamoi miramirai au poui a mamae, wate matauei gulau, Bada vivirewapanana kaukauana a inanai."

⁶ Ma seraph tagogi incense aniapuna au tepana ai moniana i kavini ma i lavenei awariu.

⁷ Ma ai monianei gamou i vodadani ma i riwa, "Ma inanai, wei ipirim i vodadani; am apoapoe vinimalana i vaitawanei ma am ġo'apoapoe i notatawanei."

⁸ Anina ma BADA ponana a nonori i riwa i pa, "Aiai ana paritawanei? Aiai aubaita ina nae?"
 Ma a riwa a pa, "Tau weka. Ma paritawaneu!"

7

Immanuel ana mataira.

¹⁰ Muriae, BADA, gulau Ahaz i riwana-melei i pa,

¹¹ "BADA am God ma vibaġai da mataira piripirina, doa au ipu dewadewana, irairāġei ai au animae bo mara au tepa dewadewana, ina viatataiem."

¹² Wate Ahaz i paribelei, "Tau ega Bada ana vibaġai mataira aubaina. Ega ata ġoei da Bada ana raudadani."

¹³ Ma Isaiah i riwa i pa, "Gulau David ana epaepaia, ona rautaniġana kaua! Taumi ami orapotei rava orai o vivibadoi ma marina o ġoie da kauana tagogina ona kaei Bada awarina bo?

¹⁴ Lamna aubaina Bada ainelana mataira ina viatataiem: Matatapu ina duama ma tevera orotona ina ġuni ma ina viwavai Immanuel." Wei anona God tauta maiteni.

9

Awarita tevera i tupua

¹ Taui i vivinu'apoapoe, ai vinuapoapoe ina kwa. Rorova dobu Zebulun ma dobu Naphtali i kwalai* ma i vinimalalamai, wate muriae dobuna ina viboruma-kauei. Galili, jentail ai dobu, au boga Mediteranean ina vikarei da maramatanei ina nae da waira Jordan au baba ġelauna.

* 9:1: I pupuna-naiei au Assyria i vianipani

²Taui waguwaguvareina taubabarai
lalaina ġaēgaena i 'nanai;
Taui gimtona taumaenina[†]
awarii lalalaina i lalai.
³Tam ai dam u vimaġai
ma ai nuaiai u viratai;
am viturana i vinuiaiei;
me tuaruta au marana e vivinuiai,
me sorodia e vivinuiai,
maranai, ġavia purapurai i tuarui, e ġutaġutai.

⁶Aubaina, awarita tevera i tupua!
Tevera orotona i vereta!

Tauna ina vibada.

Tauna ina ġorei:

Tauvinuaterena Aiai telarana, God Vivirewapanana;

Amata Maemae Nonoana; Nuauba Badana.

⁷Ana vigulau ma ana nuauba ina tua,
eġa damona ita mame.
Noina Gulau David ana au vigulau gabuna ina kiala,
ma nuavainei ma jijimaninei ina vibada kaua;
Ina mae-nonoa, marina da mara au damona.

BADA VIVIVIREWAPANA KAUKAUANA
ana nuavainei wei anatapuna ina kaei!

11

David ana epaia

¹Me ai tuğutuġu ita nabinabi
Mara e nenei maranai Jesse ana damei gulau ina nei.
²Ma BADA Aruana tauna au tepana ina ruae da:
Nuaulaula ma aramana ġaēgaena ina verei,
ana oġa tara aiaina ma tepa tora ina verei, da ana rava ina paina-kauei.
BADA ina aramanei ma ina vivirei.
³Bada votelatela, lamaña ana nuai ġaēgaena,
ma eġa kaua tepana inanana bo viarauta awarinei, ina kovoġimi;
⁴Tauna molamolakai ina rauetarana-kauei,
ma vivinuapoapoe au dobu aubaii ina mairi.
Ma gamona bolabolana dobu ina kovoġi,
ma ponanei ġo'apoapoe ravai ina viraġeni.
⁵Tauna kaua jijimanina ina vijiġoratei
ma patutu ina vitairoroei.
⁶Nanare auou moduei sipu natuna maiteni ina mae,
ma leopard gote ġaubaona au ririvana ina matave,
nanare cow ma lion natunatui ina laba-tagogi;
ma tevera ina viġamoġamo.
⁷Bulumakau ma bear ina am tagogi,
natunatui ina matave tagogi,
ma lion gidagida ina ani me bulumakau.
⁸Tevera daradarana mota ana au nibo ina vikalokalo
Ee! Ma tevera edaedana mota aiara ana au nibo, urana ina tereġairei.
⁹Au Zion, au ola vivivireina eġa aiwai ina vikeroi bo ina viapoapoeni.
Aubaina BADA aramanana
dodu ina vioai, me waira boga e vivioai.
¹⁰Nai maranaina gulau vouna, Jesse ana damei,
ina vomairi da ina vimataira dobu au ana tapuna.
Dam ġaēgħei anatapui ina deri ġeta awarina, ana au animae boruborumana.

[†] 9:2: Iraġe paratana

35*Etanai Vivivireina*

- ¹ Mutulua ma dobu poipoina ina vinuiai,
dibu dariğaga ina vinuiai ma ina talai!
- ² Berana ina numoi,
ma ina vinuiai ma ina logologoi!
Inanana i vinualaulauna me Lebanon olai
ma ana maura me Carmel olana ma Sharon wapuna.
- Kampa BADA ana boruma rava ina viatataiemi,
BADA ana vigulau ina inanai.
- ³ Ura vogarigarii ona vovaibagi,
ae tutu gwağagwağana ona vovaibagi;
- ⁴ Rava rovorovoi ona riwei,
“Eğä ona rovol! Ona virewapano!
Ona inana! God ana mejina e nenei;
da ami ġavia ina vipupui.”
- ⁵ Ma mata potapotai ina inana
ma taniġa potapotai ina nonora
- ⁶ Gwağagwağai ina viauauepa me deer, ma gumgum ana morelanai ina vigaragararei.
Waira au dobu dariğaga ina wanaiwagi,
ma vuvura ina raupairerei.
- ⁷ Doa paipairana ina vitopa
vuvura ina raupairerei
au dobu dariğaga,
modu ma gonu ina gogo labalababa auou moduei ana au animae.
- ⁸ Ma kampa etanai ġaegaena e ḡoregorei *Etanai vivivireina*, ina mae.
Etanaina lamna taui God ana babara e nenaeni, taui ava aubaii,
Rava orai miramirai ega ina babarani.
Bubuai weka ega ina babara dadana.*
- ⁹ Ega lion bo raviuru kampa ina babara.
Ega ġamoġamo ġaigaiwai kampa ina mae
BADA rava i vivilawania,
taui ava kampa ina babara.
- ¹⁰ BADA aiavoi i gimara-melei wenanare ina nememei
ana welawelai ina rui au Zion
Nuaiai maemaena ina vikunuteiei,
nuaiai ma morelana ġaegaena ina peu au tepai,
nuabola ma iniviara ina amoa.

40*God ana rava ina vinuabai.*

- ¹ Ami God e ririwa, “Au rava, ona vinuabai!
Nuauba riwai ona riwei.”
- ² Riwa egolanei mai Jerusalem ona riwei
ona riwei da ai vinuapoapoe marana i kwa,
ai ḡo'apoapoe i nota-tawanei.
BADA ai ḡo'apoapoe i vimaiei mara ruaġa.
- ³ *Rava e viġoregħ;
“BADA ana aniniae au mutulua ona vokaukauei!
Etanai jijimanina ata God aubaina au mutulua ona kuae.
- ⁴ Gwagwa ona dobo-naie,
ma ola anatapui ona ġara tawatawanei
doana anatapuna ona vimataveni,
ona ġara-labogħi.
- ⁵ BADA ana boruma ina vieġai,
ma rava anatapui ina inanai.
Lamna BADA gamonei i riwal!”

* 35:8: Bo avena da ai nota i aburu, taui ega ina kwako. * 40:3: Mrk 1:3

⁹ Zion, tam pariverena aiaina e garagararei.

Ma ġae ola ġaegäena au tepana

ma ponam ġaegäenei,

pariverena aiaina ma raugugulei

ma ega ma rovo!

Taon ġaegaei Judah au paratana ma pariverei,

“Ami God e nenei!”

¹⁰ Ona inana BADA God ana rewapanana

e nenei da ina vibadeta.

Ona inanai! Maiana, lamna rava i vivilawania, maiteni e nenei.

¹¹ [◊]Ana rava ina ġamoi me sipu tauġamoina,

ana sipu natunatui au nuwanua ina raparapai.

ma tatauvao ina ravena-kauei.

42

BADA ana taunola.

¹ [◊]BADA i riwa,

“Wei au taunola, a vinei,

a vovaivirewapani ma a vinuaiae.

Aruau au orana a terei

ma tauna lawana aiaina, ma kaua jijimanii ina neiai dobu au anatapuna.

² Tauna ega ina garara

bo ponana ina rata au deba.

³ Rava me gonu barabarana ega ina gai,

bo rava me wiki tupona ega ina boi.

Wate lawana aiaina ma kaua jijimanii ina neiai dobu anatapui awarii da ai lawana.

⁴ Ega orana ina peu bo ina vokokokara,

lawana jijimanina ina terei au dobu;

bonabona ravai aueia nanare, e vivipaipai.”

⁶ [◊]“Tau BADA jijimaniu, a vinem ma ana vovaivirewapanim da lawana aiaina ma neiai; ma ana raunimavoaim ma ana gagaloem.

Tamei, parivainuāgħana bagibagina rava anatapui au dobu maiteni ana kuae, ma vilalaina jentail awari.

⁷ Ma mata-potapotai matai ma vikalai;

ma ravai au panipani numana;

nai taui gimtona maemaei ma tereopunei.”

49

BADA ana taunola

³ BADA i riweu i pa,

“Israel tam au taunola ma tamei au boruma ana vieġai.”

⁵ Au manawa ma BADA i vineu da ana taunola;

da ana rava mai Israel kwakokwakoi ana neiana-meleiae awarina.

BADA i vimaegħaġen;

Tauna au rewapani.

⁶ [◊]I riweu “Au Taunola,

Jacob ana dam ma voepana-melei ma

mai Israel kwakokwakoi ma neiana-meleiae; lamna nola aburuna.

Wate nola ġaegħena a vereverem;

lalalaina ma naiei jentail awarii

ma lawana mamae-nonoana ma naiei da dobu au già dewadewana ina ġeta.”

¹⁴ Wate mai Jerusalem i riwa,

“BADA i netawaneta! Tauta nuwanua i vuru”

¹⁵ Ma Bada i paribelei,

“Moina! Tatauvao natuna melamelana au ġuġuna, nuwanua ina vuru bo;

bo natuna i ġuniġunia nuanuana ina vuru
 Mepa da alo nuanuana ina vuru,
 wate tau, eġa nuanuau ina vuru!”
¹⁶Jerusalem eġa melanai nuanuau ina vuru
 Ona inanai! Wavami, au ura lapalapau a rurui.

50

BADA ana taunola patupatutuna.
⁴BADA God i viararamanu aiwai ana latoni,
 da ġokokokarai ma peupeui ana vovairewapani.
 Ubaubanai patapatai e ravidagudagui,
 ma taniġau a tonetonei da
 ana rautaniġanana ma ana viararamana kaua.
⁵BADA God aramana i vereu
 ma eġa ata parīgaiei bo ata mae-puputei.
⁶*Uporau a verei da i kwapu-kauei,
 ma a voterei da mutuorou i amui.
 Eġa naou ata govaġi maranai i vinimalamalaiu
 ma naou i ovai.

⁷Wate BADA God au muriu e maimairi,
 lamna aubaina eġa ita vitepaubaubaiu.
 A vokaukaua da ana nebelei,
 aramanei da eġa ina vinimalamalaiu.
⁸God au ririvau, ma ina vitaubabani aubaiu.
 Tauna ina riwemi da tau eġa aiwai ata kauana-boai.
 Aiai ina viwavui?
 Tana nae tana etara
 Au ġavia mepa, taumi ona nei?
⁹Anina BADA tauoina e gagagloei,
 Aiai ina riwei da tau a kauana-boai?
 Taui anatapui ina gumaga me gara wadubona.
 Komagħana ina ambaubauni.

52

BADA ana vilawana e nenei
⁷I ai ġaġa, taupariverena a inanai olei e taġotagonai.
 Riwa Aiaina e jimejimei:
 nuauha ma nuaiāii riwai
 ma BADA ana vilawana.
Ma Zion i riwei, “Ami God e vivibada.”
⁸Ona rautaniġana! Ami tauvineneġana e vigaragararei;
 ana morelanaei e logologoi;
 Taui mataiei BADA i 'nanai
 e nenememei au Zion.
⁹Jerusalem wanarakirkana,
 ana morelanami ona wela-gogona BADA awarina.
 Tauna ana rava i vinuaubai,
 ma ana melagai Jerusalem, i vai-melei.
¹⁰Dobu anatapui au matai
 ana rewapani vivivireina e vivieġġai.
 Rava anatapui au dobu
 BADA ana vilawana, ina inanai.

Taunola ana vinuapoapoe ma ana boruma.
¹³BADA i riwa, “Au taunola ana nola ina kauana-kauei!
 Rava tauna ina voepai au tepea dewadewana.
¹⁴Au naona rava magħamagħau tauna i 'nanai

* 50:6: Mrk 14:65

ma i virovorovoanei.
 I vunu-kauei ma i vitaratarai;
 da inanana ega me rava.
 15 Wate marina dobu patarai ina ravigori
 ma gulagulau gamoi i pota tauna voepaepa aubaina.
 Ega ita pariverei,
 marina mataiei ina inanai,
 ma aiwai ega ita nonori, ina aramanei.”

53

1 “Aiai wei pariverenana ita vitumaiganie?
 BADA aiai awarii ana rewapana i viatataiei?”
 2 God au matana, i rata me ai-nabina,
 me aiwarama au kemara e gogogolana.
 Ega ita tupua karawata bo vigulauna,
 ega aiwaina vinualaulauna da tata rauogarei.
 3 Ta inana geduaiei ma ta inana-tawanei,
 iniviria ma vinuapoapoe malana i vaia,
 ta raugovaagei,
 ta mae-puputei ma ta riwa da tauna rava labalababa.

4 Tauna, ata nuabola kovoaga i vaia
 ma ata iniviria i avarai.
 Wate ta notai da
 ana go'apoapoe aubaina, God i kovoagi.
 5 Ata kaua apoapoe aubaina i vitonei,
 ata go'apoapoe aubaina i vikeroi.
 Kovoganei, nuauba i vereta;
 kwapu keronei i vilawanita.
 6 Anataputa me sipu kwakokwakona,
 ana nuaita ma ata goanei ta mamae;
 wate ata go'apoapoe kovoaga, BADA tauna i viavarai.

7 *Au taunola i rauviapoelana-kauei,
 wate i volagota;
 ega aiwai ita latoni.
 I taravaina-naiei viraagenana aubaina me sipu gaubona.
 Me sipu ana genugenuanana e nenea aparabori aubaina ega aiwai ita latoni.
 8 I pani ma i naiei
 ma ega aiai tauna ita vinuabolei,
 ega ana epaepaia ma ina irage.
 Ana lawana au pouna i kwa labalababa.
 Ana rava oina ai go'apoapoe aubaina i'rage.
 9 Tauna ega morumoruna bo gaiigaiawana.
 Wate taui i goei da danedanei maiteni ita doboi,
 ma purapura ravana ana au kokoaaga i vimataveni.

10 Maranai ana lawana i puloei ata go'apoapoe aubaina.
 Lamna, BADA ana goana da tauna ita vunu-boai ma iniviria gaegeaena ita vaia.
 Ma ana epaepaia ina maga guratana
 ma ana lawana ina manawa.
 Ma taunei, BADA ana goana ina kauana-paiei.

11 Ana nola anona ina inanai ma ina vinuiae,
 da ana nuabola ega kwakwolina.
 Bada i riwa, “Au taunola patupatutuna a vinuiae,
 rava magamaagaui ai kovoaga i avarai
 ma lamnei taui ana gorei Rava-Jijimanii.

12 *Ma lamna aubaina ana vimaegegaeni, tauna rava gaegeaena.
 Ma ana au gabu ana terei
 rava gaegeai ma virewapanai maiteni
 ma ana maia ina gutai.

Aubaina ana nuaina ana lawana i verenei.
 Tauna ora-potapotai maiteni i'rāgē,
 ma īgo'apoapoe ravai ma īgama īgauai aubai i mairi."

54

BADA ana nuavaina Zion aubaina.

⁴ E īga ona rovo aubaina e īga ina vītepa-ubaubaimi.
 Tepami ina tora, e īga ina vīnimalamalaimi.
 Ami laraga kauai nunuami ina vuru.
 Ami vikaiababa nuabolana ina amo.

⁵ Aubaina, taukauem lamna awam,
 wavana BADA Vivirewapanā Kaukauana.
Israel ana God Vivivireina am taugimaramelana,
 Tauna dobu anatapuna ai God.

⁶ Israel, tam me wavine tavine vovou
 ma awam i geduaiem ma u vīnuabola kaua.
 Wate BADA ina gōre-melel awarina ma ina pa,
⁷ "A voterem mara aburuna,
 wate raunuapoapoe īgāgānei ana vaimelem.
⁸ Au meji i rata kaua da a mae-puputem mara aburuna.
 Wate au nuavaina mamae-nonoanei,
 ana raunuapoapoelem."

BADA taugimaramelana i riwa me,
⁹ ♦ "Awariu, wei me Noah ana au mara,
 maranai parivainua īgāna bagibagina a kaei
 da e īga melanai wairei dobu ana purui-melei.
 Marina, nanare parivainua īgāna bagibaginei a ririwem
 da e īga melana amlou ina īgāgāi da ana kovo īgimi.
¹⁰ Ola ina vidagu
 ma ina amo.
 Wate, au nuavaina mamae-nonoana,
 ma au nuauba mamae-nonoana tam awarimi ina mae-nonoa."
 BADA tauraunu'apoapoelemi i riwa.

55

Nuarelānamī ona nei

BADA i riwa i pa,

¹ "Ona nei, nuanuarelānamī! Waira wei!
 Awarimi mane e īga ona nei ona gimara ma ona am!
 Ona nei, wine ma mereki ona gīmarai
 maiana e īga, ona vaioi.

² Aiwai aubaina lam apoapoei awari mane e tawatawanei.
 Aiwai aubaina e nolanola labalababa.
 Ona rautani īgāna kaua ma ona am-iaua,
 ma lam aiaii dagidagiaii ona vinuaiaiei.

³ ♦ Tani īgāmi ona toneiai ma ona nei awariu
 ona rautani īgāna da ona lawana.
 Au parivainua īgāna mamae-nonoana ana kaei tam maiteni.
 Ma viaiaina David a parivainua īgāni ana verem."

⁶ "BADA ona baiei da ona nelāgāi,
 marina au īgerēgeremi, ona vība īgāi.
⁷ Īgoa apoapoei raval, ami lawana apoapoei ona geduaiei
 ma nuanuami ona virai.
 Ee! Ma ona wanavirai BADA awarina da ina raunu'apoapoelemi
 ma ami īgo'apoapoe ina notatawanei."

- ⁸ BADA i riwa, "Au nota ega me ami nota nanare,
ma au kaua tapuna, ega ami kaua nanare."
- ⁹ Mara i getelara ega me dobu
ma nanare au kaua i getera ega me ami kaua.
Ma nanare au nota i getelara ega me ami nota nanare.
- ¹⁰ Garewa ma turuvani marei e peupeu
ega kwakwavina ina naeme au mara,
wate dobu ina viutuvanei
da lam ina gogo,
da pei ina vereta, paewa aubaina
ma lam, aniam.
- ¹¹ Ma wenanare riwau gamouei e opuopu;
ega kwakwavina ina nememei awariu
da aiwai a pariparitawanei ina kaei;
au goana anatapuna ina vikwai.

56

Lawana rava anatapui aubaii

¹ BADA wei e ririwei:

"Aburuna ava, ana nei da ana vilawanimi
ma au viaiaina ana viegai.

Lamna aubaina, kaua aiaii
ma jijimanii ona kaukuae."

⁶ "Mai jentail, aiai da tau i vituraneu
ma i vitaunoleu, ma wavau
i vinuavainei ma i vimaegae-gaeniu.
Au Sabate i vivirei,
ma au parivainuagana bagibagina e vovoijina-kauei.

⁷ ⁸Taui ana neiae au ola vivivireina - Zion
ma nuaiai ana verei au parinumana.

Ma ai pulo e apuapui awariu ana vianinei.
Anina ma rava, au tempol ina gorei pari numana,
dam anatapui au dobu aubaii."

58

Uji ririwa kauana.

BADA uji ririwa kauana e bababaniei:

⁷ Am-iraira-gei lam ona tarai-guei,
ma ami numa ona votawanei,
nelabalabai ma vinuapoapoe awarii.
Kovakovai gara ona vioten,
ma taraoim ega ona inana-tawanei."

⁸ Maranaina, au viaiaina ina ravilalaimi me maratomtom madegana,
ma ami doria lagilagina ana vilawani.
Au naomi ana nae da ami aninae ana vovajijimani,
ma murumie, au boruma ina gagaloemi.
⁹ Nai maranaina ona viigore ma TAU BADA, ana paribelemi.
Agu ona gararei ma ana riwa, 'Tau weka.'

"Ega rava, vita ona verei, ega ona viwavuwavu
ma ega babani morumorui ona kaukauei.

¹⁰ Maranai am-iraira-gei o viambagibagi,
gokokokarai o vovoagui.

Lamnei, ami lalalaina gimtona ina lalai,

ina ravidalai me aubenai madeğana."

61

Riwana Aiaina molamolakai aubai
BADA ana taunola e ririwa:
¹ "BADA God, aruana i vereu.
 I vineu ma i paritawaneu da:
 Riwana Aiaina ata naiei molamolakai awari
 ma vinuanuabolai ana vinuabai.
 Ma panipani ana pariverei da deriei ina viopuni.
² I paritawaneu da rava ata pariverei,
 da mara i turai maranai BADA ana rava ina vilawani
 ma ana gavia ina kovogi.
 Ma i paritawaneu da vinuabolai ana vinuabai.
³ Da taui e mogumogu au ola Zion,
 nuaiai ina vikunuteiei ma ega ina vidolodolo.
 Nuaiai logologona ma ega tou.
 Taui ina vinuabai ma ega ina vinuabai.
 Ai kaua jijimanina aubaina ina górei BADA ana labarava ai jijimanina
 da tauna ina vimaegægaeni."

⁶ "Ma taumi ina góremi BADA ana pirisi.
 Ina góremi, God ana taunola.
 Taumi dobu ǵelaui ai maura ona ani
 ma ona vigulagulauei."

BADA i riwa
⁸ "Aubaina Tau, kaua aiaii a ǵoeǵoei,
 danene ma ǵo'apoapoe a gedugeduaiei.
 Au rava ai vinuapoapoe aubaina ana vimaiana-kauei;
 au parivainuaga bagibagina mamae-nonoana maiteni ana kaei.
⁹ Dam anatapui, am epaepaia ina aramanei
 ma e inainana ǵaei."
 Ma ina pa,
 "BADA i viaiaina-kauei."

Zion i riwa
¹⁰ BADA awarina a vivinuabai kaua
 ma Aruau God awarina i vinuabai kaua.
 Aubaina vilawana garanei i vigaraiu
 Ma jijimana vianei ma garanei i vioteniu.
 Me tavitavinevou orotona e vivigarai nanare bo
 me wavine tavitavinevou ana viana e tavitavine.
¹¹ Me doa, pei e vivigogoi ma debagau lam e verevereta,
 nanare BADA God, rava e teretere-vaijijimani
 au dobu da tauna ina voepaepae.

64

Pari agu aubaina
⁴ Oo Bada wariaǵa da marina, ega aiai god ǵelaui ponana ita nonori, ita inanai, bo ita aramana
 dadanei.
 Anina Tam ainelam.
 Taui da e vivipaipaiem e vovoagui.
⁵ Tam kaua aiaii ravai e vovoagui,
 am tarawatu e vovoijini.
 Wate maranai ta ǵo'apoapoe ǵiriǵiri
 tam amlom e vogaiǵai.
 Aiwai aubaina ma vilawania?
⁶ Anatapuiai a ǵo'apoapoe,
 Au matam, ai kaua jijimanii anatapui miramirai me gara wadubona.

Anataputa ta poipoi me ai-rugurugu,
Ata ġo'apoapoe e kapupuana-naieta.

⁷ Ma eġa aiai wavam ita voepaepai
bo ita voguratei da naom ita inanai.
Lamna aubaina tam u netawanelai
da ai ġo'apoapoei e vunuvunuiai.

⁸ Wate BADA, tam amaiāi.
Tauai dogodogo ma tam nau tauvoaina.

Tam anatapuiai uramei u rauġaroġaroelai.

⁹ Lamna aubaina, eġa ma meji guratana awariai.
Ma eġa ai ġo'apoapoe ma nota-nonoei.
Ma i 'nanaiai, anatapuiai tam natunatum.

Peroveta Jeremiah ana buka

Pariverena

Jeremiah lamna peroveta wavana naenaena au Jerusalem, ma BADA riwana i raugugulei ana rava awari. Tauna riwa bagibaginei ana rava i ririwei menanare God taui ina kovoğanei, aubaina Tauna i mae-puputei ma god ġelau i votaġotagoi.

Bada Jeremiah i ġorei

⁴ BADA i riweu i pa:

⁵ “A vinem, muriai da alom au manawana a teretagogiem.

Muriai da uta tupua, A terieriem,
rava anatapui ai peroveta.”

⁶ A paribelei, “Oo BADA God, tau tevera ota, ma babani eġa ata aramanei.”

⁷ BADA i riweu, “Eġa ma riwa, ‘Tau tevera ota.’ Ma nae mepa a pariparitawanem, ma aiwai a ririwem taui ma pariverei.

⁸ Eġa ma rovoei aubaina Tau a paritawanem. Tau tam maiteni ana mae da ana gagaloem. Tau BADA a babani.”

⁹ Anina ma BADA urana i viloloi da ipiriu i tapedadani ma i riweu,
“Marina riwau au gamom a terei.

¹⁰ Ma aramana-kauei da marina rewapania a vereverem,
da dobu anatapui ai gulagulau ai kovoġa ma vinolenolei wenanare,
Gelaui ma orumi, ma viairikarikai,

ma vovaiubai ma vipupui.

Gelaui ma voepai ma ma paewi.”

¹¹ “Ma vokaukaua Jeremiah! Ma vomairi ma aiwai anatapuna a riwem ravai ma pariverei.

Eġa ravai ma rovoei, bo au matai, ana virorovoim.

¹² Amadodo a vovaivirewapanim me

melagai vivirewapanana, tuatuana ma garina iramei voavoana. Tam ma mairi
ma eġa majjudah ma ai gulagulau, ai gabemani ravai, ai pirisi ma dobuna ravai
ina tereġairem.

¹³ Tausi ina viġaviem wate ina kauana-avei.

Aubaina tau tam maiteni, ma ana gagaloem. Tau BADA a babani!”

6

Bada i riwa,

¹⁴ “Rava anatapui, ġaegħaei da muomuo,
e ġoegħoei da moruei mane ina kauei;
peroveta da pirisi anatapui nanare
rava e morumorui.

¹⁵ Tausi, au rava keroi ġaegħaei
e bunabunamai apamina me kero aburuna.
E ririwa da aiwai anatapuna anina,
Wate eġa anina!”

17

BADA ona-vitumagħanei

¹⁶ BADA e ririwa,

“Aiavoi da ai vitumaġana rava ota awarii e terererei,
ma ai rewapania e vitumatumagħaneie;

ma e gedugeduaieu,
ana parivaiapoapoeni.

¹⁷ Tausi me, ai podapodai au dobu dariġaġa
eġa aiwai aiaina ita inainanai.

Tau i dobu au paipairana ina mae, ai ma modu ega,
me au dobu au vivibogana ita mamae kampa ega rava ita mamae.”

7 “Wate aiavoi awariu e vivipatutu ma e vivitumañana da
BADA ai tepamairi, taui ana viaaini.

8 [◊]Tau me ai, vuvura au adana i paewi,
ma warami i gaira waira au orana.

Ega marapoi ina rovoei,
ma rugurugui majimajigai ina maimairi.
Ma marapoi ana au mara,
ega ua ita vovoterei.”

9 “Rava nuapoui lamna morumoru kauana, i apoapoe kaua,
aiai i aramana-kauei, da ina vilawani.

10 Tau BADA rava nuapou
a tuvirevirei ma kaua govagovañai au orai a inana-pai.
Rava anatapui ai kaua ana inanai.
ma ai kaua awarinei ana puloi.”

20

Jeremiah ana beura

BADA i riwa,

5 Tau, Jerusalem ma ai mane ma ai maura ma aiwai anatapui polapolai i toitoiei
ana veredamanei ai gavia awarii. Ina nei ma Judah, ai gulagulau ai purapura maiai gaegei
maiteni ina pupuna-naiei au Babilon.

Jeremiah i riwa,

7 Oo BADA! u gwala-kaueu da a viperoveta
ma a voterem da u kauei.
Tam u virewapanana guratana da
u teregaireiu.
Marina tau rava ai anivinama.

Rava anatapui e vivinameu, marai ma waguvarai.

8 Maranai a paripariverena,
Riwa ana nuuai e rubaruba-opu.

“Viñgaiñawai! Pupu e neneil!”
BADA ana pariverena aubaina, vinama ava a nenelañai.

9 Mepa da ana geduai ma wavana ega ana latoni bo wavanei ana jima
Lamna maranaina riwam lamna me ai araratana,
orau e ararai.

Amapo ega ana vojjina-guratei. Amapo ega!
10 A nonori patara e viviarautueu.

Au gavia i maña kaua,
ma e vineneñaneu da ana neboa,
ma ina viwaviu ina pa,
“mepa da i jima boa, ina waro-melei ma tauta ata biwa tana vaia.”

11 Wate BADA tau maiteni
me tauviñavia vivirewapanana kaukauana.

Lamna aubaina au gavia ega ina teregaireu.
Taui ina vunu-aveu ma ina vinimala kaua.

Ina vinimalana-nonoei ma ega nuuanuai ina vuru.

12 “Oo BADA Vivirewapanam! Tam rava jijimanii e raraudadani,
ma ai nota ma orai e araramanei.

Au vita au uram a terei
ma ana inanaim, au gavia ma kovoñi.

13 Ona wela BADA awarina.

Ona voepaepai.
Maranai Rava vivirewapanai, gwañagwagai e rarau-iviaipoapoelei,
lamna BADA ana rewapanai taui ina gagaloei.”

23

BADA Gulau vouna ina vinei mamae-terenai aubaii

1 BADA e ririwa, "Au rava ai babada nuabola ġaeġaena ina nelagai! Taui sipu taupaini apoapoei. I vipaipai-boa da sipu i vidabararai."

2 Lamna aubaina BADA, Israel ana God, wenanare Israel babadai awari e ririwa, "Taumi ami kaulelei au sipu o vidabararai ma o vilamolamonei. Eġa ota vipaipai kaua. Lamna kauai apoapoei aubaina ana kovoġimi.

3 Anina ma Tau au sipu gelaui a virubai au dobūgħela, ana neiana-melei ai au gari. Wei mamae-terenai ina vinatuna ma ina maġa guratana.

4 Taupainii rava kaua ana tere-naiei da ina viġamoġamo kaua ma eġa ina rovo me bo orai ina sisi. Eġa tagogi ina kwako. Tau BADA a riwa."

5 ♀ BADA e ririwa

"Mara vouna e nenei maranai gulau ana terei David ana damei.

Wei gulauna ina vibada kaua ma kaua aiainei ma jijimaninei dobu anatapuna ina vibadei.

Nota aiainei Judah ravai ina rauetaraveni ma

Israel ravai au nuauba ina mae.

6 Wei maranaina mai Judah, ina vilawani

ma Israel ana nuaubai ina mae.

Ma wawana ina ġorei, BADA Tauterevajjijimanita."

31

BADA Israel ina vaimelei.

7 BADA i riwa:

"Ana nuaiaimi ona wela Jacob ana dam aubaina

ponami ona voepai dam vigulauna aubaii.

Ona voepaepa, ona jima ma ona riwa,

'God, am rava mai Israel mamae-terenai ma vilawani!'

8 Au kariwabuei au rava ana neiana-melei, dobu au giana da au giana anatapui.

Maiteni mata-potapotai ma sigesigei, duaduamai ma tautauvaoi.

Dam patara ġaeġaena ina nememei.

9 Ana rupenai ma ana toutoui agu aubaina, ana neiana-melei

Waira adanei ana taravainiai, etanai abuabunei da eġa ina peu.

Tau Israel amana, Ephraim au natuevou."

Parivainuaġana bagibagina vouna.

31 ♀ BADA e ririwa i pa, "Mara e nenei maranai parivainuaġana bagibagina vouna ana kauel mai Israel ma Judah maiteni.

32 Wei lamna eġa me noinoi maiteni a kauel nanare; maranai a raunimavoai ma Egypte a taravaina-opunei. Aubaina au parivainuaġana i viaigai avena da nuanuai a vaia me oroto awana nuanuana e vaivai.

33 Wei parivainuaġanana mai Israel maiteni ana kauel nai marana au murina." BADA e ririwa, "Au tarawatu ai au nota ana terei ma au nuanuai ana girumi. Wei ina terekauie da Tau ai God ma taui au rava.

34 Ma eġa ai rava ina viaramana-melei bo riwa vivira, 'BADA ona aramanei' Aubaina au aburuna da au magurina anatapui ina aramaneu. Tau ai go'apoapoe ana nota-tawanei ma eġa ana nota-melei." BADA e ririwa.

33

Nuauba parivai-nuaġanana

¹⁴ [◊]BADA i riwa, “Mara e nenei maranai au parivainuağana bagibagina mai Israel ma mai Judah maiteni a kaukaueia anona ina tupua.

¹⁵ Nai maranaina,
rava kaua David ana damei ina nei;
Ma Tauna kaua aiaii ma jijimanii ina kaeui au dobu.

¹⁶ Nai au marana
Judah ina vilawani ma
Jerusalem ana nuaubana ina mae.
Wei melagaina ina ġorei, *BADA Tauterevaijjijimanita.*”

38

Jeremiah waira dogona au orana.

⁴ Babadai, gulau Zedekiah i riwei, “Wei ravanana Jeremiah tana viraġeni. Ana babaniei, sorodia ruaqauta lawalawai ma rava ġelaui e viviorabadoi. Tauna ega rava ita vovoagui wate e viviorabadoi.”

⁵ Gulau i paribelei, “Tauna au urami, ami ġoana nanare ona kaeui. Tau ega ana viġaemi.”

⁶ Ma Jeremiah i vaia ma i tere-ġairei gulau natuna Malkijah, ana au dogo, wei lamna gulau ana sorodia ai au potuma au ririvana. Ma ġuravei Jeremiah i tere-ġairei au *dogo. Au orana dogodogo ava, ma Jeremiah i monu ġaira da i mairi dogodogo orana.

* 33:14: Jer 23:5-6 * 38:6: Wei lamna wapaketa dogona, viutuvana aubaina.

Lamentation Mogu Jerusalem aubaina

Pariverena

Wei bukana e ririweta da au 586 B. C mai Israel i vinuapoapoe kaua maranai ai ġavia i nei da Jerusalem i pupuni ma rava ma purapura aiaii i vaia da i naiei. Tauta eġa tata aramana-kaei aiai wei bukana i girumi wate rava ġelau i notanotai da augunai Jeremiah wei bukana i girumi.

Jerusalem ana nuabola

¹ Kaporel. Zion wariaġa am patara i rata ġaġa, marina u kwakkawa.

Dam patarai ai voepaepa, marina i vikaiababa.

Wariaġa dobūgela gulagulaui ai voepaepa. Tauna i 'nana ġaei.

Marina i vitaunola.

² E toutou maratom,

jirigwegwena au navananava e toitoi.

Ana nuvavainana maġamagaui i ruba-tomana, eġa aiai da ina vinuaubai.

Ana rava * anatapui i mae-puputei ma i viġavie.

³ Judah i pani ma i pupuna-naiei.

Au dobu ġela i vivipanipani,

e raraū-iviapoapoelei,

i vitaomana au dobūgela.

Ġavia i mae-kwativiroi,

menanare ina onaġanei?

⁴ Zion etanaina e mogumogu

eġa aiai kampa ita nenaē torela aubaina.

Ana anirui i kwakkawa,

Pirisi e gunugunura,

ana guguini e vivitouana;

Nuapouna i wanagwadgwadai.

⁵ Ana ġavia i vibada,

au urai e mame.

BADA nuabola ġaegħaena i neiai Zion awarina

aubaina ai ġo'apoapoe i rata.

Natunatui i paniniaeī aueia, ai ġavia au mataii.

⁶ Kapore wariaġa Zion na!

Wavana naenaena, vinualaulaunana marina mepa?

Marina, Zion ana babada lamna me

deer, nuanuai i arelei ma i raumolagħau ma lam i baiana-avei.

Inina i garigari

ma eġa tagotagogina da ai ġavia ina rubatawanei.

⁷ Zion i kwakkawa, ravana eġa.

Ana maura, wadubona e vinuanotenotei.

Maranai ana rava i peu ai ġavia au urai, eġa aiai ita nei da ita rauagui.

Ana ġavia Zion ana peu i 'nanai ma i vinamei.

3

¹⁹ BADA, A tenam nae, eġa matave kaua, iniviara maiteni,
a vinuapoapoe kaua, notana i viġora kaua.

²⁰ A notanota-maelei
ma au orau a toutou.

* ^{1:2:} Ana eririam lamna wapu god Baal ma Aserah ma mai Judah maġamagaui wei god i voepaepi. Ana rava lamna taувiġavia mai Egypt ma nanare maiteni i viturana ma maranai ġavia i ġetai taui i viruberubei.

21 Wate BADA a vinua-notenotei ma orau e vovovaivirewapani. Lamnei a vitumaḡana:

22 da BADA ana nuavaina mamae-nonoana.

Ma ana raunuapoapoe ega ina kwa.

23 Ubaubanai, e raviravivouni;

am vipatutu i rata kaua.

24 A ririwana-meleu, BADA au buderi lamna a vivitumaḡanem.

25 Taui daBADA e vivitumaḡanei ma e baibaei, ina viaiaini.

26 I ai da tana volaḡota ma BADA tana paini da ina vilawanita.

27 I aii da vilamolamona ma nola ma aramanei. Am au vilaraga,

28 maranai BADA e viviaramana,

ma mae genuatau.

29 Tana mae-ḡaira au debidebi,

mepa da agu ina nei.

30 Navanavami ona verei da ina ravi, ma ina vijiboḡimi.

Wate ega ona vobelei aubaina.

31 Bada ega ina geduaiana-nonoeta.

32 Avena da maraḡela nuabola e neineiai, wate ana raunua apoapoe i rata kaua.

Aubaina ana nuavaina i rata kaua, ega damona.

33 Wate wei kauai ega ita vinuaiae.

Peroveta Ezekiel ana buka

Pariverena

Ezekiel mai Jew au Babilon i vianipipani awari i babani. Tauna mara nonoa vivirarautua vinualaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu augia dewadewana anatapui ina neiana-meleiana da ai au dobu oina ina terei.

2

God Ezekiel i vinei ana peroveta

¹ Bada ana boruma a inanai ma au doa a peu. Ma a nonori pona i riweu, i pa, "Rava ota natuna, ma vomairi ma awarim ana babani."

² I bababani ma God aruana au orau i rui ma i voepai ma a nonori awariu i bababani.

³ I riwa, "Rava ota natuna, a pariparitawanem dam paripariviravirai mai Israel awarii. Amamai maiteni ega ita voteleteleu ma awariu i pariviravira da marina.

⁴ Rava paripariviravirai ma orai badobadoi ma ega ita vivivireu. A pariparitawanem da ma riwei, 'Wei Bada riwana.'

⁵ Taui paripariviravirai ma ina rautaniganem bo ega lamna avena, wate ina aramanei da peroveta i getai awarii."

17

God Israel ina ravivouni

²² Bada God wenanare i riwa, "Tau ai cedar manamanaina nuanuana ana vogai da ana paewi. Raiana au tepadewadewana nabina ana gai da ola manamanaina au tepana ana paewi.

²³ Israel ola au tepai ana paewi, ina raagai ma ina raunumo, ai gulauna. Kiu tapuna ma tapuna au raagai ina raunoji ma au goui ina viogo.

²⁴ Ai anatapui nai au dobuna ina aramanei da tau BADA, ai manamanaii ana taragai ma ai tupotupoii ana voepai. Ma ai majimajigana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kaei."

33

God Ezekiel i vinei da tauvinenegeana.

BADA i riwa:

⁷ "Rava ota natuna, Tau a vinem tauvinenegeana dam Israel aubai; riwa a vereverem ma nonori ma babani bagibaginei ma riwei.

⁸ Maranai go'apoapoe ravana a ririwei, 'Tam, go'apoapoe ravana, amapo ma i 'raage.' Ma ravana ega uta pariverei da ana go'apoapoe ita voterei, ma ina irage. Marina ana irage au urum a tereterei.

⁹ Wate mepa da go'apoapoe ravana u riwei da ana lawana ita virai ma ega ana lawana ita virai, ana goa apoe ina iragelei, ma tam am lawana ina mae."

34

BADA tauvipaipai aiaina

¹¹ Bada God wenanare e ririwa, "Tau ainelau au sipu ana baiei ma ana gamoi.

¹² Sipu taupainina, ana sipu kwakokwakoi e baibaiei da e nenemeleiai. Nanare tau, au sipu e kwakokwako-nae. Ana nelagai ma ana neiana-meleiai, maranaina dobu i waguvarei ma i gimtonei.*

¹⁵ —Tau ainelau au sipu ana gamoi ma ana terei da ina matave kaua, Tau BADA God a babani.

* **34:12:** Wei lamna awanaina maranai mai Babilon Israel ina pupuna-naiei au 587 B.C.

¹⁶ Tau kwakokwkaoi ma nelabalababai ana baiei, ma ana neiana-melei. Ma keroi ana bunamai ma gokokokarai ana vovaivirewapani. Wate dododoi ma virewapanai ana pupuni. Jijimaninei au sipu ana ġamoi.

¹⁷ —Taumi au sipu Tau BADA God a ririwana-kauemi da taumi tagotagogi ava ana rauetaremi. Aiaii ma apoapoei ana vilamonei, sipu ma gote ana vilamonei.”

36

BADA ana rava ina ravivouni

¹⁶ BADA i riweu, i pa,

¹⁷ “Rava ota natuna, maranai Israel ai au dobu i mamae, taui ai kaua apoapoenei ai dobu i vimirai. Tau au matau lamna i vimira-melei me wavine ana nawaravi e vaivaia.

¹⁸ Marina, au meji ana iwaga-tawanei awarii aubaina taui tara i vitoini au dobu, ma nanare kokoitauei dobu i viapoapoeni.

¹⁹ A vidabarai ma a vilamolamonei au dobuğela, ai ġo'apoapoei ma ai kaua awariei a kovoġi.

²⁰ Wate metauna au dobuna i rui taui wavau vivivireina i vijibogħi, aubaina nai dobuna ravai e ririwa, ‘Wei lamna BADA ana rava wate ana dobu i opu-tawanei.’

²¹ A ġoiei da au rava au wava vivivireina ita vimaegħaġaen, wate noi rava mai Israel dobu anatapui i naeni ma i vitepaubaubai.

²² —Lamna aubaina, marina dam Israel ma pariverei, Bada God wei i riwei, ‘Tau a neineiana-melei aimi, eġa tam am kaua aiaina aubaina. Tau a kaukauei wavau vivivireina aubaina, taum wavau o viapoapoeni-naiet jentali ai au dobu.

²³ Ana viataataei da wavau, ġetelarana ma vivivireina. Wavau taumi dobu au anatapuna o vitepaubaubai. Taumiee dobu ana viataataiei da tau vivivireu

²⁴ aubaina dobudobuai ana taravainimi ma ana neiana-melei aimi au dobu.’

²⁵ —Wairei ana vitoaimi da ona aii, ami mira ma kokoitau viborumai mirana ina oġa-tawanei.

²⁶ Ma nuanuami vouna, ma aruami vouna ana veremi. Nuanuami badobadoi ana votawanei ma aiaina ana terei.

²⁷ Ma Aruuau au oram ana terei da au tarawatu ma au viararamana ona votaġotaġgi.”

37

BADA gelama ina ravivouni

¹ BADA i raunimavoaiu ma aruanei i naieu da gwagwa ġaegħena au pouna i tereu, rava gelamii gwagħwanana i oai.

² Gwagħwanana a naeni ma a inanai da gelama i maġħa guratana ma i poi.

³ I paridadanu, “Rava ota natuna, amapo wei gelamii ina virava me bo eġa?” A paribelei, “Oo! Bada God, tam ainelam u aramanei.”

⁴ Ma i riweu, “Riwauei gelama ma riwei, ‘Gelama poii, BADA riwana ona nonori.’”

⁵ Bada God wenanare gelama i riwei, “Lavutu au orami ana terei ma ona lawana me!

⁶ Vioa ma warowaro ana veremi, ma opu da gelama ina purui. Ma lavutu ana veremi da ma lawana. Kampa ma aramanei da Tau BADA.”

⁷ I riweu nanare a babani, a vikarei da a bababani ma dobuna ura ketarana i nae da dobuna i oai, gelama anatapui i vitagogie.

⁸ A inainana ma warowaro ma vioa gelama au tepana i ampasi ma au tepai opu i tupua da i purui, wate awari eġa lavutu.

⁹ Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meieħi e uveuvena, au orami lavutu ina opu ma taubeu patarai e matamatavon ona uveni da ina lawana me.’”

¹⁰ Ma i riweu nanare a babani, ma lavutu ravai tupuai i ruini. Anatapui i lawana ma i mairi sorodha boruna ġaegħena.

¹¹ I riwa me, “Rava ota natuna, mai Israel lamna me wei gelamii. Taui e ririwa i pa, ‘Tauta gelama poi ava ma ata tumaġħana i kwa, ata dam i kwa.’”

¹² Lamna aubaina ma riwana-melei, Bada God wenanare e ririwa, ‘Ona inana! Ami kokoaga ana votawanei ma ana voepaem i ma ana neiana-melei aimi au Israel.’

¹³ Au rava! Maranai wei i tupua, ona aramanei da Tau BADA.

¹⁴ Ma Aruuau au orami ana terei ma ona lawana ma ana neiana-melei aimi au dobu oina. Maranaina, ona aramanei da Tau BADA. Ee! A ririweia; ana kaei.”

**Peroveta
Daniel
ana buka**

Pariverena

Daniel tauna laraga maranaina i naiei au Babilon da i vипаниpani. Ma maranai i vomagura tauna i terei da gabemani ai bada гаegäna. Tauna ana au lawana i vипатуту ma God i votetelei.

Ana vипатуту awarinei God nuaulaula i verei, ma tauna tagotagogina da rava ai rauboni anona ina vieгai ma kaua aiwai amapo ina tupua e vivieгai.

7

Daniel ana rauboni

¹³ *Waguvarai inana a inanai, ma kaua aiwai a inanai me Rava Natuna apau oraninei i nenei, ma i taravaina-naieiMAEMAE NONOANA awarina.

¹⁴ MAEMAE NONOANA vibadana ma rewapana ma vимaeгaегaena, tauna i verei da ina vibada, da dam anatapui ma dobu anatapui ai ponei ina voepaepai ma ina voteletelei. Ma ana rewapana ina mae-nonoa, ma ana vigulau vibadana eга ina kwa.

12

Mara au damona

¹ *Ma nai maranaina anela vivirewapanana Michael, Israel ana taugagalo, ina eга. Amapo nuabola гаeгae otana ina nei, eга melanai nanare tata inainanai, au karena da marina. Wate wei au marana rava aiavoи da wavai au buka i girugirumia ina lawana.

² Maгамaгaui irairaгeи ina vomairi me, ma ina nae, гelauи au lawana maemae nonana ma гelauи vinimala maemae-nonoana.

³ Rava nuaulaulaui ina lalai me Mara madeгana. Ma taui maгамaгaui e raveraveni da lawana jijimanii e maemaei, ina lalai me ubona.

**Peroveta
Hosea
ana buka**

Pariverena

Hosea God ana peroveta, tauna mai Israel awari God riwana i jimei. God i riwa da taui ina kovōgi ma ai dam ina pupuni aubaina taui tauna i geduaiei ma god morumorui i voepaepai ma ai kaua apoapoe i votāgoāgoi.

Hosea awana tauna i voterei ma nelara ġelaui maiteni i nenea. Wate tauna awana nuuanuana i vaini ma i baiei ma i taravaina-meleiai ana au numa. Wei bukana e viviatataeta da nanare tagogina avena da mai Israel ai God i geduaiei tauna anina da taui nuuanu i vaia ma i parivainuaġana da taui ina neiana-meleiai awarina.

11

God, Israel nuuanuana i vaia

¹ Bada Hosea i riwei, i pa, "Maranai Israel ana au vitevera, a vinuvainei ma Egyptei a ġore-opunei.

² Wate a viġoreġore
ma tauna amapo da i nenetawaneu.
Tauna ana pulo i apuapui Baal awarina,
ma dajj ġabugabui, i apuapui kokoitau ġelaui awarii."

Peroveta Amos ana buka

Pariverena

Amos taon au aburuna i mae Bethlehem au ririvana, au Judah maranai God tauna i kwatuei ana peroveta. Tauna God riwana mai Israel i riwei da God, ai kaua apoapoei aubaii ina kovoġi. Wei ravai God eġa ita vimaeġgaġaeni ma eġa ita ririwa kaua, i morumoru ma molamolakai awarii kaua apoapoei i kaukauei.

Ma maiteni Amos God ana parivainuaġana taui i verei da amapo tauna Israel ana gabemani ina ravivouni, Jerusalem ina voa-melei ma gulau David ana tupua rereġa ravai dobuna ina vibadana-melei ma ana nuaubai ina mae.

8

Tou ġaegħaena e nenei

⁴ Ona rautanīgħana! Taumi voladaġai o kwalekwalei
ma molamolakai o tugwadagħwadai.

⁵ O ririwa, nawaravi vouna torelana ina kwa laġilāġina
ma Sabate ina kwa.

Ma witti tana gimarei,
witti ruva aburuna tana terei ma maiana tana ġaġġaiei
ma sikere morumorunei tana gimajimarei.

⁶ Witi loġiġi o tami da witti o tavipotoi ma o gimarei
ma lamnei, molamolakai o għimra ammi taunola.
Taui maiai me busi, maiana aburuna.

⁷ BADA parivainuaġana-bagibagħina, ana wawa i kaei,
nai wawana mai Israel e vimaeġġaġe,
I pa, “Ami ġo’apoapoei eġa melanai nuanuau ina vuru.”

Peroveta Jonah ana buka

Pariverena

God ana peroveta Jonah i kватуеи da au Niniveh ita raugugula. Wate tauna eѓа ita ѓоei da ana dobu ravai ai ѓavia wariагана awarii ita raugugula.

God i rauагiѓаiei ma iana tauna i lawani. Au murina, i nae au Niniveh ma i nelaѓai da mai Israel ai ѓavia, God riwana i votetelei.

Jonah BADA i rauагiѓаiei

¹ Mara tagogi BADA, Amitai natuna Jonah i riwei,

² "Ma vomairi ma nae au taon ѓaeѓаena Niniveh. Ma riwei, da ai ѓо'apoapoei a inanai da i rata kaua ma lamma aubaina ana kovogi."

³ Wate Jonah, BADA i voterei ma etanai ѓelauna i vaia ma ina ruba ѓaira au Joppa. Ma kampa waga i nenea au Tarshish i nelaѓai. I vimaia ma i geru da ita nae. I notai daBADA ita ruba govaѓei.

⁴ Wate BADA kojikojira ѓaeѓаena i paritawanei da waga ita viairikarikai.

⁵ Waga ravai ai lawana aubaina i rovo-kaukaua ma ai god awarii i tou agu aubaina, ma purapura au boga i viorereni da waga ita telatela. Wate Jonah waga au orana i raunuavuru.

⁶ Kapena i ѓaira awarina ma i eni i pa, "Mara i apoapoe ѓаѓа ma e matamatave! Ma vomairi, ma tou am god awarina da ina voaguita. Mepa da ina raunuapoapoeleta da eѓа tana iraѓe."

⁷ Waga ravai i babani vivira i pa, "Gaima tana vikalokaloei da tana aramanei aiai ana wavu." Kalona i kaei ma wavuna Jonah awarina i peu.

⁸ Ma taui Jonah i paridanei, "Aiwai aubaina kojikojira awarita i peu? Tam aiai? Tam am nola aiwai, tam meie?"

⁹ Jonah taui i paribelei i pa, "Tau Hebrewei ma tau BADA, Mara ana God a voepaepai, Tauna boga ma doa i kaei."

¹⁰ Waga ravai i rovo kaukaua ma i vigaragararei, "Aiwai aubaina lamna u kaei!" Jonah boiboѓi i vieѓа da tauna BADA i rovoei da i rubaruba.

¹¹ Mara i apoapoe kaua ma taui Jonah i vitaravireirei, "Aiwai tana kaei da kojikojira ina kwa?"

¹² Jonah i riwa, "Ona tawaneu au boga ma ive ina raumairie. Aramanei da tau au kaelei wei ivena i vomairi."

¹³ Wate waga ravai i lare-guratana da waga ita ѓairei au gera, wate eѓа tagotagogina, kojikojira i voguratei.

¹⁴ Anina ma taui anatapui i tou Jonah ana God awarina i pa, "Oo BADA! eѓа ma voterelai da wei ravana ana ѓо'apoae aubaina, ana i'raѓe, ma eѓа tarana wavuna ana avarai!"

¹⁵ Ma Jonah i vojijini ma i tawana-opunei au boga ma maratagogi kojikojira i wanatuini ma daumora i matave.

¹⁶ Ma ravai i rovoana-kaei da pulo i apui BADA awarina ma i parivainuaѓani da tauna ina vivrei.

¹⁷ Wate BADA iana ѓaeѓаena i paritawanei da Jonah i lawani. Ma Jonah iana au manawana i mae aupom ma waguvara tonuѓa.

2

Jonah ana pari

¹ Jonah iana au manawana ma i raupari BADA, ana God awarina.

² I pa,

"Au nuabola au orana a tou BADA awarina,
ma i paribelei.

Irairagei, ai au dobu

ma agu a gararei

ma au tou u nonori.

³ Au gabinou u tawana ѓaireu,

boga au gabaura dewadewana.

Boga i kwaviviroiu.

Rabamam ġaegaei i viaimonumonui.

⁴Oo BADA! A notai da tau u tereopuneu,
ma a notai da ega melanai am tempol vivireina ana inana-melei.”

5 “Boga i puruiu
lavutui i tupo
ma aragoma kolau i pani.

6 A monu ġaira ola au kare dewadewana,
a vianipani nai au dobuna,
dobuna metaetana guduguduna maemaena.

Wate tam BADA au God, u vilawaniu.
Lawalawaiu gabinouei u sinaepaiu,

7 Malana a vaia au lawana i opopu,
ma BADA a raupari awarim,
am au tempol, ma u nonoriu.

8 Taui kokoitau labalababa e viviborumei,
am nuavaina mamae-nonoana i geduaiei.

9 Wate tau ana welem, ana voepaepaim
ma au pulo ana apui awarim.
Au parivainuaga awarim ana kauei
lawana maemae nonoana BADEI e nenei.”

10 Ma BADA iana i egari da Jonah i medana-tawanei au gera.

3

Jonah i naa au Niniveh

1 Ma BADA i babani me Jonah awarina,

2 I pa, “Ma nae taon ġaegaena vinualaulaunana Niniveh ma au riwa a vereverem ma pariverei.”
³ Jonah, BADA riwana i voteteleli ma i nae au Niniveh. Niniveh lamna taon ġaegae otana
ma aupom tonuġa i vaia da i verautuini.

⁴ Jonah i vikarei nai au taona ma aupom tagogi i babara ma i jima i pa, “Aupom 40 ina kwa
ma Niniveh ina pupu.”

⁵ Mai Niniveh BADA riwana i vitumaġanei ma i vioga da anatapui magurina da aburuoina
i vianina tagogi da ina uji ma uji garana i oteni da ina vimataira.

⁶ Maranai Niniveh ana gulau wei riwana i nonori, tauna ana anikiala i opu-tawanei ma ana
gulau garana i ġiggi. Uji garana i oteni ma au lapukare i kiala.

⁷ Ma mai Niniveh awarrii wei vinolanolana bagibagina i paritawanei tauna au wavanei.
Wenanare i riwa:

Ega rava bo bulumakau bo sipu, aiwai ina ani bo ina umai.

⁸ Ma ġamogamo ma rava uji garana ina oteni ma ina raupari guratana BADA awarina. Ma
kaua apoapoe ma ġoagai ina geduaiei.

⁹ Aiai i aramanei? Mepa da God nuanuana ina amviravira ma nuavainei ana meji
ina vojjini da ega ina pupunita.

¹⁰ Maranai God inanai aiwai i kaukauei ma menanare ai kaua apoapoe i geduaiei, Tauna
nuanuana i virai ma ega ita pupuni.

4

Jonah ana ġaiawa ma BADA ana nuavaina

1 Wate Jonah wei ogana ega ita ġoiei ma amlona i ġaigai kaua.

² *Ma i raupari BADA awarina, i pa, “BADA a notai da amapo nanare ita tupua muriae da au
melagai ata opu-tawanei. A ‘ramanei da tam God raunuapoapoem ma iviaiam, ega laġilägħina
amlom ita voġaġai ma am nuavaina maemae-nonoana. Tam ega am ġoana da go’ apoapoe
ravai ma pupuni wate ma tere-kauei. Lamna Aubaina a ruba nae au Tarshish.

³ *Ma marina BADA, au lawana ma waitawanei, i ai da ata iraġe ma avena ata mae!”

⁴ Wate BADA i paribelei, i pa, “Tam aiwai e ġaigaiawei?”

⁵ Jonah i opu melagai au metaetana, au maramatanei. Kampa ġou i voepai ma au
gabaurina i kiala ma i vipaipai da BADA aiwai ita kauei nai taona awarina.

⁶ Ma BADA ġoroġorova i vigogoi da i tuaġeta Jonah au tepana da ana ġou. Ma Jonah wei i vinuainaina-kauei.

⁷ Wate ubaubana boibogi aupom ġela, BADA motamota i paritawanei da ġoroġorovana i ani da i'rāġe.

⁸ Maranai madeġa i gogo, God ive maramatanei i paritawanei. Ma madeġa Jonah kolana i rarani da i ġokokokara. I ġoei da ita iraġe ma i riwa, "Iraġe i aii, eġa me lawana."

⁹ Wate God Jonah i paridadanei, "Am nola aiwai da amlom i ġaiġai kaua wei ġoroġorovana awarina?"

Jonah i paribelei, "Amloj i ġaiġai kaua da a ġoei ana i'rāġe."

¹⁰ BADA i riwa, "Wei ġoroġorovana u vivinuabolei lamna eġa tam uta kaei bo uta paini. Tauna waguvvarai i gogo ma waguvvarai i'rāġe.

¹¹ Wate nai taon ġaegħaena Niniveh ma ana patara 120,000, taui gimtona taumaenina ma ai ġamōġamo maġgamägħui. Wei taona a vinuabolei tapa?"

Peroveta Micah ana buka

Pariverena

Wei bukana, Micah mai Israel e ririwei da God taui awari amlona i ġaiġai. Tauna amlona i ġaiġai aubaina eġa ita votelatelei. Lamna aubaina ai ġavia ina voterei da ina viġavie.

Wate nanare BADA ana parivainuaġana i jimej. BADA i parivainuana da au damona ana rava ina vilawani.

5

Gulau meiei ina nei

¹ Sorodia ona vomairi! Ona vokaukau!

Ġavia Jerusalem i matave kwaipipini.

Israel ana gulau ina kwapui, jiġonei navanavana ina kwapui.

² Tam, Bethlehem Ephrathah,

melaġai aburu oina dam Judah au orai.

Wate awarimiei, Israel ai gulau ina opu.

Tauna wariaġana,

au karea da marina.

³ BADA mai Israel i voterei ai ġavia au urai,

da wavine marina au manawa, tevera orotona ina ġuni.

Ma ai rava ġelau i tuvai-opunei,

ina nememei ai au gana au Israel.

⁴ Tauna BADA ana rewapanei, ina mairi ma ana sipu ina raveni,

ana vinu laulaunei ma BADA wavana ġaegħaenei.

Rava anatapui au dobu, Tauna ina vivirana-kauei

ma lamna aubaina taui kampa ina mae-kaua.

Peroveta Zechariah ana buka

Pariverena

Mai Jew ai ġavia i nei ma taui i pupuna-naiei au Babilon. Ma madeġa 70 au murina Babilon ai gulau mai Jew i voterei da i naeme au Israel tempol voamelana Aubaina. Zechariah maiteni i nae. BADA Zechariah i riwei da mai Israel wenanare ina pariverei, "Ona mae-taviremi awariu ma ana maetavireu awarimi."

Zechariah turana peroveta Haggai maiteni i nola tagogi nai au marana.

9

Zion ana gulau e nenei

⁹ BADA i riwa, "Ona morelana Zion
Ona logoimi Jerusalem,
ona inana! Ami gulau e nenei awarim.
Orana Jijimanina ma ana ġavia i vovaiubai.
Ana volaġotana donkey e gerugerui,
donkey ġaubona i gerui.
¹⁰ Dam Ephraim awarii Chariot ina vaitawanei,
ma Jerusalem awari ġavia horse ina vaitawanei.
Ma viġavia ana pidu ina gai.
Tauna rom ina neiai.
Ma ana vibada boga i taġoni da au boga ġela,
au waira Euphrates da dobu au gia dewadewana."

12

Tauna i tonatonai ana mogu.

¹⁰ Tau-Bada, David ana epaepaia ma mai Jerusalem awarii, raunuapoapoe ma rupena aruana ana iwagi. Taui ina taepai ma i tonatonau ina inanai, ma ina touei ma ina moguei me rava natuna tagotago i'rāġe; me natuevouna ina irairāġe.

¹¹ Nai marana, tou ma tarakwatu au Jerusalem ina rata kaua me au Hadad-Rimmon au wapuna, au Meggido maranai gulau Josiah i viraġeni.

13

¹ BADA Virewapana Kaukauana i riwa i pa, "Mara ina ġetai maranai vuvura ina votawanei au Jerusalem. David ana epaepaia ma mai Jerusalem anatapui ina nei ma ai ġo'apoapoe ma ai mira ina oġa-tawanei."

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karea. Rava wei bukana i girumi, wvana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana magamagaui i notai da tauna, Peter maiteni au Rome i mae. Ma Peter, Iesu ana kaua ma ana viararamana magamagaui Mark i riwei. Anina ma Mark wei riwana i girumi da tauvitumaagana au Rome ita aramanei, Iesu aiwai i kaei.

Riwa karea i girugirumia e vivigeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapania da kaua magamagaui ita kaei. Wei kauai tana inanai maranai: e viviararamana; ma arua-apoapoei e viviagagan-opunei; ma rava doridoriai e vivilawani; ma goapoapoe e notanota tawanei. Mark, Iesu ana nola ma ana kaua i girumi ma ega ana viararamana ita giruma-guratei. Mark i viegeta menanare Iesu au korosi i raage da rava anatapui ita vilawanai ma God menanare, Iesu iragalei i vovaimairini.

*John Taubabataito, Iesu ana aninae i vovokaukauei
(Matthew 3:1-12; Luke 3:1-18; John 1:19-28)*

¹ Wei lamna Iesu Keriso Messiah God natuna Riwana Aiaina karea.

² Wariaga peroveta Isaiah i girugirumia nanare:

*"Ona rautaniganal! Au peroveta au naom ana paritawanei
da am aninae ina vokaukauei."*

(Malakai 3:1)

³ ⁴“Peroveta au mutulua e vivigoregore:

*'Taumi BADA ana aninae ona vokaukauei,
ana eta ona vovai-jijimani!"*

(Isaiah 40:3)

⁴ Ma taupariverena John i nei au mutulua da rava i bababataitoi ma God riwana i jimejimei i pa, “Ami goapoapoe ona voterei, ma ona mae-taviremi God awarina ma ami goapoapoe ina nota-tawanei ma ana babataitoimi.”

⁵ Ma rava anatapui Judea au paratana ma au Jerusalem i nae da John ita rautaniganai. Maranai ai goapoapoe i rupeni, John, taui i bababataitoi au waira Jordan.

⁶ Ma John, kamel aparana metametanana i oteotenai ma ana tairoro gamogamo opina. Ana lam kapau ma manigewa.

⁷ Ma tauna, rava i ririwei i pa, “Rava au muriu e nenei i getelara, ega me tau. Ega tagotagogiu da ana ae uma guravana ana rupeni.

⁸ Tau wairei a bababataitoi, wate tauna, Arua Vivivireinei ina bababataitoimi.”

*John, Iesu i bababataitoi
(Matthew 3:13-17; Luke 3:21-22)*

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i bababataitoi.

¹⁰ Ma maranai Iesu wairei i gegetai, i 'nana da mara i wanatawanei ma Arua Vivivireina me gabubu i gairai.

¹¹ ¹²*Ma God ponana marei i opu ma i riwa i pa, “Tam, tau natu au nuavaina ma u vinuaianiu.”

*Satan, Iesu i raelari
(Matthew 4:1-11; Luke 4:1-13)*

¹² Ma lamna au murina God Aruana Vivivireina Iesu i paritawanana-opunei au mutulua.

¹³ Ma au pom 40 au mutulua i mae. Ma Satan, tauna i raelari. Gamogamo gaigaiaawai nai au dobuna i mamae ma God ana anela marei tauna i paini.

*Iesu, lebalebagai ruaga ma ruaga i raukwatuei
(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei.

¹⁵ Ma Iesu i ririwa i pa, “God ana mara vinevinena i getai. God ana vibadana vouna rava aubai, lamna i turiai. Ami goapoapena ona rupeni ma ona mae-tavirem ma Riwana Aiaina ona vitumaganei!”

¹⁶ Mara tagogi Iesu Galili topana au gerana i bababara nae. Ma lebalebağai ruağai i 'nanai, Simon* ma ana tevera Andrew au topa i raraugida.

¹⁷ Iesu i riwei i pa, "Ona nei ma ona votağotağıou. Ma me marina iana o tutuarui; nanare, ana viararamanimi da rava ona tuarui da ina vitumaganeu!"

¹⁸ Ma maratogogi ai agida i voterei ma Iesu i votağotağı.

¹⁹ Ma taui au gera i verau-nae. Iesu, Zebedi natunatuna i 'nanai, James ma John ai au waga ai agida wanawanarorona i yokaukauei.

²⁰ Ma maratogogi taui i górei, "Taumi ona nei ma ona votağotağıou!" Ma taui amai Zebedi† ana taunola maiteni i voterei ma Iesu i votağotağı.

*Iesu, arua-apoapoena rava awarina i viağagaña-opunei
(Luke 4:31-37)*

²¹ Iesu ana Tauvotağıma maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

²² Tauna ana rewapanana i viararamana eğä me mai Jew ai tarawatu babadai § nanare. Ma taurautaniğana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i rruiruinia i garara

²⁴ i pa, "Iesu Nasaretei, aiwai e góegoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godeil!"

²⁵ Ma Iesu riwa bagibaginei i riwei i pa, "Ma genuana! Nai orotona ma opu-tawanei!"

²⁶ Ma arua-apoapoena orotona i viakwjie i ma ponana i rata, i garara ma i opu-tawanei.

²⁷ Ma rava anatapui i bana-kaei ma taui ava i vitarapiri, "Wei aiwai? Wei viararamana vouna ma ana rewapanana maiteni! Wei ravana awarina rewapanana e mamae da arua-apoapoena i riwei ma tauna i votovetelelei!"

²⁸ Iesu nolana, maratogogi i tua Galili au anatapuna.

*Iesu, rava mağamağai i vilawani
(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tauvotağıma maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini góğurana ana au animatave i matamatave ma maranai Iesu i geta ma numa ravai, tauna i pariverei.

³¹ Tauna i nae wavyne awarina, nimana i vojjini ma i voagui da i vomairi. Lamna maranaina, ini góğurana i voterei ma wavinena, taui i paini.

³² Ma au bigai madega i neulai au murina, rava, ai rava doridoriai ma aiavoi arua-apoapoei au orai maemae, i neiae Iesu awarina.*

³³ Ma rava anatapui nai au melagaina i vitagogie i numa au metaetana.

³⁴ Ma Iesu, mağamağai ai doria nununai i vilawani ma arua-apoapoe mağamağai rava awari i viağagaña-opunei. Ma arua-apoapoena i aramanei da tauna anina God natuna ma lamna aubaina taui i vígæi da i genuana.†

*Iesu au Galili i raugugula nae
(Luke 4:42-44)*

³⁵ Ubaubanai boiboği, Iesu i vomairi ma numa i opu-tawanei ma i nae gabu au genugenu-nana. Ma kampa, God awarina i raupari.

³⁶ Muriai, Simon ana rava maiteni i nae da i baiei.

³⁷ Ma maranai Iesu i nelağai, ma i riwei i pa, "Rava anatapui e baibaiem."

³⁸ Iesu i paribelei i pa, "Tana nae taon ġelau i gógeğere, ma kampa maiteni God Riwana Aiaina ana raugugulei. Tau wei lamna aubaina a nei."

³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi doriana i vilawani
(Matthew 8:1-4; Luke 5:12-16)*

* **1:16:** Wavanaugh Peter † **1:20:** Eng. Zebedi. ‡ **1:21:** Eng. Capernaum. § **1:22:** Wariağai BADA, ana Tarawatu Moses i verei mai Israel aubai. * **1:32:** Madega ina neulai au murina anona lauvitau ana mara damona. Mai Jew ai lauvitau ana mara au Friday madega e neneulai au murina e vivikarei da Saturday madega e neneulai au murina e vororovorei. † **1:34:** Iesu i aramanei, mepa da ita kaei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta vígavia, me taui e vivinua-notenotei nanare. Jhn 6:15 ma inanai.

⁴⁰ Anina ma rava awarina opi doriana, i nei Iesu awarina ma au naona i peu ma i raudune ma agu i vibagei i pa, "Mepa da ma ġoei, anina da ma viaiainiu."[‡]

⁴¹ Ma Iesu nuabola orana i oai ma urana i vilolo i vodadani ma i riwa i pa, "Anina a ġoeġoei, ma aii!"

⁴² Ma maratogogi opi-doriana, oroto i voterei ma tauna i aii me.

⁴³ Anina ma Iesu i riwana-guratei i pa,

⁴⁴ "Tam ma nae! Aiawi tuptupua awarim, ega rava ma viegei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauie da ina vimataira faui awari! Pirisi pulo tauapuina ana vianina ina verei da tam u lawana."

⁴⁵ Wate orotona i nae ma aiwai awarina i tuptupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa ega rava ita mamaelana kampa i nae. Wate rava mepa maemaei i nei lesu awarina.

2

*Iesu, oroto gwaġagwaġana i vilawani
(Matthew 9:1-8; Luke 5:17-26)*

¹ Iesu ana tauvotaġoġa maiteni i wanavira-melei au Capeniam. Ma au pom ruāga au murina, rava nolana i nonori da tauna i nememei au melagai.

² Ma rava maġamaġoui i vitagogie i au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruāga ma ruāga, oroto gwaġagwaġana rasirasie i avarai da i neiai Iesu awarina.

⁴ Rava i maġa guratana ma ega tagotagogina da ita neiai Iesu awarina, lamna aubaina da tetelei i amġaena da au poewa ma gavogavo i bauni ma kampa gwaġagwaġana ana rasirasina i tere-ġairei lesu au naona.

⁵ Ma Iesu, nai ravai i 'nanai da ai vitumaġħana i rata, lamna aubaina gwaġagwaġana i riwei i pa, "Natu, am ġo'apoapoei, a nota-tawanei."

⁶ Anina mai Jew ai Tarawatu babadai ġelau kampa i kiakiala, au orai i vinua-notanota i pa,

⁷ "God ainelana ġo'apoapoei e notanota tawanei. Aiawi aubaina wei ravana nanare e bababani? Tauna, God e viviġibgi ma e ririwa da tauna, God nanare."

⁸ Maratagogi, Iesu Aruanei ai nota i vaia ma i riwei i pa, "Aiawi aubaina wei kauai o vivinu-notonotei?

⁹ Metauna i telatela: ġwaġagwaġana ata riwei, 'Am ġo'apoapoe a nota-tawanei?' Bo ata riwei, 'Ma vomairi, am animatave ma vaia ma ma babara?'

¹⁰ A ġoei da taumi ona aramei da Rava Natuna au dobu ana rewapani e mamae da rava ai ġo'apoapoe ina nota-tawanei ma ina vilawani." Ma gwaġagwaġana i riwei i pa

¹¹ "A riwem, ma vomairi, am animatave ma vaia ma ma nae au numa!"

¹² Orotona i vomairi ma maratagogi aravi i vaia ma i barba nae. Ma patara i raraubiga, i bana-kauei ma God i voepaepi ma i ririwa, "Tauai ega melanai kaua wenanare ata inanai!"

Iesu, Levi i kwatuei

(Matthew 9:9-13; Luke 5:27-32)

¹³ Iesu, Capeniam i voterei ma Galili topana au gerana i bababara ana tauvotaġoġa maiteni. Ma patara i nei awarina ma tauna God riwana viararamanana i vikarei.

¹⁴ Ma i verau-nae aburuna ma Apies* natuna Levi i 'nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, "Ma votaġoġoġi!" Levi i vomairi ma i votaġoġoġi.

¹⁵ Tax tautami ma ġo'apoapoei ravai maġamaġoui, Iesu ma ana tauvotaġoġa i votaġoġoġi. Ma anatapui, Levi ana au numa i kiala gogona ma i amam.[†]

¹⁶ Tarawatu Babadai ġelau lamna Pharisi, ma taui i 'nanai da Iesu tax tautami ma ġo'apoapoei ravai maiteni i amam. Anina ma Iesu ana tauvotaġoġa i riwei i pa, "Aiawi aubaina Iesu tax tautami ma ġo'apoapoei ravai maiteni e amam?"

¹⁷ Ma maranai Iesu wei riwana i nononori ma taui i riwei i pa, "Rava lawalawai, doketa ega ita ġoeġoei ma rava doridoriai, doketa e ġoeġoei. Tau a nei ġo'apoapoei ravai aubai ma ega rava jijimani aubai."

[‡] **1:40:** Mai Jew ai Tarawatu e ririwa da rava lepeleperai, taui miramirai me dobu gela ravai - *Jentail*. Mai Jew amapo nai ravai ega ina vodadani. Rava miramirai ega maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelei ma rava maiteni ina mae ma ina taparoro. * **2:14:** Eng. *Alphæus*. † **2:15:** Moses, BADA ana Tarawatu i girumi ma mai Pharisi wei Tarawatuna i votaġoġoġ-kauei. Ma taui kaua waduboi amamai ġariei maiteni i votovetelelei ma i riwa da aiavoi Tarawatu ega ita votovetelelei lamna taui rava apoapoei, ġo'apoapoei tau kauie.

Uji vitaraviravirana

(Matthew 9:14-17; Luke 5:33-39)

¹⁸ Mara tagogi, John Taubabataito ma Pharisi ai tauvotaḡotaḡo i ujuji. Ma rava ġelaui i nei Iesu awarina ma i vitara-virevirei, “Aiwai aubaina John Taubabataito ma Pharisi ai tauvotaḡotaḡo e ujuji, wate tam am tauvotaḡotaḡo eġa ita ujuji?”

¹⁹ Iesu i paribelei i pa, “Taumi o notanotai da taui aiavoi i raukwatuei tavine ana au torela, ina mae lota bo? Eġateni kaua! Maranai tavitavine vou orotona, taui maiteni e mamae, taui eġa ina uji.

²⁰ Wate mara ina ġeta maranai tavitavine vou orotona ina vaitawanei ma lamna maranaina ana rava ina uji.”

²¹ Ma riwa e mamae, “Tau kaua vouna a neia eġa me taumi ami kaua wadubona nanare. Eġa aiai ravana, gara vounet gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata.

²² Ma nanare, eġa aiai *wine* vouna ina vaini da *wine* aniterenana wadubona ġamoġamo opinei au orana ina iwagi. Mepa da ina kauei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni[‡]. Wate *wine* vouna, anina da *wine* aniterenana vouna au orana ina iwagi.”

Iesu ana riwa Sabat aubaina

(Matthew 12:1-8; Luke 6:1-5)

²³ Mara tagogi au Sabat, Iesu ana tauvotaḡotaḡo maiteni, *witi* wapuna au orana i nena. Ma ana tauvotaḡotaḡo *witi rovei* i vaini ma i amam.

²⁴ Pharisi ġelaui i 'nanai wei kauana i kaukauei ma taui Iesu i riwei, “Ma inanai, ata Tarawatu e mamae da Sabat, lamna lauvitau ana mara. Aiwai aubaina taui e vovobagibagi?”

²⁵ Iesu i paribelei i pa, “Me perovetai i girugirimia nanare. David ana tauvotaḡotaḡo maiteni am-irage ma aiwai i kauei? Taumi o iavi ma aiwai aubaina anona, eġa ota vinua-notenotei?

²⁶ ♦Pirisi Gegetelaranu Abiathar ana au mara, David, God ana au numa i rui ma palawa vovivirana i vaia ma ġelaui ana tauvotaḡotaḡo maiteni i verei da i ani. Moses ana Tarawatu e mamae da pirisi ava palawana e aniani.”

²⁷ Ma Iesu ana riwa au damona i riwa i pa, “God, Sabat i kauei da rava voaguna aubaina ma eġa rava ita kauei Sabat voaguna aubaina.

²⁸ Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotu urana irairaġena i vilawani

(Matthew 12:9-14; Luke 6:6-11)

¹ Mara ġelauna au Sabat, Iesu i naeme au pari numana ma oroto urana irairaġena i 'nanai kampa i kiakiala.

² Ma Pharisi ġelaui i ġoei da aiwaiei Iesu ita viwavui. Lamna aubaina i 'nana-taḡotaḡoi da oroto ita vilawani bo eġa au Sabat.

³ Ma Iesu, orotona i riwei, “Ma nei, au naoi ma mairi!”

⁴ Ma Iesu, ravai i vitara-virevirei i pa, “Sabat au marana, metauna i aii: Aiaina tana kauei bo apoapoena? Tana vilawana bo tana viragħena? Tarawatu aiwai i riwei?” Ma anatapui i genua.

⁵ Iesu ana amloġaġaina i 'nana viravira ma i 'nanai da taui orai i bado ma nuanuana i bokkauei. Ma orotona i riwei i pa, “Uram ma viloloi!” Ma i viloloi ma i lawana.

⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita viragħanei.

Iesu, Patara awari i babani

⁷⁻⁸ Iesu ana tauvotaḡotaḡo maiteni, taui i netawanei ma i nae au gera da ita vilauvit; ma mai Galili patara ġaġġaena i votaḡotaḡo. Rava maġamaġau, Iesu aiwai i kaukauei nolana i honori ma mai Galili ma Judea, Jerusalem taon, Idumea ma taon ġelaui waira Jordan taon au babagelauna, Taia taon ma Sidon taon,[†] taui anatapui i nei Iesu awarina.

⁹⁻¹⁰ ♦Iesu, rava maġamaġau i vilawani. Ma lamna aubaina doridoriai maġamaġau i viviamdu ma i ġoei da tauna ita vodadan. Lamna aubaina ana tauvotaḡotago i riwei da waga i vokaukauei.

* 2:22: Wine e tutupupua ma puropurona wine ana aniterenana ina viaisikasai 2:26: 1Sa 21:1-6 * 3:6: Herod ana rava anona lamna mai Jew ai boru, taui aiavoi Rome gabemanina i vovoagu. Taui ai bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava taui tauvibenabenam ai rava au oienaw awarii.

† 3:7-8: Eng. Tyre & Sidon. Wei ravana eġa mai Jew. * 3:9-10: Mrk 4:1

¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, "Tam God Natuna!"

¹² Ma Iesu taui i vīgæi da avena ita vīēga da tauna aiai.

*Iesu ana Apasol 12 i vinei
(Matthew 10:1-4; Luke 6:12-16)*

¹³ Anina ma Iesu i ġæe au ola ma ana ġoanei nanare, rava i kwatuei da awarina i ġei.

¹⁴ Tauna, nelara 12 i vinei da maiteni ita mae ma muriae ita paritawanei da ita raugugula. Ma i ġorei Apasol.

¹⁵ Ma i vovai-virewapani da arua-apoapoei rava au orai ina viopuni.

¹⁶ Taui i vinevinei 12 ai wava wenanare,

Simon i ġoregoreia Peter‡

¹⁷ ma Zebedi§ natuna James ma ana tevera John i ġorei Boaneges, anona waiparara natunatuna,

¹⁸ Andrew,

Philip,

Batolomeo*,

Matthew,

Thomas,

James, tauna Apius† natuna,

Thadeus‡,

Simon, tauna Ununurana,§

¹⁹ ma Judas Iskariotei; * tauna, Iesu tauvibenabenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

²⁰ Ma Iesu ana tauvotagħoġo maiteni i rui au numa. Ma patara i rieiai da taui ega tagotagogina da ita am.

²¹ Ma Iesu ana numa ravai nolana i nonori ma i riwa i pa, "Tauna i bua." Lamna Aubaina i nei da ina taravaini.

²² Tarawatu babadai ġelauj Jerusalemei i nei ma i riwa i pa, "Arua-apoapoei, ai bada Bielsibul† Iesu au orana i rui ma lamnei arua-apoapoei e viviopuni."

²³ Lamna Aubaina Iesu, wei Babadai i ġorei ma awanainei i pa, "Satan amapo Satan ega ina viopuni.

²⁴ Mepa da dobu ravai ina viġavia vivira, lamna dobuna ita mae ava.

²⁵ Ma nanare dam ina viġavia vivira, nai damna ita mae ava.

²⁶ Ma Satan ita vomairi ma ita viġaviana-melei, amapo ita mae ava.

²⁷ Taudanene amapo ega rava virewapanana ana au numa ina danene, ega da au naona ravana ġuravei ina raġini ma muriae ina danene.

²⁸ Riwa kaua a ririwemi da God ami ġo'apoapoei ma ami vijibogħa anatapui ina nota-tawanei.

²⁹ Wate aiai da Arua Vivivireina e viviġibogħi, God, nai ravana ana ġo'apoapoei ega melanai ina nota-tawanei ma ana ġo'apoapoe ina mae-nonoa."

³⁰ Iesu wenanare i babani, Aubaina rava ġelauj e ririwa, "Iesu au orana arua-apoapoei e mamae."‡

Iesu ana dam oina

(Matthew 12:46-50; Luke 8:19-21)

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

³² Ma patara Iesu i kiala kwaviviroi, ma taupariverena i riwei i pa, "Alom ma novunovum ma varevareim au doa ma e ġoegoem."

³³ Iesu i paribelei i pa, "Aiai alou ma aiavoi varevareiu?"

³⁴ Anina ma taui i kiakiala i 'nanai ma i riwa i pa, "Ona inanal! Wei taui alou ma varevareiu.

³⁵ Aiai God ana ġoana e kaukxaei, tauna alou ma novu ma vareieu."

‡ **3:16:** Anona ġaima. § **3:17:** Eng. *Zebedi*. * **3:18:** Eng. *Batolomeo*. † **3:18:** Eng. *Alphaeus*. ‡ **3:18:** Wavana ġelauja Judas - Luk 6:16 § **3:18:** Anona lamna taui mai Jew ma taui Rome e viviġavie. * **3:19:** Iskariot, lamna Judas ana melagħi wawana da auna lamna Iskariotei. † **3:22:** Eng. *Beelzebub*. Anona lamna, *nabugara ai bada*. ‡ **3:30:** Tarawatu tau girumi i parivajjigei Aubaina taui e ririwa da Arua Vivivireina ana nola lamna baravu da parauma. BADA ega melanai ai ġo'apoapoei ina nota-tawanei.

4

*Doa tapuna ma tapuna ai awanaina
(Matthew 13:1-9; Luke 8:4-8)*

¹ Iesu, giu i raukarena-melei Galili topana au adana. Ma patara i rie da ita rautaniġanei. Ma patara i rata, da tauna au waga i geru ma i kiala ma waga i dudu da i viraupu au topei ma patara au gera i mae.

² Ma kaua maġamaġau awanainei i giu ma i viararamana i pa,

³ “Ona rautaniġana! Taupaewa, ana wapu i vokaukauei ma pei i ravi awawari.

⁴ Pei ġelaui au eta i peu. Ma kiu i ġeta ma i ani.

⁵ Ma pei ġelaui doa au ġaiġaimana i peu, doa au avavana. Ma lamna aubaina maratagogi i gogo.

⁶ Wate maranai madeġa i rarani, maratagogi i poi, anona warami eġa ita ġaira guratana doa au orana.

⁷ Pei ġelaui, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

⁸ Ma pei ġelaui doa au aiaina i peu ma i gogo kaua ma i ua, ġelaui 30, ġelaui 60 ma ġelaui 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

*Aiwei aubaina Iesu awanainei i babani
(Matthew 13:10-17; Luke 8:9-10)*

¹⁰ Maranai Iesu ainelana i mamae ma ana tauvotaġo 12 ma taurautaniġana ġelaui i ġeta ma Iesu i vibajgi da awanaina onona ita riwei.

¹¹ Ma Iesu i paribelei i pa, “God ana vigulau ana kaua mamae govaġġana; taumi i vieġemi ma rava au tano maemaei, taui aiwai anatapui awanainei e paripari-verei.

¹² Lamna ana kauei da wariaġa peroveta aiwai i girugirumia ina tupua:

‘Taui ina inana ma eġa ita inainanai.

Taui e rarautaniġana ma eġa ita araramanei;
ma lamna aubaina taui eġa ita nenei God awarina
da ai ġo-apoapoe ita notatawanei.’

(Isaiah 6:9-10)

Doa tapuna ma tapuna anoi.

(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramanei bo? Ma awanaina ġelaui menanare ona aramananei?

¹⁴ Taupaewa, God riwana, rava anatapui e paripari-verei.

¹⁵ Rava ġelaui orai i bagibagi me etanai. Riwa au tepana e rauraei, wate maratagogi Satan e nenei da riwa rava au orai e vaivai-tawanei.

¹⁶ Ma rava ġelaui orai me doa viġaiġaimana. Taui, riwa i nonori ma maratagogi ana nuaiai riwa e vaivai.

¹⁷ Wate warami eġa da eġa ita mamae guratana. Ma maranai nuabola bo rau-iviaopaoe e nenei taui awari, aubaina taui ai tumaġġana God awarina e tereterei. Taui maratagogi e peupeu.

¹⁸ Rava ġelaui orai me pei, modu donadonai au orai e gogogolana. Taui anina riwa e nononori.

¹⁹ Wate lawana ai nuabola ma mane ai nuavainana ma kaua ġelaui ai au nuaiai e ruirui ma God riwana e lavalavani da eġa ita uaua.

²⁰ Ma ġelaui, taui me pei doa au aiaina i peu. Taui, lamna anina riwa e nononori ma e vaivai-kauei ma e uaua: ġelaui 30 ma ġelaui 60 ma ġelaui 100.”

²¹ Iesu i riwei i pa, “Rava, eġa rampa ita neinei da iriga au gabaurina ita tereterei bo vataru au gabaurina ta pa? Rampa ana au anikiala e tereterei ta pa?”

²² Kaua mamae govaġġai, anataputapui a vieġġi ma kaua govagovaġġai nanarena ana vieġġai.

²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwei o nononoria ona rautaniġanana-kauei, ruva o ruveruveia, God nanare avarimi ina ruvai ma ġelauna ina tavipotoi.

²⁵ Lamna aubaina, mepa da riwau ona aramanei, tau ġelauna ma ġelauna ana veremi. Ma taui eġa ita aramanei, lamna aiwai aburuna i nononoria, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, *witi* peina au doa ita ravi-awawari.

²⁷ Ma waguvvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanainei.

²⁸ Doa ana nuaina, pei me *witi* e vivigogoi ma e uaua. Au naona e raraupairei ma muriae e roverove ma muriae onona e magumagura au tapina.

²⁹ Maranai i magura, rava petona e raraukarei. Tuaruta marana i ġetai.”

*Pei aburuoina ana awanaina
(Matthew 13:31-32, 34; Luke 13:18-19)*

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi?

³¹ Wenanare, wei aina peina, lamna me gaga peina, pei aburuoina au dobu ma au doa i paewi.

³² Ma peina i gogo ma i rata da ai muomuo i ġetawanei ma raġaraġai ġaegħae i terei ma au ġoui, kui ai noġi ita voai.”

³³ Ma Iesu, awanaina maġamaġaui, rava au matai i raugugulei da taui ai rau-taniġana ana au ruva nanare.

³⁴ Awanainei, rava awari i giugiu, wate ana tauvotaġoġa ava awari kaua anatapui i vivieġgai.

*Iesu, kojikojira i ravi-daumorai
(Matthew 8:23-27; Luke 8:22-25)*

³⁵ Nai aubigaina Iesu, ana tauvotaġoġa i riwei i pa, “Tana damana topa au baba ġelauna.”

³⁶ Anina ma taui patara i voterei. Ma anatapui Iesu, maiteni au waga i geru ma i damana, waga ġelaui maiteni.

³⁷⁻³⁸ Iesu, waga au murina unutana i terei ma i raunuavuru. Ma kojikojira ġaegħaena i tupua ma rabama, waga au tepana i rauraei ma waira, waga i oaoi. Ma ana tauvotaġoġa, tauna i ravi-dagħidgħu ma i riwei i pa, “Taugħi, nuanuam e bolabolai bo eġa da tana iraż?”

³⁹ Ma tauna i vomairi ma ive i viġiae i ma i riwei i pa, “Ma genuana!” Ma rabama i riwei i pa, “Ma mae-genuatau!” Ma ive i wanatuini ma daumora ġaegħaena i matave.

⁴⁰ Iesu ana tauvotaġoġa i riwei i pa, “Aiwai aubaina o rovorovo? Taumi amapo da eġa ota vitumaġħana!”

⁴¹ Ma taui i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoena oroto awarina i viaġaġana-opunei.

(Matthew 8:28-34; Luke 8:26-39)

¹ Iesu ana tauvotaġoġa maiteni Galili topana au baba ġelauna i ġeta, mai Gerasa ai au dobu.

² Wei au dobuna, arua-apoapoena oroto au orona maemaena.

³⁻⁵ Eġa aiai tagotagogina da ita vovaiubai. Mara maġamaġauna, aena ma urana seinei i pani. Wate wei i vialtituini, ma eġa tagotagogina da seinei ita pani. Marai ma waguvvarai i nene-labalababa ma i garagarara ma ġaime tupuana i boribori-melei ma au kokoaga ma au ola i raunuma.

⁶ Maranai Iesu wagei i opuopu, arua-apoapoei orotona i ruiruinia, aueia Iesu i 'nanai ma kokoagei i ruba ma Iesu au naona i mae-peu ma iraudune.

⁷⁻⁸ Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ġeġgieri? God wavanei a viviġġaim da eġa ma kovoġiū!”

⁹ Iesu, orotona i vitara-vireirei i pa, “Tam wavam aiai?”

I paribelei i pa, “Tauai a maġa, aubaina tau wavau lamna Ġavia Patarana.”

¹⁰ Ma arua-apoapoei, Iesu i vibaq-a-gurtei da avena nai dobunei ita viopuna-tawanei.

¹¹ Ma poro boruna ġaegħaena au għereġġe ola au adana i labalaba.

¹² Ma arua-apoapoei, Iesu i vibaq, “Ma paritawelai poro au orai ana rui.”

¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba għajra da au topa i monu.

¹⁴ Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimmanina. Ma taui i rovo kaua.

¹⁶ Ma aiwai i tupua orotona ma poro awari, taui i nainanaia, rava i riwana-naiei.

¹⁷ Ma dobuna ravai, Iesu i vibaq-i da dobuna ita oputawanei.

¹⁸ Iesu au waga i gerugeru ma orotona, Iesu i vibaq-i pa, “Tau maiteni tana nae.”

¹⁹ Iesu i viġiae i ma i riwei i pa, “Ma naeme am au dam. Ma BADA kaua aiwai ġaegħaena i kaukaueia ma ana iviāiai tam awarim, taui ma pariverei.”

²⁰ Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma taui anatapui i nononoria i baiei.

*Iesu, Jairus natuna wavinena ma wavine doridoriania i vilawani.
(Matthew 9:18-26; Luke 8:40-56)*

²¹ Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai.

²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

²³ ma i vibaga-guratei i pa, "Natu guguinina e irairaġe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariġuruvi ma i votaġotagoi.

²⁵ Wavine tagogi kampa patarana au orana awarina tara-doriana i mae da madeġa 12 i kwa.

²⁶ Ana mane anataputapuna, dokedoketa maġamaġau awarri i tawanei ma eġa tagotagogina ita vilawani ma amapo da ana doria i rarata.

²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

²⁹ Maratagogi, tara-doriana i wanatuini ma malana i vaia da i lawana.

³⁰ Nai maranaina, Iesu malana i vaia da ana rewapani i opu-tawanei ma i mae-tavirei patara au poui ma i riwa i pa, "Aiai au gara i vodadani?"

³¹ Ana tauvotaġoġo, tauna i riwei, "Ma inanai, patara i mae gariġuruvim! Ma menanare da u riwa 'Aiai i vodadani?'

³² Wate Iesu i 'nana viravira da ita inanai aiai i vodadani.

³³ Wavine i rovo kaua ma i sisisi, wate i aramaniei aiwai awarina i tupua ma i nei ma Iesu au naona i raupari ma aiwai anatapui i vieġei.

³⁴ Anina ma Iesu, wavine i riwei i pa, "Natu, am tumaġana i vilawanim. Am doria i kwa, ana nuaubam ma nael!"

³⁵ Maranai i bababani ma rava ġelaui Jairus ana numei i nei ma i riwei i pa, "Natum ana mara i kwa. Eġa Taugiu ma visina-viravirai!"

³⁶ Iesu ai babani i nonora-tawanei ma Jairus i riwei i pa, "Eġa ma rovo, ma vitumaġana!"

³⁷ Iesu, rava ġelaui i viġiae ma Peter ma James ma ana tevera John maiteni i nae.

³⁸ Ma Jairus ana au numi i ġeta ma Iesu, patara i 'nanai; i toutou ma i taratarakwatu

³⁹ ma i rui ma taui i riwei i pa, "Aiwai aubaina o taratara-kwatu ma o toutou? Tevera eġa ita iraġe, tauna e matamatave ota."

⁴⁰ Ma taui, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġoġo tonuġa maiteni i rui mepa tevera i matamatave lana.

⁴¹ Iesu, tevera nimana i vaia ma i riwei i pa, "*Talitha koum!*" wei anona, "Kukuma, ma vomairi!"

⁴² Maratagogi i vomairi ma babara i vikarei (Tauna ana madeġa 12). Ma taui i ba kaua.

⁴³ Iesu, taui i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivireirei

¹ Iesu ana tauvotaġoġo maiteni nai dobuna i netawanei ma i naeme ana au melagai.

² Ma Sabat marana i ġeta ma tauna giu i vikarei au pari numana. Ma rava maġamaġau i riea da i rautaniġanei. Taui anatapui i baiei ma i vitara-viravira vivira i pa, "Wei tauna nuaulaula ma aramanana mepa i vaia?" Ma, "Kaua aiwaiei e kaukauei?"

³ Anina ma taui ava i babani vivira i pa, "Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?" Ma lamna aubaina mai Nasaret, Iesu i parivireirei.

⁴ Iesu, taui i riwei i pa, "*Peroveta* dobu au ġelaui e vivivirei, wate ana au melagai, ana rava ma ana dam oina, eġa ita vivivirei."

⁵⁻⁶ Tauna i baiei da rava eġa tauna ita vitumaġanei. Ma eġa tagotagogina da kaua vivirepanai kampa ita kauei. Tauna urana, rava ruāġa ota doridoriai au tepai i terei ma i vilawani. Ma muriai, melagai nununau ġereġerei i viararamana nae.

Iesu ana Apasoli partawaneda ita viararamana

⁷ Ma Iesu, taui 12 i ġoreiħi ma ruaruaġei ava i paritawanana-opunei ma rewapani i verei da arua-apoapoei ina viġaġana-opunei.

⁸ Ma riwa bagibaginei i riwei i pa, "Ami au vagai, eġa aiwai ona vaia anina jiġona ava; eġa lam, eġa autu bo mane au urami.

⁹ Ae uma ona oteni ma eġa kwama ġelauna ona vaia."

¹⁰ Ma i riwei i pa, "Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.

¹¹ *Mepa da au melagai o ġeta ma rava eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da taui ai wavu!"*

¹² Ma taui i opu ma rava awari i raugugula ma i riwei i pa, "Taumi ami ġo'apoapoei ona voterei ma ona mae-taviremi God awarina!"

¹³Taui, arua-apoapoei i viägħagna-opunei. Ma rava doridoriai maġamāġau, olive oirana au kolai i buloi ma i vilawani.

John Taubabataito ana iraġe

¹⁴⁻¹⁶*Iesu nolana i nae da rava anatapui i aramanei ma tauna i babaniei. Ma rava ġelaui i ririwa i pa, "Tauna, kaua vivirewpanai e kaukauei, aubaina tauna John Taubabataito iraġelei i vomairi me." Ĝelaui i ririwa i pa, "Tauna Elijah i nememei." Ma ġelaui i ririwa i pa, "Tauna peroveta wariaġai nanare." Ma gulau Herod,[†] nolana i nonori ma i riwa i pa, "Tau, John Taubabataito uana a borutini; marina i vomairi me."

¹⁷⁻²⁰John ana virarauta, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġirigiriei i pa, "Tarawatu e mamae da eġa vareim awana ma kwalei." Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuanuana i raġaraġa.

Ma Herodias, John awarina amlona i ġaġġai ma viraġenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kaei.

²¹ Ma wavine, gavogavo i 'nanai, maranai Herod ana tupua marana i ġeta ma torela i vokukauei. Ma gabemani babadai ġaġġaei ma sorodja ai babada ġaġġaei ma Galili babadai i raukwatuei.

²² Ma Herodias natuna wavinena i nei ma i ara. Herod ma taui maiteni i amam i vinuaiaini. Ma gulau, guguini i riwei i pa, "Aiwai u ġoegoeia ma vibagħi ma ana verem!"

²³ Ma i parivainuāġani i pa, "God au matana a ririwem da aiwai u vivibagħeu ana verem da au vigulau navanavana au paratana."

²⁴ Ma tevera wavinena i opu ma alona i paridadanei i pa, "Aiwai ana vibagħi?"

Ma i paribelei i pa, "John Taubabataito kolana."

²⁵ Ma maratagogi i vipaparana ma gulau awarina i rui ma i vibagħi i pa, "A ġoegoei da marina John Taubabataito kolana ma vereu au aboma!"

²⁶ Ma gulau nuanuina i bola-kaei. Wate parivainuāġana boibogħi i kaei taui i amam au matai. Ma lamna aubaina guguini, aiwai i vivibagħi anina i vianinei.

²⁷ Ma tauviraġena i paritawanei ma i riwei da John kolana ita nejai. Ma i nae panipani au numana ma John uana i borutuini.

²⁸ Ma kolana au aboma i terei ma guguini i verei ma guguini, alona i verei.

²⁹ Ma John ana tauvotaġo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagħibgi

(Matthew 14:13-21; Luke 9:10-17; John 6:1-14)

³⁰ Apasol i ġeta memei ma aiwai anataputapuna i kaukauei ma i raraugugulei, Iesu i vieġei.

³¹ Lamna maranai, rava maġamāġau i nenei ma i nena da Iesu ana tauvotagoġo maiteni eġa gavogavo ita maemae da ita am. Lamna aubaina Iesu, taui i riwei i pa, "Taumi ava ona nei ma tana nae au mutulua da laumi ina tau mara aburuna."

³² Ma anatapui wagei i nae au mutulua.

³³ Wate rava maġamāġau i 'nanai i nena ma i aramanei taui aiavoi. Ma melagai nununai anatapui geraei i ruba gogona da au dobuna i aigħeta.

³⁴ Maranai Iesu wagei i tuopu au gera ma patara ġaġġaena i 'nanai ma nuanuana i bokalauei. Taui me sипu ma eġa ai tauvipaipai. Ma Riwana Aiaina viararamanai i raukarei.

* **6:11:** Act 13:51 * **6:11:** Wariaġa mai Jew, tauvagħi u nenemem ħi Israel. Taui au aei pokau e raraubuabu maranai Israel ħi Israel au parata u ġeġeta, lamna taui orai u viaiai. Ma Iesu ana tauvotagoġo wei i kaei da melagai ravai ina notai, "Tauvotagoġo u ririwa da tauta orata apoapena me tauta eġa mai Jew." * **6:14-16:** Mrk 8:28 † **6:14-16:** Herod Antipas, Galili ħi Galwalatona.

³⁵ Ma au biga e tuturiai ma ana tauvotağotağ i nei awarina ma i riwei i pa, "Wei mutulua ma madega e arearere.

³⁶ Rava ma paritawanei da ina nae au melagai ma au wapu au ġereğere da ai lam ina gimarai."

³⁷ Wate Iesu i paribelei i pa, "Taumi ona viambagibagi!" Ma taui i paribelei i pa, "Mepa 200 denarii[‡] tana vaia da wei patarana tana viambagibagi?"

³⁸ Ma Iesu i paridadanai i pa, "Palawa biağā awarimi? Ona nae ma ona baiei!"

Maranai i nelägai ma i riwa i pa, "Awariai, palawa five ma iana ruağā."

³⁹ Anina ma Iesu, patarai i riwei i pa, "Boru nununai, gidagida au majimajığai ona kiala nae."

⁴⁰ Ma taui ai au boru 50 da 100 nanare i kiala nae.

⁴¹ Ma Iesu, palawa five ma iana ruağā i vaia ma i ġotouta au mara ma God i viegualaei. Ma palawa i vogimagimai ma iana i ġutai da ana tauvotağotağ i verei ma taui, rava i verei.

⁴² Ma patarai i am ma i am-iaua.

⁴³ Ma ana tauvotağotağ, lam am tereterenai i tuarui da poa muomuo 12 i vioai.

⁴⁴ Nelara 5,000 i viambagibagi.

Iesu, waira au tepana i babara

(Matthew 14:22-33; John 6:15-21)

⁴⁵ Anina ma Iesu, ana tauvotağotağ i egari da ita aidamana au Bethsaida.[§] Taui au waga i geru da i nena ma tauna, patarai i paritawanei.

⁴⁶ Patara i paritawanei ma tauna ava i ġae au ola da ita raupari.

⁴⁷ Ma waguvra ana tauvotağotağ au waga au topa ma Iesu au alala.

⁴⁸ Ma ana tauvotağotağ, lare i vovoguratei da ita ġota wate ive i viraumatamatani. Ma maratotomnanare, Iesu i nae awari. Tauna waira au tepana i bababara ma i ġoie da taui ita tutelarei.

⁴⁹⁻⁵⁰ Ma maranai taui, Iesu i 'nanai topa au tepana i bababara ma i notai da tauna konäga ma i rovo kaukaua ma i vigaragararei. Ma maratagogi Iesu i riwa i pa, "Tepami ina tora! Tau, eġa ona rovo!"

⁵¹ Ma au waga i geru ma ive i wanatuini ma taui i bana-kauei.

⁵² Avena da kaua palawa awarina i kauei i 'nanai, wate ana rewapani eġa ita aramana-kauei. Taui orai i bado ma i vinuanaina.

Iesu, rava doridoriai maġamaġau i Genesaret i vilawani

(Matthew 14:34-36)

⁵³ Taui, topa i damani ma au Genesaret i ġota ma ai waga i raġini.

⁵⁴ Taui, waga i oputawanei ma rava, Iesu i 'nanai ma maratagogi i aramanei da tauna.

⁵⁵ Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirasie i vivaneiae.

⁵⁶ Iesu mepa i nenele, melagai ġaeġaei ma muomuo 100 mepa rava e mamae lana. Ma rava, ai rava doridoriai nai au melagaina i neiae au deba. Ma i vibaġa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

Amamami ai giu

(Matthew 15:1-9)

¹⁻⁴ Pharisi ma Jew anatapui, magumagura ai giu maġamaġau e notanota-jijini. Taui, ai aniuma ma ai aniam anatapui e oġaoġai lamnei taui e viaiaina-melei God au matana. Ma maranai au maket da e nenei, urai ina oġai ma ina am. Taui eġa ina am da au naona urai ina oġa kauei me ai magumagura ai giu nanare.

Maratagogi Pharisi ġelaui ma Tarawatu Babadai, Jerusalem ei i nei Iesu awarina da ita rautaniġanei. Ma taui i 'nanai da Iesu ana tauvotağotağ ġelaui, urai eġa ita oġai ma i amam.

⁵ Ma taui, Iesu i vitara-virevirei i pa, "Aiwi aubaina am Tauvotağotağ magumagura ai giu, eġa ita votağotağoi ma ana ura miramirai e amam?"

⁶ Ma Iesu i paribelei i pa, "Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepaepai,
wate nuuanuai aueia.

⁷ Taui rava ai giu e viviararamani.

Lamna aubaina ai voepaepa anona eġa.'

(Isaiah 29:13)

[‡] **6:37:** 200 denarii. Denarius tagogi lamna taubagibagi ai maia au pom tagogo nolana aubaina. [§] **6:45:** Eng. Bethsaida.

⁸Taumi, God ana Tarawatu o teretere-tawanei ma ami giu o votaḡotaḡoi.”

⁹Ma i riwana-melei i pa, “Taumi o aramana kaua da God ana Tarawatu o gedugeduaiem a amamami ai giu o vovotaḡotaḡoi.

¹⁰God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viraḡeni.*

¹¹Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei pulo, God aubaina.’

¹²Wei viararamanana, taui e viviḡei da amana ma alona ina voagui.

¹³Ma wei taunei viararamana, rava awari o vividamani; ma God riwana o vivikwakwavi. Ma kaua maḡamāgaui ġelau mai teni o kaukauei.”

Metauna kauai, rava orai e vivimirai.

(Matthew 15:10-20)

¹⁴Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei.

¹⁵⁻¹⁶Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

¹⁷Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai.

¹⁸⁻¹⁹Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

²⁰Anina ma i riwa i pa, “Aiwai, rava oranei e opuopu; lamna, rava e vivimirai God au matana.

²¹Anina rava nuanuanei vinuanotanota apoapoei e opuopu me: viawawana labalababa, danene, viraḡena, awadanene,

²²ambo, rau-iviaipoapoe, moru, erawa, unura, terevaideḡa, mae-ḡaeḡae ma opa.

²³Wei kauai apoapoei anatapui oranei e opuopu ma rava e vimiramirai.”

Jentail wavine,[†] Iesu i vitumaḡanei

(Matthew 15:21-28)

²⁴Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa.

²⁵⁻²⁶Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoea, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoea ita viopuni.

²⁷Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lamata vaia da auou ata verei da au naona roaroa ina am-iaua.”‡

²⁸Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e rauraua e aniani.”

²⁹Ma Iesu wei i riwei i pa, “U paribelana kaua, aubaina ma nae au numa. Arua-apoapoea natum i opu-tawanei.”

³⁰Ma wavine i naeme au numa. Natuna wavinena i ’nanai i matamatave, arua-apoapoea boibogi tevera i opu-tawanei.

Iesu, oroto taniḡa-potapotana ma mena birebirena i vilawani

³¹Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana.

³²Oroto taniḡana potapotana ma menana birebirena i neiai Iesu awarina ma i vibaḡai da urana au inina ita terei da ita vilawani.

³³Iesu, oroto i taravaina-opunei da taui ava ma ura-gigina, oroto au taniḡana i terei ma ura-gigina ġelauna i ova ma menana i vodadani.

³⁴Nuanuana i bolai ma i goutata au mara; i lavutu tawanana ma oroto i riwei i pa, “*Ephathal!*” Wei anona, “Ma wanatawanei!”

³⁵Maratagogi taniḡana i wanatawanei ma menana i vidagudagu ma i babani kaua.

³⁶Ma Iesu, taui i viḡaei da aiwai i tuputupua, avena rava ita vieḡei. Iesu, rava i viḡaei; wate taui eḡa ita rautaniḡana ma riwa i vitual.

* 7:10: Exo 20:12; Exo 21:17 * 7:15-16: Giruma ġelaui Mark uranei i girugirumia wei riwai wenanare e mamae, “*Mepa da taniḡani e mamae, ona rautaniḡana.*” † 7:23: Rava eḡa mai Jew. ‡ 7:27: Riwa roaroa wei au awanaina lamna mai Jew. Taui e notanotai da taui i ai guratana eḡa me rava ġelaui. Lamna aubaina taui dobu ġelaui ravai e ḡoregorei auou.

³⁷ Ma maranai ravai wei i nonori, tau i bana-kauei ma i riwa i pa, "Aiwai anatapui i kauana-kauei. Tauna, rava taniga potapotai e vivilawani da e rarautanigana ma menabirebirei e bababani."

8

*Iesu, rava 4,000 i viambagibagi
(Matthew 15:32-39)*

¹Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġoġa i kwatuei da i nei ma i riwei i pa,

²"Au pom tonuġa patara maiteni a mae ma ai lam eġa ma a rau-nuapoapoelei.

³Tau i ġelau, uamei i nei. Mepa da ana am-iraġe ana paritawanei ai au numa, ma au etanai ina raumolagħu."

⁴ Ma ana tauvotaġoġa i paribelei i pa, "Wei mutulua ma mepa lam tana vaia da wei patarana tana viambagibagi?"

⁵ Ma Iesu, tau i paridadanei i pa, "Awarimi palawa biaġa?"

Tau i riwa i pa, "seven."

⁶ Ma Iesu, patara i riwei da au doa i kiala. Ma palawa seven i vaia ma God i viegualaei ma i vogimagħi ma ana tauvotaġoġa i verei da patara i verei.

⁷ Ma taui awari, iana muomuo i ruāga ota. Iesu i vaia; God i viegualaei ma ana tauvotaġoġa i verei da patara i verei.

⁸ Taui anatapui i am da i am-iaua. Ma lam am tereterenai i tuarui da poa ġaġeġi seven i vioai.

⁹ Rava 4,000 i viambagibagi. Ma muriae i paritawanei ai au numa.

*Pharisi, God ana mataira i vibaġei
(Matthew 15:39-16:4)*

¹⁰ Maratagogi, Iesu ana tauvotaġoġa maiteni au waga i geru ma i nae Damanuta ana au parata.

¹¹ Pharisi ġelaui i nei ma vipariparigħi i vikarei Iesu maiteni. Tau i ġoēi da Iesu ita raudadani da mataira Godei ita viatataiei.

¹² Iesu, Aruanei i lavutu tawanaganma ma i riwa i pa, "Wei kimta voui, aiwai aubaina mataira e ġoġeġei? A ririwana-kauei, amapo mataira eġa ona inanai."

Iesu, ana tauvotaġoġa I parivainotai

¹³ Anina ma Iesu, patara i netawanei ma ana tauvotaġoġa maiteni au waga i geru me ma i damana Topa Galili au baba ġelauna.

¹⁴ Ma ana tauvotaġoġa, nuanuai i vuru da ai palawa ita vaia ma palawa tagogi ava au waga i mamae.

¹⁵ Iesu, tau i parivainotai i pa, "Pharisi ma Herod ai giu ma ai viararamana morumoruna ona inana-kauei! Lamna me yist.*"

¹⁶ Ma tau i babani vivira i pa, "Tauta eġa ata palawa aubaina da e ririweta."

¹⁷ Ma Iesu i aramanei ma tau i riwei, "Aiwai aubaina o bababani da taumi awarimi eġa palawa? Taumi amapo da eġa ota aramana ma o vivinuanaina? Orami i bado bo?

¹⁸*Matami e mamae ma eġa ota inainana. Ma taniġami e mamae ma eġa ota nonora. Ma o vinuanotonta bo eġa?

¹⁹ Maranai palawa five a vogimagħi rava 5,000 aubaii, lam am tereterenai o tami da poa biaġa o vioai?"

Tau i paribelei, "Twelve."

²⁰ "Ma maranai palawa seven a vogimagħi rava 4,000 aubaii, lam am tereterenai o tami da poa ġaġeġi biaġa o vioai?"

Tau i paribelei, "Seven."

²¹ Ma tau i riwei i pa, "Ma amapo da o vivinuanaina!"

Iesu, oroto mata apoapoena i vilawani au Bethsaida

²² Tau i nei au Bethsaida ma rava ġelau, oroto matana apoapoena i nejai Iesu awarina ma i vibaġa-guratei da ita vodadani.

²³ Ma Iesu, oroto matana apoapoena i raunimavoai ma melagaie i taravaina-opunei. Ma kampa matana i ovai ma urana au matana i terei ma i paridadanei, "Aiwai e inainanai bo eġa?"

²⁴ Ma i taepai ma i riwa, "Rava a inainanai ma taui me ai ita bababara."

* **8:15:** Yist mai Jew awarri awanainei lamna aiwai da apoapoe, mira bova e vivitua bo e vivimägħi. Weka Iesu mai Pharisee ma mai Herod ai lawana ma ai giu morumorui e babaniei, da eġa ina tua. * **8:18:** Mrk 4:12

²⁵ Iesu, urana i tere-melei oroto au matana. Ma matana i wanatawanei da aiwai anatapuna i 'nana-kauei.

²⁶ Iesu, tauna i paritawanei ana au numa ma i riwei, "Ega ma nae au melagai! Wate jijimanina ma nae au numa."

*Peter i riwa da Iesu, tauna Keriso
(Matthew 16:13-16; Luke 9:18-20)*

²⁷ Iesu, ana tauvotagotaño maiteni i nae melagaii Caesarea Philipai au ġereġerei. Maranai i nena ma Iesu, taui i paridadanei, "Rava e ririwa; tau aiai?"

²⁸ Ma taui i paribelei, "Gelau e ririwa da tam, John Taubabataito. Ma ġelaui Elijah. Ma ġelaui e ririwa da peroveta wariaġana tagogi."

²⁹ Ma Iesu, taui i paridadanei, "Wate taumi, mena o notanota-nei? O ririwa da tau aiai?"

Peter i paribelei, "Tam God ana Messiah - anona Keriso."

³⁰ Iesu, taui i viġaei da ega aiai ina riwei da tauna aiai.

*Iesu ana iraġe ma ana vomairi me i babaniei
(Matthew 16:21-23; Luke 9:21)*

³¹ Ma Iesu i raukarei da ana tauvotagotaño i giuni i pa, "Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina virāgeni. Ma au pom tonuġa au murina ina vomairi me."

³² Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

³³ Wate Iesu i mae-tavirei ma ana tauvotagotaño i 'nanai. Ma Peter i eni, i pa, "Satan ma nae au muriu! Tam am nota ega Godei ita nenei, ega da ravei."

*Iesu votaġotagona anona
(Matthew 16:24-28; Luke 9:23-27)*

³⁴ Ma Iesu, patara ma ana tauvotagotaño i raukwatuei ma i riwei, "Mepa da aiai votaġotagoi. Tauna ina boviana-melei ma ana korosi ina avarai ma ina votaġotagoi."†

³⁵ Aiai ana lawana e tatājjini, ina vine-boai. Ma aiai da ana lawana i verenei; Tau ma Riwana Aiainā aubaina. Tauna ana lawana ina vaimelei.

³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai.

³⁷ Wate aiwaiei am lawana ma gimara-melei.

³⁸ Mepa da aiai: tau ma au viararamana ina vinimalei; ma i mae-puputeu; ma ana ġoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni."

9

¹ Ma Iesu, wenanare i riwei, "Taumi a ririwana-kauemi; rava ġelaumi weka o maimairi amapo ega ona iraġe da God ana vigulau ona inanai ana rewapanana ina nei."

*Iesu inanana i virai
(Matthew 17:1-13; Luke 9:28-36)*

² Au pom six muriai, Iesu, Peter, James ma John i taravaini. Ma taui ava i ġae ola ġaegaena au tepana. Ma kampa taui au matai, Iesu inanana i virai.

³ Ana gara i arapoira ma gamrina i vimata-kamokamota; ega me aiwai ġelauna au dobu nанare.

⁴ Ma kampa au matai, Elijah ma Moses i ega. Ma Iesu maiteni i bababani.

⁵ Ma Peter Iesu i riwei, "Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!"

⁶ Ma taui i rovo kaua ma Peter ega ita aramanei da aiwai i latolatoni.

⁷ Anina ma apau i ega ma taui i purui. Ma pona apaei i opu ma i riwa i pa, "Wei Tau Natu au nuavainana, ona rautaniġanei!"

⁸ Maratagogi taui i 'nana viravira ma ega aiai ġelauna ita inanai ma Iesu, tauna ava.

⁹ Ma maranai olei i ġaġairai ma Iesu, taui i viġaei da aiwai i 'nananaia ega ina vieġai da au naona Rava Natuna iraġelei ina vomairi me.

¹⁰ Ma taui, wei riwana i voletelei ma i babani vivira i pa, "Iraġelei vomairi me anona aiwai?"

* 8:28: Mrk 6:14-15 † 8:34: Wei lamna awanaina. Anona lamna Iesu ana tauvotagotaño anina vinimala ma apoapoi ina nelagai aubaina taui, tauna i votaġotagoi. Tauna ega ita ririwa da ana tauvotagotaño au korosi ina iraġe me tauna.

* 9:7: Mrk 1:11

¹¹ Ma tauui, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

¹² Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariaġa i girumi da Rava Natuna ina vinuapoapoe kaua ma ina inana-geduaiei.

¹³ Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

Iesu, arua-apoapoaena tevera orotona awarina i viopuni

(Matthew 17:14-21; Luke 9:37-43a)

¹⁴ Iesu ana tauvotaġoġo tonuġa maiteni olei i ġaira memei ai rava awari ma patara ġaeġaena, taui i gariġuruvi. Ma Jew ai tarawatu babadai, taui maiteni i vivitarapiri.

¹⁵ Maranai patara, Iesu i ‘nanai. Taui orai i auepai ma awarina i ruba ma i viegualaeui.

¹⁶ Iesu, taui i vitara-virevirei, “Aiwai o vitarapiriei?”

¹⁷ Orotu tagoggi patara au poui i paribelana, “Tauviararamana, arua-apoapoaena natu orotona au orana e mamae ma i kaei da eġa ita bababani, lamna aubaina a neiai awarim.

¹⁸ Maranai ana doria e ururu-melei, lamna arua-apoapoaena: tauna au doa e tawatawanei; gamona e vivipropuro; ivona e utauta ġiriġirie; ma inina e badobado. Am tauvotaġoġo a vibagħi da arua-apoapoaena ita viopuni, wate eġa tagotagogina da ita kaei.”

¹⁹ Ma Iesu i paribelei, “Oo mara aiwai ona vitumaġħana! Ta mae ġaġa ma ami vita ana ‘vara ġagħali? Tevera awriu ona nejal!”

²⁰ Ma tevera i nejal Iesu awarina. Ma maranai arua-apoapoaena, Iesu i ‘nanai, maratagogi tevera i viaikwajiana-gurtei da au doa i tonei ma i vitatauvira ma i vivipropuro.

²¹ Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

²² Arua-apoapoaena mara au anatapuna, tauna ai au araratana ma au waira e tawatawanei ma i ġoġi da ita vitraġeni. Mepa da tam tagotagogina; ma raunuapoapoeħelai ma ma voaquijal!”

²³ Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġħana, God anatapuna ina kaei tauna aubaina.”

²⁴ Maratagogi tevera amana i garara, “A vitumaġħana, wate au tumaġħana eġa ita rata ma ma voaquiu da ina ratal!”

²⁵ Iesu i ‘nana da patara i rierieiai awarri ma lamna aubaina arua-apoapoaena i egar i pa, “Tam arua taniga-potapotana ma gumgum. Tau a egaegarim da tevera ma opu-tawanei. Ma eġa melanai au orana ma rui me!”

²⁶ Ma arua i garara ma tevera i viaikwajiana-gurtei ma i opu-tawanei. Ma tevera inanana me taubeu. Ma rava maġamaġau kampa i riwa, “Tauna i’raġe!”

²⁷ Ma Iesu, tauna urana i vojjini ma i sinaepai da i mairi.

²⁸ Muriai Iesu, ana tauvotaġoġo maiteni i rui au numa. Ma maranai taui ava ma i paridadanei i pa, “Aiwai aubaina tauai eġa tagotagogina da arua-apoapoaena ata viopuni?”

²⁹ Iesu, i riwa, “Arua-apoapoei me wenanare, pari ainelana ina viopuni.”

Iesu ana iraġe i babaniana-melei

(Matthew 17:22-23; Luke 9:43b-45)

³⁰ Iesu, ana tauvotaġoġo maiteni dobuna i netawanei ma Galili i verautuini. Iesu eġa ita ġoġi da rava ita aramanei da taui mepa.

³¹ Aubaina tauna, ana tauvotaġoġo i viararamani i pa, “Taui Rava Natuna ina amverenei rava ġelauj au urai. Ma taui ina vitraġeni. Wate au pom tonuġa au murina ina vomari me.”

³² Wate taui eġa ita aramanei tauna aiwai i bababaniei. Ma pari-dadanana i rovoei.

Tauvotaġoġo i vitarapiri vivira da aiai i ġetelara

(Matthew 18:1-5; Luke 9:46-48)

³³ Iesu ana tauvotaġoġo maiteni i ġeta au Capeniam ma au numa i rui. Ma Iesu, taui i vitara-virevirei, “Au etanai aiwai o vitarapiriei?”

³⁴ Wate taui i genuana, aubaina au etanai taui i vitarapiri vivira da aiai i ġetelara.

³⁵*Iesu i kiala ma Apaso 12 i raukwatuei awarina ma i riwei i pa, “Aiai e ġoegħoe da ina vibada. Tauna ina tereġairana-melei ma ina vimuri dewadewa ma ina vitaunola rava aubai.”

³⁶ Ma Iesu, tevera i vaia ma au poui i vimairini. Ma urana au jiġona i tere-taġonei. Ma taui i riwei i pa,

* **9:11:** Mai Jew i vitumaġħana da Elijah au naona ina nememei ma Keriso muriai ita nei. (Mal 3:1, 4:5-6). Ma taui eġa ita notai da Elijah rau-iviapoapoe ina nelaġi ana au nememei. † **9:13:** Iesu lamna John Taubabataito i bababaniei da tauna Elijah (Mat 11:13-14, 17:10-13) ✶ **9:35:** Mrk 10:43-44

37 "Aiai ravana; tau wavauei, tevera wenanare i rauğorei. Lamna tau maiteni e raraugoreiu. Ma aiai da tau e raraugoreiu. Lamna tauparitawaneu maiteni e raraugorei."

*Aiai eğä ata ġavia, lamna turata
(Luke 9:49-50)*

38 Anina ma John, Iesu i riwei, "Tauviararamana! Tauai, oroto tagogi a inanai; tam wavamei arua-apoapoeni viviopuni ma tauna eğä turata. Lamna aubaina a viğaei da eğä ina kauana-melei."

39 Iesu i riwa, "Eğä ona viğaei! Eğä aiai au wavau kaua babai ina kuae i ma muriae ina parvai-apoapoeni.

40 Aiai ravana eğä ata ġavia; lamna turata.

41 Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotağotağ. Taur ai maia eğä ina vine-boai."

*Raelara babanina
(Matthew 18:6-9; Luke 17:1-2)*

42 Aiai ravana i kuae i da wei teverana ana tumağana Tau awariu i viapoapoeni da gó'apoapoe i kuae. Lamna i ai da ġaima ġaēgaena ravana au uatabana ina duri ma au boga ina tawanei aubaina God, tauna ina kovoğ-a-guratei. ⁴³⁻⁴⁴ Mepa da nimam i kauem da gó'apoapoe u kuae. Ma bori-tawanei! I aii da nimam tagogiava ma lawana mamae-nonoana ma vaia. Ma eğä ma kuae da nimam ruağ aiaii ma ma nae ai au menamenana; mepa ai eğä melana i ita bobo.[‡]

45-46 Mepa da aem i kauem da gó'apoapoeni u kuae. Ma bori-tawanei! I aii da sigesigem au lawana mamae-nonoana ma rui. Eğä me aem ruağ aiaii ma ai au menamenana ina tawanem.[§]

47 Ma mepa da matam ina kauem da gó'apoapoeni u kuae. Ma waitawanei! I aii da matam tagogi ma God ana vigulau ma rui. Eğä me matam ruağ ma ai au menamenana ina tawanem;

48 dobuna motamotana eğä ita irairağe ma ai eğä ita bobo.

49 Au Tauvotağotağ anataputapui, ai araratanei ina bogai.

50 "Nia i ai lam viaiainana aubaina. Ma mepa da i tomatoma, mena ma vidagianei. Nia au orami ina mae ma ona viturana vivira!"

10

Iesu, tavine vilamonana i babaniei

1 Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaēgaena i riana-melei. Ma Iesu i viararamana, me mara patapatana i kauaei nanare.

2 Ma Pharisi ġelaui i góei da tauna ita waroi. Ma lamna aubaina i vitara-virevirei, "Tarawatu e mamae bo eğä da rava, awana maiteni ita vilamonei?"

3 Ma Iesu i paribelei, "Moses ana Tarawatu aiwai e ririwei?"

4 Ma taui i riwa, "Moses ana Tarawatu e ririwa da oroto *vilamona pepana ina girumi ma awana ina verei*. Ma taui ina vilamonei."

5 Iesu i paribelei, "Taumi orami i bada. Au baina Moses wei Tarawatuna i terei.

6^{*}Wate ona nota da au karena, maranai God rava i kuae *ma tauna oroto ma wavine i kuae*.

7^{*}Ma lamna aubaina oroto amana ma alona ina netawanei

8 *ma awana maiteni ina vitagogi* da taui eğä ruağ me au naona ma tupua tagogi.

9 God aiwai i vitagogiei, eğä aiai ina vilamonei."

10 Maranai taui i naem au numa, ma tauvotağotağ, Iesu i vitara-virevirei wei kauai aubai.

11 Iesu i paribelei, "Mepa da oroto, awana i voterei. Ma wavine ġelauna i ravağ. Lamna tauna, awana awarina i rauviapoopae."

12 Ma nanarena mepa da wavine, awana i voterei ma oroto ġelauna i ravağ. Lamna awana, awarina i rauviapoopae."

Iesu, roaroa i viaiaini

13 Rava ġelaui, roaroa i neiae Iesu awarina da urana au tepai ita terei. Ma ana tauvotağotağ, ravai i viğaei.

14 Maranai Iesu wei kauai i 'nanai. Ma ana tauvotağotağ i eni ma i riwa, "Roaroa ona voterei da awariu ina nei. Ma eğä ona viğaei. Au baina God ana vigulau, lamna rava wenanare aubai me wei roaroai.

[‡] **9:43-44:** Wariağä nimaiei i giruma damanei taui riwana tagogina me vs 48. [§] **9:45-46:** Wariağä nimaiei i giruma damanei taui riwana tagogina me vs 48. ^{*} **10:6:** Gen 1:27 ^{*} **10:7:** Gen 2:24

¹⁵ A ririwana-kauemi. Aiai, God ana vigulau ega ina vaia me tevera aburuna nanare. Tauna, ega God ana au vigulau ina rui.”

¹⁶ Ma roarao i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu i vomairi da i nena. Oroto i ruba geta ma au naona i raudune ma i riwa i pa, “Taugi vinualauna. Aiwi ana kauai da lawana maemae-nonoana ana vibuderiei?”

¹⁸ Ma Iesu i paribelei i pa, “Aiwi aubaina, tau u vikaua vinualauna? God, tauna ava vinualauna.”

¹⁹ *Tam, God ana Tarawatu u aramanei, *Ega ma viragēna! Ega ma awadanene! Ega ma danene! Ega ma vivavi-morū! Ega ma amkwalakwāl! Amam ma Alom ma vivirei!*”

²⁰ Ma tauna i riwei, “Taugi! Maranai tau aburueu da amadodo, wei tarawatui anatapui a voteletelei.”

²¹ Iesu, tauna i ‘nanai ma i vinuavainei ma i riwei, “Kaua tagogi e mamae ega uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au Mara God, tam ina vimaiem. Ma ma nei ma ma votagotaōgiu!”

²² Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

²³ Iesu i ‘nana viravira ma ana tauvotagotaōgi awari i riwa, “I piripiri kaua da purapura ravana, God ana au vigulau ina rui.”

²⁴ Tauvotagotaōgi riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,* God ana au vigulau ina rui.

²⁵ I telatela kaua da ġamogamo gaeġaena wavana kamel, īgoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

²⁶ Taui i vinuanaina ma ai nota i kwa. Ma taui ava i babani vivira i pa, “Mepa da nanare; amapo aiai lawana mamae-nonoana ina vaia?”†

²⁷ Iesu awarii i ‘nana ma i riwei, “Rava awarii wei kauai i piripiri. Wate ega God awarina. God awarina aiwai anatapuna i telatela kaua.”

²⁸ Ma Peter i riwei, “Ma tauai menanare? Tauai ai purapura a voterei ma tam a votagotaōgi.”‡

²⁹ Iesu i paribelana, “A ririwana-kauem. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votagotaōgi; tau ma Riwana Aiaina aubaina.

³⁰ Tauna ana maia ina rata kaua wei au dobuna. Tauna ana maia ina viaitepepani da ana numa, varevareina, novunovuna, alona, natunatuna ma ana wapu, anatapui ina maga. Rava ina rau-iviapoapolem; aubaina tam, tau au Tauvotagotaōgi da mara au murina tauna lawana mamae-nonoana ina vaia.

³¹ Wate maġamaġau marina e vivinao; taui ina vimuri. Ma maġamaġau da e vivimuri; ina vinao.”

Iesu ana iraġe babanina i vitonui

(Matthew 20:17-19; Luke 18:31-33)

³² Iesu, ana tauvotagotaōgi maiteni i ġeġgæ au Jerusalem. Iesu, taui au naoi i nena. Tauvotagotaōgi i baiei. Ma rava ġelau au muri i nenei i rovo kaua.§ Ma taui 12 i rauġorei au ririva ma i raukarei da kaua amapo da awarina ina tupua; taui i vieġei

³³ I pa, “Ona inana, tauta ta ġeġgæ au Jerusalem. Ma Rava Natuna ina verenei pirisi babadai; ma tarawatu babadai awarii. Ma taui ana iraġe ina vianinei. Ma Mai Jentail ina verei.

³⁴ Ma tauna ina vijibogħi ma ina ovai ma ina kwapui ma ina viragħeni. Au pom vitonuina ina vomairi me.”

James ma John ai vibaġa

(Matthew 20:20-28)

* **10:19:** Exo 20:13; Exo 20:14; Exo 20:15; Exo 20:16; Exo 20:12 * **10:24:** Wei riwana buka ġelau awarii e mamae ma ġelau ega *purapura ravana*. † **10:26:** Mai Jew i notai da rava vipurapurai lamna BADA ana verena ana nuavaina matairana, taui e notai da BADA, rava vipurapurai ega ina gagaloji, tauna ravai ġelau maiteni ega ina gagaloji. ‡ **10:28:**

Peter i goei da ita aramanei da tauvotagotaōgi ai au iraġe maiana aiwai, ina vaia. § **10:32:** *Iesu i ġeġgæ au Jerusalem* ma rava maġamaġau i viġavie i ma lamna aubaina ana tauvotagotaōgi i baiei da tauna tepana i tora da weka i nena. Rava ġelau i votagotaōgi, taui i rovo kaua da aiwai awarina ina tupua maranai i ġeta au *Jerusalem*.

³⁵ - Zebedi natunatuna James ma John i nei Iesu awarina ma i vibagai i pa, "Tauviararamana! Tauai ai goana a vivibagei uta kaei."

³⁶ Iesu i riwa i pa, "Aiwai o goegoei ana kaei aubaimi?"

³⁷ Taui i paribelana, "Ma verelai da ana kiala, tagogi au oiem ma gelauna au kelakelaum am au vigulau."

³⁸ Iesu i paribelei, "Taumi ega ota aramanei aiwai o vivibagei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoi?"*

³⁹ I paribelei, "Tauai tagotagogina!"

Iesu i riwei, "Iniviara kelakana anina ona umai ma ona irage me tau ana irage."

⁴⁰ Wate tau au rewapanana ega ita mamae da ana veremi da mepa ona kiala au oieu bo au kelakelau. God, rava i vinevinei; taui ai gabu i vokaukauei."

⁴¹ Maranai Tauvotagotaogo 10 gelaui, wei riwana i nonori. Taui James ma John awarii i gaiawa.

⁴² Ma Iesu, taui anatapui i gorei da awarina ma i riwei, "O aramanei da jentail ai babada, dobu gela ravai jentail awarri e mamae-gaegee ma e raraui-ivapoapoelei. Wate taui ai babada gaegaei, ai rewapanana i getelera da ai rava e vibadebadei da ai goana e kaukauei."

⁴³ *Wate au tauvotagotaogo ega nanare. Ega da aiai i goei da ina getelara taumi au poumi; tauna anina da ina vitaunola.

⁴⁴ Aiai i goei da ita vinao. Tauna ina vitaunola rava anatapui aubai.

⁴⁵ Ma nanare Rava Natuna ega ita nei da tauna, tana nolei. Wate ita vitaunola rava aubaii. Ma ana lawana ita verenei da rava ma gamaagaui ai lawana ita gimara-melei."†

Iesu, rava mata-potapotana Batimeus i vilawani

(Luke 18:35-43)

⁴⁶ Ma taui i geta au Jeriko. Iesu, ana tauvotagotaogo, patara gaegeena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viangigimana.

⁴⁷ Maranai i nonori da tauna, Iesu Nasaretei; garara i raukarei i pa, "Iesu, tam David natuna! Ma raunu'apoapoeleu!"‡

⁴⁸ Rava ma gamaagaui, tauna i rai ma i riwei da ita genuana. Wate tauna, garara i voguratei, "David Natuna! Ma raunu'apoapoeleu!"

⁴⁹ Iesu i tumairi ma i pa, "Ona goreiai!"

Anina taui, mata-potapotana i goreiai i pa, "Tepam ina tora ma ma vomairi! E goregorem!"

⁵⁰ Tauna, ana puru i tawanei ma i vomairi lagilaigina ma i nei Iesu awarina.

⁵¹ Iesu i paridadana i pa, "Aiwai u goei ana kaei aubaim?"

Mata-potapotana i paribelei, "Tauviararamana! A goei da ana inana me."

⁵² Iesu i riwa, "Ma nael! Am tumaagna i vilawanam." Maratagogi tauna i 'nana me ma Iesu au eta i votagaogoi.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

¹ Ma maranai Jerusalem i tugeregerei ma i rui au Betphagi ma Bethani* au ola Olives. Ma ana tauvotagotaogo ruaga i paritawanei,

² ma i riwei i pa, "Ona nae au melagai au naomi. Maranai o ruirui, kampa donki natuna gaubo, raigiragitanona nelagai. Tauna ega aiai ita geru-dadanei. Ona rupeni ma ona neiai."†

³ Mepa da aiai ina paridadana, "Aiwai aubaina wei o kaukauei?" Ona riwei, 'BADA e goegoei ma maratagogi ina paritawana-melei."

⁴ Ma i nae ma donki gaubona au doa au metaeta raigiragitanai i rupeni.

⁵ Rava gelaui kampa i maimairi i paridadana i pa, "Aiwai o kaukauei donki gaubona o ruperupeni?"

⁶ Ma i paribelei me Iesu i ririweia nanare ma taui i voterei da i nae.

* ^{10:38:} ...babataito me tau ina babataitoi taui iniviari ma irage e bababaniei, maranai Iesu au Gethsemani i raruapari muriai da ana irage tauna ana nuabolana kelaka i babaniei (Mrk 14:36). Iesu, James ma John i riwei da nuabolana nelagai.

† ^{10:43:} Mrk 9:35 ^{10:45:} Iesu i vinuapoapoei ma irage aubaita me Isaiah i girugirumia nanare au Isa 52:13-53:12.

‡ ^{10:47:} Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaiga nanare. Ma i nei da rava doridoriai ita vilawaname. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24) * ^{11:1:} Eng. Bethphage & Bethani † ^{11:2:} Mai Jew awari, donki lamna nola aubaina ma ega gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei.

⁷Tau i donki i neiai Iesu awarina ma ai puru au uporana i tawana-epai ma au tepana Iesu i kiala.

⁸Ma rava mağamağau, ai puru au eta i ebani ma ġelau, ai rugurugu i tarataraa i ebani.

⁹Tau i vivinao ma taui au muri i nenei i garara:

“Hosanna!”[‡]

“Viviaiainana tauna BADA au wavana e nenei!”

¹⁰“Viviaiainana amata David ana vigulau e nenei!”

“Hosanna au aidamo telarana!”

¹¹Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, taui 12 maiteni.

*Iesu, damala aina i parivai-irairaġeni
(Matthew 21:18-19)*

¹²Ma marana i tom, taui Bethani i opu-tawanei ma Iesu am-iraġe.

¹³Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelāġi. Anina ai ruguruguna ava, aubaina eġa damala ana mara.

¹⁴Iesu, damala aina i riwei i pa, “Eġa aiai amadodo ma amapo anom ina am-melei!” Ma ana tauvotagaġo i nonori aiwai i latoni.

*Iesu, taugimara tempolei i viaġaġana-opunei
(Matthew 21:12-17; Luke 19:45-48; John 2:13-22)*

¹⁵Maranai taui i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina[§] ai kepakepa ma gabubu taugimareina ai anikiala i vitauvirai.

¹⁶Ma i viġaei da eġa aiai ana gimara Tempol au orana ita avarai-naiei.

¹⁷*Ma rava i viararamani i pa, “I girugrumia nanare,

‘Au numu ina ġorei pari numana

dam anatapui au dobu aubaii.’

Wate taumi o vovirai da kwalakwalai ai guba.”*

¹⁸Pirisi Babadai ma tarawatu Babadai i nonori ma i ogei da ita viraġeni. Taui, Iesu i rovoei aubaina patara ana viararamana i baiei.

¹⁹Ma au bigai Iesu ana rava, Jerusalem i opu-tawanei.

*Damala aina i poi
(Matthew 21:20-22)*

²⁰Ma ubaubanai taui i nena ma damala aina i 'nanai anatapuna i poi.

²¹Peter i notai ma i riwa “Tauviararamana ma inana! Damala aina u parivai-irairaġenia i poi.”

²²Iesu i paribelei, “God ona vitumaġanei!

²³A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana da aiwai e ririweia, ina tupua.

²⁴Lamna aubaina a ririwemi. Aiwai ami au pari o vibaġei, ona vitumaġana da taumi boibogħi o vaia ma ina viġarimie.

²⁵Ma maranai & raraupari, au naona rava anatapui ai ġo’apoapoe awarim ma nota-tawanei. Ma nanare amam au mara am ġo’apoapoe ina nota-tawanei.”†

*Jew babadai, Iesu ana vibadana i vitarapiriei
(Matthew 21:23-27; Luke 20:1-8)*

²⁷Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

²⁸Ma i paridadanei i pa, “Aiwi vibadanei wei kauai e kaukauei? Aiai vibadana i verem da wei kauai uta kauei?”

²⁹Iesu i paribelei i pa, “Au vitaraviravira tagogi ana terei ma ona paribelei. Ma ana riwemi; aiwai vibadanei wei kauai a kaukauei.

‡ 11:9: Lamna pona Aram anona *ma vilawani* ma muria lamna viegualau ma vimea-gaġġena aubaina. § 11:15: Mai Jew ai nuota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). * 11:17: Isa 56:7 * 11:17: Iesu dobugħla manena tauviraina ma gimara ravai i vivawu da taui pari numana i vovirai da amkwalakwalai ai guba, taui rava ai arua nolana e viviapoapeni Jer 7:11-15. † 11:25: Riwa wadubo nonoana uraiei i girugrumia vs 26 weka eġa ita mamae, *Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.*

³⁰ Aiai, John tababataito vibadana i verei da rava ita babataitoi, God bo rava? Ona riweu!"

³¹ Taui i vitarapiri vivira, "Mepa da tana riwa, 'Godei.' Tauna ina riwa, 'Ma aiwai aubaina ega ota vituma'ganei?"

³² Wate ega tana riwa da, 'Ravei.' Taui rava i rovoei, aubaina rava anatapui, ai nota da John anina peroveta.

³³ Ma i paribelei, "Tauai ega ata aramanei." Iesu i riwa, "Tau nanare ega ana riwemi aiwai vibadanei wei kauai a kauakei."

12

Tauipi ai awanaina

(Matthew 21:33-46; Luke 20:9-19)

¹* Iesu i vikrei ma awanainei awari i babani i pa, "Mara tagogi oroto, ana wapu i kaei ma grape i paewi* ma i gari ma grape anigudana ma violaga numana i voai. Ma tauipi gelau i verei da ita nolei taui anatapui aubai. Ma i va'gai au dobu 'gela.

² Tuaruta ana mara i getai ma taniwaga, ana taunola i paritawanei tauipi awarri da ana guta ita vaia.

³ Wate tauipi, tauna i vojjini ma i kwapui ma kwakwavina i paritawanei.

⁴ Ma taniwaga, taunola 'gelauna i paritawanei. Ma taui, kolana i viaibauni ma i vitepaubaubai.

⁵ Ma taunola 'gelauna i paritawanei ma tauna i vira'geni ma i ma'ga 'gelaui i paritawanei, 'gelaui i kwapui ma 'gelaui i vira'geni.

⁶ Ma tagogi ava e mamae da ina paritawanei. Lamna natuna orotona tagotago ana nu'avainana. Ma tauna au murioina i paritawanei ma i pa, 'Taui, natu ina vivirei.'

⁷ Wate taui, tauna i 'nanai ma i riwa vivira i pa, 'Wei taniwaga natuna. Ona nei, tana vira'geni ma ana buderi ina vigarataie!

⁸ Ma i vunui ma i vira'geni ma tupuana wapuei i tawanana-opunei.

⁹ —Wapu taniwagana marina aiwai ina kaei taui awarri? Tauna ina nei ma tauipi ina vira'geni ma grape wapuna ina veredamanei tauipi 'gelaui awari.

¹⁰ Wei girumana o iavi bo ega?

*'Wei gaimana, tauvoa i geduae'i,
wate muriai i nelagai da tauna 'gaima kaua.*

¹¹ *Wei lamna, BADA ana kaua
ma inanana i vinualaulauna.*

(Psalm 118:22-23)

¹² Jew babadai i aramanei da awanaina lamna taui i bababaniei ma i 'goei da ita pani. Wate taui patara i rovoei, lamna aubaina Iesu i voterei ma i nae.

Caesar awarina tax tana terei bo ega?

(Matthew 22:15-22; Luke 20:20-26)

¹³ Ma Pharisi 'gelaui ma Herod ana rava 'gelaui i nae Iesu awarina da riwei ita waroi.

¹⁴ Taui i nei ma i riwa, "Tauviararamana, tauai aramanei da tam rava jijimanim. Ma rava wavai naenaei ma rava labalababa ega uta vibainaenaei ma anatapui e vaivaia da tagogi. Wate tam God ana babani riwa kaei e viaramani. Ma riwelai tax tana terei Rome gulauna wavana Caesar* awarina, i aii bo ega?"

¹⁵ Wate Iesu, ai moru i 'nana-bauni ma i riwei, "Aiwai aubaina o raudadani? Mani tagogi ona neiai da ana inanai!"

¹⁶ Denarius tagogi i neiai Iesu awarina ma taui i vitara-virevirei, "Wei aiai aruana ma wavana?"

I paribelei, "Caesar."

¹⁷ Iesu i riwa, "Aiwai Caesar 'garinei, Caesar ona verei. Ma aiwai God 'garinei, God ona verei!" Ma taui i baiei.

Sadusi 'gelaui, Iesu i vitara-virevirei iraira'gelei vomairina aubaina

(Matthew 22:23-33; Luke 20:27-40)

¹⁸* Mai Sadusi ai vituma'gana da rava ega ita vovomairi-me maranai e iraira'ge.‡ Anina ma 'gelaui i nei Iesu awarina ma i paridadanei,

* 12:1: Isa 5:1-2 * 12:1: Parivainota wadubona, God au anatapuna Israel e bababaniei me tauna ana grape wapuna, me Isa 5:1-2. † 12:14: Sisa. * 12:18: Act 23:8 ‡ 12:18: Sadusi taui gulagulau ma rava 'gaegaei mai Jew ai giu babadai taui maiteni ega ita vituma'gana da *anelia* bo arua 'gelaui e mamae ma buka 5 i vinao, Moses i girugirumia, taui lamna ava e vivitumaganei (Karena, Exodus, Leviticus, Numbers, Deuteronomy). Ma ega buka 'gelaui. Wate Moses ma BADA riwaieie taui i viatataiei da lawana e mamae ira'ge au murina.

¹⁹ "Tauviararamana! God ana tarawatu, Moses wenanare i girumi: Mepa da oroto i'rāge ma kaiababana i netawanei ma ega natunatui. Orotō vareina kaiababana ina ravağī ma roaroa ina ġuni vareina aubaina.

²⁰ Mara tagogi varevarei seven i mae. Ma natuevou i tavine ma ega natunatuna ma oroto i'rāge.

²¹ Vareina viruaina kaiababa i ravağī ma tauna maiteni ega natuna ma i'rāge. Ma nanare vareina vitonuina.

²² Ma nanare anatapui seven, wavinena i ravağī ma ega natunatui. Au muriai wavine i'rāge.

²³ Anatapui seven, wavinena i ravağī. Vomairi me au marana, lamna aiai awana?"

²⁴ Iesu, taui i riwei, "Aiwai Moses i girumi ma God ana rewapana ega ota aramanei.

²⁵ Maranai taui irağelei ina vomairi, taui ega ina tavine bo ina vitavinei. Wate ina mae me anela au māra.

²⁶ *Ma rava irağelei ai vomairi babanina, Moses ana tarawatu ega ota iavi bo? Mepa ai i ararat lana, kampa God Moses i riwei: *Tau Abraham ana God ma Isaac ana God ma Jacob ana God.*

²⁷ Tauna ega rava irairağei ai God, wate rava lawalawai ai God. Taumi o moru kaua!§"

Tarawatu ġeġetelarana

(Matthew 22:34-40; Luke 10:25-28)

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, "God ana tarawatu metauna i ġetelara?"

²⁹ *Iesu i paribelei, "Geġetelarana tagogi lamna wei: *Ona rautaniġħana Israel!* BADA at God, tauna ava BADA.

³⁰ BADA am i God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!

³¹ *Ma viruaina lamna wei: *Rava ġelau i nuanuam ina vaia me tam nuanuam e vaivai-melei!* Wei tarawatui ruāga lamna i ġetelara, ega me pulo apuapunana bo pulo ġelau.

³² Tarawatu badana i riwa, "Tauviararamana u babani kaua! Riwa kaua u babaniei, BADA Tauna ava God ma ega mepa ġelauna.

³³ Ma nuanuami ina vaia orami anatapunei ma ami nota anatapunei ma ami rewapana anatapunei. Ma, Rava turam nuanuam ina vaia me tam nuanuam e vaivai-melei. Wei tarawatui ruāga lamna i ġetelera, ega me pulo apuapunana bo pulo ġelau."

³⁴ Iesu i 'nanai da tauna i paribelana kaua ma i riwei, "Tam, God ana vigulau au ġereġerena e ġeġeta." Ma ega aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

³⁵ Maranai Iesu au Tempol i viararamana ma i vitara-viravira i pa, "Aiwai aubaina Tarawatu Babadai e ririwa da Keriso tauna David natuna?

³⁶ *Arua Vivivireina, David nota i verei ma tauna i riwa:

'MAMAE-NONOANA au għulau i riwei,

Au oieu ma kiala

da am ġavja

au ae karem da ma tuvaidoedet'

(Psalm 110:1)

³⁷ —David, tauoina wei gulauna i ġorei bada. Ma menanare da badana lamna, David natuna?" Patara ġaġęga riwana i nonori ma i vinuajai.

Iesu, Tarawatu Babadai ai kaua i babaniei

(Matthew 23:1-36; Luke 20:45-47)

³⁸ Ma Iesu, taui i viararamani i pa, "Tarawatu babadai ona rovoei. Ai gara manamanai ma e bababara nae au deba da rava taui e vivivrei.

³⁹ Taui anikiala vinevinei pari au numana ma au torela, gabu aiai e vaivaia.

⁴⁰ Taui, kaikaibaba e morumorui ma ai numa e kwalekwalei, e morumoru ma e raraupari-vai-manamanawa. Taui ai kovoġa ina apoapoe guratana."

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba ġelauna i kiala ma rava i 'nananai mane i tereterei. Rava maġamägaui vivimanei, mane maġamägaui i terei.

◊ 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, taui lawalawai maranai BADA, Moses awarina i babani. ◊ 12:29: Deu 6:4-5 ◊ 12:31: Lev 19:18 ◊ 12:36:

⁴² Wate kaiababa molamolakana i nei ma mane muomuoi ruağā i terei, ruvana i aburu kaua.

⁴³ Ana tauvotağotağō i ġorei ma i riwei, "Anina a ririwemi, wei kaiababa molamolakana i tere-guratei, eğā me taui ġelaui.

⁴⁴ Taui ġelaui ai maurei i verena, wate wei kaiababa molaka ma ġarinei anatapuna i terei, ana anilawana anatapuna."

13

*Iesu i riwa da rava God ana Tempol ina rikai
(Matthew 24:1-2; Luke 21:5-6)*

¹Iesu, Tempol i nene-tawanei ma ana tauvotağotağō tagogi i riwa, "Tauviaramana! Numa i viġulau ġaġa ma numa ġaimai i rata ġaġa."

²Iesu i paribelei, "Wei numai ġaegaei u inanai, eğā ġaimai tagogi, turana au tepana ina mae. Ĝaima anatapui ina rikai."

*Rava ina vinuapoapoe kaua. Iesu ana tauvotağotağō ina vipatutu
(Matthew 24:3-14; Luke 21:7-19)*

³Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma i vitaraviravirana govaġeġi

⁴i pa, "Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?"

⁵Iesu, taui i riwei, "Ona inana kaua da eğā aiai ina terevaideġaimi!

⁶Rava maġamaġau, wavauei ina nei ma ina riwa, 'Tau Keriso tauvilawana!' Ma rava maġamaġau ina terevaideġai.

⁷Ma maranai viġavia ona nonori ma viġavia uezia riwana ona nonori; eğā ona rovo! Wei kauai anina da ina tupua, wate wei eğā damona.

⁸Dam, damai ina viġavia vivira ma dobu, dobua ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviara e vivikarei maranai e vivinivira.

⁹—Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votağotağoui. Ma taui awarii, Riwa Aiaina ona raugugulei.

¹⁰Riwana Aiaina ona raugugulei rava anatapui awari ma muriae damona ina nei.

¹¹Ma maranai i panimi ma i etaremi. Eğā ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eğā taumi ota babani, wate Arua Vivivireina.

¹²Rava, vareina ina verenei da ina viraġeni. Ma ama, natunatuna ina verenei da ina viraġeni. Ma roaroa, amamai ma aloloi ina viġavie i da ina iraġe.

¹³Rava anatapui ina geduaiemi tau aubaiu. Wate aiai da e maimairi-jijina da au damona, tauna ina lawana."

*Iniviara ġaegħaena ana mara
(Matthew 24:15-28; Luke 21:20-24)*

¹⁴"Maranai 'Kaua apoapoe kaukauana'* e maimairi mepa avena ita mairi. (Buka tauvavana wei ina aramanei anona aiwai). Taui aiavoi au Judea ina ruba laġiġa ina ola.

¹⁵Aiai numa au tepana eğā ina ġaira bo ina rui au numa da aiwai ina vaia.

¹⁶Aiai au wapu eğā ina naeme au numa da ana gara ina vaia.

¹⁷Ma iniviara ġaegħena, waiwnej duaduamai ma taui da i viviġuġi awari nai au marana!

¹⁸God awarina ona raupari da wei kauai eğā au bodu ina tupua.

¹⁹*Ma nai au marana amapo iniviara ġaegħena. Ma maranai God dobu i kaei, iniviara ġaegħena eğā nanare ita tupua ma amapo eğā nanare ina tupua me.

²⁰Wate BADA nai marana ina vitupoi. Mepa da eğā ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

²¹⁻²²—Muriae keriso tauvilawana morumorui ma peroveta morumorui ina nei ma mataira ma kaua babai ina kaei ma ina kauana dadanei da God ana vinevine maiteni ita terevaideġai. Lamna aubaina mepa da aiai ina riwemi, 'Ma inanai, Tauvilawana noi!' bo 'Tauna noi!' Nai babanina eğā ona vituġanei!

²³Ona inana kaua; anatapuna a riwana-nonoem!"

*Rava Natuna ana nei
(Matthew 24:29-31; Luke 21:25-28)*

* ^{13:14}: Eng. *Abomination of Desolation* Dan 9:27 11:31 & 12:11 * ^{13:19}: Da 12:1

²⁴ Iesu wenanare i riwa, "Ma iniviara ġaeġaena au murina.

Madeġa eġa ina rarana

ma nawaravi eġa ina lalai.

(*Isaiah 13:10*)

²⁵ *Ma ubona marei ina peu*

ma rewapanapa ġelau i au aidamo ina gui.

(*Isaiah 34:4*)

²⁶ ♦—Nai maranaina, *Rava Natuna ana rewapanana ma ana borumana apauei ina nei.*

²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona."

Damala ana awanaina

(*Matthew 24:32-35; Luke 21:29-33*)

²⁸ "Damala aina ana awanaina ona aramanei. Maranai ai e numonumoi, lamna ona aramanei da maura e tuturiae.

²⁹ Ma nanare, maranai wei kauai anatapui ina tuputupua, ona aramanei da Rava Natuna i turiae; au metaia i ġetai.

³⁰ Anina a ririwemi da wei kauai au naona ina tupua ma muriae da rava marina lawalawai ina iraġe.

³¹ Mara ma dobu ina amo. Wate riwau eġa ina amo."

Bada ainelana ana nei i aramanei

(*Matthew 24:36-44*)

³² "Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amanā, tauna ava i aramanei.

³³ Ona vineneġana ma matami ina kala!† Eġa ota aramanei mara aiwai, wei kauai ina tupua.

³⁴ Wei me rava ana numa i netawanei ma i vagai. Ma ana taunola nununai i terei da ita vipaipai ma tagotagogi ava ai nola i verei da ita kaei. Ma tauvineneġana i riwei da ita vineneġana.

³⁵ Ona vineneġana! Eġa ota aramanei mara aiwai, numa taniwigana e nenei; mepa da au bigai bo au nubautuva bo maratomtomai bo ubaubanai.

³⁶ Ma eġa matamatavemi ina nelāgaimi.

³⁷ Aiwai riwana a ririwemi, riwana tagogina rava anatapui a riwei, ona vineneġana!"

14

Jew ai babada, Iesu i ogei da ita viragħeni

(*Matthew 26:1-5; Luke 22:1-2; John 11:45-53*)

¹ ♦Au pom ruaga muriae da Ragona ma Palawa Bagibagina torelai,* Pirisi babadai ma Tarawatu Babadai eta i baibiae da menanare govogovagħanei Iesu ita vunui.

² Ma i riwa, "Au torela wei kauai eġa tana kaei, mepa da viġiġiawha ġaeġaena ina tupua."

Wavine, daji gabugabuna Iesu au kolana i waġi

(*Matthew 26:6-13; John 12:1-8*)

³ Maranai Iesu au Bethani, Simon i ġoreġorei lepeleperana ana au numa i kiala ma i amam. Wavine, waġi wavana alabaster i voai ma i ġeta ma waġi uana i vogai ma daji ġabuġabuna, maiana ġaegaena e ġoreġorei *nard*, Iesu au kolana i waġi.

⁴ Rava ġelau i kampa i mamae i ġaia wa ma i riwa, "Aiwai aubaina daji u vikalokaloei?

⁵ Wei dajina ita gimarei 300 *denarii* † ruvana ma manena molamolakai ita verei." Ma taui, wavine i vienenei.

⁶ Wate Iesu i riwa, "Ona voterei! Aiwai aubaina o vinuabolai? Tauna, kaua aiaina awariu i kaei.

⁷ Molamolakai awarimi e mamae-nonoa ma ona ġoie ma taui ona voagui. Wate tau awarimi eġa ata mamae-nonoa.

⁸ Wavine ana nola i kaei. Tauna, dajiei tupuau i vokaukauana-nonoei vikkokoaga aubaina.‡

⁹ A ririwana-kauemi, mepa Riwana Ajaina i rauguglei dobu au anatapui, wei wavinena aiwai i kaukauei ina babaniei, ma eġa nuanuai ina vuru."

¹⁰ Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei.

¹¹ Taui i vinuiai kaua maranai wei i nonori ma Judas i parivainuagħani da mane ita verei. Ma Judas i 'nana da mepa gavogavo ita inanai da Iesu ita amverenei.

* 13:26: Da 7:13 † 13:33: Wedau *Evanelia* i girumi, *ma i raupari*, wate buka wadubo nonoana wei eġa ita mamae, Luk 21:16 kampa ona inanai da e mamae. † 14:1: Exo 12:1-27 * 14:1: *Ragħna (passover)* Exo 12:1 *Palawa ega yist maiteni (Unleavened-Bread)* Exo 12:17 & 23:15 † 14:5: Wei lamna me taubagħiġi ana maia madeġa tagogi aubaina. ‡ 14:8:

Mai Jew ai kaua da taubeu dajiei e bulbuloi muriae au kokoaga e terererei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi ġauboī e vunuvunuī Raġona torelana aubaina. Tauvotaġoġa, Iesu i paridadanei, “Mepa u ġoegħoei Raġona torelana ana vokaukauei aubaim?”

¹³ Iesu, taui ruāga i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġoġa.”

¹⁴ Au numana e rrujuana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġoġa maiteni Raġona torelana ana ani?”

¹⁵ “Ma tauna, numa vatavatara ina viatajaiem i vokaukauana-nonoei ma kampa aubaita ona vokaukaua.”

¹⁶ Tauvotaġoġa i nae au Jerusalem ma i ririweia nanare i nelaġai ma Raġona torelana i vokaukauei.

¹⁷ Au i biga ma Iesu i nei Apasol maiteni.

¹⁸ Taui au kepakepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaġoġa i vinuabola ma tagotagogi ava i pa, “Eġa tau tapa?”

²⁰ Iesu i paribelei, “Taumi tagogi weka palawa e vivigaloj au aboma tau maiteni.

²¹ Wariäga i girugurumia nanare, Rava Natuna ina iraġe. Wate aiai da Rava Natuna i vibenabenamei; fauna, kovoġa għaeġaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegħualau, i vogħimagħi ma Tauvotaġoġa i verei ma i riwa, “Ona vaia; wei tupuau.”

²³ Anina ma *wine* kelakana i vaia ma i viegħualau ma i verei da anatapui i umei,

²⁴ *Wei tau tarau i toi rava maġamaġaui aubai ma au parivainuāgħana bagibagina ina vovai-virewpani.

²⁵ Anina a ririwemi, *wine* eġa ana uma-melei da maranai God ana rava aubaii ana vigulau.”

²⁶ Ma taui voepaepa welana i ravi ma i ġae au Ola Olives.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, taui i riwei “I girumi nanare,

God i riwa, ‘*Tauviġamoġamo ana virażeni ma sipu ina vilamonei.*’

(Zekariah 13:7)

Ma nanare anatapumi ona ruba-tawaneu.

²⁸ Wate au vomairi au murina ana aivināu au Galili.”

²⁹ Peter i riwa, “Mepa da anatapui ina rubatawanem, wate eġa tau!”

³⁰ Iesu, Peter i riwei, “A rinwana-kauem da amadodo wagħuvarai muriai da kokorereko ina tou mara ruāga; tam mara tonuġa ma bovieu.”

³¹ Wate Peter, ponana i bagħbiġi ma i riwa, “Avena mepa da tau, tam maiteni ana iraġe. Eġa melanai ana bovien!” Ma taui ġelau riwana tagogina i latoni.

Iesu au Gethsemani i raraupari

(Matthew 26:36-46; Luke 22:39-46)

³² Ma au Gethsemani i ġeta ma Iesu, ana tauvotaġoġa i riwei, “Weka ona kiala ma ana raupari!”

³³ Ma Peter, James ma John i taravaini ma nuanuana i'rāġe ma nuanuana i bola-kauei.

³⁴ Ma taui i riwei, “Au nuabola i rata kaua au orau da e vunuvunuui. Weka ona mae ma ona vineneġħana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei.

³⁶ I riwa i pa, “*Abba Ama!* Aiwai anatapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana.”

³⁷ Ma Iesu i nememei ma taui tonuġa raraū-nuavurui i nelaġai. Ma Peter i riwei, “Simon! § tam aïwai matavena? Mara aburuna uta vineneġħana bo eġa?”

³⁸ Ma Iesu, taui i riwei, “Ona vineneġħana ma ona raupari da eġa au raelara ona peu! Arua e ġoegħoei, wate tupua i ġokkokk.”

³⁹ Ma i naemei ma parina tagogina i raupariei.

⁴⁰ Maranai i nememei ma i nelaġai, i matamatave; taui, matai i vitai. Ma taui eġa ita aramanei aïwai ita riwei.

⁴¹ Mara vitonuina i nene-memei ma taui i riwei, “Taumi amapo ona matamatave ma laumi ina tautau? Anina! Mara i ġetai, ona inanai. Rava Natuna ina vibenabenamei ġo’apoapoe ravai au urai.

⁴² Ona vomairi; tana nae; ona inanai! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tauvotaġo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawanei.

⁴⁴ Muriai da Iesu awarina ita ġeta; Judas, patara ai mataira i verei, “Orotona ana vigia laġoġonei; nai tauna. Ona pani ma ona naiei ma ona inana-kauei!”

⁴⁵ Maranai Judas i ġeta ma i nae Iesu awarina ma i riwei, “Tauviararamana!” Ma i vigia laġoġonei.

⁴⁶ Ma taui, Iesu i vojjini ma i pani.

⁴⁷ Ma tagogi kampa i maimairi, ana sword i taina-lavui ma Pirisi ġeġetelarana ana taunola tanigħana i borituni.

⁴⁸ Ma Iesu, taui i riwei, “Taumi ana apiami o nei da ota paniu bo, apamina tau amkwalak-walau?

⁴⁹ Marana patapatai taumi maiteni ta mamae au Tempol ma a viararamana ma eġa ota paniu. Ma i girugirumia nanare, ina tupua.”

⁵⁰ Ma Tauvotaġo anatapui, Iesu i voterei ma i ruba-tawanei.

⁵¹ Ma laraga tagogi, i vikareko ma Iesu i votaġoġoġi. Taui i ġoei da ita vojjini,

⁵² wate ana kareko i vojjini ma tauna ana kovakovana i ruba.

Taui, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

⁵³ Ma taui, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana.

⁵⁴ Ma Peter i votaġoġoġi da Pirisi Ġeġetelarana ana numa. Ma ana au debadeba, purusimani maiteni i kiala ma i viviairara.

⁵⁵ Pirisi Babadai ma mai Jew ai boru ġeġetelarana,* Iesu ana apoapoe i baiei da ita viraġeni; ma i baiana-avei.

⁵⁶ Matamata maġamaġau, Iesu i wiwavu-morumoruei, wate ai wiwavu taputapunei ava.

⁵⁷ Ma ġelaui i vomairi ma wei wavuna morumoruna i kauei Iesu awarina,

⁵⁸ “Tauai a nonori tauna i riwa, ‘Wei tempolna i voavaoia. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.”

⁵⁹ Wate nanare ai wiwavu taputapunei ava.

⁶⁰ Pirisi ġeġetelarana i mairi taui au naoi ma Iesu i vitara-virevirei, “Wei ravai e viviavuim ma eġa aiwai ma paribelei bo?”

⁶¹ Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawha bo? Viviaiainana Natuna bo?”

⁶² ‡Iesu i paribelana, “Tau tauna! Ma Rava Natuna ona inanai, Vivirewapanana au oienā ina kiala ma mara ladanei ina nei.

⁶³ Pirisi ġeġetelarana, amlona i ġaġiġi ma ana gara i sikai ma i riwa, “Aiwai aubaina mata-mata ġelaui tana ġoei?

⁶⁴ Taumi, vijiloga o nonori ma ami nota aiwai?”

Taui anatapui i riwa, “Tauna ana ġo’apoapoe aubaina anina da ina iraġe!”

⁶⁵ Ma ġelaui i raukarei ma Iesu i ovai ma naona i puru; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

⁶⁶ Ma Peter au gabaura i mamae ma Pirisi ġeġetelarana ana taunola guguini i ġetai.

⁶⁷ Maranai tauna, Peter i ‘nanai i viviairara; ma i ‘nana-tunutunui ma i riwa, “Tam maiteni Iesu Nasaretei, ana tauvotaġoġoġi!”

⁶⁸ Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokororeko i tou‡].

* **14:55:** Mai Jew e ġoreġorei *Sanhedrin*. † **14:61:** Isaiah i parivereta da *Keriso* ana au iraġe eġa ina gagaloana-melei. (Isa 53:7). ‡ **14:62:** Da 7:13 ‡ **14:68:** Wei riwana buka au wadubo nonoana eġa ita mamae.

⁶⁹ Taunola guguini, Peter i 'nanai ma i raukarena-melei ma rava au ġereġere i maimairi i riwei, "Wei ravana, taui tagogi!"

⁷⁰ Wate Peter i bovi me.

Mara aburuna muriai, taui au ġereġere i maimairi, Peter i riwana-melei, "Tam anina, taui tagogi; aubaina tam, Galilie!"

⁷¹ Ma Peter i riwa, "God au matana, tau a ririwa kaua, ravana o ririweia a vivinuanainei!"

⁷² Maratagogi kokorerekko i tou mara viruaina ma Peter, Iesu riwana i notai - *Muriai da kokorekko ina tou mara ruaga, tam mara tonuaga ma bovieu.* Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubanai boibogħi, pirisi babadai ma dogadogara ma tarawatu babadai anatapui i viborū * ma i vianina da Iesu i pani ma i veredamanei Pilate au urana.

² Pilate, Iesu i vitara-virevirei i pa, "Tam mai Jew ai gulau bo?" Iesu i paribelei i pa, "Anina e ririwa nanare."

³ Pirisi Babadai e viviwauim kaua maġamaġau i Aubai.

⁴ Ma nanare Pilate, Iesu i vitaraviravirana-melei i pa, "Tam ma paribelana bo ega? Ma nonori e viviwauim kaua maġamaġau i Aubai!"

⁵ Wate Iesu i genuana ma ega ita paribelei. Ma Pilate i ba kaua.†

Iesu ana iraġe i vianinei

(Matthew 27:15-38; Luke 23:13-25; John 18:39-19:16)

⁶ Taui ai kaua maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nenea.

⁷ Orotu tagogi wavana Barabas; tauna Rome gabemani i viġavie i ma i pani da panipani au numana i mamae. Ana rava maiteni tauvirāgena.

⁸ Ma patara i ġeta da Pilate ita vibagħi da panipani tagogi ita rupeni Raġona Torelana au marana.

⁹⁻¹⁰ Pilate i paribelei, "Taumi o ġoegħoei da mai Jew ai gulau ana rupeni aubaimi bo?" Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

¹¹ Wate Pirisi Babadai, patara i egari da Pilate, Barabas ita rupeni ma ega Iesu.

¹² Pilate, patara i paridadana-melei i pa, "Tauna o ġoreġorei mai Jew ai gulau mena ana kauanei?"

¹³ Taui i garara, "Ma tuparatui!"

¹⁴ Pilate i riwa, "Aiwai apoapoena i kaei?" Ma taui i garara guratana, "Ma tuparatui!"

¹⁵ Pilate i ġoed da patara ita vinuabai ma Barabas i rupeni ma sorodja i egari da Iesu i kwapui da i vitaratarai ma i naei da ita tuparatui.

Sorodja, Iesu i vinamei

(Matthew 27:27-31; John 19:2-3)

¹⁶ Sorodja, Iesu i taravaina-ruie Pilate ana au numa ma ai rava ġelaui i ġorejai.

¹⁷ Ma gara lebalebarina[‡] [me gulau ana garal] Iesu i votenī ma kunuteia ai donadonanei i viri da au kolana i terei.

¹⁸ Ma vinamana i raukarei ma i garara, "Egualau mai Jew ai gulau!"

¹⁹ Ma kolana gonuei i raviravi ma i ovaovai. Ma ae-tutuie i mae-ġaira au doa ma i raudunelei ma i vivinamei.

²⁰ Ma i vijiboga vorovei ma gara lebalebarina i voġiġi-tawanei ma ana gara i votenī. Ma i taravaina-opunei da ita tuparatui.

Iesu i tuparatui

(Matthew 27:32-44; Luke 23:26-43; John 19:17-37)

²¹ Taui i nenea ma Simon i nelagħi, rava Sairiniei[§] (tauna Rufus ma Alexander amai). Simon wapuei i nenei. Ma sorodja, tauna i egari da Iesu ana korosi iavarai.

²² Taui, Iesu i niae da gabu i ġoreġorei Golgotha, lamna anona unu gabuna.

²³ Sorodja, wine bunama myrrh maiteni i virai ma Iesu i veredadani, wate tauna i geduaiei.

* **15:1:** Mrk 14:55 *Sanhedrin* † **15:5:** Mai Rome ai tarawatue mamae da maranai i viviwauim ma tauetara ega uta paribelei lamna tam anina wawu ma varai. ‡ **15:17:** Eng. *purple*. § **15:21:** Eng. *Cyrenian*.

²⁴ Ma Iesu i tuparatu ma ana gara, taui ava au orai i ġutai.*

²⁵ Ubaubanai 9 kilok nanare, Iesu i tuparatu.

²⁶ Aniviwawuna i girumi ma i tutui, "Mai Jew ai gulau."

²⁷⁻²⁸ *Danedanenei ruāga, Iesu au ririvana i tuparatu; tagogi au oienma ġelauna au kelakelauna.[†]

²⁹ *Taubabara, kolai i kwajikwajie ma Iesu i vivinamei, "Na! Tam Tempol taurikaina ma au pom tonuġa ma voa-melei.

³⁰ Ma vilawana-melem ma *korosiei* ma ġairai!"

³¹ Ma nanare Pirisi Babadai ma Tarawatu Babadai maiteni, Iesu i vivinamei, "Rava ġelaui i vilawani, wate ainelana ita vilawana-melana-avei.

³² Keriso Tauvilawana, *Israel* ana gulau; marina *korosiei* ma ġairai ma tana inanai da tana vitumaġanei!" Danedanenei i tupatuparatu maitenai, Iesu i vinamei.

Iesu ana iraġe

(Matthew 27:45-56; Luke 23:44-49; John 19:28-30)

³³ Ma au benai dobu anatapuna i waguvarei da 3 kilok au bigai.

³⁴ Lamna maranaina Iesu ponana i rata ma i kwatu, "Eloi, Eloi, lama sabachthani?" Lamna anona, "Au God, au God aiwai aubaina u netawanue?"

³⁵ Ma rava ġelaui au ġereġere i maimairi i nonori ma i riwa, "Ona rautaniġanei, Elijah e kwatwatuei!"

³⁶ Ma rava tagogi i ruba da gara ai au damona i pani ma au *wine* tomatomana i vigaloj ma i voepai Iesu au ipirina ma i riwa.[‡] "Ona vipaipai ma tana inanai mepa da Elijah ina nei da ina tereġairei."

³⁷ Ma Iesu ponana i rata ma i kwatu ma i lavutu tawanana.

³⁸ Ma Tempol au orana anitereġġara au pouna i wanasiakai au tepana da i ġaira au doa.

³⁹ Ma *sorodja* ai bada, Iesu au naona i maimairi; i 'nanai da i lavutu tawanana ma i riwa, "Wei anina God Natuna."

⁴⁰ Waivine ġelaui ueia i mae ma i raraubiga: Mary Magdalene ma Mary (James keikeina ma Joses[§] aloi) ma Salome.

⁴¹ Taui, Iesu i votagotagoi ma i vovoagui maranai au Galili i mamae ma waivine ġelaui maġamagaui, tauna maiteni i ġegħe au Jerusalem, anatapui kampa.

Iesu i vikokoagei

(Matthew 27:57-61; Luke 23:50-56; John 19:38-42)

⁴²⁻⁴³ Ma au biga i tuturiaei Joseph Arimatheaei* tauna rava ġaegħena tagogi boru ġetelarana au orana. Tauna God ana vigulau ana nei i vipaipaiei. Ma vokaukaua marana (Lamna Sabat au naona)[†] ma Joseph ana teptatorana, Pilate awarina i rui ma Iesu taubeuna i vibagi.

⁴⁴ Pilate i baiei da Iesu boibog i 'raġe. Tauna, *sorodja* ai bada i kwatuei ma i vitara-virevirei da Iesu i 'raġe bo ega?

⁴⁵ Maranai *sorodja* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ġaegħena i gimarai ma Iesu tupuana i tere-ġairei. Garei i umai ma au guba tupuana i vimataveni ma ġaima ġaegħena i kaipeuri da kokoaga metaetana i viaitomeni.

⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ġabuġabui i gimarai da i naiegi da Iesu tupuana ita buloi.*

² Ma Sunday ubaubanai boibog i maranai madeġa i gogogo, taui i nae au kokoaga.

* ^{15:24:} Taui ġaima i tawanei me dice da aiai aiwai garana ita vaia. ^{15:27-28:} Isa 53:12 ^{15:27-28:} Giruma ġelaui waduboi vs 28 e mamae *Ma aiwai i kaukauei lamna peroveta i ririwea i tupua*, *Tau i 'nanai me taui go'apoapoe taukauei*. Isa 53:12 ^{15:29:} Mrk 14:58 ^{15:36:} Psa 69:21 peroveta i girumi da Keriso ita verei. ^{15:40:} Au Mat 27:56, Matthew i girumi Joseph ma ega Joses. ^{15:42-43:} Eng. *Arimathea*. ^{15:42-43:} Mai Jew ai *Sabate*, madeġa e neneulai au Friday e vivikarei da madeġa e neneulai au Saturday e kwakwa. Mai Jew ai Tarawatu e ririwa da rava i 'raġe lamna marana tagogina ina doboi. *Sabate* amadodo madeġa e neneulai ina vikarei lamna aubaina Joseph i volaġġilagħina da Iesu taubeuna ita doboi.

* ^{16:1:} Mai Jew ai kaua maemaena da taubeu monamonei ina buloi ma muriai ina doboi ma waivine i ġoiei da wei kauai ita votagotagoi.

³ Ma i nenaе ma i bababani, "Aiai aubaita ġaima kokoaga au metaetana ina kaipeura-tawanei?"

⁴ Maranai taui i taepai, i 'nanai da boibogī ġaima i kaipeura-tawanei - ġaima ġaeġae kaukauana.

⁵ Maranai i rui au guba ma oroto laragana ana gara ararapoirina i 'nanai au oienā.[†] Ma taui orai i auepai.

⁶ OROTO laragana i riwa, "Eġa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eġa weka! Taui weka taubeuna i vimataveni.

⁷* Marina ona nae ma ana tauvotaġo ona riwei, ma Peter eġa nuuanuami ina vuru da Iesu e vivināo au Galili. Kampa ona inanai i ririwemi nanare."

⁸Taui i opu ma kokoagei i viruberubei ana ini sisisi ma ana rovoi. Taui i rovo kaua, lamna aubaina eġa rava ita riwei.

Mark 16:9-20

Mark Riwana Aiaina damona lamna wariaga i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eġa

⁹ Iesu iraġelei i vomairi me au Sunday ubaubanai boibogī ma i ainae da Mary Magdalene awarina i eġa. Maraotai Iesu, Mary awarina arua-apoapoei seven i viopuni.

¹⁰ Iesu, ana tauvotaġo i vivinuabola ma i toutou ma Mary i ġeta da i pariverei.

¹¹ Ma Mary i pariverei da Iesu i lawana me ma tauna matanei Iesu i 'nanai. Wate taui eġa ita vitumaġanei.

Iesu, tauvotaġo ruaga awari i eġa

¹² Wei au murina Iesu inanana tapuna ma ana tauvotaġo ruaga awari i eġa; maranai taui i nenaе au melagai.

¹³ Taui i naeme ma tauvotaġo ġelaui i vieġei. Wate taui nanare eġa ita vitumaġanei.

Iesu, Taui 11 awari i eġa

¹⁴ Muriai taui 11 i amam ma Iesu awarii i eġa. Ma i eni aubaina taui orai i bado ma eġa ita vitumaġana maranai rava, i riwei da Tauna i vomairi me.

¹⁵* Iesu ana Apasol i riwei, "Ona nae dobu au anatapuna. Ma God Riwana Aiaina ona jimej rava anatapui awarii.

¹⁶ Aiai da i vitumaġana ma i babataito; tauna ina lawana. Ma aiai da eġa ita vitumaġana ina kovoġi.

¹⁷ Ma taui aiavoi da i vitumaġana, rewapani ina verei da kaua babai ina kaei. Ma arua-apoapoei ina viopuni ma pona tapunei ina babani.

¹⁸ Taui, mota uraiei ina vaia ma waiaawa ina umai ma eġa ina rauputei. Ma urai doridoriai au kolai ina terei ma ina lawana."

God, Iesu i ġaie au Mara

¹⁹* BADA Iesu, awari i babani vorovei. Ma tauna i ġaie au mara ma God au oienā i kiala.

²⁰ Tauvotaġo i opu ma dobu au anatapuna i raraugugula. Ma BADA, taui i voagui ma kaua babai i kaukauei da tauvotaġo aiwai i bababaniei i vovai-virewapani.

[†] **16:5:** Tupua i vimataveni au oienā i kiakiala, ana gara ararapoirina. * **16:7:** Mrk 14:28 * **16:15:** Act 1:8 * **16:19:** Act 1:9-11

Apasol ai kaua Pariverena

Luke ana buka i giruma vorovei ma muriae Apasol ai kaua bukana i girumi. Tauna ana ano gaegeaena lamna i goei da rava ita viegei da menanare Arua Vivivireina Iesu ana tauvotagotaago i rau-etalaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana. (1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaġana. Tauamgiruma ana nota ġaġġena da wei bukana tauiavana ita pariverei da kerisiana avena Rome gabemanina ita viviġavie. Kerisiana vitumaġanana lamna mai Jew ai vitumaġana e kaukauana-paiei. Wei bukana i ġutai da raġaraġana tonuġa, ma e viviatataieta da dobu au anatapuna Jesu Riwana Aiaina i jimej ma ekalesia i vitupi:

Iesu ana ġae au murina Ekalesia au Jerusalem ai nola i vikarei;

Palestine taun gelau i awari tua-nae;

Ma i tua-nae au Mediteranean da i nae au Rome paratana. Wei bukana ana kaua gægaena lana Arua Vivivireina i nolanola, ma rewapanana tauvitumaðgana au Jerusalem i verei au Pentecost. Ma wei au bukana i vieðeta da Arua vivivireina mara nonoa agu ma rewapanana ekalesia ma ai babada i verei ai au animola au anatapuna. Wariaga kerisiana ai pariverena i tere-tagogie raugugula au maðgamagau, ma kaua ma ai nola i kaukauei anatapui. Wei au bukana i girumi da wei parivai-nuaganaganana ana rewapanana tauvitumaðgana ai au lawana ma kerisiana ai au voepaepa i viatataieta.

Buka reregana 1.

Vokaukaua tauvimatamata aubai (1:1-26)

Iesu ana tarawatu ma ana parivainuāgana damona (1:1-11)

Judas Epaiana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–12:25)

Paul ana nola (13:1–28:31)

Paul ana vagai tagogi (13:1–14:28)

Boru au Jerusalem (15:1-35)

Paul ana vagai viruaina (15:36–18:23)

Paul ana vagai vitonuina (18:24–21:16)

Paul i viapanipani au Jerusalem, Caesarea, ma Rome (21:17–28:31)

Iesu ana Apasol i parivainua ġani

¹ Egalau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem

² i nae da ana gae au marana. Muriai da Iesu i gaiei au mara, Tauna Arua Vivivireinei ana apasol vinevinei riwa bagibaginei i pariverei.

³Iesu ana iraäge au murina i viegħana-melei ana apasol awarii. Ma kaua maġamaġau i kauedda apasol i vitu maġħadha biegħi minnha. Taui awarii i eġa au pom 40 au orana ma God ana vigħilu i babaniei.

⁴ Maranai ana apasol maiteni i vitagogiei ma i riwana-guratei i pa, "Ega Jerusalem ona oputawanei, wate pulona amau i paripari-vainua^ganimi ona paini, maraotai a ririwemi nanare.

⁵ *John wairei i babataito, wate mara aburuna ava Amau, Arua Vivivireinei taumi ina babatitomi."

God Iesu i qaei au Mara

⁶ Muriai maranai Iesu ma Apasol i vitagogiei ma taui Iesu i vitara-virevirei i pa, "Bada! Marina, Israel ana[†] vigulau ma vere-melei bo?"

⁷ Ma lesu i paribelei, "Amau ainelana ana rewapanei mara ma iri e vivibadei, aubaina da taumi ega ona aramanei.

⁸ *Waté maranaina Arua Vivivireina au orami ina rui, maranaina taumi rewapana ona vaia. Ma aubaiou na vitaunola au Jerusalem, Judea, au Samaria ma dobu au anatapuna.”

⁹ I babani vorovei ma au matai God Iesu i ġaiei au mara. Ma apau i nei da i purui ma tauri.

* **1:1:** Bukanau naona i girigurumi lamna Luke ana Gospel weiu marana. Mai few wei ega ita ſeo, ma i ſeo da ita virai.

◊ **1:5:** Mrk 1:8 † **1:6:** Rome gabemanina Juda i vibadei

◊ **1:8:** Mrk 16:15 ◊ **1:9:** Mrk 16:19

ēga ita inana-melei.

¹⁰ Ma taui i ̄gogouta au mara ma nelara ruāga ai gara ararapoiri au ririvai i raumairiei.

¹¹ Ma i riwa, “Mai Galili, aiwai weka o maimairiei ma o ̄gogoutatei? Wei ravana menanarena o inanai i ̄gaenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i ̄gaira me au Jerusalem lamna ēga uama ma au ̄geregere.

¹³ *Ma au Jerusalem i ̄geta ma i ̄gae numana i mamae lana au tepana au vatavatara. Taui ai wava, Peter, John, James ma Andrew, Philip ma Thomas, Batolomeo ma Matthew, James - Apicus natuna, ma Simon tauna au naona Zealot[‡] ma Judas - James natuna.

¹⁴ Ma wei ravai mara patapatana i vivitagogiei ma i raraupari gogona, waivine ̄gelaui ma Iesu ana roaroa ma aloi Mary maiteni kampa.

¹⁵ Wei au marana, tauvitumāgana 120 i vitagogiei ma Peter i vomairi ma wenanare awari i babani,

¹⁶⁻¹⁷ “Varevareieu, Judas Iskariot lamna turata tagogi ma maiteni ta nola gogona, wate muriasi i voagu da Iesu i pani. Arua Vivivireina wei riwana wariaga gulau David i riwei da ina tupua; ma aiwai i ririwei anina nanare i tupua.”

¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu.

¹⁹ Ma rava anatapui au Jerusalem wei irāgena riwana i nonori, lamna aubaina taui nai dobuna ai ponei i viwavai Hakeldama, wei anona Tara Doana.

²⁰ “Wariāga Gulau David i girugirumia, nanare i tupua,

Ana animae ina kwakwawa,

ma ēga aiai au orana ina mae.

(*Psalm 69:25*)

Ma

rava ̄gelauna ana nola ina vaia.

(*Psalm 109:8*)

²¹ *Lamna aubaina marina awarita, rava ̄gelauna tana vinei da ina raviepaiai. Tauna ravana Iesu maiteni ta bababara-nae madega tonūga au orana,

²² John rava i babataitoi au marana ma i nae da Iesu i ̄gaiet au mara. Ma maiteni tana nola ma rava tana riwei menanarena God Iesu irāgelei i vovaimairini.”

²³ Ma taui rava ruaga i vinei, Joseph-Barsabas (ana wava ̄gelauna Justus) ma Matthias.

²⁴⁻²⁵ Anina ma taui i raupari, “BADA tam rava anatapui orai u aramanei. Ma viēgelai da wei ravai ruaga, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.”

²⁶ Anina ma taui i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ̄gairai

¹ Pentecost torelana i ̄getai ma tauvitumāgana anatapui numa tagogi au orana i vitagogiei.

*

² Maratagogi gugura ̄gaegaena, nonorana me ive vivirewapanana marei i ̄gairai ma tauvitumagana i mamae numana i vioai.

³ Taui purapura inanana me ai menamenana i 'nanai, i ̄gairai ma rava tagotagogi ava au kolai i kiala.

⁴ Ma Arua Vivivireina anatapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui.

⁶ Ma patarai kampa i viruberubei, ma i nonori da gugurana lamna tauvitumāgana taui tagotagiuya ai ponei i bababani ma taui ai nota i kwa.

⁷ Taui anatapui i baei ma taui ava i babani vivira i pa, “Wei mai Galili bo?

* **1:13:** Mrk 3:16-19 ‡ **1:13:** Rava ununurana. Wei ravai mai Rome ai gabemani e vivigavie. * **1:21:** Mrk 1:9; Mrk 16:19 § **1:26:** Wei kalona wenanare: mai Jew wava ̄gaima muomuo awari i girugirumi ma e tawatawanei, ma aiia ana namba i ēga lamna tauna ina vaia. Taui i vitumagana da wei kauana awarinei God taui ina viataiae da aiai ita vinei. (Pro 16:33) * **2:1:** Mai Jew ai Rāgona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

⁸ Ma menanarena da anataputa awarita ata ponei e bababani!

⁹⁻¹⁰ Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijja, Pamphilia, Egypt ma Libya navanavana, au Sairini au ġereġerena, ma ġelauta mai Rome,

¹¹ ġelau mai Jew ma ġelau Jentail wate inibor i vaia da i vimai Jew. Ma ġelauta mai Crete ma mai Arabia. Wate God kaua ġaġġena i kaukaueia, ata ponei i bababaniei ma ta nononori!"

¹² Tau i anatapui i vinuanaina, nuanuai i raġaraġa ma i bababani vivira, "Wei aiwai kauana e tuputupua?"

¹³ Wate ġelau tau i vinamei i pa, "Wei ravai i uma bua!"

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana ġaġġenei patara awarii i babani, Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kaua.

¹⁵ Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

¹⁶ Wei lamna wariġa peroveta Joel i ririweia e tuputupua:

¹⁷ Mara au damona,

Aruau rava anatapui awari ana iwaġi.

*Ma natunatumi nelarai ma waivinei riwau ina jimei,
ma nelara youi mataiei kaua ina inanai,
ma babada magumaguri raubonie i kaua ina inanai.*

¹⁸ Wate nanare, Aruuau ana iwaġi au taunola nelarai ma waivinei awarii,
ma ina vitaubabani.

¹⁹ Ma kaua babai au mala ana kauei,
ma au dobu mataira ana vieġġi
ai araratana, tara ma bau potopotona.

²⁰ Ma madeġa ina waguvarei
ma nawaravi ina ravitaratarai,
muriar da BADA ana mara ġaġġena ma borborumana ina nei.

²¹ Nai au marana aiavoi da BADA awarina e viviġore agu aubaina BADA tau i ina vilawani. (Joel 2:28-32)

²² Ma Peter i babani me:

Mai Israel ona rautaniġana: God Iesu Nasaretei i vovai-virewapani da kaua babai, ma mataira ġaġġei i kauei da ita viatataiemi da tauna anina Godei i nei.

²³ ♦Wate God wariġa i viogej ma ana ġoana nanare da Iesu au urami i terei, ma taumi ġoapoapoe ravai ai aguei, Tauna au korosi o tuparatu i da o virägeni.

²⁴ ♦Wate God, Iesu iraġelei i vovaimairini, ma iraġe iniviarana i vaitawanei ma iraġe eġa tagogogina da tauna ita vojjini.

²⁵ Wariġa David. Iesu i bababaniei maranai i riwa:
Tau a inanai BADA God au naou mara au anatapuna.

Tauna au oieu lamna aubaina eġa ana rovo.

²⁶ Lamna aubaina nuaiai orau i oai ma menau i morelana,
ana iraġe ma a aramanei da tupuau ma paina-kauei.

²⁷ Ma aruuau eġa rava iraġeai ai au dobu ma voterei,
ma tam eġa am taunola vivivireina tupuana ma voterei da ina buda.

²⁸ Tam lawana etanaina u viatataieu,
ma Tam maiteni a mamae ma a vinuiai kaua. (Psalm 16:8-11)

²⁹ Au rava, A riwana-kauemi da amata gulau David i raġe da i doboi, ma ana kokoaga weka e mamae.

³⁰ ♦Wate David lamna peroveta, ma i aramanei da God i parivainuġani da ana damei gulau ina opu, me tauna nanare.

³¹ Ma David i 'nanai God muriai aiwai ina kauei ma i riwa,
Keriso ina vomairi me,

ma tupuana ega rava iraġeai ai au dobu ina voterei da ina buda. (Psalm 16:10)

³² Ma God Iesu-na tagogina iraġelei i vovaimairini, ma tauai anatapuiai a vimatamat.

³³ Ma God i ġaġei ma au oiena i vikialai. Ma Arua vivivireina i verei me i parivainuġana nanare, ma nai Aruana tagogina Iesu awariai i waġi, lamna marina o nononori ma o inainanai.

† 2:15: Mai Jew taui au bigai sia e aniani ma wain e umaumai.

◊ 2:23: Mrk 15:24

◊ 2:24: Mrk 16:6

◊ 2:30: 2Sa

³⁴ * David ega ita gae au mara, ma wate i riwa, BADA au Bada i riwei, “Au oieu ma kiala

³⁵ ma am gavia au ae karem ana terei.

(*Psalm 110:1*)

³⁶ Lamna aubaina mai Israel anatapumi ona aramana-kauei da wei ravana Iesu o tupatuparatuia, God i terei da BADA ma Tauvilawana.

³⁷ Ma maranai rava wei riwana i nononori, taui orai i rautonai da Peter ma Apasol ġelaui i riwei, “Varevareiai, tauai aiwai ana kauei da ana lawana?”

³⁸ Ma Peter i paribelei, “Taumi tagotagogi ava Iesu Keriso wavanei ona rupena ma ona babataito ma ami ġo'apoapoei ina nota-tawanei, ma God ana pulo Arua Vivivireina ona viai.”

³⁹ Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavo i da e kwatukwaturei ina nei Tauna awarina.”

⁴⁰ Ma Peter riwa ġelaui maiteni rava i vinua-terenei, ma i egari, “God ona vianinei da ina vilawanimi, ma ega kovoġa ona vaia.”

⁴¹ Ma rava maġamaġau Peter ana babani i vitumaġanei ma i babataito ma nai au marana rava 3,000 ai au boru i rui.

Tauvitumaġana i mae gogona

⁴² Ma tauvitumaġana Apasol ai viararamana i nononori, ma i viboruboru, i amam ma i raraupari gogona.

⁴³ Apasol kaua babai ma mataira ġaegae maġamaġau i kaukauei ma anatapui i rovo ma God i vivirana-kauei.

⁴⁴ *Ma tauvitumaġana anatapui gabu tagogi i vivitagogie ma aiwai ġariei ai rava maiteni i ġutagħutai.

⁴⁵ Taui ai doa, ai numa, ai wapu ma ai purapura i għimximarei ma manena ai rava ġelaui maiteni i ġutagħutai.

⁴⁶ Taui Mara patapatai au tempol i vivitagogie, ma ai au numa ana nuaiai ma ana morelanai i amam gogona.

⁴⁷ Ma taui God i vovoepapei ma rava anatapui i vivinuaaini. Ma marana patapatai rava voui i nenei Iesu awarina ma tauvitumaġana ai boru i viviratai.

3

Peter; oroto aena gwaġagwaġana i vilawani

¹ Mara tagogi au bigai 3 oklok, Peter ma John pari aubaina i ġeġae au Tempol.

² Ma oroto tagogi aena gwaġagwaġana i tupuei, ma mara au anatapuna ana rava i avavra neiai da Tempol metaetana, e ġoreġorei, metaeta aiaina, kampa i vivikialai ma rava i rurui tempol au orana i vivigimanei mane aubaina.

³ Maranai i 'nanai da Peter ma John aburuna ava da au metaeta ita rui, ma i vibagħi mane aubaina.

⁴ Peter ma John orotona i 'nana-tunutunui ma Peter i riwa, “Ma inanaiai!”

⁵ Ma orotona taui i 'nanai ma i notanotai da aiwai awarri ita vaia.

⁶ Ma Peter, orotona i riwei, “Awariu silva ma gold ega wate aiwai awariu lamna ana verem. Iesu Keriso Nasaretei, wavanei ma vomairi, ma babara!”

⁷ Ma Peter oroto nimana au oieina i vojjini ma i vovägi da i vomairi. Ma maratagogi oroto aena ma ae kwarukwaruna i a i ma i virewpana,

⁸ ma aenei i viauepa ma babara i vikarei. Anina ma taui maiteni i rui au tempol ma tauna tempol oraninee i bababar, i viviauepa ma God i vovoepapei.

⁹ Ma rava anatapui orotona i 'nanai i babbara ma God i vovoepapei,

¹⁰ ma i aramanei da tauna ravana tagogina tempol metaetana e ġoreġorei *inanana aiaina* au naona, i kiakiala ma i vivigimana. Ma rava anatapui i 'nanai aiwai i tupua wei orotona awarina ma i ba-guratana.

Peter patara awarri i babani

¹¹ Ma orotona Peter ma John i vovojjini ma rava anatapui i bana-kauei, ma i viruberubei taui awari au lovelove e ġoreġorei. Solomon ana lovelove. *

¹² Ma maranai Peter patara i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainanatunutunui, apamina tauai ai rewapani bo ai vipatutuei, wei ravana a kauei da i babara?

* **2:34:** Psa 110:1 ◊ **2:44:** Act 4:32-35 * **3:11:** Solomon ana lovelove tagogi tempol au orana e mamae. Wei lamna gari au ririvana ma ana tuatua magħamaġa.

¹³ Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraġeni, ma Pilate au matana o geduaiei. Pilate i ġoei da ita rupeni wate taumi eġa ota vianinei.

¹⁴ *Iesu lamna rava vivivireina ma jijimanina, wate o geduaiei. Ma Pilate i ġoei da Iesu ita rupeni, wate taumi o ġoei da tauviraġena i rupeni aubaimi.

¹⁵ Ma taumi lawana maemae-nonoana tauvereina o viraġeni, wate God i vilawana-melei, tauai wei a vimatematei.

¹⁶ Wei ravana aena gwaġagwaġana Iesu au wavana i vitumaġana ma lamna aubaina i lawana. Taumi o aramanei ana doria menanare, Wate ana tumaġana Iesu awarina i vilawani.

¹⁷ Ma au rava marina a aramanei da taumi ami babada maiteni Iesu o viraġeni, aubaina taumi eġa ota aramanei da tauna tauvilawana.

¹⁸ Wate wei lamna wariaġa God ana peroveta anatapui i ririweia i tupua, God i riwa da ana tauvilawana ina vinuapoapoe.

¹⁹ Ami ġoа apoapoe Ona voterei ma ona mae-taviremi God awarina da tauna ami ġo'apoapoe ina nota-tawanei.

²⁰ Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawanei.

²¹ Iesu au Mara ina mae da God kaua anatapui ina ravivouni, me God ana peroveta vivivirei wariaġa i ririweia nanare.

²² *Moses i riwa, "BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniġanana-kauei. †

²³ *Ma aiāi da wei perovetana eġa ina rautaniġanei lamna God ana rava awariei ina vilamonei."

²⁴ Peroveta Samuel ma muriae Peroveti maġamaġaui, kaua i ririweia marina e tutupupua.

²⁵ *Taumi nai perovetai natunatui ma taumi maiteni parivainuġana bagibagina au orana. Au baina God Abraham i riwei, "Am epaepaia awariei dam anatapui au dobu ana viaiaini."

²⁶ Ma maranai God ana taunola i vinei, ma au naona i paritawanei awarimi da ita viaiainimi, ma lamnei taumi tagotagogi ava ami ġo'apoapoe ota opu-tawanei ma ota nei Tauna awarina.

4

Jew babadai Peter ma John i etarei

¹ Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ġelauui † i ġetai.

² Tauli amlöi i ġaġġai kaua Peter ma John awari aubaina tau i viviararamana da God, Iesu iraġelei i vovaimairini ma wei i viatataiana da God rava anatapui iraġelei ina vovaimairini.

³ Tauli Peter ma John i pani ma au i pom aubaina panipani au numana i terei da i mae mara.

⁴ Wate rava maġamaġaui riwa i nonori ma i vitumaġana, ma ai maġa nelara 5,000 waivine eġa ita iavi.

⁵ Ma mara i tom ma Jew babadai, dogadogara ma tarawatu babadai au Jerusalem i vitagogie.

⁶ Ma pirisi ġeġetelarana Annas kampa ma Caiaphas, John, Alexander ma pirisi ġeġetelarana ana rava maiteni. ‡

⁷ Ma taui Peter ma John i neiei da au naoi i vimairini ma i riwei, "Aiwai rewapananei, ma aiāi wavanei wei o kauei?"

⁸ Arua Vivivireina Peter orana i vioai ma taui i riwei, "Rava ai babada ma dogadogara;

⁹ tauai kaua aiaina a kauei gwaġagwaġana awarina ma amadodo taumi o vitara-virevirelai, da menanare tauna i lawananei.

¹⁰ Ma wei ona aramana-kauei, da taumi ma mai Israel anatapui, da Iesu Keriso Nasaretei o tuparatui, Wate God tauna iraġelei i vovaimairini ma tauna wavanei wei orotona au naomi lawalawaina e maimairi.

* 3:13: Exo 3:15 * 3:14: Mrk 15:6-14 * 3:22: Deu 18:15, 18 † 3:22: Mai Jew e ririwa da Moses lamna ai peroveta ġaġġena. * 3:23: Deu 18:19 * 3:25: Gen 22:18 * 4:1: Tempol tau-painina lamna anatapuna au tempol e inainana-vaitetei (purusimani). Tauli pirisi ġeġetelarana ana taunola. † 4:1: Sadusi taui iraġelei vomairime eġa ita vitumaġanei ‡ 4:6: Mai Rome Caiaphas i vinei da Pirisi ġeġetelarana, poiana Annas epaiana. Wate mai Jew ai au giu da aiāi pirisi ġeġetelarana vaivaina i vaia, tauna anina ina mae da au iraġe. Luke e ririwa da Annas tauna pirisi ġeġetelarana.

¹¹ Taumi tauvoa nai gaimana o geduaiei, wate wei gaimana lamna numa ogona, numa ana tapuna e vovoijjini. §

¹² Lamna aubaina Iesu ainelana ina vilawanita. Ma God ega aiai gelauna au dobu rewapana ita verei da ina vilawana."

¹³ Ma taui Peter ma John ai tepatora inanai ma maranai i aramanei da taui ega girugiru-mai, ma i baei. Ma i aramanei da taui Iesu ana tauvota-gota-go.

¹⁴ Ma wate i 'nanai oroto i vivilawania Peter ma John maiteni i maimairi, lamna maranai taui gamoi i pota.

¹⁵ Anina ma Peter ma John i riwei da boru gabuna i opu-tawanei, ma taui ava i vitarairavira vivira.

¹⁶ Taui i vitarairavira-viravira i pa, "Aiwai tana kaei wei nelarai awari? Rava anatapui au Jerusalem i aramanei da taui kaua babai i kaukauei, lamna ega tana boviei.

¹⁷ Wate tana viigaei da wei kauai ega ina tua rava gelaui awari, ma riwa bagibaginei tana viigaei da ega aiai awarina Iesu wavanei ina raugugula."

¹⁸ Anina ma taui i gørei da i rui me, ma riwa bagibaginei i viigaei da ega aiai awarina Iesu wavanei ina raugugula bo ina viararamana.

¹⁹ Wate Peter ma John taui i paribelei, "Taumi ami nota aiwai. Tauai God ana voteletelei bo taumi?

²⁰ Tauai aiwai a inainanaia ma a nononorai babanina ega ana voterei."

²¹⁻²² Wei Orotona i vivilawani lamna gwa-gagwa-gana ma ana madega 40. Lamna aubaina rava anatapui God i vovoepaepai, ma babada ega ita aramanei menanare Peter ma John ina kovo-ganei. Ma i parivairovorovo-melei ma i paritawanei da i nae.

Tauvituma-gana God i vibagai agu aubaina.

²³ Peter ma John i nae me ai rava awari ma pirisi gae-gaei ma dogadogara aiwai i ririweia taui i viigaei.

²⁴ *Maranai tauvituma-gana wei riwana i nonori, taui anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukaueina.

²⁵ Tam Arua Vivivireinei am taunola, amaiai David gamonei u babani ma u riwa,

Ai wai aubaina rava awariai e mejimeji,

ma aiwai aubaina ai oga e taratarab labalabai?

²⁶ Ma dobu ai gulagulau i yokaukaua ma babada gae-gaei gelaui maiteni i vitagogie i da

(Psalm 2:1)

²⁷ *Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogie, da am taunola vivivireina Iesu u bulobuloia i viigaei.

²⁸ Ma tam am rewapanei ma am goanei am oga menanare u tarataranei marina nanare i tupua.

²⁹ BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei.

³⁰ Uram ma viloloi da ma vilawana ma kaua babai ma mataira gae-gaei ma kaei, am taunola Vivivireina Iesu wavanei.

³¹ Ma pari au murina, taui mepa i vivitagogie gabuna i vigu. Ma Arua Vivivireina anatapui orai i vioai. Ma ana tepatorai God riwana i raugugulei.

Tauvituma-gana gariei i gutagutai

³² *Tauvituma-gana anatapui ai nota ma orai tagogi. Ma ai purapura tagogi ma ega aiwai ita nuanei.

³³ Ma Apasol ana tepatorai ma rewapanai BADA Iesu ana irage, ma ana vomairi me i raugugulei. Ma God ana viaiaina gae-gaei taui anatapui awari i peu.

³⁴⁻³⁵ Ma taui au orai ega aiai aiwai ita voladagei aubaina, ai rava gelaui ai doa bo ai numa i gimagimarei ma manena i neneiai Apasol awari i tereterei, ma aiai da aiwai i vovoladagei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i gorenorei Barnabas, wei wavana anona lamna taudu-gu.

§ **4:11:** Mai Jew ai numa gaime i voavoai. Iesu tauna anina God ana Tempol vouna ogona. (Eph 2:19-21, Isa 28:16).

* **4:24:** Exo 20:11 * **4:26:** Wei lamna Keriso. * **4:27:** Mrk 15:1 * **4:32:** Act 2:44-45

³⁷ Tauna ana doa i gimarei, ma manena i neiai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei.

² Ma airuāga i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, "Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagimarei manena navanavana u nuanei?"

⁴ Doa lamna tam īgarimei da uta gimarei bo ega. Ma maranai u gimarei lamna manena tam īgarimei da uta verenei, aiwai aubaina nota apoapoenia au oram i rui? Tam ega rava awarina uta moru, wate God awarina u moru."

⁵⁻⁶ Maranaina Ananias wei riwana i nononori, tauna i peu da i'rāge. Anina ma nelara i rui da tupuana i umai ma i naiei da i doboi. Ma aiavo i da wei riwana i nonori i rovo kaua.

⁷ Taui ega ita mae guratana, ora tonuāa nanare ma awana i nei, aiwai i tupua ega ita aramanei.

⁸ Ma Peter wavine i paridadanei, "Abe uta riweu, tam awam Ananias maiteni doa o gimagimarei maiana anina wei bo?" Ma tauna i paribelei, "Ee, doa maiana anina nai."

⁹ Ma Peter i riwa, "Aiwai aubaina taumi o vianina da BADA Aruanota raudadani? Nelarai awam i bobodoboi ma inanai au metaeta da tam maiteni ina avara-opunem."

¹⁰ Maratagogi wavine Peter au ae karea i peu da i'rāge. Maranai nelara i rui au numa ma i 'nanai da wavine i'rāge, anina ma i avara-opunei da awana au ririwana i doboi.

¹¹ Lamna maranaina ekalesia anatapui, ma rava aiavo i da wei riwana i nonori i rovo kaua.

Apasol rava ma īgāma īgāui i vilawani

¹² Ma Apasol mataira ma aniba kauai ma īgāma īgāui i kaukauei rava awari. Ma tauvituma īgāna Solomon ana au lovelove i vivitagoei.

¹³ Wate rava īgelaui ai au boru ruina i rovoei, wate rava taui i vivirana-kauei.

¹⁴ Wate nelara ma wavine ma īgāma īgāui Iesu awarina i vituma īgāna ma tauvituma īgāna ai au boru i rurui.

¹⁵ Ma lamna aubaina rava ai rava doridoriai i avvara-opunei au eta ma ai au animatave i vimataveni, da Peter inii ita vodadani bo ega da īgouna taui ita īgouni da ita lawana.

¹⁶ Ma melagai īgelaui Jerusalem au ririwana ravai ma īgāma īgāui ai rava doridoriai, īgelaui arua-apoapoei i ruruiinia i neiai ma anatapui i vilawani.

¹⁷ Anina ma pirisi īgēgetelarana ma ana rava mai Sadusi anatapui orai unura i oai.

¹⁸ Ma Apasol i pani, ma panipani au numana i terei.

¹⁹ Wate waguvvarai BADA ana anela i nei da panipani numana metaetana i votawanei, ma taui i taravaina-opunei ma i riwei,

²⁰ "Ona rui tempol au orana, ona mairi ma lawana vouna riwana anatapuna rava ona pariverei."

²¹ Anela i ririwei nanare, taui au tempol i rui ma rava viararamanai i vikarei. Nai maranai pirisi īgēgetelarana ana rava maiteni i īgetai ma boru īgēgena e īgore īgore Sanhedrin i terei. Ma rava i paritawanei au panipani numana da Apasol ita neiai awari.

²² Taui panipani au numana i īgetai ma i baina-avei, ma i naeme da i viega.

²³ I pa, "Panipani numana anina i gudu-kauei, ma tauvipaipai au metaeta i maimairi; wate maranai tauai metaeta a votawanei lamna ega aiai kampa."

²⁴ Maranai tempol taupainina ai bada ma pirisi babadai wei riwana i nonori, taui i vinuānaina da aiwai i tupua.

²⁵ Ma rava tagogi i nei ma i riwa, "Ona rautani īgāna! Nelara panipani au numana o teretereia, taui au tempol e maimairi ma rava e viviararaman."

²⁶ Anina ma tempol taupainina ai bada, ma babada īgelaui maiteni i nae ma Apasol i neiai. Taui i rovo ma ega ita egari mepa da rava īgāmei ita ravi.

²⁷ Ma Apasol i neiai boru īgēgetelarana au naoi, ma pirisi īgēgetelarana taui i vitara-virevirei.

²⁸ I pa, "A riwana-guratem i da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai."

²⁹ Ma Peter Apasol īgelaui aubai i vitauvibabani i pa, "Tauai God ana votetelei ma ega rava.

³⁰ Taumi Iesu au korosi o tuparatui ma o vira īgāni, wate amamata ai God Tauna i vovaimairini.

³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai īgōapoapoe ina rupeni, ma ai īgōapoapoe ina nota-tawanei.

³² Ma tauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatela i awari."

³³ Taui wei babanina i nonori ma amlo i ġaġġai kaua, ma i ġoēi da Apasol ita viraġeni.

³⁴ Wate Pharisi ma tarawatu badana wavana Gamaliel, rava anatapui wei ravana e vivivrei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

³⁵ Anina ma ana rava i riwei, "Mai Israel, ona inana kaua ma muriai da aiwai wei ravai awari ona kaei.

³⁶ Mara tagogi oroto wavana Theudas viġavia i vikarei ma i kauana-melei da tauna rava ġaġġena, ma rava ai maġa 400 nanare tauna i votaġotagoi. Ma maranaina tauna i viraġeni ana tauvotaġotago i vilamonei ma aiwai anatapuna kampa i kwa.

³⁷ Wate tauna au murina oroto Galilei wavana Judas i ġeta, census au marana ma rava maġamaġau tauna i votaġotagoi, ma tauna maiteni i viraġeni, ma ana tauvotaġotago i vilamonei.

³⁸ Lamna aubaina a ririwemi da wei ravai ona voteretawanei! Mepa da taui ai nola ravei, amapo ina peu.

³⁹ Wate mepa da Godei, taumi eġa tagotagogina da wei ravai ona viġaei, taumi mepa da God o viviġavie!

⁴⁰ Taui Gamaliel ana babani i voteletelei. Ma Apasol i riwei da i rui, ma i wipie i kwapui ma i viġaei da Iesu wavanei ina jima, ma i paritawanei da i nae.

⁴¹ Aubaina i aramanei da God taui i vinei da Iesu wavana aubaina ina vinuapoapoe. Anina ma Apasol ana nuaiai Sanhedrin i opu-tawanei,

⁴² Taui mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaġu

¹ Tauvitumaġāna ai boru i rarata, ma au orai mai Jew Greek tababanieina, mai Jew kampa maemaei i viamparipariei. Taui i beubeura da ai kaikaibabu ai ġuta eġa ita terererei.

² Anina ma Apasol 12 tauvitumaġāna ai boru i raukwatuei. Ma i riwei, "Tauai Apasol ma ai nola lamna God riwana ata jimejimei ma avena mane nolana maiteni ata kaukauei.

³ Lamna aubaina au rava, awarimi rava 7 ona vinei, taui orai Arua Vivivireina i oai ma nuaulaulai da wei nolana ina kaei,

⁴ Ma tauai ai nola da pari ma God riwana ava ana jimei."

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaġāna God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

⁶ Ma wei ravai i neiai ma Apasol nimai taui au tepai i terei ma i raupariei.

⁷ Anina ma God riwana i vituui ma au Jerusalem rava maġamaġau Iesu i vitumaġanei, ma nanare pirisi maġamaġau i vitumaġana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukauei rava awari.

⁹ Wate mai Jew ġelau provins nununai i nei mai au Sairini, mai Alexandria, ma Silisia ma Eisia ai parinumana e ġoreġorei panipani *waduboi, Stephen ana ġavia i vomairi.

¹⁰ Wate Arua Vivivireina, Stephen nuaulaula ma riwa i verei ma i bababani da taui i vigamopotai.

¹¹ Lamna aubaina taui rava ġelau i gwalai da moruei Stephen ita vibenabenamei, ma ita riwa, "Tauai a nonori Stephen, Moses ma God i vivijibog!"

¹² Ma lamnei patara i viamlo-ġaġgaini, dogadogara ma tarawatu babadai maiteni. Anina ma taui Stephen i vojjini ma i naiei mai Jew ai Boru Ĝeġetelarana[†] awarina.

¹³ Ma taui rava ġelau i neiai da moruei Stephen i vibenabenamei, ma i riwa, "Wei ravana mara patapatana Tempol vivivireina ma Moses ana tarawatu i vivijibog!"

¹⁴ Tauai a nonori i riwa da Iesu Nasaretei tempol inarikai ma tarawatu Moses i verevereta anatapui maiteni ina virai."

* 6:9: Wei ravai lamna slave waduboi, marina i voterei da ana goanei e mamae.

† 6:12: Sanhedrin.

15 Ma rava anatapui nai au boruna i kiakala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

1 Anina ma Pirisi ġeġġetelarana Stephen i paridadanei, "Wei viwavuna, riwa kaua bo?"

2 ^oStephen i paribelei:

Varevareiu ma amamau, au babani ona rautaniganei. God boruborumana noita Abraham awarina i eġa au Mesopotamia, muriai da ita nae au Haran.

3 Ma God tauna i riwei, Am dobu ma am dam ma netawanei da ma nae dobu ana viatataiem lana.

4 ^oAnina ma Abraham Mesopotamia i netawanei ma i nae da au Haran i mae. Amana i'rāġe ma au murina God Abraham i paritawanei da marina dobuna o mamae lana kampa ita mae,

5 ^oNai maranaina God eġa Abraham doa ita verei, eġa aburu dadadana! Wate i parivainuġani, da ina verei tauna ma ana epaepaia aubaii. Nai au marana Abraham eġa natunatuna,

6 ^oma God wenanare Abraham i riwei, Am epaepaia au dobu ġela ina mae ma ina vitaunola, nai dobuna ravai taui ina rau-iviapoapoelej da madeġa 400 ina kwa.

7 ^o Wate ravai, awarii e vivitaunola ana kovog, ma muriai mai Israel ina opui ma wei au dobuna ina voepaepaipu.

8 ^oAnina ma God inibori parivai-nuaġanana bagibagina Abraham maiteni i kauei, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

9 ^oJacob natunatuna varei Joseph i unurei ma i gimarei da ita vitaunola au Egypt, wate God tauna awarina i mae.

10 ^oMa ana au nuabola i gagaloei. Ma God nuaulaula i verei ma i kauei da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei.

11 ^oMa gomara ġaġġaena i ġeta au Egypt ma au Canaan, ma vinuapoapoe ġaġġaena i tupua. Ma noinoita eġa ai lam.

12 Ma maranai Jacob i nonori da au Egypt lam, ma noinoita i paritawanei au Egypt, wei ai babara naona.

13 Ma muriai i nae me ma wei maranai Joseph i vieġana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei.

14 ^oAnina ma Joseph riwa i paritawanei amana Jacob awarina ma i riwei da ana numa ravai anatapui, ai maġa 75, ita nei au Egypt.

15 ^oAnina ma Jacob i nae au Egypt. Tauna kampa i'rāġe ma nanare natunatuna anatapui.

16 Taubuei i naiana-melei au Shekem ma Abraham Hamor natunatuna awarii kokoaga i gimimajaraia, kampa i vimataveni.

17 ^oMaranai mara i tugereġerej da God Abraham i paripari-vainuġania ita kauei, ata patata i maġa guratana au Egypt.

18 Ma Pharaoh vouna au Egypt i vibada ma tauna noita Joseph eġa ita aramanei.

19 ^oTauna amamata i morui ma i rau-iviapoapoei, i egari da natunatui melamelai numei i viopuni da ita i'rāġe.

20 ^oWei au marana Moses i tupua, tevera inanana aiaina. Amana ma alona natui i ġamoi da nawaravi tonuġa i kwa.

21 ^oMa maranai tevera numei i tere-opunei, gulau natuna guguinina tevera i vaia ma i ġamoi da natuna.

22 Ma mai Egypt ai nuaulaula Moses i viararamani ma i virewapano, babani ma nola awarina.

23 ^oMoses ana madeġa 40 ma i nota da ita nae ana dam ravai ita raugenari.

* 7:2: Gen 12:1 * 7:4: Gen 12:4 * 7:5: Gen 12:7; 13:15; 17:8 * 7:6: Gen 15:13-14 * 7:7: Exo 3:12 * 7:8: Gen 17:10-14; Gen 21:2-4; Gen 25:26; Gen 29:31-35:18 * 7:9: Gen 37:28; Gen 39:2-21 * 7:10: Gen 41:39-41 * 7:11: Gen 42:1-2 * 7:14: Gen 45:9-10, 17-18 * 7:15: Gen 46:1-7; Gen 49:33 * 7:17: Exo 1:7-8 * 7:19: Exo 1:10-11; Exo 1:22 * 7:20: Exo 2:2 * 7:21: Exo 2:3-10 * 7:23: Exo 2:11-15

24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i viraġeni.

25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate taui wei ega ita aramanei.

26 Ma maratomna Moses i nae me ma ana rava ruaġa i viġaiġaiawa i 'nanai, ma i riwei, "Taumi ava ma aiwai aubaina o viġaiġaiawa?"

27 Wate ġaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?

28 Tam ma viraġeniu me pom Egyptei u viraġenii nanare bo?"

29 Maranai Moses wei i nonori tauna Egypt i ruba-tawanei ma i nae au Midian, wei ega ana dobu wate kampa i mae. Muriai dobuna wavinena i ravaġi ma natunatuna nelarai ruaġa i tupua.

30 *Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i ega, inanana me ai menamenana ai aburuna rugurugui au orana i ġegħae.

31 Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa,

32 "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi.

33 Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana.

34 A inanai menanare mai Egypt, natunatu e rarau-iviapoapoelei. Ai ora-tou a nonori ma a ġairai da taui ata vai-tawanei. Ma marina ma nei, Tau ana paritawanem au Egypt."

35 *Stephen i riwa:

Wei Moses na tagogina, mai Israel i parivirevirei i pa, "Aiai i terem da tauai ma vibadelai ma ma rauetarelai?" Moses i paritawanei da ita vibademi ma ita tereopunemi, anela i ega ega ai menamenana au poui, ana aguei.

36 *Ma Moses taui Egyptei i ravena-opunenei ma mataira babai ma vivirewapanai i kaukauet au Egypt, Boga lebalebarina ma ai au vaġai madeġa 40 au mutulua.

37 *Wei Moses-na tagogina, mai Israel i riwei, "God muriai peroveta ami damei ina paritawanei me tau."

38 *Moses Israel patarana maiteni Egypt i opu-tawanei i vitagogiee au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoona i nonori ma wei lamna i veredamanei tauta awarita.

39 Wate noinoita Moses i parivirevirei ma au orai i ġoie da ita nae me au Egypt.

40 *Ma taui Aaron i riwei, "Nai ravana Moses, Egyptei i taravai-opunelai, tauai ega atta aramanei aiwai awarina i tupua. Ma tauai ai god kokoitau ma kaei da ina rauetaravieni."

41 *Anina ma bulumakau ġaubona kokoitau i kaei, ma pulo i apui awarina ma i amei ma i umei, da aiwai uraiei i kaukauet i vimae-ġaġaġeni.

42 Wate God taui i mae-puputei ma i voterei da ubona ma nawaravi ma madeġa au mara i vimae-ġaġaġeni. Wei lamna peroveta nununai i ririweia i tupua:

Rava mai Israel! Maranai madeġa 40 au mutulua.

Taumi ega Tau awariu ġamōġamo ota vunui ma ota apui tapa?

43 *Taumi ami god Molek ana numa gara ma ami ubona god kokoitaua Rephan o avari. Kokoitau o kaei da ota vimae-ġaġaġeni.*

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au ġelauna.

(Amos 5:25-27)

44 *Noinoita, God ana numagara, i avarai maranai au mutulua i mamae. Moses wei i voai, me God i viatataeia nanare.

45 Muriai Joshua noinoita i rau-ataraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David, ana au mara.

46 *God, David nuanuana i vai-kauei ma David i vibaga da tauna God ana numa ita voai.

47 *Wate David ega numa ita voai ma natuna Solomon numa i voai.

48 Wate God ġeġetelerana eġa rava uranei numa ita voavoai au orana ita mamae, me peroveta wariaġa i riwa i pa:

49-50 *Aubaina Tau aiwai anatapuna au mara ma au dobu a kaeui. Tapa?*

BADA i riwa, "Mara au anikiala*

ma dobu aeu kareu aniterenana.

Wate numa aiwaina ona voai tau aubaiu? Eġateni!

Tau au animae-kaua mepa? Eġa mepa!

(Isaiah 66:1-2)

51 Ma Stephen i riwa:

Taumi orami badobadoi. Ma eġa ota ġoegħei da God ona voletelelī ma taniġami o vopotai da ana riwa eġa ota nononori. Taumi Arua Vivivireina o viviġavie i me noinōimi i kaukauei nanare.

52 Noinōimi metaui perovetai eġa ita rau-iviapoapoelei. Wariaġa perovetai, God ana tauvilawana, ana nei i vinolenolei; Wate noinōimi wei perovetai maiteni i virāġeni. Ma marina Tauna i nei ma o vibebabenei ma o virāġeni.

53 God ana anela i paritawanei da ana tarawatu noinōita i verei, wate taumi tarawatuna eġa ota voletelelī.

Stephen ġaimej i virāġeni

54 Maranai babada wei riwana i nonori ma i meji guratana ma ivoi i uta-ġiriġiriei Stephen awarina.

55 Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oienā i maimairi.

56 Ma i riwa, "Ona inana! Mara metaetana i wanatawanei ma Rava Natuna a inainanai God au oienā e maimairi."

57 Marina taui anatapui taniġai i vopotai, i vigaragarei ma Stephen aubaina i ruba,

58 ma i taina-opunei au doa, taon i opu-tawanei da au ririva ma ġaimej ravina i vikarei. Ma tauviwawu aikwama i votawanei ma tevera laragana wawana Saul au aena i vidamni.

59 Taui i viraurauei ma tauna i raupari i pa, "BADA Iesu, arauau ma vaia!

60 Ma ae-tutunei i peu ma i garara, "BADA aik ġo-apoapoe ma nota-tawanei." Wenanare i riwa ma i rage.

8

1-2 Ma Saul kampa da Stephen ana iraġe i 'nanai ma i vianinei. Rava patupatutui ġelaui ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ġaegħena i vikarei ekalesia awarrii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae.

3* Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

4 Wate tauvitumaġana Jerusalem i rubaruba-tawanei taon ma dobu anatapuna i naeni ma Riwana Aiaina i raugugulei.

5 Ma Philip i nae au taon tagogi au Samaria ma kampa BADA ana Vinevine Keriso i raugugulei.

6 Maranai patarana, Philip i raraugugula i nonori, ma i 'nanai kaua babai ma mataira ġaegħae i kaukauei taui anatapui orai taputapunei i rautaniġana.

7 Tauna arua-apoapoei rava maġamagaui au orai i egari da ana garagararai i viopuopuna, ma nanare rava maġamagaui gwaġagħwai ma sigesigei i vilawani.

8 Ma nuaiai ġaegħena i mae nai au taona.

Simon tauna barabaravna

9 Wenanare, nai au taona oroto tagogi i mae wawana Simon, ma tauna wariaġa ava ana baravu i kaukauei ma mai Samaria i baibaei. Ma i voepaepana-melei da tauna rava ġaegħena.

10 Rava labalababa, ma wawai naenaei anatapui ana babani i rarautiġana-kauei ma i riria, "Tauna, God ana rewapani e ġoreġorei, Rewapani Gaeġaena."

11 Taui i vineneġħana-kauei aubaina mara nonoa taui Simon ana baravu i baebaei.

* 7:49-50: Wei anona lamna Bada wenanare natuna i riwei, "Tam au oieu ma kiala ma am ġavia au ae kareu ana tuvaidoedoei" ° 8:3: Act 22:4-5; 26:9-11

¹² Wate taui Philip i vitumağanei maranai, God ana vigulau Riwana Aiaina ma Iesu Keriso rava awari i raugugulei. Ma lamna Aubaina nelara da wainvive i nei da i babataito.

¹³ Simon maiteni i vitumağana ma i babataito. Ma Philip mepa i nena tauna kampa Aubaina kaua babai ma mataira vivirewapanai i kaukauei. Tauna wei pulona i bana-kauei.

¹⁴ Maranai Apasol au Jerusalem i nonori da mai Samaria, God Riwana i vitumağanei, taui Peter ma John i paritawanei awari.

¹⁵⁻¹⁶ Ma auSamaria i ġeta ma taui i raupariei da Arua Vivivireina ita rui au orai. Aubaina taui Iesu wavanei ava i babataito. Ma arua vivivireina ega ita rui.

¹⁷ Peter ma John urai taui au tepai i terei ma i raupari da Arua Vivivireina au orai i rui.

¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi,

¹⁹ ma i vibaġa i pa, "Tau maiteni nai rewapanana ma vereu da rava au kolai urau ana terei ma taui Arua Vivivireina ina vaia."

²⁰ Wate Peter i paribelei i pa, "Anina da God tam am mane maiteni ina tawanem ai au menamenana, Aubaina tam e notanotai da God ana pulo manelei ma gimarai!"

²¹ Tam wei nolana au orana am gabu ega ita mamae, Aubaina oram ega ita ai God au matana.

²² Am nota apoapoe ma votere-tawanei. Ma mae-tavirem BADA awarina ma ma vibaġa da am nota apoapoe ina nota-tawanei.

²³ Aubaina a inanaim da unura oram i oai tauai awariai ma wei notai apoapoei e panipanim."

²⁴ Simon marina Peter ma John i riwei, "Aubaiu BADA awarina ona raupari da aiwai o ririwei ega ina tupua awariu!"

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ġeta au Jerusalem.

Philip ma Ethiopei

²⁶ Mara tagogi BADA ana anela, Philip i riwei, "Ma vokaukaua ma ma nae au rauanaġei, etanai au Jerusalem da e ġaigaira au Gaza." (Wei etanaina lamna au mutulua).

²⁷ Anina ma Philip i vokaukaua ma i nae. Ma wei au etanaina oroto Ethiopiei 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana Aubaina,

²⁸ ma i nena-me ana au dobu. Ma ana au chariot i kiala ma wariaġa peroveta Isaiah buka i girugurimia i 'aiavi.

²⁹ Ma Arua Vivivireina Philip i riwei, "Ma nae ma chariot au ririvana ma babara-nae."

³⁰ Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, "Aiwai e iaiaavia e araramanei bo ega?"

³¹ Orotona i paribelei, "Menanare ana 'ramananei mepa da rava ega ita parivai-araramaniu!" Ma Philip i vibaġai da i ġeta da au ririvana i kiala.

³² Buka au orana, wei riwana i 'aiavi,

*Tauna i taravaina-naiei me sipu viraġgenana aubaina
me sipu natuna e genugenuana maranai aparana e boribori,
tauna ega aiwai ita latoni.*

³³ *Tauna i vijibogħi ma i vinimalamalai ma ega ita kauana-kauei awarina.
Aiai ana epaepaia ina babaniei.*

Aubaina ana mara au dobu i vaitawanei."

(Isaiah 53:7-8)

³⁴ Ma orotona, Philip i paridadanei, "Isaiah e babaniana-melei bo rava ġelauna e babaniei?"

³⁵ Ma Philip, wei riwana awarina i vikarei ma riwa ġelaui maiteni ma Iesu Riwana Aiaina i viararamani.

³⁶ Ma i nena da waira i 'nanai ma Ethiopei i riwa, "Ma inana waira noi, aiwai Aubaina da ega ana babataito?"

^{37*}

³⁸ Badana, chariot taurubeina i riwei, "Chariot ma vojjini" Ma tauna ma Philip i ġaira waira au orana ma Philip, badana i babataitoi.

* ^{8:37}: Buka wadubo nonoana vs 37 ega ita mamae.

39 Maranai wairei i ġeta, BADA Aruana maratagogi Philip i vai-tawanei ma turana eġa ita inana-melei, ma ana morelanana i nae ana au dobu.

40 Wate Philip au Asotus i raeġa ma dobuna i naeni ma Riwana Aiaina i raugugulei da au Caesarea taon i ġeta.

9

Saul i vitumaġana

1 Wate Saul amapo da i mejimeji ma i ġoegħoei da BADA ana tauvitumaġana ita viraġeni. Ma i nae Pirisi Ġetelarana awarina,

2 ma i vibagħi da pepa ita girumi boru-numai babadai awarii au Damaskas da rewapania verei da Iesu ana etanai tauvitumaġanai, nelara ma waivine ita pani ma ita neiai au Jerusalem.

3 Ma Saul, Damaskas i tuġereġerei, nanare ma lalalaina marei i ġairai da tauna i ravilalai.

4 Tauna i peu au doa ma pona i nonori awarina i babani i pa, “Saul, Saul! Aiwai aubaina e raraū-iviaipoapoeleu?”

5 Saul i paridadana, “Tam aiai bada?”

Ma pona i paribelei, “Tau Iesu, tauna e raraū-iviaipoapoele!”

6 Marina ma vomairi ma ma rui au Damaskas, ma kampa aiwai ina riwem ma kaei.”

7 Nelara Saul maiteni i nena i mairi kwakwa, ana gamopotai, taui pona i nonori wate eġa aiai ita inanai.

8 Ma Saul au doa i matamatave i vomairi ma matana i kala, wate eġa aiwai ita inanai. Ma ana rava i raunimavoai ma i taravaina-naiei au Damaskas.

9 Ma au pom tonuġa eġa ita inana, eġa ita am bo ita uma.

10 Au Damaskas tauvitumaġana i mae wavana Ananias. BADA ana au inana i viatataie i pa, Ananias!”

Ma i paribelei, “Bada, tau weka!”

11 BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu.

12 Ma ana au inana i ‘nanai oroto wavana Ananias i nei awarina ma urana au inina i terei da ita inana-me.”

13 Wate Ananias i paribelei, “Bada, rava maġamaġau i riweu da wei ravana ana kaua i apoapoe kaua tauvitumaġana awarii au Jerusalem!

14 Ma weka i nei pirisi ġaegħei ai rewapani da aiai wavam e viviborumei ina pani.”

15 Wate BADA, Ananias i riwei, “Ma nae! Tau a vinei da aubaiu ina vitaunola ma wawa u ina jimei, Jentail ma ai gulagulau awarii ma nanare mai Israel awarii.

16 Tau ana viatataiei da aubaiu ina jima ma rau-iviaipoapoe ġaegħena ina nei awarina.”

17 Anina ma Ananias i ġeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i eġa maranai weka u nenei, i paritawaneu awarim da ma inana me ma Arua Vivivireina oram ina vioai.”

18 Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.

19 Ma i am ma ana rewapani i vai-melei.

Saul au Damaskas i raugugula

20 Ma tauna maratagogi i nae ma pari au numai i raraugugula da Iesu anina God natuna.

21 Taui aivvoi da Saul i nonori i ba kaua ma taui ava i babani vivira i pa, “Wei ravana tagogina, rau-iviaipoapoe ġaegħena Iesu ana tauvitumaġanai awarii i kaukuei au Jerusalem bo? Tauna i nei weka nolana tagogina aubaina da tauvitumaġana ita pani ma ita naiei Pirisi babadai awarii bo.”

22 Wate Saul ana raugugula i virewpana kaua ma lamnei mai Jew au Damaskas i aramanie da Iesu anina Keriso, Vinevinena, ma lamna aubaina ana babani eġa ita parivirevirei.

23 Ma au pom biäga au murina Jew babadai i viogatara da Saul ita viraġeni.

24 Mai Jew marai ma wagħuvvarai taon garina au metaetana i vipaipai da Saul ita viraġeni. Wate Saul ai ogatara riwana i nonori.

25 Ma wagħuvvarai tauvitumaġanai ġelau i boda Saul i taravaini ma iriga ġaegħena au orora i poai ma gavvogavo aburuna taon au garina, kampa ġuravei i tere-ġairei au doa ma i ruba.

26 Saul i ġeta au Jerusalem ma maranai i ġoie da tauvitumaġanai ai au boru ita rui. Wate taui i rovoei ma eġa ita vitumaġanei da tauna Iesu ana tauvotaġo.

²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei.

²⁸ Anina ma taui Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei.

²⁹ Ma nanare Saul mai Jew pona Greek tababanieina maiteni i babani ma i veparipariğai, ma taui i viogatara da tauna ita virağeni.

³⁰ Maranai tauvitumağana ġelau wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina anaaguei ekalesia ai tumağana i vovai-virewapani, Ma ai boru i rarata, ma taui BADA i vivirana-kaeue.

Aeneas ma Dorkas

³² Nai maranaina Peter dobu mağamağau i naeni, ma God ana tauvitumağana awarii i ġeta au Lidda.

³³ Kampa oroto wavana Aeneas i nelägai, tauna gwağagwağana madeğä 8 ana au aravi i matave.

³⁴ Peter i riwa, "Aeneas, Iesu Keriso i vilawanim! Ma vomairi ma am aravi ma noui!" Ma maratagogi i lawana.

³⁵ Anina ma rava mağamağau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumağana tagogi wavana Tabitha (Greek ponanei lamna Dorkas) tauna marana patapatana kaua mağamağau aiai i kaukauei molamokai aubaii.

³⁷ Wei marana tauna i doria ma i'räge ma tupuana i oğai ma numa vatavatara au aidamo, i vimataveni.

³⁸ Lidda, lamna Joppa au geregrena ma maranai tauvitumağana i nonori da Peter au Lidda, taui ai rava ruağä i paritawanei da Peter i egari i pa, "Lağilägina ma nei!"

³⁹ Ma Peter taui maiteni i nae da i ġeta ma i taravaina-ruei au numa vatavatara. Kaikababa mağamağau ana toutoui Peter i mairi kwaviviroi. Maranai Dorkas lawalawaina ma kwama da gara i popopoa Peter i viatataie.

⁴⁰ Wate Peter anatapui i vibağai da i opu au doa, ma ae-tutunei i mae-ğaira ma i raupari, ma taubeu i riwei, "Tabitha, ma vomairi!" Tabitha matana i kala ma maranai Peter i 'nanai, i vomairi da i kiala.

⁴¹ Peter urana i viloloi ma i voagui da i vomairi. Ma tauvitumağana anatapui ma kaikababa maiteni i kwatuei, ma waviné lawalawaina taui i verei.

⁴² Ma wei riwana dobu Joppa i naeni ma rava mağamağau Iesu i vitumağanei.

⁴³ Peter au Joppa i mae au pom biäga nanare Simon ġamogämoo opina taurauğaroğaroëina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada.

² Tauna rava jijimanina ma patupatutuna, ma ana numa ravai maiteni God tau-rauduneli. Ma molamolakai i paipaina-kauei ma marana patapatai i raraupari God awarina.

³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, "Cornelius!"

⁴ Cornelius ana rovona anela i 'nana-tunutunui ma i riwa, "Au bada, menanare!"

Ma anela i paribelei, "Am pari ma am verena molamolakai awarii, i ġeta God awarina me pulo apuapunana ġabuna.

⁵ Ma marina nelara ġelau ma paritawanei au Joppa ma ravana wavana Simon wavana ġelauna Peter ina taravainiai.

⁶ Tauna rava wavana Simon, ġamogämoo opina taurauğaroğaroëina awarina e mamae gera au ririvana."

⁷ Maranai anela i nae, Cornelius ana taunola ruağä i ġorei, ma ġelauna lamna sorodia, tauna ana tauvipaipai, tauna God tauvitumağaneiana.

⁸ Tauna aiwai anatapua taui i riwei ma i paritawanei au Joppa.

Peter Cornelius i raugenari

* **10:1:** Wei ravana jentail.

⁹ Maratomna au benai nanare maranai nelarai Joppa i tuğereğerei, Peter i ġeta numa au tepana da ita raupari.

¹⁰ Ma am i'räge ma i'goei da aiwai ita ani, maranai taui lam i vovokaukauei, ma Peter matanei rauboni i 'nanai.

¹¹ I 'nanai mara i wanatawanei ma purapura inanana me puru ġaeġaena au adana 4 i vojijini ma marei i tere-ġaireiai au dobu.

¹² Au orana lamna sia tapuna ma tapuna, tetetei me mota ma kiu au aidamo lavelavei.

¹³ Ma pona i riwa, "Peter ma vomairi, ma virāgena ma ma am!"

¹⁴ Wate Peter i paribelei, "Eġa! Lamna eġa melanai ana kaei. Eġa melanai lam viviġana at a am-dadanai."

¹⁵ Wate pona i babani me, "Aiwai God i viviaiinia, eġa ma riwa da i apoapoe."

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, taui Simon ana numa i nelaġai ma i ġeta ana au metaeta.

¹⁸ Taui i paridadana, "Weka rava wavana Simon-Peter e mamae bo eġa?"

¹⁹ Peter amapo da wei i vivinua-notenotei maranai Arua vivivireina i riwa, "Simon, nelara tonuġa e baibaim!

²⁰ Lamna Aubaina ma vomairi ma ma ġaira au gabaura, eġa ma geduai, Aubaina tau a paritawanei awarim."

²¹ Peter i ġaira ma awarri i riwa, "Taumi tau o baibaeu bo, Ami ġoana aiwai?"

²² Ma nelarai i paribelei, "Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamägaui tauna e vivivrei. Anela vivivireina i riwei da uta nei ana au numa da aiwai u araramanei uta riwei."

²³ Ma Peter nelarai i ġorei da i rui au numa ma kampa i matavei.

Peter Cornelius ana au numa

Ma maratomna anatapui i nae, Tauvitumaġħana ġelaui au Joppa maiteni i vomairi.

²⁴ Ma au pom ġelauna taui au Caesarea i ġeta. Cornelius taui i paipaini, ma ana numa ravai ma ana rava i ġorei da i nei.

²⁵ Ma maranai Peter i ruirui au numa, Cornelius Peter i 'nanai ma i mae-ġaira au ae karenna ma ana vivirana i raudune.

²⁶ Wate Peter tauna i voepai ma i riwa, "Ma vomairi, Tau rava ota me tam."

²⁷ Peter ma Cornelius i bababani ma i ruirui au numa. Ma i 'nanai da patara tauna i paipaini.

²⁸ Peter taui i riwei, "Taumi o aramana-kauei da tauta mai Jew ata tarawatu e viviġeta da Jentail maiteni tana mae-gogona bo tana raugenari. Wate God i viatataieu da eġa rava ana ġorei rava apoapoea bo miramirana.

²⁹ Lamna Aubaina maranai u vibagħi da ata nei, Tau au nota aiainei a nei. Tau ata paridadanem, Marina ma riweu aiwai Aubaina au riwa u paritawanei?"

³⁰ Cornelius i paribelei, "Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamarina au naoiu i raumairie.

³¹ Ma i riwa, 'Cornelius! God am pari i nonori ma am verena molamolakai awarri i vinuiaiaeil!

³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamōġamo opina taurauġaroġaroena ana au numa e mamae.'

³³ Lamna Aubaina da am riwa lagħiġaqna ava a paritawanei, ma i ai da tam u nei. Tauai anatapuiai marina weka God au matana a vivipaipai da BADA aiwai i riwem ana nonori."

Peter ana babani

³⁴ Ma Peter babani i raukarei, "Marina a inana-kauei da God rava anatapui e vaivaia da tagogina.

³⁵ Wate dobu dobua i ravai God e vivivrei ma kaua aiai e kaukauei, Tauna wei ravai e ġoegħei,

³⁶ Taumi o aramanei God Riwana Aiaina i paritawanei mai Israel awarri da rava ina mae-kaua God maiteni, maranai Iesu Keriso ina vitumāġanei ma tauna ai lawana ina vibadei.

³⁷ Taumi o aramanei Iesu aiwai i kauei Judea au anatapuna, au Galili i vikarei maranai John babataito ai kaua i raugugulei.

³⁸ God Arua Vivivireina ma rewapani Iesu Nasareti i verei da dobu maġamägaui i naeni ma kaua aiai i kaukauei, ma rava au orai arua apoapoe i ruiruini, i vilawani.

³⁹ —Aiwai anatapuna au Judah provins ma au Jerusalem i kaukauei tauai anatapuiai a vimatematei ma a babbanie. Tauna au korosi i tutui da i'räge.

⁴⁰ Wate God tauna iraägelei i voepa-melei aupom au vitonuina ma i kaei da ġelauai awariai i ega.

⁴¹ Ega rava maġamaġaui tauna ita inanai, anina tauvimatamata i vinevinei awari ava i ġeta. Lamna tauai maiteni a uma ma am ana vomairi au murina.

⁴² Ma i egariai da dobu au anatapuna ana raugugula ma ana jima da God Iesu i vinei da rava anatapui lawalawua ma irairaġei ina rauetarei.

⁴³ Peroveta anatapui i jimei da maranai rava Iesu i vitumaġanei, Tauna wavinei God taui ai ġo'apoapoe ina vaitawanei."

⁴⁴ Maranai Peter i bababani ma Arua Vivivireina i ġairai ma rava i raurautanigana i vioai.

⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ġairei Jentail awarii.

⁴⁶ Au baina mai Jew i nonori taui pona tapunei i bababani ma God i vivimae-ġaġaeni. Anina ma Peter i riwa,

⁴⁷ "Taui Arua Vivivireina i vaia me tauta. Wei lamna aubaina ega aiai ina viġaeta da wei ravai tana babataittoi."

⁴⁸ Ma taui Cornelius ana numa ravai maiteni ma ana rava ġelaui Iesu Keriso wavanei i babataittoi, ma taui Peter i vibagħi da maiteni ita mae mara aburuna.

11

Peter ana babani

¹ Apasol ma tauvitumaġana au Judea provins i nonori da Jentail maiteni God riwana i nonori ma i vitumaġana.

² Ma maranai Peter i ġeta me au Jerusalem tauvitumaġana mai Jew ġelaui tauna i eni i pa,

³ "Tam Jentail ai au numa u rui, ma maiteni u am!"

⁴ Anina ma kaua menanare i tuputupuanei anatapuna Peter taui i pariverei:

⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru ġaġaena adana 4 i vojjini ma marei i tere-ġaireiai awariu.

⁶ Au orana a inana lamna ġamogħamo maramaraġamai ma moduei, tetetei me mota ma kiu au aidamo lavelavei.

⁷ Ma pona a nonori i pa, "Peter ma vomairi, ma viरaġena ma ma am!"

⁸ Tau a paribelei, "Ega! Lamna ega melanai ana kaei. Ega melanai lam viviġana ata am-dadani."

⁹ Wate pona marei mara viruaina i babani, "Aiwai purapurana God i riwa da i ai, tam ega ma riwa da i apoapoe."

¹⁰ Mara tonuġa wenanare i tupua, ma puruna i ġaiana-melei au mara.

¹¹ Nai maranaina mai Caesarea ai rava tonuġa i paripari-tawaneiai, au metaeta i raumairie.

¹² Ma Arua Vivivireina i riweu da ega aiwai ana notai ma orau taputapunei ana nae. Mai Joppa tauvitumaġana 6 maiteni a nae ma ravana ana au numa a rui.

¹³ Cornelius i riwelai da anela awarina i ega, ma i riwei, "Rava ma paritawanei au Joppa da rava wavana Simon Peter ina nejai."

¹⁴ Tauna wei riwana ina nejai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ġairai da taui i vioai me au naona awarita i tupu nanare.

¹⁶ *Anina ma Iesu aiwai i ririwei a notai, "John wairei i babataito, wate taumi Arua Vivivireina ina babataitoimi."

¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaġanei, ma tau aiai da God ata viġiae?

¹⁸ Taui i vigamopotai maranai wei i nonori, ma God i viborumei i pa, "Riwa kaua da God Jentail maiteni i vianinei da ina rupena ma ina lawana."

Ekalesia au Antiok

¹⁹ *Ekalesia ġelaui rau-iviaapoapoe i rovoei maranai Stephen i viरaġeni ma i vilamonei au uama. Gelau i ruba nae au Phonišia, au Saipras ma Antiok, ma kampa Iesu Riwana Aiaina i raugugulei mai Jew ava awarii.

20 Wate ekalesia ġelaui mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei.

21 BADA ana rewapanan taui au orai i mae ma Jentail maġamāġau i vitumaġana ma i mae-tavirei BADA awarina.

22 Wei riwana i ġeta ekalesia awarii au Jerusalem, ma taui Barnabas i paritawanei au Antiok.

²³⁻²⁴ Maranai i ġeta ma i 'nanai da God ravai i viaiaina-kauei, tauna i vinuaiai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumaġana i rata, ma God ana aguie, i rauguga ma rava maġamāġau i taini BADA awarina.

25 Ma Barnabas i nae au Tarsus da Saul ita baiei.

26 Ma i nelagħi ma i nejai au Antiok, ma kampa tauvitumaġana maiteni i mae madeġa tagogi i kwa, ma patara għeġġena awarii i viararamana. (Weka au Antiok lamna i vikarei da tauvitumaġana i viġorei Kerisiana)

27 Wei au marana peroveta ġelaui Jerusalem ei i ġairai.

28 ⋆Peroveta tagogi wawana Agabas i vomairi ma God ana rewapani i vieġa da gomara e nenei au naoii dobu au anatapuna (Caesar Claudius ana vibada au marana gomarana i nei).

29 Tauvtagħoġa au Antiok i vianina da taui ava ita kauana-gurtei da mane vounaina ita kauei da ai rava ekalesia au Judea ita voagui.

30 Taui nanare i kauei ma manena Barnabas ma Saul au urai i terei ma taui ekalesia ai babada au Jerusalem i verei.

12

James i viragħeni ma Peter i pani

¹ Lamna maranai, gulau Herod Agrippa* i raukarei da ekalesia ġelaui i rau-iviapoapoelei.

² James, John tuana uana sodei i bori-tuini.

³ Ma maranai Herod i 'nanai da mai Jew wei kauana i vinuaiae, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua.

⁴ ⋆Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ȸoiei da Peter ita vojjini da raġona torelana au murina ma au deba ita rauetarei.

⁵ Ma lamna aubaina Peter au pani numana i vojjini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai wagħvaraina, ma maratomna da Peter ita rauetarei, Peter sorodia ruāġa au poui i matamatav. Urana seinei i raġini sorodia ruāġa au urai, ma sorodia ġelaui au metaeta i vipaipai.

⁷ Maratagogi BADA ana anela i eġa ma pani numana i ravilalai. Ma Peter i vogugui da matana i kala ma i riwei, "Laġiġa ma vomairi!" Ma sein au urana i dabbarara.

⁸ Ma Peter i riwei, "Ma vigara ma ae uma ma oteni." Ma nanare i kauei. Ma i egari, "Am kwama potopotona ma oteni ma ma votaġoġoġi."

⁹ Peter anela i votaġoġi da pani numana i opu-tawanei, wate eġa ita aramanei anela aiwai i kaukauei, tauna i notai i rarauboni.

¹⁰ Taui, sorodia boruna ruāġa au doa i netawanei, da i opu au metaeta iramei, wei e opopu au taon. Metaeta ainelana i wanatawanei aubaiji ma i opu. Taui etanai tagogi i ġairani ma maratagogi anela tauna i voterei.

¹¹ Peter ana nota i nememei ma i riwa, "Wei anina riwa kaua! BADA ana anela i paritawanei da Herod au urana i waitawaneu, da mai Jew aiwai i notanotai da ita tupua lamna eġa ita tupua."

¹² Maranai ana nota i nememei tauna i nae Mary ana au numa. (Mary lamna John alona. John wawana ġelauna Mark). Kampa rava maġamāġau i vitagogie ma i raraupari.

¹³ Peter au metaeta i raupewapewa ma taunola wawana Rouda i nei da metaeta ita votawanei.

¹⁴ Ma Peter ponana i nonori ma i aramanei da tauna, ma i vinuaiai guratana da ega metaeta ita votawanei ma i ruba-rui da i vinolanola i pa, “Peter au metaeta e maimairi!”

¹⁵ Wate taui ega ita vitumaganei ma i riwei, “Tam ma bubual!” Wate tauna i riwa bagibagi. Ma taui i riwa, “Nai Peter ana anela.”

¹⁶ Wate Peter i raraupewapewa ma maranai taui metaeta i votawanei ma i 'nanai da tauna, taui orai i auepai.

¹⁷ Peter urana i voepai da rava i genuana ma i riwei menanare BADA pani numanei i tereopunei. Ma i riwei, “James[†] ma ekalesia gelau wei ona pariverei.” Ma Peter i nae au dobuqela.

¹⁸ Maranai mara i tom kampa au pani numana nuabola ma vinuanaina gaeqena i peu sorodia awarii da aiwai i tupua Peter awarina

¹⁹ Herod, ana sorodia i egari da Peter i baei wate ega ita nelaqai. Lamna aubaina sorodia 16 i etarei ma i virageni. Muriai Herod Judea i netawanei ma i nae au Caesarea da ita mae mara aburuna.

Herod irage

²⁰ Marina Herod amlona i gaiqai kaua Taia ma Sidon ravai awarii, lamna aubaina taui ana borui i nei da Herod maiteni wei i babaniei. Taui Herod ana taunola gaeqena Blastus, i taravaini da ita voagui. Taui rom i vibaqei Herod maiteni. Aubaina ai lam Herod ana dobuei i nenei.

²¹ Ma marana i getai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani.

²² Ma patara ana babani i nonori ma i logo i pa, “Wei lamna god e bababani ma ega rava!”

²³ Maratagogi BADA ana anela Herod i vipeuni au doa ma motamota orana i ani da irage, aubaina tauna rava ai voepaepa i vinuaiae ma ega rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava magamagaui i nenei BADA awarina ma ekalesia i rarata.

²⁵ Maranai Barnabas ma Saul ai nola au Jerusalem i vikwai, taui John-Mark i taravaini da maiteni i nei au Jerusalem.

13

Barnabas ma Saul i viaianini ma i paritawanei

¹ Kerisiana au Antiok au orai peroveta ma taugiu wawai wenanare, Barnabas, Simeon (e gogorei Gawara), Lusias Sairinie, Manaen (Tauna gulau Herod Antipas maiteni i rata tagogi), ma Saul.

² Mara tagogi maranai taui i ujiuji ma BADA i vovoepaepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.”

³ Anina ma uji ma pari au murina taui urai Barnabas ma Saul au tepai i terei ma God ruagai i viaianini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i gaira au Selusia ma kampa i amkuka damana au bonabona Saipras.

⁵ Ma au Salamis i gota ma i nae mai Jew ai au boru numana ma God riwana i raugugulei. John-Mark taui maiteni i nae da ai tauagu.

⁶⁻⁷ Taui bonabonana i kwaviviroi da au Paphos taon i geta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualalaunana ma i goei da God ana babani ita nonori ma lamna aubaina Barnabas ma Saul i rauqoreiai.

⁸ Wate barabaravuna Bariesu (Greek ponanei lamna Elimas) Saul ma Barnabas i viqavie i da gavena ana tumagana ita viapoapoeni.

⁹ Saul wavana gelaua Paul, Arua Vivivireina orana i oai ma barabaravuna matana i 'nana-tunutunui.

¹⁰ Ma i pa “Tam Satan natuna ma kaua aiai ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaua ma voviravir da moru.

¹¹ Ma marina BADA urana ina kovoqim da matam ina apoapoe mara aburuna ma ega madega lalalaina ma inanal.” Maratagogi matana i vinawanawa ma i gimtona ma nare da were i voladaga-nae da rava au urana ita vojijina.

[†] 12:17: Iesu ana tevera

12 Maranai gavena i 'nanai aiwai i tupua ma i vitumağana, aubaina tauna BADA ana viararamana i bana-kauei.

Paul God Riwana Aiaina i jimejimei au Antioik taon au Pisidia

13 Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark taui i voterei ma i naeme au Jerusalem.

14 Perga i voterei ma i rui da au Antioik taon au Pisidia provins. Ma au Sabate i rui au borunumana ma i kiala.

15 Ma rava ġelau, Moses ana tarawatu bukana ma peroveta ġelauai ai buka i 'avi, ma babada riwa i paritawanei Paul ma Barnabas awari i pa, "Varevarei! Mepa da awarimi nota aiwai da ota voaguiai lamna marina ona ġei da ona babaniei."

16 Paul i vomairi ma urana i voepai da rava i genuana ma babani i vikarei i pa:

Mai Israel ma taumi ega mai Jew ai God tauvivborumeina, ona rautaniganeu!

17 *Mai Israel ai God noinoita i vinei, ma i vimaurai ai au mae au Egypt, ma ana rewapanā ġaeġaenei dobunei i taravaina-opunei.

18 *Madeġa 40 au mutulua ami kaua apoapoei ami beura ma ami gunura anatapui amiaeui.

19 *Dam ġaeġaei 7 i pipupui au Canaan ma dobuna mai Israel i verei da i vigariana-nonoei.

20 *Wei anatapuna madeġa 450 au orana i tupua. Wei au murina God taurauetara† i terei da taui i vibadei da peroveta Samuel ana mara.

21 *Anina ma rava God i vibagħi da gulau ita verei. Ma God Saul, Kish natuna Benjamin ana damei i terei; ai gulau da madeġa 40 i kwa.

22 \$Ma God Saul i tere-opunei ma David i terei ai gulau. Ma wenanare i riwa i pa, "Tau a aramanie da David, Jesse natuna orau ana rauoġara, ma au ġoana anatapuna ina kauēi."

23 Muriai me God i parivainuāġani nanare, Mai Israel ai Tauvilawana, Iesu David ana damei i nei.

24 *Muriai da Iesu ita nei, John mai Israel anatapui awari i jima da ai ġo'apoapoe ina voterei ma ina mae-tavirei God awarina ma ina babataito.

25 *Ma John ana nola au damona i riwa, "Taumi o notanotai da tau Tauvilawana bo? Eġal Tau eġa tauna. Wate ona rautanigħana, rava au muriu e nenei tauna i ġetelara, tau eġa tagottagogina da ana ae uma ġuravana ana rupeni."

26 Varevareu - Abraham natunatuna ma taumi Jentail God tauvivborumeina, God tauta awarita, kwakokwkaoi vilawani riwana i paritawanei!

27 Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoġi, Peroveta wei lamna i jimejimei au Sabate marana patapatana.

28 *Taui eġa ana apoapoenā aiwai ita nelagħi da Iesu ita viraġeni, wate Pilate i vibagħi da ita viragħeni.

29 *Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ġairei ma au guba i vimataveni.

30 Wate God Iesu iraġelei i vovaimairini.

31 *Ma au pom maġamaġaui Iesu taui maiteni au Galili da i ġegħae au Jerusalem awari i eġa. Wei ravai marina e vivimatamata rava awarii.

32 Marina tauai Riwana Aiaina a paripariveremi. Wei parivainuāġanana wariaġa noinoita awari i kauēi.

33 Ma God nanare i kauēi tauta eda muri aubaita, da Iesu iraġelei i vovaimairini, au Psalm viruaina wenanare I girumi,

Tam natu.

(*Psalm 2:7*)

34 God Iesu iraġelei i vovaimairini da eġa tupuana ina buda. Me i girugirumi nanare i pa,
Au viaiaina vivivireina David a parivainuāġani tam ana verem. (Isaiah 55:3)

35 Psalm ġelauна wenanare i girumi,
A' ramanei da Tam am Messiah-Tauvilawana tupuana eġa au kokoäga ma voterei da ina buda. (Psalm 16:10)

36 Maranai David i mamae ma God ana nola i kauēi ma i'rāġe, ma amamana maiteni i doboi ma tupuana i buda.

* 13:17: Exo 1:7 * 13:18: Num 14:34 * 13:19: Deu 7:1 * 13:20: (a) Jdg 2:16; (b) 1Sa 3:20 † 13:20: Wei ravai lamna ai għavia babadai ma ai tauravena ma taurauetara *Judge*. * 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 * 13:24: Mrk 1:4 * 13:25: Mrk 1:7 * 13:28: Mrk 15:13-14 * 13:29: Mrk 15:42-47
* 13:31: Act 1:3

³⁷ Wate God Iesu iraägelei i vovaimairini ma tupuana ega ita buda.

³⁸⁻³⁹ Lamna aubaina au rava, ona aramanei da Iesu awarinei God ami go'apoapoe ina nota-tawanei. Rava anatapui da Iesu e vivitumağanei, ai go'apoapoe e notanota-tawanei ma ai viturana e viviaiaini. Wei Moses ana tarawatu ega ita kaukuae.

⁴⁰ Ona paina-melemi da peroveta aiwai i ririwei ega awarimi ina tupua. Aubaina i riwa;

⁴¹ *Ona rautaniğana vivijibogami,*

kaua gaęgaena ana kaei da Ona baei ma ona iraäge!

Aubaina ami au lawana kaua gaęgaena ana kaei da taumi ona vitumağana-avei.

⁴² Paul ma Barnabas i opopu ma rava i nei ma i vibağı-guratei da ita nememei au Sabate ġelauna da Tauvilawana ana kaua ita babanana-kauei.

⁴³ Boru i kwa da rava i vilamonei, mai Jew borui ma ġelaui marina ina bori i vaia da i vimajew, taui Paul ma Barnabas i votaġoi, ma i riwana-guratei da Iesu ana aguei ina mae jijina.

⁴⁴ Au Sabate ġelauna taon ravai anatapui i ġeta da Iesu riwana aiaina ita nonori.

⁴⁵ Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

⁴⁶ Ma Paul ma Barnabas ana tepatorai i babani, "God riwana a jimei awarimi au naona, wate taumi wei riwana o gedulaie. Wei e vivitataiana da taumi lawana mamae-nonoana ega ota ġoegoei. Lamna aubaina ana voteremi ma God riwana ana jimei Jentail awarii.

⁴⁷ BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapui au dobu ona riwei menanare ai go'apoapoe a nota-tawanei ma a vilawani.
(Isaiah 49:6)

⁴⁸ Maranai Jentail wei riwana i nonori, taui i vinuaiai kaua ma BADA Riwana Aiaina i voepaepai, ma taui da God i vinei lawana mamae-nonoana ita vaia, i vitumağana.

⁴⁹ Ma BADA Riwana Aiaina i vituai nai au paratana.

⁵⁰ Wate mai Jew Jentail waivinei manemanei ma mai Jew ġelaui i egari da Paul ma Barnabas ai ġavia i vomairi ma dobunei i viąağana-opunei.

^{51*} Anina ma taui aei pokauna i rauabuabui da ita viatataiei da BADA ega ita vinuaiai awarii ma i nae au Ikoniam taon.

⁵² Wate Arua Vivivireina kerisiana voui au Antioik orai i oai ma i vinuaiai kaua.

14

Paul ma Barnabas i jima au Ikoniam.

¹ Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail mağamağau i vitumağana.

² Wate mai Jew ġelaui ega vivitumağanai Jentail i kelari ma ai nota i barai da Paul ma Barnabas i gedulaie.

³ Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babaii ma vivirewapanai mağamağau i kaei. Wei i vimataira da ai jima lamna riwa kaua.

⁴ Taon i kai ġelaui mai Jew aubaii i mairi ma ġelaui Aposol aubaii i mairi.

⁵ Ma mai Jew ma Jentail ġelaui i vioga da Paul ma Barnabas ġaimei ita viraurauei.

⁶ Wate taui riwana i vaia ma dobuna i ruba-tawanei ma i nae au taon ġaęgæi Listara ma Derbi au Laikonia provins ma taon au ririvai.

⁷ Ma weka Riwana Aiaina i jimana-naiei.

Rava i notai da Paul ma Barnabas god

⁸ Au Listara oroto aena ġokkokarana, alona manawanei gwaęgħaġana i vinatunei ma ega ita babara dadana.

⁹ Kampa i kiala ma Paul i bababani i rarautaniğanei. Paul matana i tawanei ma i 'nanai da tauna i vitumağana da ita lawana

¹⁰ ma i garara awarina, "Aemei ma mairi!" Ma orotona aenei i mairi ma babara i vikarei.

¹¹ Maranai patura i 'nanai Paul aiwai i kaei taui ava ai ponei i babani vivira, "god ruęga i ġairai awarita me *rava."

¹² Tau i riwa da Barnabas lamna mai Greek ai god Zeus[†] ma Paul i vitaubabani aubaina i riwa da tauna Hermes.

¹³ Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, taui ai gara i sikai ma i ruba-opu patara awarii ma i garara,

¹⁵ *“Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anatapuna au orai i kauei.

¹⁶ Wariaga tauna rava i voterei da ai goanei i mae.

¹⁷ Wate marana patapatai e viviatataiem da tauna e mamae ma ana nuavaina e verevereta, garewa marei ma maura ma lam e vereveremi ma au orami nuai e oaoai.”

¹⁸ Apasol i bababani ma i kauana-guratei da ravai ita vigaei da taui avena ita puloi.

Mai Listara Paul gaimei i viraurauei.

¹⁹ Mai Jew ġelaui Antioch ei ma Ikoniam i nei ma patarana i egari da Paul gaimei i viraurauei ma taonei i taina-opunei, i notai da tauna iraġe.

²⁰ Wate maranai vivitumagħanai i ġeta da i mae-kwaviviroi, tauna i vomairi ma i naeme au taon.

Aupom ġelauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui maġamaġau i rui. Ma i nae me au Listara, Ikoniam ma Antioch.

²² Metauna au dobuna i jemajima kampa tauvitumaġħana i ririwana-guratei ma i vovai-virewapani da ina mairi-jijina ai au tumagħana i pa, “Piripiri maġamaġau i orana ona rui wate au murina God ana au vibadana ona rui.”

²³ Paul ma Barnabas ekalesia nununaii babada i vinei ma i raupari ma i uji BADA awarina, da ai ekalesia ma ai babada ina paini.

²⁴ Anina ma au Pisidia provins i verautua da i nae me au Pamphilia provins.

²⁵ Au Perga BADA riwana i jimei ma i ġāra au Atalia.

²⁶ Ma kampa i amkuka ma i nae me au Antioch au Syria provins, weka ai nola i vikarei, maranai ekalesia kampa God i vibagħi da taui ita viaiaini ai au nola ma i paritawanei ma marina ai nola e vivikwai.

²⁷ Ma kampa i ġeta ma ekalesia i vitagogie, ma aiwai anatapuna God ana aguei i kaukauei rava i vieġei, ma menanare Iesu metaeta i votawanei da Jentail maiteni Tauna i vitumaġħanei.

²⁸ Ma kampa tauvitumaġħana maiteni i mae guratana.

15

Boru au Jerusalem

¹ Wate nelara ġelaui Judeaei i ġairai au Antioch ma ekalesia i viararamani i pa, “Mepa da eġa inibori ona vaia Moses ana tarawatu e ririwei nanare, God taumi eġa ina vilawanimi.”

² Ma karuwaġawaġa ġaġġaena i bauni Paul ma Barnabas maiteni. Ma taui Paul, Barnabas ma rava ġelaui i vinei da i ġae an Jerusalem da Apasol ma babada ita inanai wei babanina aubaina.

³ Ma i paritawanei au Jerusalem, Ma ai au vaġai ekalesia au Phonisia ma Samaria provins i pariverei menanare Jentail i mae-tavirei God awarina. Ma taui i vinuajjai kaua maraina wei i nonori.

⁴ Maranai i ġeta au Jerusalem, ekalesia ma Apasol i nei da i nebelei. Taui i pariverei menanare kaua anatapui God ana aguei i tupua.

⁵ Wate ekalesia ġelaui mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteteletei.”

⁶ Apasol ma babada i vibor da wei babanina i okei.

⁷ *Ma i vitarapiri guratana ma Peter i vomairi ma taui i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da taui ina nonori ma ina vitumaġħana.

⁸*God rava anatapui ai nota e araramanei, ma Jentail Aruana Vivivireina i verei me tauta

[†] **14:12:** *Zeus lamna mai Greek ai god ġaġġaena. Rava ai vitumaġħana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ġelaui aubai. Rava i notai da Hermes lana e kauwei da rava e babana-kauwa ma ai babara e aiai. Wate nanarena e notanontai da tauna kauwa aiaina e vivitupi ma e kauwei da rava e vivinatuna kauwa.* ^{*} **14:15:**

nanare. Wei matairana i viatataieta da God i vianina.

⁹ Tauna Jentail ma tauta e vaivainita da tagogina, ma ata vitumağanei orata i viaiaiani.

¹⁰ Marina aiwai aubaina God o viviamlo-ğagaini? Tauta amamata maiteni ega tata virewapanan da tarawatu tata vojjina-kauei. Wate marina wei vitana Jentail ta vereveredamanei.

¹¹ Egateni! Tauta anataputa ta vivitumağana da BADA Iesu ana aguei tana lawana, ma nanare Jentail maiteni."

¹² Rava anatapui i genuana ma Barnabas ma Paul i rautaniğanei, taui i bababani menanare ana au vägai God ana aguei kaua aniba ma vivirewapanai i kaei Jentail awarii.

¹³ Maranai i babani vorovei, James* babani i vikarei, "Au rava ona rautaniğaneu.

¹⁴ Peter[†] au naona i pariveremi menanare God Jentail i raugenari ma ğelau i vinei da tauna ğarinei.

¹⁵ Ma Peroveta nununai wei kauai i babaniei marina nanare e tuputupua:

¹⁶ Wei au murina ana nememei,

ma David ana numa gara ana voa-melei.

Ana vituramairini

ma ana kaei da ina virewapanan me.[‡]

¹⁷ Da rava mamae-terenai

BADA ina baiei,

Wate Jentail a raugorei da gariuei, BADA i riwa.

(Amos 9:11-12)

¹⁸ Wariaga da marina wei ta aramanei.

¹⁹⁻²¹ —* Lamna au baina ega tana kaei da ina piripiri Jentail aubaii, taui e mamae-tavirei God awarina. Wate pepa tana girumi ma tana egari da lam e pulopuloei god morumoroui awarii ega ina ani, ega ina viawawana labalababa, ğamoğamo uai e kikiki ega ina ani ma sia ana tarana ega ina ani. Aubaina wariağa da marina Moses ana tarawatu e raugugulei boru au numai Sabatena patapatana."

Pepa i girumi Jentail awarii

²² Ma Apasol, babada ma ekalesia anatapui rava ğelaui i vinei ma i paritawanei au Antiok au Syria provins Paul ma Barnabas maiteni. Taui ai babada ruaga i vinei wawai Judas wavana ğelauna Barsabas ma Sailas.

²³ Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

²⁴ Tauai riwana a vaia da rava ğelaui ai au boru i ğairai ma ai viararamani i vinuabolaimi ma i visina-viraviraimi, wate tauai nai ravai ega ata paritawanei.

²⁵ Lamna aubaina tauai a viboru ma a vianina da taupariverena ata paritawanei, ata rava Paul ma Barnabas maiteni,

²⁶ taui i verena-melei ma ai lawana ega ita vinuabolei BADA Iesu Keriso wavana aubaina.

²⁷ Judas ma Sailas a pariparitawanei da taui gamoie i ina riwemi aiwai tauai a girumi.

²⁸ Arua Vivivireina ma tauai ai ığoana da ega vita ığeğäena ana veremi, anina wei tarawatuna ava.

²⁹ Lam god morumorui i puloi ega ona ani,

Ega tara ona umai, Ega ğamoğamo uana kikikina vioana ana tarana ona ani.

Ega ona viawawana labalababa,[§]

Mepa da wei tarawatui ona vojjina-kauei, taumi kaua aiaina o kaukauei.

Egualau kaua.*

³⁰ Ma nelarai i paritawanei da i ğaira au Antiok, ma ekalesia i rieiai da pepa i verei.

³¹ Ma taui i av'i ma i vinuiai kaua pariverena aiaina aubaina.

³² Judas ma Sailas taui God ana peroveta ma i babani guratana awarii ma wei taui i vinuiaeiai ma ai tumağana i vovai-virewapani.

* ^{15:13:} Iesu ana tevera † ^{15:14:} Peter wavana ğelauna Simon. ‡ ^{15:16:} Maranai God David ana numagara e babaniei lamna David ana vibadana vouna e ririwei ma ega ana epaepaia. * ^{15:19-21:} Lev 18:6-23; Lev 17:10-16

§ ^{15:29:} Viawawana labalababa ğelaui wei: Rava ğelaui awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) Gamogamo e viviawawanei (Lev 18:23) Rava ega uta ravağı ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28) * ^{15:29:} Kaua ığeğäena lamna ega ini bori ma Iesu ana aguei, u korosi i take aubaita.

³³ Ma kampa i mae mara aburuna ma ekalesia ana nuaubai i paritawana-melei au Jerusalem.

³⁴ †

³⁵ Wate Paul ma Barnabas au Antiok i mae, ma taui maiteni BADA Riwana Aiaina i viararamani ma i raugugulei.

Paul ma Barnabas i vilamonei

³⁶ Ma muriai Paul, Barnabas i riwei, "Tana nae dobu au anatapuna mepa BADA Riwana Aiaina ta raugugulei ma ekalesia tana rauenari, ma tana inanai taui anina bo ega."

³⁷ Barnabas i ūoei da John-Mark ita taravaini.

³⁸ *Wate Paul wei notana ega ita ūoei aubaina au naona John taui au Pamphilia i rubatawanei ma ega ita mae da maiteni ita nola.

³⁹ Ai vipariparinigā i apoapoe guratana da taui i vilamonei. Barnabas, Mark i taravaini ma kukei i damana au au Saipras.

⁴⁰ Paul, Sailas i vinei. Ma ekalesia, BADA i vibagai da ana aguei taui ai au nola ina paini.

⁴¹ Taui Syria da Silisia i naeni ma ekalesia i rauenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvotagaōgo i mae wavana Timothy. Tauna alona Jew ei ma kerisiana, Wate amana Jentail.

² Ekalesia au Listara ma Ikoniam Timothy i voepaepana-kauei.

³ Paul i ūoei da tauna ita taravaini ana au vāgai, lamna aubaina ini bori i verei aubaina mai Jew kampa i aramanei da tauna amana Jentail.

⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votagaōgi.

⁵ Ma ekalesia ai vitumağana i vovai-virewapanai ma tauvitumağana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i vīgæi da ega BADA riwana ita jimei au Eisia provins, ma Pirijia ma Galatia paratana i naeni.

⁷ Maranai i nei Maisia ana au provins ma i ūoei da ita damana au Bithinia provins. Wate Iesu Aruana ega ita vianinei.

⁸ Ma Maisia i verautuini da i nae au Troas.

⁹ Waguvvaraina Paul ana au inana i 'nanai oroto Macedonie i maimairi ma i vivibagai i pa, "Ma damanai au Masedonia da ma voaguai!"

¹⁰ Paul ana rauboni au murina tauai a vioga da lagilagina ana vomairi Masedonia provins aubaina. Tauai a vitumağana da God i ūorelai da Riwana Aiaina kampa ana jimei.

Paul i nae au Philipai.

¹¹ Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis.

¹² Ma kampa da a babara nae au Philipai taon au Masedonia provins, weka mai Rome ai sorodai ai bareki ġaegäena i mae, kampa a veraumae.

¹³ Ma a Sabate taon a opu-tawanei ma a nae au waira, a notanotai da kampa boru gabuna wate ega. A kiala ma waivine ruāga ota kampa i rauriei awari a babani.

¹⁴ Taurautanigā tagogilamna Jentail wavinena wavana Lidia ma ana dobu Thaiataira. Tauna gara lebalebarina maiana ġaegäena taugimareina ma God i vitumağanei, ma God orana i votawanei da aiwai Paul i bababaniei i rautanigānan kauaei.

¹⁵ Maranai wavine ana numa ravai i babataito ma i raugorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sailas au panipani numana au Philipai

¹⁶ Mara tagogi a nenaiborau au gabuna ma taunola guguini a nebelei, Tauna au orana arua apoapoeni i mae ma lamnei aiwai amapo da ina tupua i viviegai. Ma mane ġaegäena i kaukauei ana taniwaga aubaina.

† **15:34:** Buka waduwaduboi au orai vs 34 ega ita mamae "Wate Sailas i ūoei da kampa ita mae." * **15:38:** Act 13:13

¹⁷ Tauna Paul ma tauai i votaḡotaḡoiai ma i garagarara “Wei nelarai God ġegetelarana ana taunola! E vivinolola menanare God e vivilawananei.”

¹⁸ Wei kauana i kaei au pom biāga da Paul i viamlo-ġaiġaini da i mae-tavirei ma arua apoapoeni i riwei, “Iesu Keriso wavanei a egaegarim da wavine ma opu-tawanei!” Maratagogi arua apoapoeni wavine i opu-tawanei.

¹⁹ Maranai taunola guguni ana taniwaga i aramanai da ai mane etanaina i vine-boai, taui Paul ma Sailas i vojjini ma i taina naiei au deba Gabemani awarii.

²⁰ Tauri i nei ai tauruetara awarina ma i riwa, “Wei nelarai mai Jew wei dobuna ravai e vivinuaraġaragai.

²¹ Taui ata rava kaua ġelaui e viviararamani ma wei ata giu e teretereġairei.”

²² Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipie i kwapui.

²³ I vunu-kauei ma i tawana-ruiei au panipani numana. Ma numana badana i egari da ita paina-kauei da ega ita ruba.

²⁴ Anina ma Panipani badana taui i tawana-ruiei, panipani numana au orana ma aei, ai vivitainei au orana i raġita-jijini.

²⁵ Nubautuvai Paul ma Sailas i raraupari ma i welawela God awarina ma panipani ġelaui i rarautaniġana.

²⁶ Nanare ma lolo ġaġeotana dobuna i gui. Ma maratagogi pani numana metaetana i wana-tawatawanei ma panipani anatapui ai sein i dabarara.

²⁷ Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavu i da ita virägena-melei.

²⁸ Wate Paul i garara, “Eġa ma vunu-melem! Tauai anatapuai weka!”

²⁹ Pani numana badana ana taunola i ġorei da lalalaina ita neiai ma i ruba-rui ma ana sisisina i mae-peu Paul ma Sailas au naoi.

³⁰ Ma i opunei au doa ma i paridadanei, “Babada aiwai ana kauei da ana lawana?”

³¹ Taui i paribelei, “BADA Iesu Keriso ma vitumäganei ma ma lawana, am numa ravai maiteni.”

³² Ma God riwana i raugugulei tauna ma ana numa ravai awari.

³³ Nai maranaina avena da waguvvarai, pani numana badana Paul ma Sailas i naiei ma kerio i oġai, Ma maratagogi tauna, ana numa ravai maiteni i babataito.

³⁴ Paul ma Sailas i ġaiei ana au numa da i viambagibagi. Tauna ana numa ravai maiteni i vinuiai kaua da marina God i vitumäganei.

³⁵ Ma marana i tom ma tauetara ana taunola* i paritawanei pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Tauruetara i egariu da ana voteremi da ona nae. Marina ana nuaubami ona nae.”

³⁷ Wate Paul, tauruetara i riwei, “Tauai eġa ita rauetarelai ma i vunu-kauelai patara au matai. Ma avena da tauai mai Rome, wate marina i ġoei da govagovaġanei ina paritawanelai bo? Eġatenei kaua! Ona voterei da tauruetara ina nei weka da ina naelai.”

³⁸ Taui wei babanina i naiana-melei da babada i riwei ma taui i rovo kaukaua maranai riwana i nonori da Paul ma Sailas lamna mai Rome.

³⁹ Ma i nei au pani numana ma i riwa, “Tauai a kauana-boai, ai ġo’apoapoe ona nota-tawanei.” Ma i tere-opunei ma i vibaġa-guratei da dobuna ita oputawanei.

⁴⁰ Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma taui dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

² Ma i rui au boru numana au Sabate me mara patapatai i kaukuei nanare, kampa Sabate tonuġa rava awari God riwana i viararamani.

³ Ma God riwanei i viararamana da Keriso ina vinuapoapoe ma iraġelei ina vomairi me, “Wei ravana a bababaniei awarimi, tauna Iesu Keriso.”

⁴ Mai Jew ġelaui orai i taini ma taui i votaḡotaḡoi. Ma nanare Jentail nelara maġamaġagui God tauraudunelena ma waivine wavai naenaei maġamaġau.

* **16:35:** vs. 20 ma inana. † **16:37:** Mai Rome ai tarawatu lamna, “Eġa rava Romei ma kwapi labalababai bo ma pani da au naona ma rauetarei.” Rome Israel i vibadei Iesu ana au mara.

5 Wate mai Jew i unura ma rava ora-potapotai mağamağau au etanai i tami ma au taon vikaruwağawağā i vikarei. Ma oroto wavana Jason ana numa i ruini Paul ma Sailas i baibaei da ita opunei patara awari.

6 Wate maranai ega ita nelägai taui Jason ma kerisiana ġelaui i taina-naiei taon babadai awari, ma i garara, “Wei ravai dobu au anatapuna apoapoe mağamağau i kuae, marina i ġetai ata au dobu.”

7 Ma Jason, Paul ma Sailas i taravaini ana au numa. Taui Caesar ana tarawatu e viviaigai ma e ririwa da gulau ġelauna e mamae wavana Iesu.

8 Maranai patara ma taon babadai wei babanain i nonori taui amlo i ġaiġai kaua,

9 ma Jason i egari da mane ġaegħena i vimaiei da eġa mae boaboa ġelauna ina vitupui. Ma taui Jason i voterei da i nae.

Au Berea

10 Ma waguvvarai tauvitumagħana Paul ma Sailas i paritawanei au Berea. Maranai kampa i ġeta, ma i rui au boru numana.

11 Mai Berea i viaiai, eġa me mai Thesalonika. Taui i rautaniġana ma i votelatela ma marana patpatatana God ana buka i 'aiav i da ita aramanei da Paul aiwai i babbanie lamna riwa kaua.

12 Ma lamnei mai Jew mağamagħau i vitumagħana, ma nanare mai Greek waivinei wavai naenaei ma nelara.

13 Maranai mai Jew au Thesalonika paratana i nonori da Paul God riwana i raraugugulei au Berea, taui maiteni i nae kampa, ma rava i raeugari da ġavia ita vikarei.

14 Maratagogi kerisiana Paul i paritawanei au gera wate Sailas ma Timothy au Berea provins i mae.

15 Ma nelara Paul i tauwigwanigwanie da au Athens, ma Paul nelarai i riwei ma i paritawanei au Berea da Sailas ma Timothy ita riwei da laġilägħina ita nei awarina.

Paul au Athens i rauġugula

16 Ma Paul au Athens ana rava i paipaini, ma i 'nanai da kampa kokoitau i maġa kaua ma i vinuabla kaua.

17 Mai Jew ma mai Greek God tauviborumeina awari i jima guratana au pari numana ma nanare au deba, aiai da i ġeta ma i rautaniġana.

18 Ma rava ġelaui nuaulaulai i ġetai ma maiteni i vitarapiri, taui e ġoreġorei mai Epicure ma mai Stoic*^{17:18}, taui lawana ai kaua tauviararamanai. Ma ai rava ġelaui i paridadana, “Wei ravana aiwai e voġavōgansei?” Ġelaui i riwa, “Mepa da tauna dobu ġelaui ai god e babbaniei.” Taui wenanare i babani aubaina Paul Iesu Riwana Aiaina ma ana iraġe ma ana vomairi me, i rauġugulei.

19 Ma i taravaini ma i naiei ai au boru e ġoreġorei Areopagus ma i riwei, “Ma nei ma a ġoei da am viararamanana vouna e babbanie, ata aramanei.

20 Kaua ġelaui e babaniei tauai a vivuñanainei, ma a ġoei da ana aramanei anona aiwai?”

21 (Taumana ma mai Athens marana patpatatai ai nola eġa aiwai, da kaua voui ina virarautuei ma ina nononori.)

22 Ma Paul babadai au naoi i mairi ma i riwa:

Dogadogara mai Athens! A inana da taumi vipatputatumi ami god awarii,

23 A babbara ma ami pulo aniapunana a inainanai, ma tagogi a inanai au tepana i giruma, “Wei God ega at a araramanei aubaina.” Wei Godna o viviborumei wate ega ota aramanei. Tau ana riwemi nai Godna aiai.

24 Tauna God mara ma dobu ma aiwai anatapuna au orana i kuae. Ma tauna mara ma dobu badana, ma numa rava uranei e voavoai au orana eġa ita mamae.

25 Ma eġa rava ai agu ita paipaini, tauna agu eġa ita ġoēgoei. Aubaina tauna rava lawana ma lavutu ma anatapuna e vereverei.

26 Au karena rava tagogi i kuae ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraġe ma animae paratana i aiterei.

27 God wenanare i kuae da rava tauna ina baiei da mepa ina nelagħi. Wate tauna au ġereġereta, eġa au uama.

* 17:18: Mai Epicure rava wavana Epicurus ana viararamana i votagħotagoi. I viararamana da lawana ana ano lamna nuaiai. Da taui aiwai da tupuai ma matai ana rauqara, e vivuñai. Ma aiwai da e virovoro vo bo iniviera vereverie. Taui wei lamna e geduġeduaie. Taui e ririwa da God rava eġa ita vinuavainei Stoic rava wavana Zeno ana viararamana e votagħotagoi. I viararamana da rava ma ai maiteni au ririvata ta mamae (nature) ita vivrei, Taui ai ġoana ma ai erawa ita teretawanei ma ita vinuñanotana kaua ma avena rava ġelaui ai agu ita raunenelei. Taui e ririwa, “Nuaiai lamna kaua e vovoterei da mena ina tupua nei nanare ina tupua.” ^{17:24} 1Ki 8:27; Act 7:48

28 Taugiruma ġelauna Greekei i riwai pa, “Taunei ta mamae ma ta bababara ma anatapuna ta kaukuei.”[†] Ma wate ami taugiruma ġelauna i girumi i pa, “Tauai nanare tauna natunatuna.”[‡]

29 Ma tauta God natunatuna, eġa tana notai da God lamna me kokoitau, goldei bo silvei i kaei. Rava uraiei ma ana nuaulaulauei i kaei.

30 Wariäga rava God eġa ita aramanei wate God taui i 'nana-tawanei, wate marina anataputa egaegarita da tana rupena ma tana mae-tavireta awarina.

31 Aubaina mara i vinei maranai rava anatapui aiainei ma jijimaninei ina kovoġi. Rava i vinei da taunei ina kovoġi. God wei ravana iraġelei i vovaimairini lamna ina vimataira rava awari da ravana anina tauna.

32 Maranai Paul iraġelei vomairina i babaniei, rava i nonori ma ġelau tauna i vinamei wate ġelau i riwa, “Tauai a ġoei da muriae wei babanina ma babaniana-melei.”

33 Ma Paul ai boru i opu-tawanei ma boru i gudu.

34 Wate ġelau i vitumaġana ma Paul i votaġoġoġi. Tagogi lamna Dionisius, Areopagus boruna au orana, ma wavine wavana Damaris, ma rava ġelau.

18

Paul i nae au Corinth da rava awari Iesu ita jimej

¹ Paul Athens i netawanei ma i nae au Corinth.

2 Kampa Akwila tauna Jew au Pontus i tupua, marinaota au Italy* da i nei awana Prisila maiteni. Aubaina Rome ai gulau Claudius mai Jew anatapui i viāġaġei da Rome i opu-tawanei. Paul i nae da taui ita inanai.

3 Paul taui maiteni i mae, taui tauampopo, (ġamōġamo opina ma gara i popopoi numa Aubaina ma i gimagimarei) me Paul ai nola tagogina.

4 Sabate patapatana au pari numana tauna mai Jew ma Jentail awari i jima guratana da orai ita sinavirai.

5 Maranai Sailas ma Timothy au Masedonia da i ġetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso.

6 Wate mai Jew Paul i viġavie i ma riwa apoapoenei i ririwei. Ma tauna ana gara i rauabuabu ma awari i riwa, “Mepa da o kwako, lamna ona viwavu-melemi, eġa tau ona viwavui! Marina da e nena, ana nae Jentail awari.”

7 Ma taui i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena.

8 Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġau Paul i rautaniġanei, i vitumaġana ma i babataito.

9 Waguvvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.”

10 Aubaina Tau tam maiteni. Ma rava eġa ina rau-iviapoapoelem aubaina au tauvotaġoġoġi ma magħi wei au dobuna.

¹¹ Ma Paul kampa i mae madeġa tagogi ma nawaravi six, ma God riwana i jimej.

12 Wate maranai Galio i vi-Gavena au Akaia provins, mai Jew kampa i vitagogiegi ma Paul i vojjini ma i nae Gavena awarina da ita rauetarei.

13 Ma taui i viwavu 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”[†]

14 Ma Paul gamona i laġi da ita babani ma Galio i babani mai Jew awarii pa, “Mepa da taumi wei ravana o viviwavui da kaua ġaegħaei bo kaua apoapoe aubaina, lamna tau au nola da ata rau-tanīganemi.

15 Wate wei taumi ami babani ami wava ma ami tarawatu, ana voterei au urami. Tau eġa wei kauai ana rauetarei.”

¹⁶ Ma etara numanei i viāġaġana-opunei.

17 Taui anatapui pari numana ai bada Sothenis i vojjini ma i vunui etara numana au naona wate Galio taui i 'nana-tawanei.

* 17:28: Epimenides Ciritei au 6 century BC. † 17:28: Aratus Silisei 3 century BC. * 18:2: Rome taon lamna taon ġaegħena au Italy ma ai kapital AD. 49 au orana kampa viġaġiawha ġaegħena da wavalatona Claudius mai Jew i rwei da dobuna i netawanei. † 18:13: Mai Jew e ririwa da Paul eġa taui ai vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina taui i ġoei da Rome ai bada Paul ina kovoġi. Ma inanai Act 16:20-21 ma 17:7.

Paul i nae me au Antiok au Syria

¹⁸ Paul i mae mara aburuna taavitudumağana maiteni au Corinth ma wagei i nae au ġereğere au Cenkirei waga ai au animae. Prisila ma Akwila maiteni. Ma kampa Paul ana parivainuağana aubaina aparana i ġari, ma anatapui i nae au Syria

¹⁹ Taui au Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima.

²⁰ Rava i vibagai da ita mae mara aburuna wate tauna ega ita vianina.

²¹ Wate maranai i opu da ita nae ma taui i riwei, "Ana nememei mepa da God ana ġoana, ma Ephesus i netawanei ma wagei i damana."

²² Maranai i ġeta au Caesarea ma i nae au Jerusalem da kerisiana i raugenari ma i nae au Antiok.

²³ Au Antiok i mae mara aburuna ma Galatia provins ma Pirijja provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina.

²⁵ Rava ġelau, Apolos BADA ana etanai babanina, i viararamani, ma ana tepatorana i jima ma Iesu ana kaua ma ana lawana i viararamana-kauei. Wate tauna John Taubabataito ana babataito babani ava i aramanei.

²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i gorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nenaue au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita parierei da tauna ita nebelei. Maranai au Akaia i ġeta ma taui God ana aguei i vivitumağana, agu ġaegħaena i verei.

²⁸ Tauna ana babaniei au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taġoni da au Ephesus i ġeta. Kerisiana ġelau kampa

² ma i paridadanei i pa, "Arua vivivireina o vaia bo ega maranai o babataito?"

Taui i paribelei i pa, "Ega, Tauai ega ata aramanei da Arua vivivireina e mamae."

³ Ma Paul i paridadana, "Aiwi babaitona o vaia?"

Taui i paribelana, "John ana babataito a vaia."

⁴*Paul i riwa, "John ana babataito lamna mataira da taui ai go-apoapoei i mae-tavrei; ma mai Israel i riwei da Tauna au muriu e nenei ona vitumağanei lamna Iesu."

⁵ Maranai wei i nonori ma i aramanei taui i babataito BADA Iesu wavanei.

⁶ Ma Paul urana au kolai i terei ma Arua vivivireina au orai i rui. Ma i vikarei da ponatapunei i babanii ma God riwana i raugugulei.

⁷ Taui nelara iavana twelve.

⁸ Paul i nae au boru-numana ma kampa nawaravi tonuġa au orana ana tepatorana mai Jew awarii i babanii. Da rava orai ita sinavrai da BADA ana vigulau ita vitumağanei.

⁹ Wate ġelau kampa orai i bagħiġi ma ega ita ġoei da ita vitumağana, ma patara au matai Iesu ana etanai i vijibgi. Ma Paul taui i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom.

¹⁰ Ma nanare i mae madeġa ruaga i kwa, da mai Jew ma Jentail ravai maġamağau i Eisia provins maemaei BADA riwana i nonori.

Sceva natunatuna

¹¹ Ma God ana rewapani Paul kaua ġaegħa ma aniba i kaukauei,

¹² lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ġelau dobuna i naeni ma arua apoapoei i viviġaġeji. Taui arua apoapoei i riwei i pa, "Iesu wavanei, taunei Paul e raraugugula, Tau a egarim da ma opu."

¹⁴ Skeva, pirisi ai bada natunatuna nelarai seven wei kauana i kauakei.

¹⁵ Wate mara tagogi arua apoapoena i paribelei, "Iesu a aramanei ma Paul a aramanei ma taumi aiavoi?"

¹⁶ Ma rava au orana arua apoapoena maemaena i auepai ma taui i vunui da ega ita vikalokaloei. Ai gara i sika-naei ma ana kovakovai ma tararatai numei i viopuopuana ma i vivuberubei.

¹⁷ Mai Jew ma Jentail ravai au Ephesus maemaei wei riwana i nonori ma rovo orai i gaeni ma Iesu wavana i vivirana-kaei.

¹⁸ Mağamağau i vitumagana ma i nae kerisiana awarii ma ai go'apoapoe i rupeni.

¹⁹ Tautivitumağana voui mağamağau paraparaumai,* ai buka i vidamni au deba ma i apui. Maranai bukai ai maia i 'avi da silver 50,000†.

²⁰ Kaua babai me wei, Iesu riwana i vibabarai nai au dobuna ma rava mağamağau i vitumagana.

²¹ Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, "Ana nae au Jerusalem ma muriai ana nae da Rome ana inanai."

²² Ma Paul ana tauagu ruaga Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Vigaiğaiawa au Ephesus

²³ Iesu ana babani ma ana kaua vouna aubaina, ma vigaiğaiawa gaeğena i tupua au Ephesus.

²⁴ Silver taunoleina wavana Demetrius, mai Greek ai god wavinena ana numa taparoro kokoitaui i raraugaroerai da i gimagine, ma wei nolana mane gaeğena e neineiai silver taunoleina nai au dobuna aubaii.

²⁵ Ma taui anatapui ai rava nolana tagogina e kauakei maiteni i rauğorei ma i riwa, "Au rava, o aramanei da ata maura wei nolanei ta vaivai."

²⁶ Ma o inanai ma o nonori menanare wei ravana Paul e kauakei, Rava ai nota i sinavirai da mağamağau god Artemis raudunena i voterei au Ephesus ma dobu Eisia paratana anatapuna. Ma e ririwa da 'rava god i rauğaroerai, lamna ega god.'

²⁷ Tauta tana inana kaua da wavata ma ata mane ani kauana ega ina apoapoe. Ma ata god ġetelarana Artemis ana numa taparoro ma wavana ega ina vijibogi, ega au Eisia provins ava ma dobu au anatapuna."

²⁸ Maranai patara wei babanina i nonori taui i meji kaua ma i vigaragarei, "Artemis mai Ephesus ai god i ġetelera!"

²⁹ Ma taui i garagarara rava nai au dobuna i nonori ma taui maiteni i garara labalababa. Anina ma patara Gaius ma Aristakas i vojjini taui ruagai mai Masedonia Paul ana tauwigwanianana, ma i rubana-naiei nai dobuna ana boru gabuna.‡

³⁰ Paul i goei da patara au naoi ita rui da ita babani wate kerisiana ega ita vianinei.

³¹ Wate nanare Paul ana rava ġelau i gabemani tauna i vigaei da ega ina nae au boru.

³² Patara i vinuanina, i logologoi ma i garagarara labalababa ma ega ita aramanei aiwai aubaina weka i nei.

³³ Mai Jew oroto tagogi i dudu-opunei au naoi wavana Alexander ma patara ġelau i garara awarina da ita babani. Alexander urana i voepai da taui ita genuana ma tauna ana rava aubai ita babani.

³⁴ Wate maranai i aramanei da tauna Jew. Taui anatapui ponu tagoginei wenanare i garagarara, "Tauta mai Ephesus ata god Artemis i ġeteleral" da hour ruaga i kwa.

³⁵ Ma taon badana patara i riwei da i genuana ma i riwa, "Au rava mai Ephesus, rava anatapui au dobu i aramanei da tauta tauvíipaipai mai Ephesus ai god ġeġetelarana Artemis ana numa taparoro ma ana gaima vivireina marei i peuai aubaina.

³⁶ Ega aiai wei ina vikaua-moruei. Lamna aubaina orami ina raei ma ega aiwai apoapoeni ona kaei.

³⁷ Wei ravai o neiae weka wate taui ega au numa taparoro aiwai ita danenei bo ata god ita riwana-boei.

* **19:19:** Au Deu 18:10-14 God ana rava e vivigaei da ega ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaga. ‡ **19:29:** Dobuna ana boru gabuna lamna numa gaeğena. Ega poewana, ma inanana me nawaravi gebona. Rava mağamağau 26,000, nanare ina kiala **meeting place**. Rava e nena kampa da kalo tapuna ma e raraubiga.

³⁸ Mepa da Demetrius ana rava maiteni e viviwavui taui ina nae ina rauetara ma ami viwawu ona naei kampa taurauetara awarina.

³⁹ Ma mepa da ami nuabola ġelau e mamae lamna taon babadai ai au boru ona babaniei ma ona tere-jijimani.

⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaġawagaña anona ega, ma mepa da Rome ina paridadana ma tauta menanare tana paribelananei.

⁴¹ Anina ma boru i gudu i rava i vilamonei.”

20

Paul i nae au Masedonia ma Greece

¹ Vikaruwaġawaġa au Ephesus taon i kwa ma au murina Paul kerisiana i raukwatueiai da i vinua-terenei, i viegualaeuei ma i netawanei da i nae au Masedonia provins.

² Ma dobuna ġaġenana i naeni ma kaua maġamaġau kerisiana i vinua-terenei. Anina ma au Akaija* i ġeta.

³ Kampa nawaravi tonuġa i mae. Tauna i vokaukaua da ita nae au Syria ma wate i nelagai da mai Jew ġelauvirāġenana i viviogatarei lamna aubaina da i nae me au Masedonia.

⁴ Nelara ġelau i votaġo taui lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy.

⁵ Taui wagei i ainae au Troas ma kampa i painiae.

⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

Au Troas, Paul Eutikus iraġelei i vovaimairini

⁷ Wiki au karena - Sundaytauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratomna da ita nae.

⁸ Numa vatavataru au tepana a vitagogielai, ma kampa rampa maġamaġau i ararata.

⁹ Orotaragana wawanu Eutikus au windo i kiakila ma Paul i rraugugula, ma tauna matana i pota kaua da i raunuavuru, ma kampa au tepe dwedewana i peu-ġaira da au doa i rauie. Maranai taui i ġairi da ita voepai, tauna irairaġena.

¹⁰ Paul i ġaira, i matave-tepani ma i rapai ma rava i riwei i pa, “Ega ona vinuabola, tauna lawalawaina!”

¹¹ Anina ma Paul i ġae me au numa ma kerisiana maiteni BADA ana amgogona amna i ani ma awari i babani maratom. Ma Paul nai dobuna i netawanei.

¹² Taui laragana lawalawaina i naiei au numa ma rava orai i rauie.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui.

¹⁴ Ma au Assos a vigerui ma a nae au Miletus

¹⁵ Maratomna bonabona Kios au ġereġerena a nae. Ma marana i tom au Samos a ġeta, ma maratom ġela au Miletus a ġota.

¹⁶ Paul i ġoei da jijimanina ina nae ma avena ita rui au Ephesus, ega ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei.

¹⁸ Maranai au Ephesus taon i ġetai ma taui i riwei i pa:

O aramanei au lawana menanare maranai vovounai weka au Eisia provins a ġetai.

¹⁹ Mai Jew i ġoei da ita rau-ivipaoapoeleu wate tau a vilamolamona ma ana toutou BADA awarina a vivitaunola.

²⁰ O aramanei da maranai God Riwana Aiaina awarimi a raugugulei, riwa aiaina ani aguimi ega ata tajjini. Au deba a rraugugula rava maġamaġau au naoi, ma ami au numa a viararamanimi

²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumāġanei.

* **20:2:** Marina e ġoregregi Greek.

22 Ma marina Arua Vivivireina i riweu da ana nae au Jerusalem. Ega ata aramanei kampa aiwai awariu ina tupua.

23 Wate taon nununai awari a nena ma Arua Vivivireina e viviegeu da amapo ina paniu ma au deri ina tereu ma ina rau-iviapoapoleu.

24 Ma mepa da ina virageniu, wei lamna ega kaua gaegea tau awariu. Wate kaua gaegea lamna BADA Iesu nola i verevereu da ana vikwai. Wei nolana lamna, God ana iviaiai maemae, riwana ana raugugulei.

25 Magamagumi awarini a nei ma God ana vigulau a raugugulei wate marina a aramanei da amadodo da i nena, naou ega ona inana-melei.

26-27 God ana vilawana ogatarana rava aubaii ega ata govaigi awarimi lamna aubaina riwa bagibaginei a ririwemi da mepa da rava au babani ega ina vitumaiganei ma ana lawana maemae-nonoana ina vine-boai, lamna ega tau au wavu.

28 Taumi babada ma ona paina-melemi, nanare tauvitumaigana taui aiavoi da Arua vivivireina au urami i teretereria. Ona inana-vaitetei me sipu taupainana ana sipu e paipaini. Taulamna God ana vinevine taranei i gimara.

29 A aramanei da ana nae ma au muriu tauraugugula morumorui ina nei awarimi ma rava ai tumaigana ina viapoapoeni, me auou moduei sipu au horuna viragenia aubaina.

30 Ma rava gelau ami au dam oina ina vomairi ma ina viaramana ma moruei rava orai ina taini da taui ina votagotagoi.

31 Lamna aubaina matami ina kala ma ona aramanei da madega tonuga marai ma waguyarai a notanotaimi ma ana toutou a viviararamanimi.

32 Ma marina God au urana a tereteremi. Ana agu e verevereoimi ona vivitumaganei. Wei aguina e vovaivirewapanimi, ma ami pulo ina veremi, aubaina taumi God natunatuna viaianai.

33 Ma tau ega rava ana mane bo ana purapura ata rauogarei

34 Taumi o aramana-kauei da tau nimauei a nola da mane a vaia da tau au taubagibagi turau aubai.

35 Nanare, a viataiemi da ona nola guratana da mane ona vaia ma molaka ona voagui. Iesu ana babani ega nuanuami ina vuru, Tauna i riwa i pa, "Verena i ai kaua ega me vainana."

36 Paul i babani vorovei ma anatapui i mae-gaira au doa ma i raupari.

37-38 I vinolola i pa, "Amapo ega naou ona inana-melei." Wei riwana i vinuabolai da i vitouana, Paul i taragwabai ma i vigia-lagolagonei. Ma i naiei da au waga i vigeruei.

21

Paul ana vagai au Jerusalem

1 Ephesus kerisiana babadai a viegualaei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

2 Weka waga gelau i nena au Phonisnia a gerui,

3 da au Saipras bonabonana a rubatawanei, au kelakelauai da a nae au Taia au Syria provins a gota, da purapura ita viopuni.

4 Kampa tauvitumaigana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i vigaei da ega ina nae au Jerusalem.

5 Ma mara i getai da ata vomairi, kerisiana awawai maiteni da natunatui taon i voterei ma anatapuiai a gaira au gera, a raupari gogona.

6 A viegualau da tauai au waga a geru ma taui i nae-me ai au numa.

7 Au Taia ma a nae au Tolemais taon a geta. Tauvitumaigana kampa a nebelei ma aupom tagogi maiteni a mae.

8 *Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina.

9 Tauna natunatuna waivinei 4 ega tavitavinei, taui God ana riwa i viviegai rava awari.

10 *Aupom vomagai i kwa, kerisiana wavana Agabas, tauna nanare God riwana i viviegai, Judeaei i gairai au Caesarea.

11 Ma i nei awariai da Paul ana tairoro i vaia ma tauna urana ma aena i ragina-melei ma i riwa i pa, "Arua Vivivireina e ririwa, da Jew babadai wei tairorona taniwagana wenanare ina ragini, ma Jentail au urai ina terei."

¹² Maranai wei riwana a nonori, tauai kerisiana ġelaui maiteni Paul a vibaġħana-guratei, da avena ita nae au Jerusalem.

¹³ Wate i pa, “Aiwi Aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina virażeniu au Jerusalem, BADA Iesu a vovotagħoġi aubaina.”

¹⁴ Tauai a viviġaei ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

¹⁵ Wei au murina a vokaukaua ma a vomairi au Jerusalem.

¹⁶ Kerisiana ġelaui mai Caesarea I naielai Nason ana au numa ma kampa a mae. Tauna oroto Saiprasiel, ma Iesu votaġona i vikareni maranaina rava vouvounai i vikarei da Iesu Riwana Aiaina i raraugugulei.

Paul, James i raugenari

¹⁷ Maranai au Jerusalem a ġeta kerisiana ana nuaiai i nebelelai.

¹⁸ Maratom ġela Paul maiteni a nae da * James a raugenari, † dogadogara anatapui kampa.

¹⁹ Paul taui i viegħualuei ma ana au vagħi God aiwai i kaukauei Jentail awari anatapuna taui i pariverei.

²⁰ Maranaina wei riwai i nonori, taui God i voepaepai ma Paul i riwa i pa, “Turaiai u aramanei mai Jew ai magħa tausnan nanare weka Iesu e vivitumaġanei, ma God ana tarawatu e vovotagħo-kauċi.

²¹ Wate rava Jew kerisiana weka au Jerusalem am kaua i vibenabenaei, da tam Jew Jentail maiteni e mamae e viararamani da Moses ana tarawatu ina geduguedaiei. Ma u riwei da natunatui ini eġa ina bori ma ai kaua ġelaui eġa ina votaġoġi.

²² Taui i aramanei da tam u ġetai, Marina aiwai tana kauċi?

²³ Aiwai a ririwemi ona kauċi. Au nelara 4, taui parivainuāgħana bagibbagħina God awarina i kauċi.

²⁴ Ma taravaini ma ona nae au Tempol ma ona viaiaina-melemi ma ma vimaia da taui ai viaiaina pulona ina kauċi. Anina ma taui kolai ina ġari ma rava anatapui ina aramanei da tam Moses ana tarawatu anina e vovotagħoġi, ma babani au naona lamna anatapuna moru kaua.

²⁵ *Ma Jentail marina i vivitumaġħana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai, Rava ġamōġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”‡

²⁶ Anina ma marana i tom Paul nai nelarai 4 maiteni i viaiña-melei God au matana. Muriai Paul i rui Tempol au orana mā i vinolanolola pīrisi awarii da mara aiwai taui ai viaiaina ina voterei. Ma maranaina pulo ita terei taui tagotagogi ava aubai.

Paul i pani.

²⁷⁻²⁹ *Ma aupom 7 aburuna ava da ita kwa ma Jew ġelaui au Eisia provins maemaei taui Paul i 'nanai Tempol au orana. Au naonei taui Paul i 'nanai oroto Epheṣusei wawana Trophimus maiteni, au taon i babbarba ma i notai da tauna Trophimus i ruiei Tempol au orana. Taui Paul i vojjini ma i garara i pa, “Nelara mai Israel ona nei, ona voquġiai! Wei orotona dobu anatapuna e nenaeni ma rava anatapui e viviaramani da mai Jew ma ata tarawatu ma Tempol i parivireirei. Tauna Jentail i neħħi gabuna au vivivireina ma i tuvaidoedoi God au matanal!”

³⁰ Ma rava anatapui i nonori da au Tempol viġaġġiawa i tupua ma anatapui kampa i ruba. Ma Paul i vojjini ma i taina-opunei au doa ma Tempol metaetana i gudui.

³¹ Maranai taui Paul virażenana i kaukauei, Mai Rome sorodja ai bada ġaġġaena i nonori da viġaġġiawa ġaġġaena i tupua au Tempol.

³² Tauna l-aġġilägħana ana sorodja ma ai babada i vaini ma i ruba kampa, maranai rava taui i 'nanai, Taui Paul vunuana i voterei.

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vagħi i tam i bo rava i puli i verei damanai mane taupainina i verei * **21:25:** Act 15:29 ‡ **21:25:** Viawawana labalababa wei anatapuna e vaivipaip: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana, me oroto natuna wawinena maiteni bo wavine natuna orotna maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma ġamōġamo e viviawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelaui e gaegħi da maiteni ma viawawana. (Gen 34:7, Deu 22:25-28). * **21:27-29:** Act 20:4

³³Sorodia ai bada i nei Paul awarina da i vojjini ma ana sorodia ruaga i riwei da seinei Paul urana au urai i pani jijini. Anina ma tauna patara i vitara-virevirei i pa, "Wei aiai orotona? Aiwai i kaeui?"

³⁴Patara au orana rava gelaui babani tagogi i gararei, ma rava gelaui babani tapuna i gararei. Rava were da nare i garagarara da sorodia ai bada menanare ita nelagai gaiawa kareai aiwai, lamna Aubaina ana sorodia i egari da Paul ita naiei, ai au bareki.

³⁵Maranai Paul bareki tetena i tutugeregerei, patara i gaiawa guratana Aubaina sorodia Paul i voepai da i avarai da ita gagaloei.

³⁶Patara amapo da taui i votogatagoi ma i garagarara i pa, "Ona viraageni, ona viraageni!"

Paul patara awarii i babani.

³⁷Maranai taui aburuna ava da au bareki ita rui, Paul Greeki sorodia ai bada i riwei i pa, "Anina bo ega da awarim ata babani?"

Ma tauna i auepai ma i riwa i pa, "Tam Greek u aramanei bo?"

³⁸Tau a notai da tam Egyptei, rorova ai babada u viigavie, Ma rava 4,000 orai potapotai u opunei au mutulua, Tam nai ravana bo?"

³⁹Paul i paribelana i pa, "Egal! Tau Jew ei, au taon Tarsus a tupua, au Silisia provins, a vivibagaim da rava awari ana babani."

⁴⁰Tauna i vianina ma Paul au tete i mairi. Tauna urana i voepai da patara garara i voterei. Maranai taui i genuana, Paul taui awarii ai ponanei i babani i pa.

22

¹"Amamau ma varevareiu, ona rautaniiganeu ma ana viataiemi da tau ega aiwai ata kauana-boai."

²Maranai patarana Paul i nonori da taui ai ponei i bababani, taui i genuana ma i rautaniigana.

³*I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma.

Amamata ai tarawatu a girumei ma au tauviaramana Gamaliel.^{*} A goana-guratei da God ato voepaepa-kauei me taumi anatapumi nanare.

⁴*Tau Iesu ana etanai tauvotaogoina a rau-iviapoapoelei da gelaui i raage. Nelara ma waivine a pani ma au numa panipani a tawana-ruiei.

⁵Pirisi gegetelarana ana boru gegetelarana[†] maiteini i aramanei da tau a ririwa kaua. Taui ai vianina pepana i vereu da ai rava au Damaskas ata verei ma a nae au Damaskas da kerisiana ato pani ma a neiae da kovoiga ita via weka au Jerusalem.

⁶Aubenai Damaskas a tugeregerei ma maratagogi lalaina gamrina gaegaena marei i gaiai da i tunuiai.

⁷A peu au doa ma pona a nonori i pa, "Saul! Saul! Aiwai Aubaina e raraui-iviapoapoeleu?"

⁸Tau a paribelei, "Bada tam aiai?"

Tauna i paribelei, "Iesu Nasaretei e raraui-iviapoapoele."

⁹Rava maiteini a nenae lalalaina i 'nanai wate babani ega ita nonori.

¹⁰A paridadana a pa, "Bada Aiwai ana kaeui?" Ma Tauna i riwa i pa, "Ma vomairi ma nae au Damaskas. Kampa rava am nola ina pariverem."

¹¹Lalalaina gamrina i rata guratana ma matau i kamoi da ega ata inainana. Ma tauviganigwaniana au urai i voa ma i naieu au Damaskas.

¹²Oroto wavana Ananias kampa i mae tauna God i voepaepai ma ana tarawatu i vovojina-nonoei. Mai Jew tauna i vivirana-kauei.

¹³I nei da au ririvau i mairi ma i riwa, "Vareiu Saul ma inana me!" Nai marana a inana me.

¹⁴Anina ma i riwa, "Amamata ai God i rautanim, da ana goana ma aramanei, ana Taunola Jijimanina[‡] - matamei ma inanai, ma riwana tanigamei ma nonori.

¹⁵Aiwi u inainanai ma u nonori ma vimatematei rava anatapui awarii.

¹⁶Marina aiwai e paipaini! Tauai ana babataitoim ma BADA awarina ma raupari da amo'apoapoei ina oga-tawanei."

¹⁷Anina ma a nae au Jerusalem. Au Tempol a raraupari ma matauei kaua a inanai.

¹⁸A inanai BADA awarui i bababani i pa, "Rava weka am jima tau aubai ega nonorana ita goegoei. Lagilagina Jerusalem ma opu-tawanei."

* 22:3: Act 5:34-39 * 22:3: Gamaliel tauna tauviaramana ma rava aiaina Paul ana au mara. Tauna Pharisi ma boru getelarana (Sanhedrin) au orana. * 22:4: Act 8:3; 26:9-11 † 22:5: Sanhedrin ‡ 22:14: Rava Jijimanina bo bulbululona, lamna Iesu wavana. Paul ega Iesu wavana ita latoni mepa da taurautanigana mai Jew ita viamlogaigaini.

¹⁹ Wate tau a paribelei, "BADA wei ravai i aramanei da pari numai a nepai da kerisiana a vunui ma a pani-naiei.

²⁰ [✧]Ma maranai am peroveta Stephen tarana i toi, tau kampa a maimairi ma ana iraġe a vianinei ma ġāima tautawanai ai gara a paipaini."

²¹ Ma BADA i riweu, "Ma nae a paripari-tawanem ueia Jentail awarii."

Paul e ririwa da tauna Romei

²² Patarana Paul i raurutaniġanei ma maranai wei babanina i kauei tau i meji guratana ma i vigaragararei i pa, "Ona viraġena-tawanei, eġa ina mael!"

²³ Taui i vigaragararei, ai kwama i kwajikwajie ma pokau i tawatawanei awarina.

²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieġa aiwai aubaina ana rava amlo i ġaġai ma awarina i garagarara.

²⁵ Ma urana ruāga i terepai au aidamo ma i raġiragiġi da ita wipi ma Paul sorodia ai bada i riwei i pa, "Tau Rome-ei, Eġa ota etareu ma o vunuvunu-labalababai. Lamna menanare?"

²⁶ Maranai sorodia ai bada wei i nonori ma i nae da ai bada ġaġaġena i pariverei. Ma tauna i vitara-virevirei i pa, "Aiwai e kaukuae? Wei ravana Rome-ei!"

²⁷ Sorodia ai bada i nae Paul awarina ma i paridadanei, "Ma riweu! Riwa kaua da tam Rome-ei bo?"

Ma Paul i paribelei, "Ee, lamna riwa kaua!"

²⁸ Sorodia ai bada Paul i riwei, "Tau mane ġaġaġena Rome gabemanina a verei da a vimai Rome."

Paul tauna i riwei, "Tau a tupua da Rome-ei."

²⁹ Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukaua maranai i aramanei da i kauana-boai da Paul, Rome-ei seinei i pani.

Paul Jew ai boru ġetelarana [§] *au naoi i mairi*

³⁰ Au maratomna sorodia ai bada i ġoei da ita aramana-kauei mai Jew ai viwavu aiwai Paul awarina. Ma lamna aubaina Paul ana seini i votawatawanei ma i opunei boru ġetelarana au naona i vimairini.

23

¹ Paul boru ġeġetelarana i 'nana-jijini ma i riwa, "Varevareiu tau au nola God awarina i jijimana ma orau aiaina da wei paratana."

² Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

³ Ma Paul Ananias i riwei, "God ina raunavanavaim, tam morumorum! Moses ana tarawatuei e rauruetareu wate maranai am rava u riwei da i raunavanavai tam tarawatu u viaigai."

⁴ Taui Paul au ġeregerena i maimairi Paul i riwei, "Aiwai aubaina God ana Pirisi ġetelarana e vivijibog?"

⁵ Paul i paribelei, "Varevareiu eġa ata aramanei da tauna God ana Pirisi ġeġetelarana. Au buka i terei da Eġa God ana taunola ma parivai-apoapoeni." ^(Exodus 22:27)

⁶ [✧]Anina ma Paul i 'nanai da Sadusi ma Pharisi ġelaui kampa ma ponana i rata ma i riwa, "Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi o etaetareu!"

⁷ Maranai wei i latoni Pharisi ma Sadusi vipariparinigai i raukarei ma boru i kai da ruāga.

⁸ [✧]Aubaina Sadusi e ririwa da rava e irairaġe lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

⁹ Ĝaiawa ġaġaġena i tupua ma tarawata babadai ġelaui taui Pharisi, i vovomairi ma i babani guratana i pa, "Tauai eġa aiwai apoapoena ata inanai wei ravana awarina! Mepa da anela bo Bada Aruana tauna awarina i babani?"

¹⁰ Vigaġaiawa ġaġaġena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiu bareki.

¹¹ Ma waguvvarai ġelauna, BADA Paul au ririvana i mairi ma i riwei, "Tepam ina tora! Me aubaiu u jima au Jerusalem nanare aubaiu au Rome ma jima."

Mai Jew i vioga da Paul ina viraġeni

¹² Ubaubanai mai Jew ġelaui i vitagogiei ma i viogatara ma i parivainuāġana da eġa ina am bo ina uma da Paul ina viraġeni.

¹³ Nelara 40 nanare i vianina da Paul ina viraġeni.

¹⁴ Tau i nae pirisi babadai ma dogadogara awarii ma i riwei, "Tauai parivainuağana bagibagina a kuae da ega ana am da Paul ana virağeni."

¹⁵ Taumi Boru ġegetelarana maitenī ona moru ma riwa ona pari-tawanei sorodia badana awarina da Paul ina neiai ma ona vitara-vireirei da riwa kaua ona vaia. Tauai ana vipaipai da ana virağeni muriai da weka ina ġetai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

¹⁷ Ma Paul sorodia badana i ġoreiai ma i riwei, "Wei laragana laġilagħina ma naiei ami bada awarina da ana riwa ina riwei."

¹⁸ Ma i naiei aida ġaegħena awarina ma i riwei, "Panipani wawana Paul riwa i paritawanei awarii ma i riwei da wei laragana ata neiai awarim aubaina am riwa awarina."

¹⁹ Sorodia ai bada ġaegħena laraga i vinimavoai ma i maeria ma i paridadanei, "Am riwa aiwai ma riwei?"

²⁰ I riwa, "Mai Jew i riwa da ita vibagħaim da au maratom Paul uta naiei ai au Boru ġegetelarana, Wei anatapuna moru.

²¹ Wate ega ma rautaniġanei aubaina rava 40 nanare pota e paipaini da ina virağeni. Tau i vioga da ega ina am da Paul ina virağeni. Tau i vokaukaua ma am vianina ava e paipaini."

²² Ma bada laraga i riwei da ega aiai ina riwei ma i paritawanei.

Taui Paul i paritawanei Gavena Felix awarina.

²³ Anina ma sorodia ai bada ġaegħena babada ruāġa i ġoreiai ma i riwei, i pa, "Sorodia sod ravai 200, aiera ravai 200 ma hos ravai 70 ma vaia ma ona vokaukaua da wagħuvarai 9 oklok ona vomairi.

²⁴ Hos biāġa ona vaia Paul aubaina da aiaina ona naiei gavena Felix awarina au Caesarea."

²⁵ Ma sorodia ai bada pepa wenanare i girumi:

²⁶ Tau Claudius Lisiás, a girugiruma awarim au bada vinualaulaunam, Gavena Felix. Egualau.

²⁷ Mai Jew wei orotona i vojjini ma ita virağeni, wate maranai a nonori da tauna Rome-ei ma lamna aubaina au sorodia maitenī a opu da au urai a vaitawanei.

²⁸ A ġoed da ata aramanei ana apoapoe aiwai, da ata naiei ai Boru ġegetelerana awarina.

²⁹ Ma a nelagħi da viwawuna lamna tauiava ai tumāġħana kauai ma Rome ana tarawutuei lamna tauna ega aiwai apoapoeni ita kuae da ata virağeni bo ata pani.

³⁰ Maranai riwana a vaia da mai Jew i ġoed da govagħoġanei tauna ita vunui. Lamna maratagogi a paritawanei awarim, ma nanare tauwiwawu a riwana-guratei da kampa ina ġetai da ai wiwaw ina kuae.

³¹ Ma sorodia ai babada i ririweia nanare i kuae ma wagħuvarai Paul i taravaini ma i naiei da au taon Antipatris i ġeta.

³² Au maratommna aiera ma sod sorodiai i naeme au Jerusalem ma hosi sorodia Paul i naei au Caesarea.

³³ Maranai hosi sorodiai au Caesarea i ġeta pepana ma Paul gavena i veredamanei au urana.

³⁴ Gavena pepa i 'avi ma Paul i paridadanei metauna provins-na u tupua ma i riwa, "Silisia."

³⁵ Gavena i riwa i pa, "Am etara ana nonori maranai am tauwiwawu ina ġetai." Ma sorodia i naiei Herod numa i voavoiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ġegetelarana Ananias ma dogadogara i ġairi au Caesarea ai taurauetarawa wawana Tertelus maiteni.

² Ma Paul i ġoreiai gabemani au naona. Ma Tertelus i vomairi ma viwawuna i vikarei:

Au bada Felix* vinualaulaunam, Am vibadanei ta mae ubauba ma ata nota ega aiwai. Ma kaua voui i ma aiai u kaukauei ata dobu voana aubaina i voagu-kaueta.

³ Anatapuiai mepamepa a mamae a vinuaiai kaua tam awarim.

⁴ Wate ega ata ġoed da ana visina-viraviram. Ma lamna aubaina a ġoegħei da uta rautaniġaneu mara aburuna ava.

* ^{24:2}: *Felix ana au vibadana lamna ega ita ai. Tertelus lamna Felix i għwalgħalameru da Paul ita viwawu ma ita pani. Felix rava vita ġaegħei i verei da madiegħ ruāġa i kwa Sisaei Nero wei ravana i viopuni. Gavia ġaegħena i tupua ma Jew Rome i vigħavie i ma taui Jerusalem i rikai da ega aiwaina ita mae.*

⁵ Tauai a nelağai da wei ravana lamna orana potapotana ma vígáigáiawa tauvikareina mai Jew awarii dobu au anatapuna. Tauna boru vouna e góregorei mai Nasaret[†] ai bada.

⁶ Tauri i goei da Tempol maiteni ita tuvaidoedoei ma lamna aubaina a pani.

⁷ *

⁸ Ma rauetarei ma ma nelağai da ai viwawu lamna anatapui riwa kaua.

⁹ Ma mai Jew Tertelus au murina i mairi ma i riwa, "Wei babani anatapui riwa kaua!"

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madéga biága wei dobuna ai taurauetara lamna aubaina tau ana nuaubau ana babani aubaiu.

¹¹ Am rava ina riwem da tau pom ota aupom 12 nanare a ġeta memei au Jerusalem da BADA ata voepaepai.

¹² Au tauviwawu ega ita nelağaiu ata vígáigáiawa au Tempol bo au boru-numana bo mepa nanare au Jerusalem.

¹³ Ma ai viwawu tau awariu menanare tana aramanei da lamna riwa kaua?

¹⁴ Wate riwa kaua da tau amamata ai God a voepaepai ma BADA Iesu ana etanai, a votagötägoi ma taui e ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vivitumáganei.

¹⁵ Tau God awarina a vitumágana guratana me ravai nanare, da tauna muriae rava anatapui irägelei ina vilawana-melei, ravai aiaii ma rava apoapoei.

¹⁶ Lamna aubaina a kaukauana guratei da orau ina ai rava ma BADA awarii.

¹⁷ *Jerusalem a netawanei madéga biága i kwa ma pom ota a nememei da molamolakai ata puloi ma pulo ata kuae God awarina. §

¹⁸ Tau aiaiu, maranaina i nelağaiu au Tempol viaina pulona a kaukauei. Ega patara maiteni ma ega visinaviravira.

¹⁹ Wate mai Jew gelau Eisia provinsei i nei kampa. Tauri mepa marina! Ita nei au naom da ai viwawu ita terei.

²⁰ Bo babada weka ita riweta au apoapoe aiwai maranai boru ġegetelarana au naona a mairi.

²¹ *Wate mepa da maratagogi awarii a garara a pa, "A vitumágana da God rava anatapui irägelei ina vovaimairini! Lamna aubaina tau weka a maimairi."

²² Felix tauna BADA Iesu ana Etanai riwana i aramana-kuae, boru i gudui ma i riwa, "Maranai sorodai a boda Claudius Lisiás ina nei, ma ina paribelem."

²³ Ma sorodia ai boda i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viaramani

²⁴ Aupom biága au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumágana Iesu Keriso awarina i babaniei ma Felix i rautaniğana. *

²⁵ Wate maranai Paul babani i vikarei da God ana góana, da rava lawana aiaina ma jijimanina ina maeni, ma erawa kauai ma gó'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, "Ma nae! Ma maranai ana góem lamna ana kwatuem."

²⁶ Ma Felix i góegoei da Paul tauna manelei ita gwali ma lamna aubaina mara i maǵa i raukwatuei ma awarina i babani.

²⁷ Madéga ruága au murina Felix i rautom ma ana gabu Posias Festus i vaia. Felix i goei da wavana ita ai mai Jew awarii lamna aubaina Paul au numa panipani i votere-tawanei.

[†] **24:5:** Wava *Nazarene lamna Iesu ana tauvotagotagi e babaniei aubaina tauna Nasaretei. Maranai Tertelus tau e góre Nazarene Lamna Kerisiana e vivibogi. Jew Jerusalem ei ma Judea Provin anatapuna mai Galili provins raval e inainana gairei, (John 1:46 ma iavi). Tauna wate e ririwa da menanare Paul e tapataparor nei lamna mai Rome ai tarawatu e viviaiga. [‡] **24:7:** Verse 7 lamna buka waduwaduboi biága au orana e mamae, wate buka Greek ponanei i girugirumi maǵamaǵau wei ves-na au orana ega. ^{*} **24:17:** Act 21:17-28 [§] **24:17:** Madéga 5 i kwa ma Paul i nememei au Jerusalem da ita mae mara aburuna da tauvitumágana ita vovaivirewapani ma ana babbara ma nolana aiaina ita virautuei. (Act 18.22) ^{*} **24:21:** Act 23:6 ^{*} **24:24:** Mepa da Drusila Jew wavinena awarinei Felix wei ravai e góregorei tauvitumágana i aramanei. Drusila lamna Herod Agrippa natuna guguinina umauna ana madéga 20. Tauna wavalatona Siriei i ravagi wate i votere maranai ana madéga 16 da Felix i ravagi. Wei lamna ana tavine viruainma Felix ana tavine vitonuina.*

25

Paul i vibāga da Sisa au naona ita mairi

¹ Festus i ġeta au Caesarea da ana nola ita vikarei ma aupom vitonuina i ġae au Jerusalem.

² Weka pirisi ġegetelarana ma dogadogara Festus i nebelei ma ai viwavu Paul awarina tauna i verei.

³ Ma Festus i vibāgai da ita voagui da Paul ita paritawanei au Jerusalem. Taui ava i vioga da Paul au etanai ita viraġeni.

⁴ Wate Festus i paribelei i pa, “Paul au deri au Caesarea ma tau a ġaigaira me kampa aupom ruāga au murina.

⁵ Mepa da Paul aiwai i kauana-boai lamna ami Babada maiteni ana ġaira da kampa ami viwavu ina terei.”

⁶ Aupom 8 da 10 nanare au murina Festus i ġaira me au Caesarea ma maratomna au numetara i kiala ma ana sorodia i eġara da Paul ita ruieiai au naona.

⁷ Maranai Paul i ruieiai, ma Jew babadai Jerusalem ei i ġairai i nei awari ma ina viwavui, kaua maġamaġau apoapoei aubaii. Wate taui ai viwavu anatapui anona ega.

⁸ Paul wei *viwavu i vinua-nainei ma i pa, “Tau eġa aiwai apoapoaena ata kuae mai Jew ai tarawatu awarina bo ai Tempol awarina bo Caesar awarina.”

⁹ Wate Festus i ġoġi da mai Jew ita vinuaini lamna aubaina Paul i paridadanei i pa, “E goeġgoe bo eġa da tana ġae au Jerusalem ma etara?”

¹⁰ Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kuae da tau eġa aiwai apoapoaena ata kuae mai Jew awarii.

¹¹ Wate mepa da aiwai apoapoaena a kuae lamna ma virāgeniu. Tau eġa iraġe ata rovoe. Wate mepa da wei lamna viwavu moru lamna eġa aiai ana rewapani ita mamae da ina veredamaneu. Tau a viviġa Caesar awarina!”

¹² Festus Caesar ana dogadogara ai nota i vaia ma i paribelana i pa, “Tam u vibāga Caesar awarina, Anina Caesar awarina ma nae.”

Festus Paul ana babani gulau Agrippa i pariverei

¹³ Aupom biaġa au murina gulau Agrippa[†] novuna Benisi maiteni i nei au Caesarea da gavena vouna Festus i raġunardi da ita viegħualuei.

¹⁴ Ma i mae aupom vomagaġna ma Festus Paul i rarauetara gulau i pariverei i pa, “Felix panipani tagogi weka i voterei.

¹⁵ Ma maranai a nae au Jerusalem mai Jew ai pirisi babadai ma dogadogara ai viwavu i nejai awariu ma i vibāgħu da Paul ata virāgeni.

¹⁶ —Ma a riwei da tauai mai Rome ai tarawatu e ririwa da eġa rava ana kovoġa labalababai da au naona ana rauetarei. Taui ina ġetai da ai viwavu taurauetara au naona ina mairi da ina gagħolana-melei.

¹⁷ Maranai tauviwatu maiteni weka a ġetai. Tau eġa ata vipaipai ma maratomna a egara da ravana i nejai da ita etara.

¹⁸ Tauviwatu i vomairi ma a notai da aiwai apoapoaena aubaina ita viwavui wate eġa.

¹⁹ Anina kaua biaġa ava ai taparoro kaua, ma rava tagogi irairaġena wawana Iesu i vitarapiriei. Wate Paul e ririwa da Iesu lawalawaina.

²⁰ Tau nuuanu i raġaraġa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei.

²¹ Wate Paul i vibāga da Caesar ana viwavu ina rautaniġanei. Ma sorodia a egari da au numa panipani ina paini da ana paritawanei Caesar awarina.”

²² Ma Agrippa Festus i riwei, “A ġoġi da ravana ana babani ana rautaniġanei.”

Ma Festus i paribelei, “Anina, au maratom ma rautaniġanei.”

Gulau Agrippa Paul i rautaniġanei

²³ Au maratomna gulau Agrippa ma Benisi gulau garai i oteni ma ana gabemani babadai ġaegħae maiteni, i arana-ruiei au boru numana. Festus ana sorodia i egari da Paul i ruieiai.

²⁴ Festus i riwa, “Gulau Agrippa ma anatapumi o rieħi weka, wei ravana o inainan! Tauna mai Jew au Jerusalem ma weka au Caesarea e goeġġei da ina iraġe.

²⁵ Wate tau a nelagħi da tauna eġa aiwai ita kauana-boai da ina iraġe. Wate i vibāga da Caesar tauna ina rauetarei. Lamna aubaina a pariparitawanei Caesar awarina.

* ^{25:8:} *Paul au Tarsus i tupua wate tauna wawana Rome gabemania awarina. Lamna aubaina tauna ana rewapani e mamae da ana nuabolha ina niaej au Rome da Caesar ina rauetarei.* † ^{25:13:} *Wei lamna Herod Agrippa 11, Herod Agrippa 1 natuna.*

²⁶ Wate Caesar aiwai ana riwei, ega ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi.

²⁷ Aubaina ega ita ai da panipani ana paritawanei Caesar awarina ma ana viwavuna ega!"

26

Paul ana gudu i tarai

¹ Ma Agrippa Paul i riwei, "A vianinem da ma babani." Ma Paul urana i voepai ma ana gudu tarana i vikarei

² i pa:

I ai kaua gulau Agrippa da amadodo tam au etara e rautaniganee da Jew babadai ai viwavu awariu ana tere-vaijijimani.

³ Tau aramanei da tam mai Jew ai giu ma ai paripariigai u aramanana-kauei. Lamna aubaina a vivibaigaim da au paribelana ma rautaniganana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem.

⁵ [◊]Tau rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojjina-kauei.

⁶ Ma marina a vivitumaiganana da God aiwai noinoita i parivainuagani ina kauei. Ma lamna aubaina tau weka a maimairi.

⁷ Wei parivai-nuaiganana ata dam 12 e vipaipaiei da ina nei lamna aubaina ata rava i vipatutu ma marai ma waguvvarai God e viviborumei. Au gulau wei vitumaiganana aubaina mai Jew e viviwavui.

⁸ Aiwai aubaina o notanotai da God ega tagotagogina da rava iragelei ina vovaimairini?

⁹ [◊]Tau au naona a notai da aiwai anatapuna ata kauei da Iesu Nasareti ata viigavie.

¹⁰ Ma anina lamna a kauei au Jerusalem. Pirisi gegetelerana babadai pepa i verei ma lamna i vovai-virewapaniu ma kerisiana vivivireii ma gamaagai au numa panipani a terei, ma nanare ai irage a vianinei.

¹¹ Mara magamaagai boru numai a naeni da kerisiana a vununaiei da ai tumaganana ita boviei. Amlou i gaigai kaua da dobu gelau a naeni kerisiana a baibaei.

¹² Mara tagogi pirisi babadai au Jerusalem pepa i vereu da rewapania i vereu ma a nae au Damaskas.

¹³ Ma aubenai nanare, tau au etanai a nena ma a inanai, lalalaina marei i gaikai ma i lalaiai, gamrina madega i getawanei! Au rava maiteni a bababara i lalaiai.

¹⁴ Anatapui a vipeuana au doa ma pona Hebrewei awariu i bababani. I riwa, "Saul, Saul aiwai aubaina e viigavie? Tam e goegoei da Tau ma viapoapoeni wate ega da tam e viviapoapoeni-melem!"

¹⁵ Ma a paridadana, "Bada tam aiai?"

Ma BADA i paribelei, "Tau Iesu, ravana tauna e viigavie."

¹⁶ Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viataitaiem, ma vimatamatei rava awarii.

¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii,

¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapania ina votere-tawanei ma ina nei God awarina. Tauna ai go'apoapoe ina nota-tawanei, ma ina taravaini natunatura rautanii, ai tumaganana awariu aubaina."

¹⁹ Lamna aubaina Gulau Agrippa, tau riwa marei au inana a inanai a voteletelei.

²⁰ [◊]Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai go'apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i votere-tawanei.

²¹ Wei babanii aubaina mai Jew au Tempol i vojjinu ma i goei da ita viraageniu.

²² Wate God i vilawaniu da marina, ma weka a maimairi da a vimatamatei rava muomuo ma nanare rava gaegaei awarii. Aiwai a bababaniei lamna peroveta nununai ma Moses i ririweta ina tupua.

²³ *Tau i riwa da tauvilawana Keriso ina vinuapoapoe. Ma tauna ina ira^{ge} ma ina vinao da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i viona^{gi} ma i garara Paul awarina, "Tam u bua! Am aramana i vibuaim!"

²⁵ Wate Paul i paribelei, "Au bada Festus tau ega ata bua. Tau aiwai a bababaniei lamna riwa kaua ma babani anona.

²⁶ Wei kaua ega govagova^{gana} ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babanviei awarina."

²⁷ Paul Gulau Agrippa i riwei i pa, "Peroveta e vivituma^{ganei} bo ega? A aramanei da nanare!"

²⁸ Ma Agrippa i paribelei, "U notai da tau la^{gi}la^{gi}na ma sinavirau da ana vikerisiana!"

²⁹ Paul i paribelei, "La^{gi}la^{gi}na bo amapo, a raraupari God awarina da tam ma rava anatapui wei au boruna ina tupua-vira me tau nanare wate ega sein maiteni."

³⁰ Anina ma gulau ma gavena ma Benisi i vomairi ma i nae.

³¹ Ma anatapui i nenea ma i babani vivira ma i viainia i pa, "Wei ravana ega aiwai apoapoenia ita kaeue da tana virageni bo tana pani."

³² Ma Agrippa Festus i riwei, "Mepa da ega ita viba^{ga} gae Caesar awarina, lamna marina tata rupeni."

27

Paul wagei i vagai nae au Rome

¹ Festus mara i tereterei i getai da tauai ata nae au Rome. Paul ma tau ma panipani gelau maiteni au waga a geru ma a va^{gai} Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena.

² Waga Adaramitei i nei da a geru ma wagana i g^ota-nae au Eisia provins gerana. Orot wavana Aristakas ana dobu Thesalonika au Masedonia provins tauna maiteni i geru.

³ Au maratomnia au Sidon taon a g^ota, Julius ivina i ai Paul awarina ma i voterei da i opu au gera da ana rava ita raugenari ma ana goana aiwai ita viba^{gai}.

⁴ Muriai wagei a opu da a nenea ma ive i verau-matamatantai ma lamna aubaina bonabona au Saipras ma dobu gae^{ga}ena au pouna au mulagⁱⁿa ambori.

⁵ Ma boga gae^{ga}ena a bori da Silisia provins da Pamphilia provins geraii a voterei da au Maira taon a rui au Lisia provins

⁶ Au Maira taon kampa sorodia badana mai Egypt ai waga Alexandriei i nenea au Italy kampa i vigeruiai.

⁷ Ma aupom ma^gamag^{au}i nuatauai a ruba ma a voia guratana da Cinidus taon a tu^gere^gerei wate ive i verau-matamatantai da kampa waga a virai da Crete bonabonana ma mutu Samone au poui au mulagⁱⁿa nae.

⁸ Ma kampa nuatauai bonabona Crete gerana a naeni aubaina mara i apoapoe ma a geta dobu e g^oregorei U Aiaina, Lasea taon au g^oregeregena.

⁹ Mara gae^{ga}ena a vine-boai au va^{gai}* ma Rupena Ujina marana boibo^{gi} i kwa,[†] marina lamna ive ma rabama ai mara ma boga babarana i vinirovoro.

¹⁰ Ma Paul i riwa, "Nelara, malana a vaiva da ata va^{gai} ina apoapoe kaua ma waga ma purapura tana vine-boa-pai. Ata lawana maiteni tana vineboai."

¹¹ Wate sorodia ai bada, kapena ana babani i rautani^{ganei} ma ega Paul da kampa ata mae ma ega ata nae.

¹² Wei gabuna ega ita ai wei ivena au marana ma rava ma^gamag^{au}i i goei da waganei ata nae da Phinix una, Crete au bonabonana da kampa ata mae da bodu ita kwa. Wei u gae^{ga}ena ma mutuuii lavarata ma rauana^{ga} e vinao-vererei, da au mulagⁱⁿa e mamae.

Kojikojira Gae^{ga}ena

¹³ Maranai rauana^{ga} i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae.

¹⁴ Ma ega barana ita uama ma kojikojira[#] olei iveiai.

¹⁵ Iwe wagana i verau-matamatani ma waga ega tagotagogina da ita vobelei ma i voterei da iwe waga i avara-opunei.

¹⁶ Bonabona aburuna Kauda gerana au mulagⁱⁿa a ruba ma kampa a voia guratana da dingy a terepai au waga da a ragita-jijini.

* 26:23: Isa 42:6; 49:6 * 27:9: Iri i parei da kojikojira ana mara ma i va^{gai}. † 27:9: Eng. Atonement bo Yom Kippur marana wei lamna September bo October rabama ma ive ai mara # 27:14: Kariwabu gae^{ga}ena

¹⁷ Wei i kauana vorovei ma ġuravei waga au gabaurina da waga adana i raġita-kwaviviroi. Taui i rovo mepa da au maratete ina amġena au Syrtis, § Libya au gerana. Lamna aubaina ġuravei ai da kuka, i raġita-tagogie i ma au boga i viorereni da waga ita bibi. Ma i voterei da kojikojira waga i avara-naiei.

¹⁸ Maratomma kojikojirana i raraū-guratanelei da purapura ġelaui au boga a viorereni.

¹⁹ Aupom vitonuina taui waga purapurai i viorereni au boga.

²⁰ Kojikojira i ruba da aupom biaġa da madeġa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma taui i riwei, "Nelara ota rautaniġaneu ma Crete eġa tata oputawanei, amapo waga eġa tata viapoapeni ma ata purapura eġa tata vineboai.

²² Wate a ririwana-guratem i da eġa orami ina peu! Aubaina avena da waga ina monu wate eġa ina iraġe.

²³ God lamna tau au BADA ma ana taunola tau. Waguvvarai God ana anela i paritawaneiaw awariu.

²⁴ Ma i riwa, 'Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavāġai ina lawana.'

²⁵ Lamna aubaina tepami ina tora! Aubaina tau God a vivitumāġanei ma menanare i ririweia nanarena ina tupua.

²⁶ Wate tauta au maratete tana amġena."

²⁷ Kojikojira i avara-naielai au Mediteranean Bogana da aupom 14 i kwa ma nubautuva waga ravai malana i vaia da taui gera i tuġereġgieri.

²⁸ Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter.

²⁹ Ma taui i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana.

³⁰ Ma waga ravai ai kaua i kaukauei da ita ruba-govaġa. Ma i vioga da dingieit ita opu waga au naona da anika ita dubara-naiei, ma lamna aubaina dingy i teretere-ġairei au boga,

³¹ Wate Paul sorodja ai bada maiteni i riwei, "Mepa da waga ravai ina rubatawanemi lamna anatapumi ona iraġe."

³² Ma sorodja dingy ġuravana i borituini ma dingy kwakwavina i peu au boga ma i avara-naiei.

³³ Ma maratomtomai Paul rava anatapui i egari da ita am, i pa, "Taumi marina aupom 14 rovo i kauemi ma eġa ota am."

³⁴ "Tau a vivibaġa-guratem i da ona am da ona virewapana, eġa aiai tagogi ina iraġe."

³⁵ Paul i babani vorovei ma au matai palawa i vaia, BADA i viegualaei ma i vogimai ma i ani.

³⁶ Ma rava anatapui inanai ma orai i bagibagi ma am i vikarei.

³⁷ Tauai anatapuiai 276 au waga.

³⁸ Ma rava anatapui i am da i am-iava. Ma witi baikei au boga i viorereni da waga ita votatelai da au gera ita ġota da avena ita amġaina.

Waga au maratete i amġena

³⁹ Maranai mara i tom tawanana taui dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni.

⁴⁰ Anina ma anika ġuravai i vicutitui, ma labilabi i tere-ġairei, ma waga au naona kuka voaburunei i votawawanei ma gera aubaina i ruba.

⁴¹ Wate waga au maratete i amġena da i tapaiei, ma rabama waga ipuna i viairikarikai.

⁴² Sorodja i ġoei da panipani ita virāġeni, da avena ita toa-ġaira au gera ma ita viruberubei.

⁴³ Wate sorodja ai bada i ġoei da Paul ita vilawani ma i viġaei, anina ma ai viogatara eġa ita kaeui. Ma taui aiavoi toa i aramanei i egari da i viauepa au boga ma i toa-ġaira au gera.

⁴⁴ Ma ġelaui aiwai da i tenatenam i vidauei. Ma nanare anatapui lawalawaii au gera i ġota.

28

Paul au Malta bonabonana

¹ Maranai a ġota au gera ma a aramanei da tauai au Malta bonabonana.

² Dobuna ravai i nebelelai ma ivii i ai kaua awariai. Garewa atuna i vikarei ma i ububa, ma taui au gera ai i viviri.

³ Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani.

⁴ Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauviraġena ma eġa ita monu wate ata god*" e ririwa da tauna eġa ina lawana."

⁵ Wate Paul motana i viaikwajiea da ai au menamenana i rauei ma tauna eġa ita kero.

⁶ Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, taui ai nota i virai ma i riwa da tauna god ġelauna.

⁷ Au gerana a ġoṭaġota - lana au ġereġerena lamna dobuna badana Publius ana wapu ġaġġena. Tauna i taravainiai ma i paina-kauelai da aupom tonuġa

⁸ Publius amana i doria manawa ruba ma iniġugura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani.

⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai goana vagħi aubaina anatapuna i verelai. Ma waga ġelauna a geru lamna mai Alexandria ai waga bodu aubaina kampa i mae. Waga au naona lamna ai god ruāġa kokoitaui i tai[†].

¹² Kampa ma a amkuka-nae da au Sairakius a ġota ma a mae aupom tonuġa

¹³ Kampa da ambori damana au Regium ma maratomna rauanāġa i wanabauni ma amkuka ma geraei a ruba da maratom ġela au Puteoli a ġota.

¹⁴ Kerisiana kampa a nelāġi ma i riwelai da maiteni a mae wiki tagogi. Anina ma a babara-nei da au Rome taon a ġeta.

¹⁵ Kerisiana au Rome riwaiai i vaia da a nenei ma i ġei da ita nebelelai, ġelaui i ġei au taon e ġoreġorei Vaġavāġai Tonuġa ai Numa ma ġelaui i ġae Apius ana au maket. Maranai Paul wei ravai i 'nanai, ma i vinuaiai kaua ma God i viegualuei.

¹⁶ Maranai au Rome taon a ġeta taui Paul numa i verei da ainelana i mae ma sorodja i terei da i 'nana-vaitetei.

Paul au Rome i raugugula

¹⁷ Ma aupom tonuġa au murina Jew babadai kampa maemaei i raugoreiāi ma awarii i babani, "Varevareiu tau eġa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i paniu ma i veredamaneu Rome gavena awarina.

¹⁸ Mai Rome i etareiu ma i ġoei da ita rupeniu aubaina eġa aiwai apoapoena ata kauet da ina virāġeniu.

¹⁹*Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaġġena Caesar awarina da ita rauetareiu. Wate lamna eġa au rava ata viviġavie, eġa.

²⁰ Lamna aubaina a ġoremi weka da tata babani gogona, ma ata riwemi da tau a vepanipani aubaina a vitumaġġana da mai Israel ai tauvilawana wariġa i ririwei boibogħi i nei."

²¹ Taui i paribelei, "Tauai eġa pepa Judeaei ata vaia bo ai rava riwa ita nei."

²² Tauai aramanei da ravai anatapui kerisiana boruna e paripari-vireirei. Wate tauai a ġoei da am nota ana vaia."

²³ Ma taui mara i terei da Paul maiteni ita viborū, ma patara i ġetaj mepa Paul i mamaelana. Ma ubaubañai Paul God ana vigulau jidu i vikarei da wagħuvarai i vorovei. Moses ana tarawatu ma peroveta nununaii ai au buka i mairi ma i jima. I ġoei da orai ita taini da Iesu ita vitumaġġanei.

²⁴ Ana babaniei ġelaui orai i taini ma ġelaui eġa ita vitumaġġana.

²⁵ Ma taui ava babanina i vepipariniġaiei ma muriai da ita vilamonei Paul wei riwana tagogi i latoni i pa, "Arua Vivivireina riwa kaua Peroveta Isaiah ponanei amamami i riwei i pa:

²⁶ *Ma nae am rava mai Israel awari da ma riwei,
ona nononora wate eġa ona aramanei*

ona inanai wate eġa anona ona aramanei.

²⁷ *Aubaina wei ravai orai i bado.*

Tanigħi i għudui,

Taui matai i vopotai.

Mepa da taui mataiei ita inainana,

tanigħieit ita nononora

oratei ita aramanei,

* ^{28:4:} God wavinena wawana kaua aiaina bo kaua jijmanina (Justice). † ^{28:10-11:} Wei lamna mai Rome ai god raġaġa wawai *Castor* ma *Pollux* ruāġi e ġoreġore *Dioscuri* bo *raġaġa marei*, Taui lamna god *Zeus* ma *Leda* natunati.

⊗ ^{28:19:} Act 25:11

ma ita mae-tavirei awariu ma ata vilawani.

(Isaiah 6:9-10)

28-29 —Lamna aubaina ona aramanei da God Riwana Aiaina vai-melana aubaina i paritawanei Jentail awarii. Taui ina rautaniġana.”

³⁰ Paul kampa numa i vivimaiei ma i mae madeġa ruāġa taputapuna. Ma rava maġamaġau i nenei da i raraugenari ma wei i vinuaiae.

³¹ Ana tepatorana God ana vigulau ma Iesu Keriso riwana Aiaina i jimei. Ma eġa aiai ita viġaei.